

Holy Bible

Aionian Edition®

Romani Čergarsko čhib Srbija
Chergash Bible

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ®
Romani Čergarsko čhib Srbija
Chergash Bible
Language: Romani Vlax, Chergash
Balkans

Creative Commons Attribution 4.0 International, 2018-2026
Source text: eBible.org
Source version: 8/8/2026
Source copyright: Creative Commons Attribution 4.0
Pioneers.org, 2018

Formatted by Speedata Publisher 5.9.2 (Pro) on 8/31/2026
100% Free to Copy and Print
TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>
All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>
Volunteer help and comments are welcome and appreciated!

Celebrate Jesus Christ's victory of grace!

Preface

Chergash Romani at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Chergash Romani at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

NEW TESTAMENT

Matej	11
Marko	36
Luka	52
Jovan	79
Dela	99
Rimljanenđe	125
1 Korinćanenđe	136
2 Korinćanenđe	146
Galaćanenđe	153
Efežanenđe	157
Filipljanenđe	161
Kološanenđe	164
1 Solunjanenđe	167
2 Solunjanenđe	170
1 Timoteješće	172
2 Timoteješće	175
Titošće	177
Filemonešće	179
Jevrejenđe	180
Jakovesko	188
1 Petresko	191
2 Petresko	194
1 Jovanesko	196
2 Jovanesko	199
3 Jovanesko	200
Judasko	201
Otkrivenje	202

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



*A o Isus phenelas: "Jartosar lende, Dade Devla, kaj či džanen so čeren!" Pale godova e
vojnukurja čhudine e kocka thaj gajda podelisardine maškar peste lešće drze.*

Luka 23:34

Matej

1 Akava si poreklo katar o Isuso Hristo. Vo sas potomko e caresko Davidesko thaj e Avraamesko potomko. **2** E Avraamešće bijandilo o Isaak. E Isaakošće bijandilo o Jakov. E Jakovešće bijandilo o Juda thaj e phrala lešće. **3** E Judašće e Tamara bijandas e Farese thaj e Zare. E Faresošće bijandilo o Esrom. E Esromešće bijandilo o Aram. **4** E Aramešće bijandilo o Aminadav. E Aminadavešće bijandilo o Naason. E Naasonešće bijandilo o Salmon. **5** E Salmonesšće e Rahava bijandas e Voozo. E Voozešće e Ruta bijandas e Ovido. E Ovidešće bijandilo o Jesej. **6** E Jeseješće bijandilo o caro David. E Davidešće e Urijašći bivšo romnji bijandas e Solomones. **7** E Solomonešće bijandilo o Rovoam. E Rovoamešće bijandilo o Avija. E Aviješće bijandilo o Asaf. **8** E Asafešće bijandilo o Josafat. E Josafatešće bijandilo o Joram. E Joramešće bijandilo o Ozija. **9** E Ozijašće bijandilo o Joatam. E Joatamešće bijandilo o Ahaz. E Ahazešće bijandilo o Ezekija. **10** E Ezekijašće bijandilo o Manasija. E Manasijašće bijandilo o Amos. E Amosešće bijandilo o Josija. **11** E Josijašće bijandilo o Jehonija thaj lešće phrala ande vrjama kana o izraelsko them sas inđardo ando vavilonsko progonstvo. **12** Nakon so sas inđarde ando Vavilon, e Jehonijašće bijandilo o Salatiilo. E Salatilešće bijandilo o Zorovavel. **13** E Zorovavešće bijandilo o Avjud. E Avjudasšće bijandilo o Elijakim. E Elijakimešće bijandilo o Azor. **14** E Azorešće bijandilo o Sadok. E Sadokošće bijandilo o Ahim. E Ahimešće bijandilo o Elijud. **15** E Elijudešće bijandilo o Eleazar. E Eleazarešće bijandilo o Matan. E Matanešće bijandilo o Jakov. **16** E Jakovešće bijandilo o Josif, o rom e Marijako, savi bijanda e Isuse save akhardine Hristo. **17** Akava si, dakle, sa ukupno dešuštar naraštaja katar o Avram dži ko caro David, dešutrito štar naraštaja katar o caro David dži ko progonstvo ando Vavilon, thaj dešutrito štar naraštaja katar o progonstvo ando Vavilon dži ko Hristo. **18** Ake sar bijandilo o Isuso Hristo: lešći dej e Marija, sas mangli palo Josif. Ali majsigo nego so line pe, dok sas još čhej, sikadilo kaj e Marija ačhili phari katar o Sveto Duho. **19** Sar lako rom o Josif sas pravedno manuš thaj či kamlas javno te ladžarel lat, kamlas potajno te mučel lat. **20** Sar gindilas godova, lija les e lindri thaj ando suno sikadilo lešće o anđelo e Gospodesko thaj phendas lešće: "Josife, e Davidešće čhaveja, na dara te les e Marija pale čiri romnji! Kaj e čhavre saves inđarel ande peste si katar o Sveto Duho. **21** Voj bijanela čhave, a tu deja les alav Isus, kaj vo spasila piro them katar lende bezeha." **22** A sa godova dogodisajlo te pherdol okova so o Gospod phendas kroz o

proroko: **23** "Ake e čhej ačhela khamni! Thaj bijanela čaves savo akhardola Emanuel" (so značil: "O Del si amenca"). **24** Kana o Josif džungadilo, čerda sar zapovedisardas lešće o anđelo e Gospodesko thaj lijas e Marija pale piri romnji. **25** Ali či suta lasa dok voj či bijandas čaves. A kana o čhavro bijandilo, dija les alav Isus.

2 O Isus bijandilo ando gav Vittejem savo sas ande judejsko regija, ande vrjama kana vladilas o caro Irod. Ande godoja vrjama aviline e mudracurja katar o Istok ando Jerusalem **2** thaj počnisardine te raspituin pe: "Kaj si godova o nevo bijando caro e Židovengo? Dikhlam lešći čerain sar inkjel po istok thaj avilam te das koča angle leste." **3** Kana godova ašundas o caro Irod zurale uznemirisajlo sago vi o sa o them ando Jerusalem. **4** Askal akhardas sa e židovske šorvale rašajen thaj e učiteljen e Mojsiješće zakonestar te phučel lendar: "Kaj o Hristo trubul te bijandlo?" **5** A von phendine lešće: "Ando Vittejem ande Judeja, kaj gajda o proroko ramosarda: **6** 'A tu Vittejeme, ande judejsko phuv, nipošto naj san majcikno katar aver e judejske gava, kaj andar tute inkjela o vladari savo vodila mungro theme o Izraele sago o pastiri pire bakhren.'" **7** Askal o Irod čordanes akhardas peste e mudracen te phučel lendar kana inklijsti e čerain. **8** Askal phendas: "Džan thaj lačhe phučen pale godova čhavro thaj kana aračhena les, bolden tumen thaj javin mande te šaj džav vi me te pokloni man lešće," thaj bičhalda len ando Vittejem. **9** Kana ašundine so phendas lende o caro Irod thaj đeletar. A e čerain savja dikhline sar inkjel džalas angle lende dok či ačhili anglo than kaj sas o čhavro. **10** Kana dikhline e čerain kaj ačhili, zurale raduisajle. **11** Dine ando čer thaj dikhline e čhavre lešće dejava e Marijasa thaj peline pe pire koča thaj poklonisajle lešće. Pale godova putardine pire kutijice thaj daruisardine les e sunakajesa, tamnjanosa thaj e mirisno uljesa. **12** Pale godova o Del upozorisarda len ando suno te či bolden pe ko Irod, nego boldine pe ande pešći phuv aver dromesa. **13** A kana von đeletar, o anđelo e Gospodesko javisajlo e Josifešće ando suno thaj phendas lešće: "Ušti, le e čhavre thaj lešće deja thaj naš ando Egipat. Ačh okote dok či phenav tuće, kaj o Irod rodela e čhavre te mudarel les." **14** O Josif uštilo, lija e čhavre thaj lešće deja thaj još isto rjat uputisajlo lenca ando Egipat. **15** Thaj ačhilo okote dok o Irod či mulo, te pherdol so o Gospod phendas prekal o proroko savo phenel: "Andar o Egipat akhardem mungre čaves." **16** Kana o Irod dikhla kaj e mudracurja nadmudrisardine les, zurale holjajlo thaj naredisarda te ando Vittejem thaj sasti okolina mudaren sa e muške čhavren dži ke duj brš, prema e vrjama savi

saznaisardas katar e mudracurja kana inklijsti e čerain. 17 Askal pherdilo okova so o Del phendas prekal o proroko Jeremija: 18 "Ando gav e Rama ašundilo o glaso, o roipe thaj o jauk. Godova e Rahilja rovel pale pire čhavra thaj našti utešil pes kaj majbut naj len." 19 Kana mulo o Irod, o anđelo e Gospodesko javisajlo ando suno e Josifešće ando Egipat 20 thaj phendas lešće: "Ušti, le e čhavre thaj lešće deja thaj bolde tut lenca palpale ande izraelsko phuv, kaj okola save line te mudaren e čhavres muline." 21 O Josif uštio, lija e čhavre thaj lešće deja, thaj bolda pe ande izraelsko phuv. 22 Ali kana ašundas kaj e Judejava vladil o Arhelaj umesto lesko dad, darajlo te džal okote, ali o Del upozorisarda les ando suno te džal ande galilejači regija. 23 Thaj nastanisajlo ando gav Nazaret. Godolesa pherdilo okova so phendine e prorokurja palo Mesija kaj akhardola Nazarećanino.

3 Ande godoja vrjama o Jovano savo bolelas počnisarda te propovedil ande judejsko pustinja. 2 Thaj phenelas: "Pokajin tumen pale tumare bezeha thaj obratin tumen e Devlešće kaj o Carstvo nebesko si paše!" 3 O proroko Isajia phenelas palo Jovano kana prorokuisardas: "Vo si o glaso savo čhol muj ande pustinja: 'Pripremin o drom palo Gospod, vorton e staze pale leste!'" 4 A o Jovano indarelas pe peste e drze save sas čerde katar e kamilaće bal, a oko maškar sas les morčhako pojas. O habe lesko sas e skakavcurja thaj o divljo medo. 5 Leste avelas o but o them andar o Jerusolim, andar e Judeja thaj andar sa e krajurja oko e reka Jordan. 6 Ispovedinas lešće pire bezeha, a vo bolelas len ande reka Jordan. 7 A kana o Jovano dikhla e but e farisejen thaj e sadukejen kaj aven leste te bolel len, phendas lende: "Tumen e sapešće čhavra! Koli upozorisarda tumen te našen katar e Devlešći bari holji savi avel?" 8 Sikaven tumare trajosa thaj tumare plodonenka kaj pokajisardine tumen katar tumare bezaha. 9 Thaj na hohaven korkoro tumen kaj si tumende dosta te phenen: 'Amen sam e Avramešće potomkurja' kaj phenav tumende: o Del šaj vi katar akala bara te vazdel čhavren e Avramešće. 10 O tover e Devlešće sudosko već si čhutino po koreno e kaštesko. Svako kaš savo či bijanel lačhe plodurja činela pe thaj čhudela pe ande jag. 11 Me bolav tumen e pajesa, palo pokajanje katar tumare bezeha. Ali avel vareko posle mande ko si majmočno mandar, kašće naj sem dostojno e sandale te indarav. Vo bolela tumen e Sveto Duhosa thaj e jagasa. 12 Vo si spremno te losarel o kućin e đivesko katar e pleva. O div čidela thaj spremila ande piri žitnica, a e pleva dela jag e jagasa savi našti mudardol." 13 Askal avilo o Isus andar e Galileja pe reka Jordan te o Jovano bolel les. 14 A o

Jovano či kamlas te bolel les thaj phenelas lešće: "Tu trubul man te boles, a tu aves mande te me bolav tut?" 15 A o Isus phendas lešće: "Muk akana, kaj agajda trubul amende te pheras e Devlešći pravedno volja." Askal o Jovano bola les. 16 Pale godova kana sas o Isus boldo thaj čim inklijsto andar o paj. Thaj dik! O nebo putajlo thaj vo dikhla e Devlešće Duho sar fuljel sago golubo thaj mućel pes pe leste. 17 Askal o glaso andar o nebo ašundilo: "Akava si mungro Čhavo, saves voliv. Vo si mungri bah."

4 Askal o Sveto Duho indardas e Isuse ande pustinja te iskušil les o beng. 2 O Isus postilas štarvardeš đesa thaj štarvardeš rača, a pale godova bokhajlo. 3 Askal avilo leste o beng thaj iskušisarda les gajda kaj phendas lešće: "Ako san Čhavo e Devlesko, phen te akala bara aven mangre." 4 A o Isus phendas: "Ando Sveto lil ačhel ramome: 'Či trajil o manuš samo katar o mangro, nego katar svako alav savo inklijel andar e Devlesko muj.'" 5 Askal o beng indarda e Isuse ando Sveto gav Jerusolim thaj čhuta les po vrho e Hramosko, 6 thaj phendas lešće: "Ako san tu Čhavo e Devlesko, čhude tut katar tele. Kaj ando Sveto lil ramol: 'Pire anđelende zapovedila pale tute' thaj: 'von pe vas indarena tut te či pećes e pungresa ando bar.'" 7 A o Isus phendas lešće: "Ramome si vi akava: 'Na iskušisar e Gospode čire Devle.'" 8 Askal o beng indarda les po vrho pe vući gora, thaj sikadas lešće sa e carstvurja akale themešće thaj e slava lendi. 9 Thaj phendas lešće: "Sa akava dava tut ako peres pe kočā angle mande thaj slavis man." 10 Askal o Isus phendas lešće: "Džatar mandar, Sotono, kaj ando Sveto lil si ramome: 'De kočā samo anglo Gospod čiro Del, thaj jedino les slavisar.'" 11 Askal o beng đelotar lestar, a e anđelurja odma aviline thaj služisardine lešće. 12 Kana o Isus ašundas kaj phangline e Jovano savo bolelas, bolda pe ande galilejsko regija. 13 Avilo prvo ando Nazaret thaj okotar đelotar thaj nastanisajlo ando Kafarnaum, gav pašo galilejsko jezero, pe Zavulonešći thaj e Neftalimešći phuv. 14 Gajda pherdilo so phendas o proroko Isajia: 15 "Ande phuv e Zavulonešći thaj e Neftalimešći, pašo more, pe okoja rig e jordanošći, ande Galileja, e phuv savi nas e židovendi, 16 e manuša save trajinas ando tunjariko, dikhline o baro svetlo thaj okolende save trajinas ande mračno phuv, ande sena e smrtošći zasjaisardas o svetlo." 17 Katar askal o Isus počnisarda te propovedil: "Pokajin tumen pale tumare bezeha thaj obratin tumen kaj si paše o Carstvo nebesko!" 18 Kana o Isus načelas pašo Galilejsko jezero, dikhla e duj phralen e Simone saves akharenas Petar, thaj lešće phrale e Andrija, sar čhuden e mreža ando jezero, kaj von sas ribarja. 19 Thaj o Isus phendas lende: "Aven pale mande thaj me

čerava tumen te aven ribarja save astarena e manušen sago e mačhen." 20 Von odma mukline e mreže thaj teljardine pale leste. 21 Kana o Isus đelo majdur okotar dikhla e aver duj phralen, e Jakove thaj e Jovane e Zevedejevešče čhaven, sar bešen ando čamco pire dadeja thaj lačharenas pire mreže, askal akhardas vi len. 22 A von odma mukline o čamco thaj pire dades thaj teljardine pale leste. 23 O Isus džalas pe sasti Galileja thaj sikavelas e manušen ande lende sinagoge, propovedilas lende e Bahtali nevimata pale Devlesko carstvo thaj sastarelas katar o nasvalipe thaj svako nemoć andar o them. 24 O glaso pale leste buljilo pe sasti sirisko regija, thaj anenas lešće sa okolen save sas nasvale katar o razno nasvalipe savo mučilas len, okolen ande save sas e bilačhe duhurja, mesečaren thaj e linen thaj vo sastarelas len. 25 Pale leste teljardas o but o them andar e Galileja, Dekapolja, Jerusalem thaj andar e sasti Judeja, pa vi katar okoja rig e jordanošči.

5 Kana o Isus dikhla kaj čida pes o but o them, lija pe opre pe gora thaj bešlo. Pe godova aviline leste e učenikurja 2 thaj o Isus počnisarda te sikavel len alavenca: 3 "Blago okolende save svatin kaj si lende o Del potrebno kaj si lengo o Carstvo nebesko! 4 Blago okolende save tuguin, kaj o Del utešila len! 5 Blago okolende e kovle ileja kaj nasledina e phuv; 6 Blago okolende save si bokhale thaj trušale pale pravednost, kaj čaljona! 7 Blago okolende save si milosrdne, kaj o Del smiluila pe lende! 8 Blago okolende save si čiste ileja, kaj e Devles dičhena! 9 Blago okolende kaj čeren miro, kaj akhardona čhave e Devlešće! 10 Blago okolende save si progonime andar godova kaj si pravedne anglo Del, kaj lengo si o Carstvo nebesko! 11 Blago tumende kana zbog mande avena vredome, progonime thaj kana hohaibe phenena pe tumende thaj vi svako vrsta bilačhipe! 12 Raduin tumen thaj aven bahtale, kaj si bari tumari počin ando nebo. Kaj gajda progoninas vi e prorokonen save sas majsigo tumendar!" 13 O Isus phendas: "Tumen sen o lon e themende pe phuv. Ako o lon naj londo, sova lonđarela pe? Askal majbut či avela pale khančeste, osim te čudel pe avri te o them uštavel les. 14 Tumen sen svetlo e themešće. Našti garadol o gav savo si pe gora. 15 Či den jag o stenka te čhon les talo čaro, nego čhon les po čirako te svetlil savorende ando čher. 16 Gajda tumaro svetlo neka svetlil angle manuša te dičhen pe tumare lačhe dela thaj te slavin tumare Dades savo si ando nebo." 17 O Isus phendas: "Na te gindin kaj me avilem te činav e Mojsijesko zakono thaj e prorokonende zapisurja. Či avilem te činav len, nego te pherav len. 18 Čače phenav tumende: sa dži kaj postoil o nebo thaj e

phuv, či načhela ni majcikno slovo niti jek crtica andar e Mojsijesko zakono dok sa či dogodil pe. 19 Ali, ako vareko phenel kaj naj važne jek katar akala majcikne zapovesti thaj gajda sikavel aver manušen, majcikno avela ando Carstvo nebesko. A ko inčarel e zapovesti thaj aver manušen sikavel te čeren gajda avela baro ando Carstvo nebesko. 20 Kaj phenav tumende, te či avili tumari pravednost majbari katar e pravednost e učiteljendi e Mojsiješće zakonestar thaj e farisejendi, nisar či dena ando Carstvo nebesko!" 21 O Isus phendas: "Ašundine sar si phendo ande Mojsijesko zakono amare prapaponende: 'Na mudar, kaj ko mudarel, avela došalo e sudošće.' 22 A me phenav tumende: ko holjavol pe piro phral, avela došalo e sudošće! A ko phenel pire phralešće kaj si čalado, avela došalo angle majbaro sudo. A ko phenel pire phralešće dileja, avela došalo anglo pakao e jagako. (Geenna g1067) 23 Zato ako anes čiro daro po žrtveniko thaj okote des tut godi kaj čire phrales si vareso protiv tute, 24 muk e žrtva anglo žrtveniko thaj dža majsigo thaj pomirisar tut čire phralesa, thaj tek askal av thaj prinesisar čiro žrtveno daro e Devlešće. 25 Brzo nagodisar tut čire protivnikosa dok san lesa po drom, te či inkalel tut anglo sudo, a o sudco či čudel tut ande tamnica. 26 Čače phenav tuće: či inkleja okotar dok či počines sa so san uždžile dži ko poslednjo lovoro." 27 O Isus majdur phenelas: "Ašundine sar si phendo ando zakono: 'Na čer preljub!' 28 A me phenav tumende: Svako savo dičhel pe avrešči romnji te sovel lasa, već ande piro ilo čerda lasa preljub. 29 Ako čiri desno jak crdel tut po bezeh, inkal čiri jak thaj čhude lat tutar, kaj majlačhe tuće te propadnil jek deo katar čiro telo, nego čo sasto telo te avel čudino ando pakao. (Geenna g1067) 30 Thaj ako čiro desno vas crdel tut po bezeh, čin čo vas thaj čhude les tutar, kaj majlačhe tuće te propadnil jek deo katar čiro telo, nego sasto čo telo te džal ando pakao." (Geenna g1067) 31 O Isus majdur phenelas: "Ašundine kaj si phendo ando Mojsijesko zakono: 'Ko rastavil pe pire romnjatar, neka del lat lil kaj si rastavime.' 32 A me phenav tumende: Svako ko rastavil pe pire romnjatar, osim zbog o preljub, crdel lat te čerel preljub. Thaj svako ko oženil pe rastavime romnjata, čerel preljub." 33 O Isus majdur phenelas: "Isto gajda ašundine kaj si dumutune phendo ande Mojsijesko zakono amare prapaponende: 'Inčar e solah savi dijan e Gospodešće.' 34 A me phenav tumende: Na han solah, ni e nebosa, kaj si prestolje e Devlesko, 35 ni e phuvjasa, kaj si tale lešće pungere, ni e Jeruslimeja, kaj si gav e Devlesko, e bare carosko. 36 Na han solah ni tumare šoresa, kaj našti ni jek bal po šoro te čeren ni kali ni parni. 37 Zato kana phenen: 'Kamav', neka avel 'Kamav', thaj kana phenen: 'Či kamav',

neka avel 'Či kamav'. Sa so si majbut katar godova, avel katar o bilačo." 38 O Isus majdur phendas: "Ašundine kaj si phendo ando Mojsijsko zakono: 'Jak pale jak, dand palo dand.' 39 A me phenav tumende: na oduprin tumen e bilače manušešče! Te vareko pekla tut pe desno rig čire mujestar, tu bolde lešče vi aver rig. 40 Thaj ako vareko kamel te sudil pe tusa te lel tutar čiro gad, de les vi čiro ogrtači. 41 Te traden tut e rimske vojniskurja te indares lendi oprema jek kilometar, tu indar duj. 42 Ko mandel tutar vareso, de les, thaj na bolde e dume okolestar ko zamolil tut te des les udžile." 43 O Isus majdur phendas: "Ašundine kaj si phendo: 'Volisar čire pašutnes', a mrzisar čire dušmanes. 44 A me phenav tumende: volin tumare dušmajen thaj molin tumen pale okola save progonin tumen! 45 Ako gajda čeren, avena sago prave čhave tumare nebesko Dadešče, savo del te inkljel lesko kham pe bilače thaj pe lače manuša, thaj del te lesko bršnd perel okolende kaj si pravedne thaj okolende kaj si nepravedne. 46 Kaj te volin samo okolen save tumen volin, sošči nagrada šaj ažučaren? Zar či čeren godova vi e cariniskurja? 47 Ako pozdravin samo tumare phralen, zar čeren vareso naročito? Zar či čeren godova vi okola kaj či pindaren e Devle. 48 Gajda vi tumen aven savršene, sago kaj si savršeno tumaro Dad nebesko."

6 O Isus phendas: "Len sama te tumare lače dela či čeren angle manuša te von divin pe tumende, kaj askal či primina nagrada katar tumaro Dad nebesko. 2 Zato kana des e čorende, na hvali tu po sasto muj anglo them, sago kaj čeren e licemerja pe sinagoge thaj pe sokača te hvalin len e manuša. Čače phenav tumende: aver nagrada či dobina osim godoja katar e manuša. 3 A tu kana des e čorende, neka či džanel čiro levo vas so čerel čiro desno vas. 4 Nego kana tu des e čorende de len potajno pa čiro Dad, savo dičhel so si potajno, nagradila tut." 5 O Isus phendas: "kana molin tumen na aven sago e licemerja, save volin te molin pes pe sinagoge thaj pe glavne sokača, te e manuša dičen len. Čače phenav tumende kaj več primisardine piri nagrada thaj osim godoja aver či primina. 6 A tu, kana molis tut, dža ande čiri soba, phandav pale tute o udar thaj moli tut potajno čire nebesko Dadešče, a čiro nebesko Dad, savo dičhel so si potajno, nagradila tut. 7 Kana molin tumen na brbljin sago okola save či pindžaren e Devle, kaj von gndin kaj o Del ašunela len zbog e but alava save phenen. 8 Tumen dakle na aven sago von, kaj tumaro Dad nebesko lače džanel so trubul tumen vi majsigo nego so zamolin les. 9 Tumen agajda molin tumen: 'Dade amareja savo san po nebo, nek poštuil pe čiro sveto alav. 10 Neka avel čiro carstvo. Te avel čiri volja pe phuv sago kaj si ando nebo. 11

De amen mangro savo si amende potrebno pale svako des 12 thaj jartosar amende e bezeha amare sago kaj vi amen jartosaras okolende save sagrašisardine protiv amende. 13 Na de te peras ande kušnje, nego izbavisar men andar o bilačipe.' 14 Kaj, ako jarton okolende save grešin protiv tumende, askal vi tumaro nebesko Dad jartola tumende. 15 Ali, ako tumen či jarton e manušende lende bezeha, ni tumaro nebesko Dad či jartola tumende tumare bezeha." 16 O Isus majdur phenelas: "A kana postin, na mučen tumaro muj sago e licemerja, te dičen len e manuša sar postin. Kaj čače phenav tumende, kaj aver nagrada či dobina osim godoja katar e manuša. 17 A tu kana postis, thov čiro muj thaj fulav čire bal, 18 te e manuša na dičen kaj postis, nego samo čiro Dad, savo si ande tajnost. Askal čiro Dad savo dičhel so si čerdo ande tajnost nagradila tut." 19 O Isus phendas: "Na čiden tumende barvalipe akate pe phuv, kaj han les e moljcurja thaj e rda, kaj e čora provalil thaj čoren les. 20 Nego, čiden tumende barvalipe po nebo, kaj či hal les ni e moljcurja ni e rda thaj kaj e čora či provalil te čoren les. 21 Zato, kaj si čiro barvalipe, okote avela vi čiro ilo. 22 Čiri jak si sar e svetiljka e telošče. Zato, ako si čiri jak sasti, sasto čiro telo avela osvetlime. 23 Ali ako si čiri jak nasvali, sasto čiro telo avela ando tunjariko. Ako o svetlo ande tute postanil tunjariko, sosko baro tunjariko avela ande tute!" 24 "Khonik našti robujil e duje gospodarende. Kaj ječe mrzala, a avere volila, ili ječešče avela pačivalo a avres prezirila. Našti služin e Devlešče thaj e barvalipešče ande isto vrjama." 25 O Isus još phendas: "Zato phenav tumende: Na daran pale tumaro trajo, so hana, ili so pijena, ni palo tumaro telo, so lena pe tumende. Naj li o trajo majbut katar o habe, a o telo katar e drže? 26 Lače dičen e čirikljen! Niti sadin, niti žanjnin niti čiden ande pire žitnice, a tumaro nebesko Dad pravarel len. Zar tumen naj sen majvredne lendar? 27 A ko tumendar šaj e brigenca te lundarel piro trajo samo pale jek des? 28 Sostar askal vodin e briga pale drže? Lače dičen e divlje luluda sar barjon! Či trudin pe niti suven pešče drže. 29 A phenav tumende kaj ni o caro Solomon ande sa piro barvalipe či indarelas pe peste gajda šukar drže sago akala divlje luluda. 30 Pa ako o Del gajda šukar furjarel e biljke save si ando polje, save ades si, a thejara čhuden pe ando bov, kozom askal majbut vodila e briga pale tumende, manušalen e cikne pačimava? 31 Zato na daran thaj na phenen: 'So hasa?', ili 'So pijasa?' ili 'So lasa pe amende?' 32 Kaj godova roden e bi pačivale manuša. Džanel tumaro nebesko Dad sa so trubul tumen. 33 Zato majbut katar sa roden e Devlesko carstvo, thaj e pravda lešči, askal sa akava o Del nadodaila tumende. 34

Zato na daran pale thejara. Neka o des thejara vodil e briga pale peste. Svako đesešće si dosta lešće muke."

7 O Isus majdur phenelas: "Na sudin, thaj či sudila pe tumende. **2** Kaj sar tumen sudin averende, gajda o Del po isto način sudila tumende. Sar tumen merin averende, gajda vi o Del merila tumende. **3** Sostar dičhes e kaštešći prušuk ande jak čire phralešći, kana či hačares o baro kaš ande čiri jak? **4** Sar šaj phenes čire phralešće: 'Ažučar te inkalav e kaštešći prušuk andar čiri jak', kana o baro kaš si tut ande čiri jak? **5** Licemernona! Majsigo inkal o baro kaš andar čiri jak, thaj majlače dičheja te inkales e kaštešći prušuk andar čire phralešći jak. **6** Na den e džuchelende okova so si sveto thaj na čhuden e biserja angle bale, te na uštaven len e pungrenca thaj askal bolden pe protiv tumende thaj te rastrgnon tumen." **7** O Isus majdur phenelas: "Molin tumen thaj dela pe tumende! Roden, thaj aračhena! Maren po vudar thaj putrela pe tumende! **8** Kaj svako ko molil, primil, ko rodel, aračhel, a ko marel po vudar, putrel pe lešće. **9** Ko tumendar kana lesko čhavo manglasas lestar mangro, dija sas les bar? **10** Ili kana manglasas lestar mačo dija sas les sap? **11** Ako tumen, vi ako sen bilače manuša, džanen te den lače darurja tumare čhavrende, kozom majbut tumaro nebesko Dad dela lačhipe okolen save manden lestar? **12** Sa, dakle, so kamen te e manuša čeren tumende, čeren vi tumen lende, kaj godova si okova so sikavelas e Mojsijesko zakono thaj e prorokurja." **13** O Isus majdur phenelas: "Den andre po usko vudar. Kaj o bulo vudar thaj o bulo drom indaren ande propast thaj but si okola save godole dromesa džan. **14** Sar si usko o vudar thaj tesno drom savo indarel ando trajo, cara si okola save aračhen les!" **15** O Isus majdur phendas: "Len tumen sama katar e hohamne prorokurja, save aven tumende ande bakhрани morči, a andral si ruva save kamen te han tumen. **16** Pindžarena len pe lende plodurja. Dali katar e kangre kušel pe e drak, ili e smokve katar e čičkurja? **17** Isto gajda, svako lačo kaš bijanel lače plodurja, a o bilačo kaš bijanel bilače plodurja. **18** Našti o lačo kaš bijanel bilače plodurja, niti o bilačo kaš šaj bijanel lače plodurja. **19** Svako kaš savo či bijanel lače plodurja, činela pe thaj čhudel pe ande jag. **20** Isto gajda pindžarena e hohamne prorokonon pe lende plodurja." **21** O Isus majdur phenelas: "Či dela ando Carstvo nebesko svako ko phenel mande 'Gospode, Gospode!' Nego okova savo izvršil e volja mungre Dadešći savo si ando nebo. **22** But džene avena po sudo ande godola đesa thaj phenena mande: 'Gospode, Gospode, zar či prorokujisardam ande čiro alav? Zar či thradasas e benden ande čiro alav? Thaj zar

či čerasas but čudurja ande čiro alav?' **23** Askal priznajiva lende: 'Nikad či pindžaravas tumen. Džantar mandar, tumen save kršin e Devlesko zakon!'" **24** O Isus majdur phenelas: "Prema godova, svako ko čhol kan ke akala munge alava thaj gajda čerel, mudro si sago o manuš savo gradil piro čher po čvrsto temelji. **25** Pelo o bršnd, navalisada e bujica, phurdas e balval thaj peklas ando godova čher, ali o čher či pelo kaj sas sagradime po čvrsto temelji. **26** Naprotiv, svako ko čhol kan ke akala mungre alava, ali či čerel gajda, slično si sago o dilo manuš savo sazidosardas piro čher po pesko. **27** Pelo o bršnd, navalisarda e bujica, phurdas e balval thaj peklas ande godova čher, thaj o čher haradilo dži ko temelji." **28** Kana o Isus sas gata godole alavenca, o but o them čudilas pe lešće sikavipešće, **29** kaj sikavelas sago okova saves si autoriteto, a na sago lende učitelja e Mojsiješće zakonestar.

8 Kana o Isus fuljisto katar e gora, pale leste teljarda o but o them. **2** Anglo Isus avilo jek gubavco, pelo pe koča angle leste thaj zamolisarda les: "Gospode! Te kames, šaj te sastares man katar e guba!" **3** O Isus čhuta po vas pe leste, thaj phendas: "Kamav, av sasto!" Thaj e guba odma nestanisardas lestar. **4** A o Isus phendas lešće: "Le sama te na phenes khonikašće pala akava, nego dža thaj sikav tu e rašaješće, thaj prinesisar o daro savo o Mojsije odredisardas palo svedočanstvo lende." **5** Kana o Isus avilo ando Kafarnaum, avilo dži leste jek rimsko kapetano thaj zamolisarda les: **6** "Gospode, mungro sluga pašljol čhere nepokretno thaj zurale mučilpe." **7** A o Isus phendas lešće: "Avava thaj sastarava les." **8** A o kapetano phendas: "Gospode! Naj sem dostojno te des ande mungro čher; nego samo phen alav thaj o sluga mungro sastola!" **9** Kaj vi me sem manuš tele vlast thaj si man tale mande vojnukurja. Thaj kana phenav ječešće: 'Dža!' vo džaltar. Thaj kana phenav averešće: 'Av!' vo avel. Thaj kana phenav mungre robošće: 'Čer godova!' thaj vo čerel." **10** Kana godova ašundas, o Isus zadivisajlo lešće, thaj phendas okolende save džanas pale leste: "Čače phenav tumende, kasavo pačipe či arakhlem ke nijek manuš ando Izrael!" **11** A phenav tumende kaj but e manuša avena andar o sasto them, katar o istok thaj katar o zapad thaj avela len than pe bari gozba e Avraameja, e Isakosa thaj e Jakovesa ando Carstvo nebesko, **12** a but e Izraelcurja savende si pripremimo e Devlesko carstvo, avena čhudine andar o carstvo, ande majhanduk tunjariko, okote avela o roipe thaj o škripice e dandena katar e duk." **13** Askal o Isus phendas e kapetanošće: "Dža, thaj neka avel tuče sar pačajan." Thaj o sluga e kapetanesko sastilo

ande godova časo. 14 Kana o Isus avilo ande Petresko čher, arakhlas e Petrešče sokra sar pašljol nasvali ande groznica. 15 O Isus astarda lat palo vas thaj e groznica mukla lat. A voj uštili thaj počnisarda te služil lešče. 16 Kana peli e rjat, andine ko Isus e but e manušen ande save sas e bilače duhurja. Thaj o Isus e alavesa trada sa e bilače duhonen andar e manuša thaj e nasvalen sastardas. 17 Gajda pherdilo okova so si phendo kroz o proroko Isaija: "Vo lijas amare slabosti thaj indarada amaro nasvalipe." 18 Kana o Isus dikhla e bute theme savo čida pes oko leste, zapovedisardas pire učenikonende te otplovin pe okoja rig e jezerošči. 19 Ande godova avilo leste jek katar e učitelja e Mojsiješče zakonestar thaj phendas lešče: "Učiteljina, me džava pale tute kaj god tu te džas." 20 A o Isus phendas lešče: "E lisicen si lende jazbine thaj e čirikljen lende gnezdurja; a man e Čhave e Manušesče naj kaj mungro šoro te čhav." 21 Phendas lešče jek aver učeniko: "Gospode, muk man majsigo te džav te prahov mungre dade, askal avava thaj slediva tut." 22 A o Isus phendas lešče: "Tu av pale mande, a muk e mulen te prahon pire mulen!" 23 A askal o Isus dija ando čamco, a pale leste dine vi lešče učenikurja. 24 Andar jekhvar po jezero vazda pe gajda bari oluja, kaj e talasurja pherenas o čamco e pajesa. A o Isus sovelas. 25 Lešče učenikurja aviline dži leste, džungadine les thaj phendine: "Gospode, spasisar men kaj tasadosal!" 26 A o Isus phendas lende: "Sostar daran, cara pačivalen?" Askal uštilo thaj zapovedisardas e balvajende thaj e jezerošče te ačhen, a e oluja smirisajli thaj postanisardas bari tišina po jezero. 27 A e manuša, zadivime, phučline: "Ko si akava te e balvaja thaj o more pokorin pe lešče?" 28 A kana o Isus areslo pe okoja rig e jezerošči, ando gadarinsko krajo, angle leste aviline duj manuša ande save sas e bilače duhurja save inklijenas andar e limorja, a sas gači napasne kaj khonikal či tromalas te načhel godole dromesa. 29 Von čhutine muj: "So si amen tusa, e Devlešče Čhaveja? Avilan li akate te mučis amen majsigo nego so si e vrjama?" 30 A majdur lendar čarjonas but e bale. 31 A e demonurja zamolisardine e Isuse: "Ako trades men, bičhal amen te džas ande okola bale." 32 A o Isus phendas lende: "Džan." Thaj e demonurja inklijstine andar e manuša thaj dine ande bale. Pe godova, sa e bale pojurisardine niz o brego ando jezero thaj tasadile ando paj. 33 Pe godova e manuša kaj lenas sama pe bale našline ando gav thaj phendine sa so dikhline thaj so sas e manušenca ande save sas e demonurja. 34 Askal sa e manuša andar godova gav inklijstine anglo Isus, pa kana dikhline les počnisardine te molin les te džaltar andar lengo krajo.

9 Gajda o Isus dija ando čamco, otplovisardas pe okoja rig ande piro gav. 2 Okote andine lešče e line manušes pe nosilja. Kana o Isus dikhla lengo pačipe, phendas e line manušešče: "Na dara čhaveja, jarton pe tuče čire bezehal!" 3 A varesave katar e učitelja e Mojsiješče zakonestar phendine ande peste: "Dik akava hulil po Del!" 4 O Isus džanglas lendi gindimata thaj phendas lende: "Sostar gajda gndin bilače ande tumare ile? 5 So si maj loče te phenel pe: 'Jartome si tuče čire bezeha' ili: 'Ušti thaj phir'? 6 Ali, te džanen kaj man, e Čhaves e Manušesče si vlast pe phuv te jartosarv e bezeha." Askal phendas e line manušešče: "Ušti, le čiri nosilja thaj dža tuče čhere!" 7 Vo uštilo thaj đelotar pire čherešče. 8 Kana godova dikhla o but o them, darajlo thaj ačhilo te slavin e Devle, savo dijas kasavi vlast e manušenđe. 9 Kana o Isus džalastar okotar, dikhla e manušes savo akhardolas Matej sar bešel po than kaj počinelas pe o porez. O Isus phendas lešče: "Av pale mande!" O Matej mukla sa, uštilo thaj teljardas pale leste. 10 Dok o Isus sas pale sinija ande Matejesko čher, avile okote e but carinikurja thaj aver bezahale manuša thaj hanas zajedno lesa thaj lešče učenikonenca. 11 Kana godova dikhline e fariseja, pučline e Isusešče učenikonen: "Sostar tumaro učitelj hal e carenikonenca thaj e bezahalenca?" 12 A o Isus ašundas godova thaj phendas lende: "Či trubun e saste e doktore nego e nasvale. 13 Nego, sičon so akava značil: 'majbut voliv te aven milosrdne, nego te prinosin mande žrtve.' Me hav e bezahalenca zato kaj či avilem te akharav e pravednikonen, nego e bezehalen te pokajin pe." 14 Askal aviline ko Isus e učenikurja katar o Jovano savo bolelas thaj phučline les: "Sostar čire učenikurja či postin sago amen thaj e fariseja?" 15 A o Isus phendas lende: "Tugujin li e svaturja dok si o džamutro lenca? Nisar! Nego avela o đes kana otmına lendar e džamutre thaj askal vi von postina. 16 Nego, khonik či suvel o nevo kotor pe pharadi haljina sar učhardasas e hv, kaj kana thovela pe e haljina o nevo kotor čidela pe thaj avela još majbari hv. 17 Niti čhol pe e nevi mol ande purane morčače traste, kaj kana e nevi mol dela vras thaj buljola, pharavela e morčače traste, a e mol čhordola pe. Nego e nevi mol čhol pe ande neve morčače traste, gajda avena arakhade vi e mol vi e morčače traste." 18 Dok o Isus još motholas lende, avilo leste jek upravniko e sinagogako, pelo angle leste pe kočla thaj phendas lešče: "E čhej mungri muli, ali tu av thaj čho čo vas pe late thaj voj trajila." 19 O Isus uštilo thaj teljardas pale leste pire učenikonenca. 20 A varesavi manušnji savi sas nasvali dešuduj brš gajda kaj o rat thavdelas latar, avili pale lešče zeja thaj astarda pes e čoškostar katar lešči haljina. 21 Kaj gndisardas ande peste:

“Te astarde man samo palo čoško katar lešči haljina, avav sasti.” 22 O Isus bolda pe, dikhla pe late thaj phendas: “Na dara čhejo. Čiro pačipe sastarda tut.” Thaj e manušnji sastili isto čas. 23 A kana o Isus avilo ando čer e upravnikosko, dikhla e pogrebne sviračen thaj e themes sar kučin. 24 O Isus phendas: “Inkljen avri! Kaj e čori či muli, nego sovel.” A von asajine lestar. 25 Kana o them sas tradino avri, o Isus dija andre thaj astarda e čhoro palo vas, thaj e čhori uštili. 26 Thaj o glaso pale akava so dogodisajlo ašundilo po sasto than godole krajosko. 27 Kana o Isus delotar okotar, teljardine pale leste e duj kore manuša thaj čhonas muj pale leste: “Smilujisar tut amende, Čhaveja e Davidosko!” 28 Kana o Isus dija ando čer e kore manuša avile pale leste, a o Isus phučla len: “Dali pačan kaj šaj te sastarav tumen?” A von phendine lešče: “Ej, Gospode, amen pačas!” 29 Askal čhuta pire vas pe lende jakha thaj phendas: “Neka avel tumende sar pačani!” 30 Thaj ande godova čas lende jakha sastile. A o Isus askal phendas lende: “Na phenen khonikašče pale akava.” 31 Ali von inklijstine andar o čer thaj mothonas po sasto godova kraj o pale leste. 32 Dok von inklijenas, odma pale godova andine leste e manuše savo sas nemo kaj o bilačo duho sas ande leste. 33 O Isus trada e bilače duho andar o nemo manuš, thaj o nemo manuš odma počnisarda te čerel svato. E manuša sas zadivime thaj phenenas: “Gajda vareso još či dikhlam ando sasto Izrael!” 34 A e fariseja phenenas: “Vo tradel e bilače duhonen gajda kaj pomognil lešče o poglavica e bilače duhonengo.” 35 Gajda o Isus džalas pe sa e bare thaj cikne gava thaj sikavelas e manušen ande lende sinagoge, navestilas e Bahtali nevimata pale Devlesko carstvo thaj sastarelas e nasvalen katar svako nasvalipe thaj nemoč. 36 A kana o Isus dikhla e bute themes, sažalisajlo pe lende, kaj sas iscrpime thaj bescpomočne sago e bakhre bi e pastiresko. 37 Askal phendas pire učenikonende: “E žetva si bari, a radnikurja si cara. 38 Zato molin e Gospodare katar žetva te bičhalel e radnikonen ande piri žetva.”

10 O Isus akhardas peste pire dešduj učenikonen, thaj dija len vlast pe bilače duhurja thaj te sastaren svako vrsta nasvalipe thaj slabost. 2 Akava si e alava katar e dešduj apostolurja: O Simon (saves akharenas Petar), o Andrija (e Petresko phral), o Jakov (e Zevedejevesko čhavo), o Jovano (e Jakovesko phral), 3 o Filip thaj o Vartolomej, o Toma thaj o Matej (o cariniko), o Jakov (e Alfejevesko čhavo) thaj o Tadej, 4 o Simon pobunjeniko thaj o Juda Iskariotski (savo izdaisarda e Isuse). 5 O Isus bičhaldas akale dešdujen thaj zapovedisardas lende: “Na džan ke o

okola save či pindžaren e Devle thaj na den ande ni jek Samarijansko gav, 6 nego džan samo ko them save si hasarde bakhre e israelošče. 7 Džan thaj propovedin lende kaj si paše o carstvo nebesko. 8 Sastaren e nasvalen thaj okolen saven si guba, vazden e mulen, thaj traden e bilače duhonen andar e manuša. Ivija dobisardine, ivija vi den. 9 Na steknin tumende ni sunakaj, ni rup, ni bakarne lovora ande tumare pošča, 10 niti dromešči trasta niti aver gada niti još jek paro sandale, niti rovlji palo drom, kaj o radniko zaslužil te dobil piri počin. 11 A kana den ande varesosko gav, roden e manuše savo si dostojno te ačhen ande lesko čer sa dok či teljaren majdur andar godova gav. 12 A kana den ande godova čer, phenen: ‘Miro tumenca.’ 13 Thaj ako godova čer kamel te primil tumen, neka tumaro miro avel pe leste. Ali ako o čer či kamel te primil tumen, neka tumaro miro boldel pe tumende. 14 A te vareko či primila tumen thaj či čhon kan so phenen lende, inkljen andar godova čer ili godova gav thaj činon o praho katar tumare pungre, te na avel tumen khači lenca. 15 Čače phenav tumende: Majloče avela e gavende e Sodomače thaj e Gomorače ando des e sudosko nego godole gavešče.” 16 O Isus majdur motholas: “Ake me bičhalav tumen sago e bakhren maškar e ruva. Zato aven mudre sago e sapa, a bezopasne sar e goluburja. 17 Len tumen sama, kaj varesave manuša predaina tumen pe sudurja, thaj bičuina tumen ande pire sinagoge. 18 Zbog mande inkalena tumen angle vladarja thaj angle carurja, godova avela prilika te svedočin pale mande okolende kaj či pindžaren e Devle. 19 A kana predaina tumen, na daran so phenena, kaj ande godova čas dela pes tumende so te phenen. 20 Kaj či čerena svato tumen, nego o Duho tumare nebesko Dadesko čerela svato kroz tumende. 21 O phral e phrale predaila te mudaren les, a o dad e čhavres. E čhavra vazdena pes pe pire dada thaj pe pire deja thaj predaina len te aven mudarde. 22 Savora mrzana tumen zato kaj sen mungre učenikurja, ali ko god ačhel verno dži ko kraj o avela spasime. 23 Kana progonina tumen ande jek gav, tumen našen ande aver! Čače phenav tumende či aresena te završin tumaro poslanje pe sa e izraelske gava majsigo nego so me, o Čhavo e Manušesko, avava. 24 Nijek učeniko naj majbaro katar piro učitelj, niti o sluga katar piro gospodari. 25 Dovoljno si e učenikošče te avel sago lesko učitelj, a e slugašče te avel sago lesko Gospodari. Ako man e domačine akharenas Veelzevul – Sotona, kozom askal bišukar alavenca akharena tumen mungre čerutnen?” 26 O Isus majdur phendas: “Zato na daran katar okola save pretin tumende kaj sa so si garado dičhola thaj sa so si tajno ašundola. 27 Okova so phenav tumende ande tama, tumen

phenen po svetlo thaj okova so phenel pe tumende po kan objavin katar e krovurja. **28** Na daran katar okola save šaj te mudaren samo o telo, a našti mudaren e duša. Nego, daran katar okova savo šaj te uništil o telo thaj e duša ando pakao. (Geenna g1067) **29** Či li bičinen pe duj vrapcurja pale jek kovano lovoru? A ni jek lendar či perel pe phuv, a te pale godova tumaro nebesko Dad či džanel. **30** A tumende si vi sa e bal po šoro đinade. **31** Zato na daran! Kaj tumen vredin majbut katar e but e vrapcurja. **32** Dakle ko god priznail angle manuša kaj si mungro učeniko, priznaiva vi me les angle mungro Dad nebesko. **33** A ko god odreknil pes mandar anglo them, vi me odrekniiva man lestar angle mungro Dad nebesko.” **34** O Isus nastavisarda te mothol: “Na gndin kaj avilem pe phuv te anav miro. Či avile te anav miro, nego o mačo. **35** Avilem te odvojiv ‘e manuše katar lesko dad, e čheja katar lači dej, thaj e borja katar lači sokra. **36** E manušeče dušmaja avena okola save trajin lesa ando čher.’ **37** Ko volil pire dades ili pire deja majbut nego man, naj dostojno te avel mungro učeniko. Ko volil pire čhaves ili pire čheja majbut nego man, naj dostojno te avel mungro učeniko. **38** Ko či lel piro trušul thaj či džal pale mande, naj dostojno te avel mungro učeniko. **39** Ko kamel te zaštitil pesko trajo hasarela les, a ko hasarel piro trajo zbog mande zaštitila les.” **40** “Ko tumen primil, man primil, a ko primil man primil e Devles savo bičhaldal man. **41** Ko primil e proroko zato kaj si proroko, primila e proroko nagrada, a ko primil e pravedniko, zato kaj si pravedniko, dobila pravedničko nagrada. **42** Thaj ko napoil ječe katar akala majcikne vi samo tahtaj šudre pajesa, zato kaj si mungro učeniko, čače phenav tumende lešči počin či propadnila.”

11 Kana o Isus završisarda te del e upute pire dešuduje učenikonende, đelotar okotar te sikavel e theme thaj te propovedil pe galilejske gava. **2** A o Jovano savo bolelas ašundas ande tamnica pale čudurja save čerelas o Hristo, pa bičhaldas pire učenikonen **3** te phučen e Isuse: “Dali san tu okova saves o Del obečisarda kaj bičhalela ili te ažučaras avres?” **4** Askal o Isus phendas lende: “Džan thaj phenen e Jovanošče so ašunen thaj so dičen kaj čerav: **5** E kore dičen, e bande phiren, e gubavcurja saston, e kašuče ašunen, e mule bolden pe ando trajo, a e čorende propovedil pe e Bahtali nevimata. **6** Thaj blago okolešče savo či sablaznil pe zbog mande.” **7** Kana e Jovanošče učenikurja đeletar, o Isus počnisarda te mothol e themešče palo Jovano: “So đeline te dičen ande pustinja? E trska savja ljuljil e balval? Na! **8** Ili so đeline te dičen? E manušes savo lija pe peste šukar drže? Na! Okola save indaren pe

peste šukar drže bešen pe carende dvorurja. **9** Ili so đeline te dičen? E Devlešče prorokos? Ej, me phenav tumende, vo si vi majbut katar o proroko! **10** O Jovano si okova pale savo si ramome ando Sveto lil: ‘Ake, me bičhalav angle tute mungre glasnikones thaj vo lačharella o drom angle tute.’ **11** Čače phenav tumende: katar sa e manuša save sas ikada bijande, khonik naj majbaro katar o Jovano savo bolelas, a okova savo si majcikno ando Carstvo nebesko majbaro si lestar. **12** Katar e vrjama e Jovanošči savo bolelas dži akana o Carstvo nebesko trpil nasilje thaj e nasilne manuša grabin pe pale leste. **13** Kaj sa e prorokurja thaj o Mojsijesko zakon prorokuinas palo Carstvo sa dok či avilo Jovano. **14** A o Jovano si, ako kamen godova te prihvatin, o Ilija savo trubujas te avel. **15** Ašunen kana već si tumen kan! **16** A kasa te usporediv akava naraštaj? Slično si e čhavrende save bešen po trgo, thaj čhon muj jek averešče: **17** ‘Svirosardam tumende veselo, a tumen či čheldine, đilabadam tumende tužno, a tumen či rujine.’ **18** Kaj o Jovano avilo thaj či halas niti pijelas šukar habe sago e aver manuša, a von phenen: ‘Ande leste si o bilačo duho.’ **19** Avilem me, o Čhavo e Manušesko, savo hav thaj pijav šukar habe, a von phenen: ‘Dik e manušes savo but hal thaj pijel, thaj drugari si e carenikonengo thaj e bezehalengo!’ Okola save prihvatin e Devlešči mudrost sikaven kaj si voj ispravno.” **20** Askal o Isus lijas te koril e manušen andar e gava ande save sas majbut lešče čudurja kaj či pokajisajle. **21** “Teško tumende manušalen andar o Horazin! Teško tumende andar e Vitsaida! Kaj te ando Tiro thaj Sidono avilesas e čudurja save dogodisajle ande tumende, von već dumut linesas pe peste e drže katar o kostret thaj čhutine sas o praho pe pire šore sar sikadinesas kaj pokajisajle! **22** Ali phenav tumende: Kaj po đes e sudosko avela majloče e gavende, e Tirošče thaj e Sidonešče nego tumende! **23** A tumen andar o Kafarnaum, zar dži ko nebo vazdena tumen? Perena dži ko than e mulengo. Kaj te ande Sodoma avilesas e čudurja save sas maškar tumende, von pokajisajle sas thaj e Sodoma dži ađes ačhili sas. (Hadēs g86) **24** Ali phenav tumende kaj avela majloče e Sodomaće ando đes e sudosko nego tumende.” **25** Askal o Isus phendas: “Hvaliv tut Dade, Gospodarina e nebesko thaj e phuvjako, kaj garadan akava katar e mudre thaj katar e umne, a sikadan okolende save si sago ciknen čavra. **26** Ej, Dade, kaj gajda sas čiri volja te avel. **27** Mungro Dad sa predaisarda mande. Khonik osim o Dad či pindžarel e Čhaves. Thaj khonik či pindžarel e Dades, samo o Čhavo thaj okola savende o Čhavo kamel te objavil les. **28** Aven mande savora save sen umorne thaj opteretime thaj me odmoriva tumen. **29** Len mungro jarmo pe tumende,

thaj sičon mandar, kaj me sem krotko thaj ponizno ileško, thaj aračena o miro pale tumare duše. 30 Kaj mungro jarmo si blago thaj mungro pharipe si loko."

12 Ande godoja vrjama, ande jek savato o Isus načelas maškar e njive e divesa. A lešče učenikurja bokhajle, thaj počnisardine te trgon e klasurja thaj te han. 2 Kana godova dikhline e fariseja, phendine e Isusešče: "Dik čire učenikurja čeren savatone, okova so po zakono naj muklo te čerel pe savatone." 3 A o Isus phendas lende: "Sigurno čitosardine ando Sveto lil so o David čerda, kana vo thaj okola save sas lesa bokhajle a nas len so te han. 4 Dijas ande Devlesko čher thaj halas e svete mangre, vi, ako ni vo ni okola save džanas pale leste či tromanas te han lendar, nego samo e rašaja. 5 Sigurno čitosardine ando zakono kaj vi e rašaja ando Hramo kršin o zakon gajda kaj čeren buči savatone, a ipak najlen doš? 6 A me phenav tumende kaj akate si vareko majbaro katar o Hramo! 7 Kana džangline sas so značil: 'Majbut voliv te aven milosrdne, nego te prinosin mande žrtve', či osudisardinesas okolen save naj došale. 8 Kaj me, o Čhavo e Manušesko, gospodari sem e savatosko." 9 Askal o Isus delotar okotar thaj dijas ande lendi sinagoga. 10 A okote sas jek manuš e šuče vastesa. A e fariseja rodenas razlog te optužin e Isuse, zato phučline les: "Dali si muklo te sastarel pe savatone?" 11 A o Isus phendas lende: "Ko tumendar či lijasas te inkalel pire ječe bakhres te savatone pelo ande hv? 12 A kozom si o manuš majvredno katar o bakhro! Zato savatone si muklo te čerel pe lačhipe." 13 Askal o Isus phendas godole manušešče: "Inzar čo vas!" Thaj vo inzardas pesko vas, a lesko vas sastilo thaj postanisardas sasto sago vi okova aver. 14 A e fariseja čim inklijstine andar e sinagoga, dogovorisaile sar te mudaren e Isuse. 15 A o Isus doznaisardas pale godova thaj delotar okotar. A pale leste teljardas o but o them thaj vo sa e nasvalen sastarda 16 thaj upozorilas len te na mothon khonikašče ko si vo. 17 Akava sas te pherdol okova so si phendo kroz o proroko Isajja: 18 "Ake mungro sluga, saves losardem. Mungro volime, o miljeniko mungre dušako. Pe leste čhava mungro Duho thaj vo e themende objavila e pravda. 19 Či prepirilape niti čhola muj, lesko glaso či ašundola pe sokača. 20 Ni e bandardi trska či phadela, niti mudarela o stenko savo tek tinjal, sa dok e pravda či anel dži ke pobeda. 21 Ande lesko alav pouzdinape e tema." 22 Askal andine anglo Isus ječe manuše ande savo sas o bilačo duho, a sas godova manuš koro thaj nemo. O Isus sastardas les, thaj o nemo manuš šaj dičelas thaj šaj čerelas svato. 23 A sa o them sas zurale zadivime

thaj phenelas: "Te naj akava o Čhavo e Davidesko?" 24 Kana ašundine pale godova e fariseja, phendine: "Akava tradel e bilače duhonen gajda kaj pomožil les o Veelzevul knezo e bilače duhonenog." 25 A o Isus džanglas so gndin thaj phendas lende: "Svako carstvo savo si ande peste podelime propadnila thaj svako gav ili čher savo si ande peste podelime či ačhela. 26 Ako o Satana izgonil e Satanes, askal si vo protiv peste razdelime. Sar askal šaj te ačhel lesko carstvo? 27 Thaj ako me tradav e bilače duhonen gajda kaj pomožil man o Veelzevul, uz kašči pomoč traden len tumare sledbenikurja? Zato von dokažina kaj naj sen ando pravo. 28 Ali, ako me e Devlešče Duhosa tradav e bilače duhonen, askal avilo tumende e Devlesko carstvo. 29 Ili, sar šaj vareko te del ando čher e zurale manušesko te čorel lešči imovina, a te či majsigo phandel les? Tek askal šaj čorel sa andar o čher. 30 Ko naj manca, protiv mande si. Thaj ko či čidel manca rspil. 31 Zato phenav tumende: E manušende šaj avela jartome svako bezeh thaj e hula ali e hula po Sveto Duho či jartola pe. 32 Ako vareko vareso phenel protiv o Čhavo e Manušesko, šaj avela jartome lešče, a ako vareko vareso phenel protiv o Sveto Duho, či jartola pe lešče ni ande akaja vrjama niti ande vrjama savi avel. (aiōn g165) 33 Uzgojin o lačo kaš, thaj vi lesko plodo avela lačo, ili uzgojin o bilačo kaš thaj vi lesko plodo avela bi lačo, kaj o kaš pindžarel pes pe lešče plodurja. 34 Tumen e sapešče čhavra! Sar šaj tumen te phenen so si lače, kana sen vi korkoro bilače? Kaj o muj phenel okova sova si pherdo o ilo. 35 O lačo manuš andar e lači riznica pire ilešči inkalel lačhipe, a o bilačo manuš andar e bilači riznica pire ilešči inkalel bilačhipe. Kaj andar o muj inkjel sova si pherdo o ilo 36 A me phenav tumende kaj e manuša pale svako beskorisno alav savo phenen avena odgovorne ando des e bare sudosko. 37 Kaj, čire alava opravdina tut ili osudina tut." 38 Askal phendnine e Isusešče varesave učitelja e Mojsiješče zakonestar thaj e fariseja: "Učiteljina, kamlamas te sikaves amende varesavo znako." 39 A o Isus phendas lende: "Samo o bilačo thaj o neverno naraštaj rodel znako, ali či dela pe lešče aver znako osim o znako savo dogodisajlo e prorokošče Jonašče. 40 Sago kaj 'o Jona sas trin đesa thaj trin rača ando di e bare mačhesko', gajda vi me, o Čhavo e Manušesko, avava ando di e phuvjako trin đes thaj trin rača. 41 E manuša andar e Niniva uštena po sudo akale naraštajesa, thaj osudina les, kaj von pokajisaile pe Jonašči propoved, a tumen či pokaisardine tumen. A tumenca si akate vareko majbaro vi katar o Jona! 42 E carica katar o jugo uštena po sudo akale naraštajesa, thaj osudila les, kaj avili dadural te ašunel e Solomonešči mudrost, a tumenca si

akate vareko majbaro vi katar o Solomon." 43 O Isus majdur phendas: "Kana o bilačo duho inkliel andar o manuš, lutil e pustinjasa thaj rodel than kaj šaj te odmoril pe, ali či aračhel les. 44 Askal phenel: 'Boldava man ande mungro čher andar savo inklijstem.' Kana boldel pe ande piro čher andar savo inklijsto, aračhel o čher čučo, šilado thaj čisto. 45 Askal džal thaj anel eŋta duhurja majgore pestar, thaj savora von den ando manuš thaj nastanin pes ande leste, thaj gajda po krajo godole manušešće si majgore nego so sas lešće majsigo. Gajda avela vi akale bilače naraštaješće." 46 Dok o Isus još čerelas svato e themešće, aresline thaj ačhiline avri lešči dej thaj lešće phral thaj kamenas te čeren svato lesa. 47 Vareko phendas lešće: "Ake, čiri dej thaj čire phral ačhen avri. Kamen te čeren tusa svato." 48 A o Isus phendas lešće: "Ko si mungri dej? Thaj ko si mungre phral?" 49 Askal sikadas karingal pire učenikurja, thaj phendas: "Ake mungri dej thaj mungre phral! 50 Kaj phenav tumende, ko god čerel e volja mungre nebesko Dadešči, godova si mungro phral, phen thaj mungri dej!"

13 Isto godova đes o Isus inklijsto andar o čher, đelo thaj bešlo pašo jezero te sikavel. 2 Oko leste čida pe gači but them, gajda kaj vo moraš te dijas ando čamco thaj bešlo, a sa o them ačhelas pe obala. 3 But godova phenelas lende ande paramiče sago kaj si akaja: "Jek đes inklijsto o sejači te sejol. 4 Dok sejolas, varesavo seme pelo po drom thaj avile e čiriklja thaj sa haline les. 5 Aver seme pelo pe barutni phuv kaj nas but phuv thaj odma inklijsto kaj e phuv nas handuk. 6 Ali kana inklijsto o baro kham, phabilo thaj šučilo kaj nas les handuk koreno. 7 Varesavo seme pelo maškar e kangre. E kangre barile thaj tasadine les. 8 A varesavo seme pelo pe lači phuv, thaj bijandas šel drom majbut, šovardeš drom majbut, ili trijanda drom majbut. 9 Ašunen, kana več si tumen kan!" 10 E Isuseše učenikurja avile dži leste thaj phučline les: "Sostar mothos e themešće ande paramiče?" 11 A vo phendas lende: "Tumende si dino te džanen e tajne e nebesko Carstvošće, a lende naj dino. 12 Kaj, kas si džanglipe, dela pe lešće thaj avela les još majbut, a kas naj, lela pe lestar vi okova cara so si les. 13 Zato phenav lende ande paramiče, kaj dičen so čerav, a phandaven e jakha te na dičen, čhon kan so phenav lende, a či ašunen thaj či hačaren. 14 Gajda pherdol pe lende e Isajjasko proročanstvo: 'Ašunena mungre alava, a či hačarena; pire jakhenca dičena mungre dela, a našti dičena len. 15 Kaj barosajle e ile akale themešće, pire kanenca jedva ašunen, pire jakha phandadine; te e jakhenca či dičen, te e kanenca či ašunen, te e ileja či hačaren thaj te

obratin pe, te sastarav len.' 16 Ali blago tumare jakhende kaj dičen, thaj blago tumare kanende kaj ašunen. 17 Kaj čače phenav tumende: e but prorokurja thaj e pravednikurja zurale kamline te dičen so tumen dičen, a či dikhline thaj te ašunen so tumen ašunen, ali či ašundine." 18 O Isus majdur phendas: "Ašunen so značil e paramiči palo sejači. 19 Svakonešće savo ašunel o alav pale Devlesko carstvo, a či hačarel, avel o beng thaj čorel so si posadime ande lesko ilo. Godova si okova seme savo si posadime po drom. 20 O seme savo si posadime po barutno than, si okova savo ašunel e Devlesko alav thaj odma e bahtasa prihvatil les, 21 ali sar e Devlesko alav či mukla koreno ande leste, či ačhel dugo. Kana avel e nevolja thaj o progonstvo zbog o alav e Devlesko, vo odma otpadnil. 22 O seme savo si posadime ande kangre, si okova savo ašunel o alav e Devlesko, ali e brige akale trajošće thaj o hohavno barvalipe tasaven o alav thaj ačhel bi plodosko. (aiōn g165) 23 A okova seme kaj si posadime pe lači phuv, godova si okova savo ašunel o alav, hačarel thaj čače anel plodo, šel drom majbut, šovardeš drom majbut ili trijanda drom majbut." 24 Askal o Isus phendas lende vi aver paramiči: "O Carstvo nebesko si sago o manuš savo posadisardas o lačo seme ande piri njiva. 25 Ali dok savora sovenas, avilo lesko dušmano thaj posadisardas o kukolji maškar o điv thaj đelotar. 26 A kana o seme barilo thaj anda plodo, askal sikadilo vi o kukolji. 27 Askal aviline e sluge ko domačino thaj phendine lešće: 'Gospodarinal! Zar tu či posadisardan o lačo seme pe čiri njiva? Katar askal o kukolj?' 28 A vo phendas lende: 'O dušmano čerda godova.' A e sluge phučline les: 'Kames te džas thaj te inkalas o kukolj?' 29 A o domačino phendas lende: 'Na, kaj te akana inkaldine o kukolji inkalena vi o điv. 30 Mučen te liduj barjon dži ke žetva, thaj ande vřjama e žetvači phenava okolende save čiden o điv: Majsigo inkalen o kukolj, thaj phanden le ande snopurja te del pe jag, a o điv čiden thaj čhon les ande mungro skladište.'" 31 O Isus phendas lende vi aver paramiči: "O Carstvo nebesko si slično sago e gorušicako semeno savo o manuš posardisarda ande piri njiva. 32 Vi ako si majcikno katar sa o seme, kana barjol avel majbaro katar svako povřce. Barjol thaj avel kaš, thaj e čiriklja aven thaj gnezdin pes maškar lešće ranja." 33 Askal o Isus phendas lende aver paramiči: "O Carstvo nebesko si sago o kvasco savo lel e manušnji thaj šukljarel les ande biš kile aro, dok sa či vazdel pe." 34 O Isus sa godova phendas e themešće ande paramiča. Thaj khanči či phenelas lende bi e paramičengo: 35 Gajda pherdilo o proročanstvo savo phenel: "Ande paramiči phenava thaj objaviva okova so si garado katar o postanko e themesko." 36 O Isus mukla e but

e themes te džaltar thaj dijas ando čer. E učenikurja aviline leste thaj phendine lešće: "Objasnisar amende e paramiči palo kukolj pe njiva." 37 A vo phendas lende: "Okova kaj posadisardas o lačo seme si o Čhavo e Manušesko, 38 a e njiva si o them. O lačo seme si e manuša save pripadin e nebesko Carstvošće, a o kukolji si e manuša e bendešće. 39 O dušmano savo posadisardas o seme si o beng; e žetva si o krajo e themesko, a okola save čiden o điv si e anđelurja. (aiñ g165) 40 Sago kaj o kukolji čidel pe ande snopurja, thaj del pe jag, gajda avela vi po krajo e themesko. (aiñ g165) 41 A me, o Čhavo e Manušesko, bičhalava mungre anđelen, te izdvoin andar mungro Carstvo savoren save crden avren po bezeh thaj savoren save čeren bilačipe. 42 Thaj e anđelurja čudena len ando jagalo bov, okote avela roipe thaj škrippe e dandenc katar e duk. 43 Askal e pravednikurja sago o kham zasijina ando Carstvo pire Dadesko. Ašunen, kana već si tumen kan!" 44 "E nebesko Carstvos a sago e garade barvalipeja ande njiva. Kana o manuš aračhel les, garavel les okote thaj pherdo bah džal thaj bičinel sa so si les thaj činel godoja njiva." 45 Još o Carstvo nebesko si slično sago o trgovco savo rodel šukar biserja. 46 Pa kana aračhel zurale kuč biseri, džal thaj bičinel sa so si les, te činel les. 47 Još o Carstvo nebesko si slično sago vi e mreža savi si čhudini ando more ande savi astardile e svakovrsne mače. 48 Kana e mreža pherdol e mačhenca, crden lat avri pe obala. Askal e ribarja bešen thaj losaren e lače mače thaj čhon len ande kante, a e bilače mačen čuden. 49 Gajda avela po krajo e themesko: avena e anđelurja thaj odvoina e bilačen katar e pravedne (aiñ g165) 50 thaj e bilačen čudena ando užarime bov, okote avela roipe thaj škrippe e dandenc katar e duk. 51 O Isus phučla len: "Dali hačardine sa akava?" A von phendine: "Hačardam." 52 O Isus phendas lende: "Zato si svako učitelj e Mojsiješće zakonestar savo si sikado palo Carstvo nebesko slično sago o domačino savo andar piri riznica inkalel o nevo thaj vi o purano blago." 53 Kana o Isus završisarda akala paramiče, đelotar okotar. 54 Thaj dijas ando piro gav kaj barilo. Thaj sikavelas okote e theme ande lende sinagoge, a von zadivime phenenas: "Katar akales kasavi mudrost thaj moć? 55 Naj li akava e tesaresko čhavo? Či li bučhol lešči dej Marija, a lešće phrala o Jakov, Josif, Simon, thaj o Juda? 56 Thaj zar naj sa lešće pheja akate maškar amende? Katar les askal sa akava?" 57 Thaj odbisardine te pačan ande leste. A o Isus phendas lende: "O proroko si svugde poštujime osim ande piro gav thaj ande piro čer." 58 Zbog lengo bipačipe okote čičerda but e čudurja.

14 Ande godoja vrama o Irod, savo sas vladari ande Galileja, ašundas o glaso palo Isus. 2 Askal phendas pire slugende: "Godova si o Jovano savo bolelas. Vo uštilo andar e mule, thaj zato čerel čudurja." 3 A o Irod godova phendas zato kaj majsigo astardas e Jovane, phangla les, thaj čuda les ande tamnica zato kaj lijas e Irodijada savi sas romnji lešće phralešči e Filipešči. 4 A o Jovano stalno motholas e Irodešće: "Tut naj pravo te les lat romnjače!" 5 Zbog godova o Irod kamlas te mudarel les, ali darajlo katar o them, kaj o them smatrilas e Jovane kaj si proroko. 6 Ali kana sas e Irodesko bijando đes, e Irodijači čhej teljarda te čhelel angle savorende. E Irodešće godova zurale svidosajlo, 7 zato halas lače solah kaj dela lat sa so rodela lestar. 8 A voj sikadi katar pešči dej phendas: "Deman akate po tijari o šoro e Jovanesko savo bolelas!" 9 O caro Irod ražalostisajlo, ali zbog godova kaj čiči kamlas te prekršil e solah angle manuša save sas okote, zapovedisardas te den lat. 10 Thaj bičhaldas e manušen ande tamnica te činen tele e Jovanesko šoro. 11 E manuša askal andine e Jovanesko šoro po tijari thaj dine les e Irodijače čhejače, a voj inčarda les pire dejače. 12 Askal e Jovanešće učenikurja aviline, line e Jovanesko telo thaj prahosardine les. Askal đele thaj mothodine e Isusešće so sas. 13 Kana o Isus ašundas godova, dijas ando čamco thaj đelotar okotar po pusto than te avel korkoro. Ali kana godova ašundas o them teljardine phujatar pale leste andar pire gava. 14 Kana o Isus inklijsto andar o čamco, dikhla e bute theme, sažalisajlo pe lende thaj sastardas lende nasvalen. 15 Kana peli e rjat avile leste lešće učenikurja thaj phendine lešće: "Akava si pusto krajo, a već si kasno. Muk e theme te džal pe okolne gava te činen pešće vareso te han!" 16 A o Isus phendas lende: "Či trubun te džan. Tumen den len te han." 17 Von phendine lešće: "Amen naj akate khanči aver osim pandž mangre thaj duj mače!" 18 A o Isus phendas: "Anen godova mande." 19 Askal zapovedisardas e themešće te bešel pe čar. Lijas e pandž mangre thaj e duj mače, dikhla prema o nebo thaj zahvalisarda e Devlešće palo habe. Phaglas o mangro thaj dija pire učenikonende, a e učenikurja e manušende. 20 Thaj savora haline thaj čaljile. A e učenikurja čidine još dešuduj pherde korpe katar e kotora save ačiline. 21 A okola save haline sas pandž milja muškarcurja, a nas đinade e manušnja thaj e čhavra save sas lenca. 22 Odma posle godova o Isus zapovedisardas pire učenikonende te den ando čamco thaj te džan angle leste pe okoja rig, dok vo čiči mučel e theme te džantar. 23 Nakon so mukla e themes te džantar, lija pe opre pe gora, korkoro te molil pe. Kana peli e rjat, vo sas još okote korkoro. 24 A o čamco ande savo sas e učenikurja sas

već dur katar e obala, mardo katar e talasurja kaj plovilas suprotno katar e balval. 25 A varekaj katar e trin dži ke šov saturja detharinako, o Isus avilo dži ke učenikurja gajda kaj phirelas po paj ando jezero. 26 Kana e učenikurja dikhline e Isuse sar phirel po paj karingal lende, e darasa čhutine muj: "Godova si o duho!" 27 O Isus odma phendas lende: "Na daran! Me sem!" 28 A o Petar phendas lešće: "Gospode, ako san tu, zapovedisar te avav tute po paj!" 29 A o Isus phendas lešće: "Avi!" O Petar inklijsto andar o čamco thaj počnisarda te phirel po paj karingal o Isus. 30 Ali kana dikhla kozom si zurali e balval, darajlo thaj teljarda te tonil thaj čhol muj: "Gospode, spasisar man kaj tasadoval!" 31 O Isus odma inzarda piro vas, astarda les thaj phendas: "O manušeja cikne paćimava, sostar posumnjisarjan?" 32 Kana line pe opre ando čamco, e balval aćhili. 33 A e učenikurja save sas ando čamco peline pe koća angle leste thaj phendine: "Tu san čaće o Čhavo e Devlesko!" 34 A o Isus thaj lešće učenikurja preplovissardine o jezero, thaj aresline po kopno ando Genisaret. 35 Thaj e manuša andar godova than pindžardine e Isuse, razglasissardine godova pe sasto krajo kaj avilo thaj andine leste sa e nasvalen. 36 Molissardine e Isuse te mućel len te astaren pe samo palo čoško katar lešći haljina. Thaj savora save dotaknisardine les potpuno sastile.

15 Askal ko Isus aviline varesave fariseja thaj e učitelja e Mojsiješće zakonestar andar o Jerusalem thaj phućline les: 2 "Sostar ćire učenikurja phađen e purane židovske obićaja? Či inćaren o obred te thoven pire vas majsigo nego so len te han." 3 A o Isus phendas lende: "A sostar tumen phađen e Devlešći zapovest zbog tumare obićaja? 4 Kaj o Del zapovedissardas: 'Poštuisar ćire dade thaj ćire deja' thaj: 'ko del romaja pire dade thaj pire deja, neka avel kaznime po smrto.' 5 A tumen phenen: 'Ako vareko phenel pire dadešće ili pire dejaće: našti pomoživ tut kaj halem solah kaj dava e Devlešće okova so dijemas tuće.' 6 Gajda tumen phenen kaj či trubun te poštujin tumare dade thaj tumare deja zato kaj či vodin briga pale lende potrebe. Gajda zanemarin e Devlešće zapovesti zbog tumari predaja. 7 Licemerja! Laće pale tumende prorokuisardas o Isaija kana phendas: 8 'Akava them poštui man samo e mujesa, ali lengo ilo si dur mandar. 9 Uzalud poštui man kaj sago mungro sikavipe sikaven e manušende zapovesti.'" 10 O Isus akhardas e but e themes thaj phendas lende: "Čhon kan thaj probin te haćaren! 11 Či meljarel e manušes okova so del ande manušesko muj, već okova so inkjel andar o muj meljarel e manuše anglo Del." 12 Askal aviline leste e učenikurja thaj phućline les: "Dali džanes kaj e fariseja uvredissajle pe okova so phendan?" 13 A vo phendas lende: "Svako biljka savi či

zasadisardas mungro nebesko Dad, inkalela pe e korenosa andar e phuv. 14 Mućen len! Von si kore vođe e korende! A kana o koro vodil e kores, liduj peren ande hv." 15 A o Petar phendas lešće: "Phen amende so značil okova so phendan kaj meljarel e manuše anglo Del." 16 A o Isus phućla len: "Zar tumen još či haćaren? 17 Či li haćaren: kaj sa so del ando muj džal ando đī, thaj inkjel avri. 18 Ali e bilaće alava inkljen andar o ilo thaj meljarel e manušes anglo Del. 19 Kaj andar o ilo inkljen e bilaće gndurja, mudaripe, preljub, bludo, čoripe, hohamno svedoćanstvo thaj uvrede. 20 Akava meljarel e manušes! Či avela o manuš duhovno melalo anglo Del, ako hal, a te majsigo či obredno thoda pire vas." 21 Askal o Isus đelotar okote thaj crda pe andar e Galileja po sever, ando tirska thaj sidonsko krajo. 22 A jek manušnji, Hanaanejka andar godova krajo, avili dži leste thaj teljarda te čhol muj: "Smiluisar tut mande Gospode, Čhaveja e Davidesko! Kaj mungri čhej zurale patil pe, zato kaj si ande late o bilačo duho!" 23 Ali o Isus khanči či phendas laće, pa lešće učenikurja aviline đī leste thaj počnisardine te molin les: "Phen laće te džaltar kaj čhol muj pale amende!" 24 A vo phendas lende: "Bićhald sem samo te pomogniv e Izraelošće themešće save si sago e hasarde bakhre." 25 A voj avili thaj peli pe koća angle leste thaj phendas: "Gospode, pomožisar mande!" 26 A vo phendas laće: "Naj laće te lel pe o mangro e čhavrendar thaj te čhudel pe e džučhelende." 27 A voj phendas: "Ej, Gospode, kaj čak vi e džučhela han e prušuka save peren katar e sinija lende gospodarende!" 28 Askal phendas laće o Isus: "Baro si ćiro paćipe, manušnji! Neka avel tuće sago kaj kamesi!" Thaj ando isto čas sastili laći čhej. 29 Askal o Isus đelotar okotar dži ko Galilejsko jezero, lija pes pe gora thaj bešlo te sikavel. 30 A leste avilo o but o them thaj pesa andine e banden, e koren, e sakaten, e mutaven thaj e but avren saven sas razne nasvalimate thaj sidardine te čhon len angle Isusešće pungere, a vo sastarda len, 31 gajda kaj o them zadvissajlo, kana dikhline okolen kaj našti ćerenas svato sar ćeren svato, e sakaten sar si saste, e banden sar phiren, e koren sar dićen thaj o but o them hvalilas e Izraelošće Devle. 32 A o Isus akhardas pire učenikonon thaj phendas lende: "Žao mande e themestar, kaj si već trin đes manca, a najlen so te han. Či kamav te mukav len bokhale te džantar te na malaksin e dromesa." 33 A e učenikurja phendine lešće: "Kaj ande akaja pustinja te arakhas dosta mangro te pravaras gadići themes?" 34 A o Isus phućla len: "Kozom mangre si tumen?" A von phendine: "Efta mangre thaj cara maće." 35 Askal o Isus zapovedissardas e themešće te bešen pe phuv. 36 Thaj lijas e efta mangre thaj e maćen, zahvalissarda e

Devlešće, phaglas e mangre thaj dija pire učenikonende, a e učenikurja dine e themešće. 37 Savora haline thaj čaljile; thaj katar e kotora save ačiline lende pherdine još eŧta bare korpe. 38 A okola save haline sas štar milje muškarcurja thaj još vi manušnja thaj čhavra save nas đinade. 39 Kana o Isus mukla e theme te džaltar, bešlo ando čamco thaj avilo ande Magadansko krajjo.

16 Ko Isus aviline e fariseja thaj e sadukeja e gindosa te iskušin les thaj mandenas lestar te sikavel lende o znako andar o nebo. 2 A vo phendas lende: "Kana perel e rjat, phenen: 'Avela lačhi vrjama kaj si o nebo lolo.' 3 A detharinako phenen: 'Ađes avela nevreme kaj si o nebo lolo thaj mutno.' Džanen te tumačin e nebesko izgled, a či džanen te pindžaren e znakurja e vrjamaće ande save trajin. 4 Samo o bilačho thaj bi paćivalo naraštaj rodel znako, ali či dela pe lešće aver znako osim o znako savo dogodijsajlo e prorokošće Jonašće. Askal o Isus mukla len thaj delotar." 5 E Isusešće učenikurja teljardine pe okoja rig e jezerošći, ali bistardine te len pesa o mangro. 6 A o Isus phendas lende: "Len tumen sama katar e farisejengo thaj e sadukejengo kvasco!" 7 A von počnisardine te raspravin pe maškar peste, thaj phendine: "Godova sigurno phendas zato kaj či lijam o mangro." 8 O Isus džangla so ćeren svato thaj phendas: "Manušalen cikne paćimava! Sostar raspravin tumen maškar tumende kaj naj tumen mangro? 9 Zar još uvek či haćaren? Zar či den tumen gođi ke okola pandž mangre pale pandž milje manuša thaj kozom pherde korpe ćidine kotora save ačhile? 10 Thaj či den tumen gođi ke eŧta mangre pale štar milje manuša thaj kozom bare korpe ćidine kotora save ačhile? 11 Sar či haćaren kaj či phendem tumende palo mangro kana phendem tumende te len tumen sama katar e farisejengo thaj e sadukejengo kvasco?" 12 Askal haćardine kaj či phendas lende te len pes sama katar e mangresko kvasco, nego katar e farisejengo thaj e sadukejengo sikaviŧpe. 13 A kana o Isus avilo ande krajurja oko e Kesareja e Filipešći, phućlas pire učenikonen: "So phenel o them, ko sem me, o Čhavo e Manušesko?" 14 A von phendine lešće: "Jek phenen kaj san o Jovano savo bolelas, aver phenen kaj san o proroko Ilija, a varesave phenen kaj san o Jeremija, ili varesavo katar e aver prorokurja." 15 Askal o Isus phućla len: "A tumen so tumen phenen ko sem me?" 16 A o Simon Petar phendas: "Tu san o Hristos, Čhavo e džude Devlesko!" 17 O Isus phendas lešće: "Blago tuće, Simone e Jonašće čhaveja kaj godova či sikadas tuće o manuš, nego mungro nebesko Dad. 18 A me phenav tuće: Tu san o Petar, thaj pe godoja stena vazdava mungri Khandiri, thaj o vudar e Hadosko či

nadvladina lat. (Hadēs g86) 19 Tuće dava e ćije katar o Carstvo nebesko thaj sa so phandes pe phuv avela phanglo po nebo thaj sa so razrešisares pe phuv avela razrešime ando nebo." 20 Askal o Isus strogo zapretisardas pire učenikonende te na phenen khonikašće kaj si vo o Hristos. 21 Katar godoja vrjama o Isus teljardas te objasnil pire učenikonende kaj moraš te džal ando Jerusalem thaj kaj okote but trpila e starešinendar, e šorvale rašajendar thaj katar e učitelja e Mojsiješće zakonestar, kaj avela mudardo thaj uštela andar e mule o trito des. 22 Askal o Petar akharda les pe rig thaj počnisarda te odgovoril les te na ćerel godova. Motholas lešće: "Gospode, arakh Devla! Godova tuće nikada či tromal te dogodil pe." 23 O Isus bolda pe ko Petar thaj phendas lešće: "Džatar mandar, Sotono! Tu san mungri zamka kaj ćire gindimata naj e Devlešće, nego e manušešće!" 24 Askal o Isus phendas pire učenikonende: "Ako vareko kamel te džal pale mande, moraš te odreknil pe korkoro pestar, moraš te lel piro trušul thaj teljarel pale mande. 25 Kaj svako savo kamel te aračhel piro trajo hasarela les; a ko hasarel piro trajo pale mande, aračhela les. 26 So mol e manušešće te dobil sasto them, a hasarel piro trajo? So o manuš šaj del sago zamena pale piro trajo? 27 Kaj me, o Čhavo e Manušesko, uskoro avava ande slava mungre dadešći, mungre anđelencu, thaj askal svakonešće boldava prema lešće dela. 28 Čaće phenav tumende, varesave maškar tumende save si akate či merena dok či dićhena man, e Čhaves e Manušesće, sar avav mungre Carstvosu."

17 Šov des majposle o Isus lijas pesa e Petre, e Jakove thaj lešće phrales e Jovano opre pe vući gora, te aven korkoro. 2 Thaj okote angle lende promenisajlo lesko izgled, o muj lesko phabolas sar o kham, a e haljine pe leste postanisardine parne sago o svetlost. 3 Ande godova pojavisajle o Mojsije thaj o Ilija thaj teljardine te ćeren svato e Isuseja. 4 A o Petar phendas: "Gospode, lačhe si kaj sam akate! Ako kames, ćerava akate trin senice: jek pale tute, jek palo Mojsije thaj jek palo Ilija." 5 Dok vo još ćerelas svato, učharda len o svetlo oblako thaj o glaso ašundilo andar o oblako: "Akava si mungro volime Čhavo. Vo si mungri bah! Leste čhon kan!" 6 Kana godova ašundine e učenikurja, zurale darajle thaj peline pe koča e mujesa dži ke phuv. 7 O Isus avilo dži lende, čhuta pire vas pe lende thaj phendas: "Ušten thaj na daran!" 8 Von vazdine pešće jakha, ali či dikhline khonikas osim e Isuse. 9 Dok fuljenas tele katar e gora, o Isus zapovedisarda lende: "Khonikašće na phenen so dikhline sa dok me, o Čhavo e Manušesko, či vaskrsniv andar e mule." 10 A e učenikurja phućline les:

"Sostar askal e učitelja e Mojsiješće zakonestar phenen kaj o Ilija trubul te avel majsigo nego o Mesija?" **11** A o Isus phendas lende: "O Ilija vi čače avel thaj sa palem čhola pe pesko than. **12** Ali phenav tumende kaj o Ilija već avilo, ali či pindžardine les, pa čerdine lesa so kamline. Gajda vi o Čhavo e Manušesko trpila andar lende vas." **13** E učenikurja askal hačardine kaj phenel lende palo Jovano savo bolelas. **14** Kana aviline dži ko but o them, e Isuseste avilo varesavo manuš, pelo tele angle leste pe koča **15** thaj phenelas lešće: "Gospode! Smiluisar tut mungre čhavešće kaj si mesečari thaj but trpil. Često perel te ande jag te ando paj. **16** Andem les ke čire učenikurja, ali von našti sastardine les." **17** A o Isus phendas: "Tumen bi pačako thaj rumome naraštajona, kozom još moraš te avava tumenca? Kozom još moraš te trpiva tumen? Anen les mande!" **18** Askal o Isus zapretisardas e bilače duhošće thaj vo inklijsto andar o čhavo savo isto časo sastilo. **19** Askal e učenikurja aviline ko Isus thaj pe rig phučline les: "Sostar amen našti tradam godole bilače duhos andar o čhavo?" **20** A o Isus phendas lende: "Zbog tumaro cikno pačipe. Vi čače phenav tumende, te avel tumen pačipe gajda cikno sago kaj si e gorušicako zrno thaj te askal phenen akale goraje: 'Nak akatar inča', voj nakhlasas. Khanči či avilosas tumende nemoguće. **21** [Samo e molitvava thaj e postosa šaj tradel pe akaja vrsta demonurja." **22** Kana e Isusešće učenikurja čidine pe ande Galileja, O Isus phendas lende: "Me, o Čhavo e Manušesko, avava predaime e manušenje ande vas. **23** Von mudarena man, ali po trito đes me uštava andar e mule." Godova zurale rastužisarda e učenikonen. **24** Kana aresline ando Kafarnaum, avile dži ko Petar okola kaj čidenas o hramsko porezo thaj phučline les: "Tumaro učitelj počinel o hramsko porez, si gajda?" **25** O Petar phendas: "Počinel!" Askal dijas ando čher, a o Isus odma lijasle anglal thaj phučas: "So gndis, Simone, dali e themešće carurja čiden e carina ili o porez katar pire ili katar averende čhavra?" **26** O Petar phendas lešće: "Katar averende čhavra," a o Isus pe godova phendas lešće: "Askal si lende čhavra oslobodime thaj či trubun te počinen o porezo. **27** Ali te na uvredisaras len, dža dži ko more thaj čhude e udica. Prvo mačešće saves astares putar lesko muj, thaj aračeja andre lovoru. Le les thaj lesa počin lende o porezo pale mande thaj pale tute."

18 Ande godova čas aviline ko Isus e učenikurja thaj phučline les: "Ko si askal majbaro ando Carstvo nebesko?" **2** Pe godova o Isus akhardas peste e cikne čhavres, thaj čhuta les maškare maškar lende **3** thaj phendas lende: "Čače phenav tumende, ako či obratin tumen thaj

či aven sago cikne čhavra, sigurno či dena ando Carstvo nebesko! **4** Ando Carstvo nebesko, majbaro si okova savo ponizil pes sago akava cikno čhavo. **5** Ko zbog mande prihvatil ječe kasave čhavre, man prihvatil. **6** Ali ko ječe katar akala ciknen kaj pačan ande mande crdel po bezeh, avilosas lešće majlače te phanden lešće mlinsko bar oko e kor, thaj te tasadol ando more." **7** O Isus majdur phendas: "Teško e manušenje ando them kaj čeren okova so navodil po bezeh! No gajda vareso moraš te avel. No teško okolešće prekal kaste avel. **8** Ako čiro vas ili čiro pungro crdel tut po bezeh, čhin len thaj čhude len tutar. Kaj si tuće majlače te des ando večno trajo kljasto ili bango, nego te liduj vastenca ili pungrenca aves čhudino ande večno jag. (aiōnios g166) **9** Ako čiri jak crdel tut po bezeh, inkal lat thaj čhude lat tutar! Kaj si tuće majlače ječe jakhasa te des ando večno trajo nego te liduj jakhenca aves čhudino ande paklošči jag. (Geenna g1067) **10** Len sama te na dičen barikane ni ječe katar akala cikne. Kaj phenav tumende kaj lende anđelurja po nebo neprestalno ačhen anglo nebesko Dad. **11** [Kaj me, o Čhavo e Manušesko, avilem te spasiv e hasarden.]" **12** "So gindin? Ako si e manušes šel bakhre thaj jek lendar hasavol, či li mućela okolen injavardeš thajinja ande gore thaj džal te rodel okole ječe kaj hasajlo? **13** Čače phenav tumende, ako aračel les, majbut raduilape kaj arakhlas godole ječe nego okolen injavardeš thajinja kaj či hasajle. **14** Gajda vi tumaro nebesko Dad či kamel te hasavol thaj te propadnil ni jek katar akala cikne." **15** "Ako čiro phral sagrašil protiv tute, le les tusa pe rig thaj prekorisar les. Te čhuta tute kan, palem dobisardan čire phrales palpale. **16** No ako či čhol kan tute, le tusa još ječe ili duje phralen, gajda te 'svako optužba temeljil pes pe alava duje ili trine svedokonendi'. **17** Ako odbil te čhol kan vi lende, inkal godova angle khandiri. A ako odbil te čhol kan vi ke khandiri, inčaren les sago manušes svo či pindžarel e Devles ili sago carenikos. **18** Čače phenav tumende, so god phanden pe phuv avela phanglo po nebo, thaj sa so razrešin pe phuv, avela razrešime vi po nebo. **19** Isto gajda phenav tumende: ako duj džene tumendar akate pe phuv ječe ileja zamolin bilo so, mungro nebesko Dad dela tumen godova. **20** Zato okote kaj čiden pe duj ili trin džene ando mungro alav, okote sem vi me maškar lende." **21** Askal o Petar avilo ko Isus thaj phendas lešće: "Gospode, kozom drom te jartosarav mungre phralešće savo sagrašisardas protiv mande? Dži ke ehta drom?" **22** A o Isus phendas lešće: "Na samo ehta drom, nego ehta drom po ehtarvardeš! **23** O Carstvo nebesko si sago kana o caro kamel te poravnil e računurja pire slugenca. **24** Thaj kana teljardine te čeren obračun, andine leste ječe savo sas lešće uždile

deš milje gone sunakaj. 25 Sar o manuš našti boldelas o dugo, o caro zapovedisardas te bičinen le zajedno lešče romnjava thaj lešče čhavrenca thaj sa okoleja so sas len thaj gajda podmirin o dugo. 26 O sluga pe godova pelas anglo caro pe koča e mujesa dži ke phuv thaj zamolisarda les: 'Av strpljivo manca thaj sa boldava tuče!' 27 O caro sažalisajlo pe leste, oslobodisarda les thaj jartosardas lešče o dugo. 28 Ali kana godova sluga inklijsto avri, maladas pire drugares, avre slugo, savo sas lešče udžile cara love. Astarada les pale kor thaj počnisarda te tasavel les, thaj phenel lešče: 'Bolde mande so san udžile!' 29 O drugari lesko pelo angle leste pe koča e mujesa dži ke phuv thaj zamolisarda les: 'Av strpljivo manca thaj boldava tuče!' 30 A vo či kamlas te ažučarel, nego inčarda les thaj čhuda les ande tamnica dok či boldel o dugo. 31 Kana e aver sluge dikhline so dogodisajlo, zurale ražalostisajle thaj đeletar ko caro thaj obavestisardine les so sas. 32 Pe godova o caro akhardas e slugos savešče jartosardas thaj phendas lešče: 'Bilačo slugona! Me tuče jartosardem sa so sanas mande udžile zato kaj zamolisardan man! 33 Zar či vi tu trubujanas te smiluis tut čire drugarešče sago kaj me smiluisajlem tuče?' 34 Askal o caro holjajlo thaj predaisarda les e mučiteljende dok či boldel sa o dugo. 35 Gajda vi mungro nebesko Dad čerela tumenca, ako či jarton tumare phralešče saste ileja."

19 Kana o Isus sas gata godole alavenca, đelotar andar e Galileja thaj đelo ande judejske krajurja pe aver rig katar e reka Jordan. 2 Pale leste teljardas o silno them, thaj vo okote sastarelas okolen save sas nasvale. 3 Avile leste varesave fariseja thaj phučenas les gajda te probin les: "Dali o manuš troma te rastavil pe katar piri romnji zbog bilo savo razlog?" 4 A o Isus mothodas lende: "Sigurno čitosardine ando Sveto lil kaj o Stvoritelj ando početko 'stvorisarda muško thaj žensko' 5 thaj kaj phendas: 'O manuš mučela pire dades thaj pire deja thaj sjedinila pe pire romnjasa, thaj von duj džene avena jek telo.' 6 Gajda von duj džene naj majbut duj džene, nego si jek. Dakle, neka nijek manuš či rastavil okova so o Del sastavisardas!" 7 Pe godova von phučline e Isuse: "Sostar askal o Mojsije phendas kaj o manuš trubul samo pire romnja te del rastavno lil thaj te askal mučel lat?" 8 A o Isus phendas lende: "O Mojsije mukla tumende te šaj mučen tumare romnjen zato kaj sen tvrdoglave, ali ando početko nas gajda. 9 Ali me phenav tumende: Ko god rastavil pe katar piri romnji, osim zbog lako bludo, thaj lel aver romnja, čerel preljub." 10 Pe godova e Isusešče učenikurja phendine: "Ako si gajda maškar o rom thaj e romnji, askal si majlače te na ženil pe!" 11

O Isus phendas lende: "Našti godova savora te prihvatin, nego samo okola savende o Del godova dijas. 12 Kaj si manuša save si nesposobne katar o bijandipe te ženin pe, si vi okola saven e manuša čerdine nesposobne te ženin pe, a varesave pire voljasa odlučin kaj či ženina pe zbog o Carstvo nebesko. Ko šaj prihvatin, nek prihvatin!" 13 Askal andine lešče e čhavren te čhol pire vas pe lende thaj te pomolil pe pale lende, a e učenikurja godova braninas lende. 14 A o Isus pe godova phendas lende: "Mučen e čhavren te aven mande thaj na branin lende, kaj kasavende pripadil o Carstvo nebesko!" 15 Čhuta pire vas pe lende thaj askal đelotar okotar. 16 Askal nakhlo dži ko Isus varesavo manuš thaj phučla les: "Učiteljina, savo lačhipe trubul te čerav te dobiv večno trajo?" (aiōnios g166) 17 A o Isus phendas lešče: "Sostar phučes man palo lačhipe? Samo si jek lačo – o Del! Te kames te des ando večno trajo, inčar e zapovesti!" 18 A vo phučas: "Save zapovesti?" A o Isus phendas: "Akala zapovesti: 'Na mudar, na čer preljub, na čor, na svedočisar hohamne, 19 poštuisar čire dade thaj čire deja' thaj 'volisar okoles savo si čiro pašutno sago korkoro tut.'" 20 A o terno phendas lešče: "Godova sa već čeravas. So još falil man?" 21 A o Isus phendas lešče: "Te kames te aves savršeno, dža thaj bičin so si tut, a e love podelisar e čorende thaj avela tut blago ando nebo. Askal av thaj sledisar man!" 22 Kana o terno ašundas godova, ražalostisajlo thaj đelotar, kaj či kamlas te bičinel piro baro barvalipe. 23 A o Isus pe godova phendas e učenikonende: "Čače phenav tumende, phare o barvalo dela ando Carstvo nebesko! 24 Još phenav tumende: Majloče si e kamilače te načel kroz e suvjače kan nego e barvalešče te del ande Devlesko carstvo!" 25 Kana godova ašundine e učenikurja zurale začudisajle thaj phučenas pe: "Pa ko askal šaj spasil pe?" 26 A o Isus lače dikhla pe lende thaj phendas: "E manušenje si godova potpuno nemoguće, ali na vi e Devlešče. E Devlešče si sa moguće." 27 Askal o Petar phendas lešče: "Ake, amen sa muklam te šaj džas pale tute. So dobisarasa pale godova?" 28 A o Isus phendas lende: "Čače phenav tumende, kana o Del obnovila o them, me, o Čhavo e Manušesko, bešava po prestolje mungre slavako, askal vi tumen bešena pe dešuduj prestolja thaj sudina e dešuduj plemenurja e Izraelošče. 29 A svako ko zbog mande mučel piro čer, ili pire phralen, ili pire phejen, ili pire dades, ili pire deja, ili pire romnja, ili pire čhavren, ili piri phuv, primila šel drom majbut thaj nasledila o večno trajo. (aiōnios g166) 30 Ali, but save si akana prve avena palune, a e palune avena prve."

20 "Kaj o nebesko Carstvo si slično e domačinesa savo detharinako rano inklijsto te unajmil e radnikonen pale piro vinograd. 2 Taj pogodisajlo e radnikonenca pale jek dnevnicu taj bičhaldal len ande piro vinograd. 3 Oko injato sato palem inklijsto po trgo taj dikhla okote aver manušen sar ačhen bi bučarne, 4 taj vi lende phendas: 'Džan vi tumen taj čeren buči ande mungro vinograd taj počinava tumende kozom si pravedno.' 5 Gajda vi von đe te čeren buči ando vinograd. Varekaj katar o mismeri taj oko trin saturja čerda isto. 6 A kana palem inklijsto oko o pandžto sato palo mismeri, arakhlas avren manušen sar ačhen okote bi bučarne. Phendas lende: 'Sostar ačhen akate celo đes taj bi bučarne?' 7 Von phendine lešće: 'Khonik či dija men buči.' A vo askal phendas lende, 'Džan askal vi tumen ando mungro vinograd.' 8 Talerjat o gospodari e vinogradsko phendas pire upravitelješće: 'Akhar e radnikonen taj isplatil len redom, katar okola save aviline palune dži ke prve.' 9 E radnikurja save aviline oko o pandž saturja dobisardine sasti dnevnicu. 10 Pe godova okola save aviline prve te čeren buči gndisardine kaj dobina majbut, ali vi von dobisardine isto. 11 Line e love taj počnisardine te prigovorin protiv o vinogradari. 12 Taj phendine: 'Akala palune čerdine buči samo jek sato, a tu počindan lende isto sago vi amende save sasto đes phare čerdam buči taj phabilam po kham!' 13 O gospodari e vinogradsko bolda pe ke jek lendar taj phendas: 'Manušeja, naj sem nepravedno prema tute. Či li pogodisajlan manca pale gadiči? 14 Le so si čiro taj džatar. A me kamav te dav akalešće savo avilo paluno isto sago vi tuće. 15 Naj man li pravo te čerav mungre lovenca so kamav? Ili san zavidno kaj sem lačo prema leste?' 16 Gajda okola save si akana palune avena prve, a e prve avena palune." 17 Kana o Isus delas ando Jerusalem, lijas pesa pire dešduj učenikonen pe rig taj dromesa phendas lende: 18 "Ake, das ando Jerusalem. Okote predaina man, e Čhave e Manušešće, e šorvale rašajende, taj e učiteljende e zakonestar, save osudina man po smrto, 19 taj predaina man okolende kaj či pindžaren e Devle te maren muj mandar, te bičuin man, taj te razapnin man. Ali me o trito đes uštava andar e mule." 20 Askal avili dži ko Isus e dej e Zevedejevešće čhavendi, zajedno pire čhavenca, taj peli pe kočica angle leste te vareso zamolil les. 21 O Isus phučla lat: "So kames?" A voj phendas: "Zapovedisar te mungre čhave ande čiro Carstvo bešen paše tute, jek pe čiri desno a aver pe čiri levo rig." 22 A o Isus phendas: "Či džanen so roden. Dali šaj pijen andar o tahtaj savo me uskoro pijava?" A von phendine lešće: "Ej, šaj!" 23 A vo phendas lende: "Čače pijena andar mungro tahtaj pherdo patnje, ali naj mungro te odrediv ko

bešela pe mungri desno, taj pe mungri levo rig. Godola thana dena pe okolende pale kaste lačhardas mungro Dad." 24 Kana godova ašundine aver deš učenikurja, holjajle pe duj phrala. 25 Askal o Isus akharda len peste, taj phendas lende: "Džanen kaj e vladarja okolende save či pindžaren e Devle okrutno vladin pe lende a e moćnikurja volin te gospodarin pe lende. 26 Ali maškar tumende te či avel gajda! Nego savo kamel te avel majbaro maškar tumende, nek služil tumende. 27 Taj ko kamel te avel majbaro maškar tumende, neka avel tumaro sluga. 28 Baš sago kaj ni me, o Čhavo e Manušesko, či avilem te služin mande, nego te me služiv averende taj te dav mungro trajo sago počin pale butende." 29 Kana o Isus taj e učenikurja inklijenas andar o Jerihon, pale lende teljardas o but o them. 30 Taj dik, pašo drom bešenas e duj kore manuša, pa kana ašundine kaj o Isus načel počnisardine te čhon muj: "Smilujisar tut amende Gospode, e Davidešće Čhaveja!" 31 O them čholas muj pe lende te na rknin, ali von čhonas muj još majzurale: "Smiluisar tut amende Gospode, e Davidešće Čhaveja!" 32 A kana o Isus godova ašunda, ačhada pe paše lende, akharda len taj phučla: "So kamen te čerav tumende?" 33 A von phendine lešće: "Gospode, de te šaj dikhlas." 34 O Isus sažalisajlo taj čhuta pire vas pe lende jakha, taj von ande data šaj dičhenas. Taj teljardine pale leste.

21 Kana o Isus taj e učenikurja aviline paše pašo Jerusalem taj avile ando gav Vitfaga pe Maslinsko gora, o Isus bičhaldas anglal pire duj učenikonen. 2 Taj phendas lende: "Džan ando gav savo si angle tumende taj odma aračhena e phangle magarica taj lasa laće terne magare. Putren len taj anen mande. 3 A ako vareko phučel tumen vareso, samo phenen: 'Trubun e Gospodešće', taj odma mučena len." 4 Godova dogodisajlo te pherdol okova so sas phendo prekal o proroko: 5 "Phenen e themende andar o Jerusalem: 'Ake, čiro caro avel tuće, ponizno si taj jašil po magarco, po terno e magaricako.'" 6 E učenikurja đe te čerdine sar o Isus phendas lende. 7 Andine e magarica taj e terne magarco taj preko lende čhutine pire ogrtača, te šaj o Isus bešel pe lende. 8 O but o them buljarelas tele po drom pire ogrtačurja te sikaven lešće čast, a aver čhinenas e ranja e patrjenca katar e kaš taj buljarenas po drom. 9 A o them savo džalas angle leste taj pale leste čhonas muj: "Hosana e Davidešće Čhavešće! Blagoslovime okova savo avel ando alav e Gospodesko! Hosana e Devlešće ande visine!" 10 Kana o Isus dijas ando Jerusalem, sasto gav uzbunisajlo taj phučenas pe: "Ko si akava?" 11 A o but o them phenelas: "Akava si o Isus, o

proroko andar o Nazaret ande Galileja." 12 Askal o Isus dijas ando Hramo, thaj trada andar leste sa okolen save bičinenas thaj činenas ando Hramo. Okolende kaj phađenas e love dijas mujal e sinije, a okolende save bičinenas e golubonen dijas mujal e klupe. 13 Thaj phenelas lende: "Ando Sveto lil ačhel ramome: 'Mungro Hramo trubul te avel molitveno čer', a tumen čeren lestar than kaj čiden pe e razbojnikurja!" 14 Askal avile dži ko Isus ando Hramo e kore thaj e bande thaj vo sastardas len. 15 A kana dikhline e šorvale rašaja thaj e učitelja e Mojsiješće zakonestar e čudurja save čerda thaj e čhavren ando Hramo sar čhon muj: "Hosana e Davidešće Čhavešće!", zurale holjajle, 16 thaj phučline les: "Ašunes li tu so akala čhavra čhon muj?" O Isus phendas lende: "Ašunav. Sigurno čitosardine ando Sveto lil: 'Čerdan te slavin tut e čhavra thaj e bebe.'" 17 Askal mukla len thaj andar o gav Jerusalam bolda pe ando gav savo akhardolas Vitanija, te okote račarel. 18 Detharinako rano, kana boldelas pe ando Jerusalam, o Isus bokhajlo. 19 Dikhla e smokva pašo drom thaj nakhlo dži late, ali pe late či arakhlas khanči osim patrija. Zato phendas lače: "Nikada te na avel majbut rodo pe tute!" Thaj e smokva odma šučili. (aiōn g165) 20 E učenikurja pe godova začudisajle thaj phučline: "Sar e smokva gajda sigo šučili?" 21 A o Isus phendas lende: "Čače phenav tumende, te pačajine thaj či posumnjin, či čerena samo godova so me čerdem e smokvasa, nego te phendine akale planinače: 'Vazde tut akatar thaj čhude tut ando more!', godova vi avela. 22 Sa so zamolin ando pačipe, primina." 23 O Isus delo ando Hramo. Dok okote sikavelas, avile leste e šorvale rašaja thaj e themešće starešine thaj phučline les: "Savo autoriteto si tut te čeres akava? Ko dija tut vlast pale godova?" 24 A o Isus phendas lende: "Vi me tumen vareso phučava. Ako tumen mande phenen, vi me phenava tumende ko dija man vlast. 25 Dali o Del phendas e Jovanošće te bolel e manušen, ili e manuša phendine lešće te čerel godova?" Von čerenas svato maškar peste: "Te phendam 'o Del phendas lešće', phučela men 'Sostar askal či pačajine lešće.'" 26 A te phendam katar e manuša, dar amende katar o but o them kaj savora pačan kaj si o Jovano proroko." 27 Zato phendine e Isusešće: "Či džanas." A o Isus phendas lende: "Askal ni me tumende či phenava katar man vlast!" 28 "So gndin pale akava: Varesave manušen sas duj čhave. Avilo ko prvo thaj phendas lešće: 'Čhaveja, dža ađes thaj čer buči ando vinograd!' 29 O čhavo phendas: 'Či kamav!' Ali maj posle predomislasajlo thaj delo. 30 Askal o dad isto gajda phendas vi e aver čhavešće. A o čhavo phendas 'Džava, raja', ali či delo. 31 Savo katar akala duj džene čerda e volja pire dadešči?" A von phendine: "Okova prvo". A o Isus pe godova

phendas lende: "Čače phenav tumende, e bludnikurja thaj e carinikurja dena majsigo tumendar ande Devlesko carstvo! 32 Kaj o Jovano savo bolelas avilo te sikavel tumende o pravedno drom, ali tumen či pačajine lešće, a e carinikurja thaj e bludnikurja pačajine. A tumen čak vi kana sa godova dikhline, či predomislasajle thaj či pačajine lešće." 33 "Ašunen još jek prispodoba: Varesavo manuš posadisardas vinograd thaj ogradisarda les, hanadas ande leste than kaj čičidelas pe e drak te čerel pe e mol thaj vazda stražarsko kula. Askal dijas o vinograd ando najam e vinogradarende thaj delo po drom. 34 Kana avili e vrjama pale berba, bičhaldas e slugen te len lesko deo katar o urodo. 35 Ali e vinogradarja astardine e slugonen, ječe mardine, a ječe mudardine, a po trito čhudenas e bara dok či mudardine les. 36 Pale godova vo bičhaldas majbut slugonen nego prvo data, ali e vinogradarja vi lenca čerdine isto gajda. 37 Po krajo bičhaldas lende pire čhaves kaj gndisardas: 'Mungre čhave pošujina.' 38 Ali kana e vinogradarja dikhline e čhave phendine: 'Akava si o nasledniko. Hajde te mudaras les, thaj te ačhel amende lesko nasledstvo.' 39 Astardine les, čhudine les avri andar o vinograd thaj mudardine les." 40 Askal o Isus phučla len: "So gndin, sar o gospodari e vinogradesko čerela okole vinogradarenca kana boldela pe?" 41 Von phendine lešće: "Godole zlikovconen mudarela bi milako, a o vinograd dela aver vinogradarende, save dena les o urodo kana pale godova avela e vrjama." 42 O Isus phendas lende: "Sigurno čitosardine ando Sveto lil: 'Bar saves e graditeljurja odbacisardine postanisardas glavno bar e temeljesko. Godova si e Gospodesko delo, čudesno ande amare jakha.' 43 Zato phenav tumende kaj lela pes tumendar e Devlesko carstvo, thaj dela pe okole themešće save dena lešće plodurja. 44 Thaj ko god perel pe godova bar phadelape, a godova bar smrskola okoles pe kaste perel." 45 Kana e šorvale rašaja thaj e fariseja ašundine e paramiče thaj hačardine kaj mothol pale lende, 46 kamenas te astaren les, ali daranas katar o them savo pačalas kaj si o Isus proroko.

22 O Isus palem počnisarda te čerel lende svato ande paramiče. 2 "O Carstvo nebesko si sago kana varesavo caro čerel svaturja pire čhavešće. 3 Thaj bičhaldala pire slugonen te akharen okolen save sas akharde pe svaturja, ali von či kamline te aven. 4 Palem bičhaldas aver slugen thaj phendas: Phen e akhardende: 'Dik, pripremisardem tumende e gozba. Peklam o majlačo mas. Sa si spremno. Aven pe svaturja!' 5 A von či marisardine thaj deletar svako pire dromesa, jek ande pire njive, aver dele te trguin. 6 A okola save ačhiline astardine e carošće slugen, mardine len thaj

mudardine len. 7 Pe godova o caro holjajlo, thaj bičhaldas piri vojska te mudaren okolen save mudardine lešče slugen thaj te den jag lengo gav. 8 A e slugende phendas: 'Ake e svaturja si spremne, ali e akharde naj dostojne te aven. 9 Askal džan pe droma avri andar o gav thaj akharen pe svaturja kas god aračhen.' 10 Gajda inklijstine godola sluge pe droma thaj čidine sa okolen saven arakhline, e bilačhen thaj e lačhen. Thaj e sala pale svaturja pherdili. 11 Ali kana o caro dijas andre te dičhel okolen save sas akharde, dikhla okote ječhe manušes savo nas lačhardo ande svečane svaturjače drže. 12 Thaj phendas lešče: 'Manuša, sar avilan akate bi e svaturjende drže?' A o manuš ačhilo bi alavesko. 13 Askal o caro phendas e slugende: 'Phanden lešče vas thaj lešče pungere, thaj čhuden les avri ando majhanduk tunjariko, okote avela o roipe thaj o škripipe e dandena katar e duk. 14 Kaj but si akharde, ali si cara odabrane.'" 15 Askal e fariseja dele thaj dogovorisaile sar te astaren e Isuse ando svato. 16 Thaj odlučisardine te bičhalen leste pire učenikonen zajedno e Irodešče manušenca te phučen les: "Učiteljina, džanas kaj phenes čačipe thaj či inčares khonikašči rig, niti dičhes ko si ko, nego sičares palo čačo drom e Devlesko. 17 Akana phen amende so gndis tu? Dali tromal te del pe o porez e rimsko carošče ili te či del pe." 18 A o Isus džanglas lende bilačhe gindurja thaj phendas: "Sostar kamen te crden man ande tumari zamka, licemerja? 19 Sikaven mande e kovanica savjava počinen o porez. Thaj phenava tumende." Andine lešče e kovanica. 20 A vo phučlas len: "Kasko si akava liko thaj o alav pe kovanica?" 21 A von phendine lešče: "E carosko." Askal phendas lende: "Den askal e carošče so si e carosko a e Devlešče trubun te den so si e Devlesko." 22 Kana godova ašundine zadivisaile, mukline les thaj deletar. 23 Godova des aviline leste e sadukeja, save phenen kaj naj uštippe andar e mule, thaj phučline e Isuse: 24 "Učiteljina, o Mojsije phendas: 'Ako varesavo manuš savo sas oženime merel, a nas les čavra, neka lesko phral oženil pe lešče udovicava sar voj bijandasas čhaves savo avela nasledniko e mulesko thaj vazdel lešče potomstvo.' 25 Amende sas efa phrala. Prvo oženisaile thaj mulo, pa pošto nas les čavra lesko phral oženisaile lešče romnjava. 26 Isto gajda sas vi e dujto thaj e trito phralesa, pa sa gajda dži ke eftato phral. 27 A posle savorende muli vi e romnji. 28 Kašči askal voj avela romnji ando des kana avela o vaskrsenje kana sas udajime pale sa efa phral?" 29 A o Isus phendas lende: "Hohaven tumen, kaj či pindžaren o Sveto lil niti e Devlešči sila! 30 Kaj kana avela o vaskrsenje e manuša či ženina pe niti udajina pe, nego avena sar e andelurja e Devlešče po nebo. 31 Sigurno

čitosardine ando Sveto lil so o Del phendas tumende palo vaskrsenje andar e mule: 32 'Me sem o Del e Avraamesko, e Isakosko, thaj Jakovesko' save dumut muline. A o Del naj o Del e mulengo, nego e džudengo!" 33 Kana o but o them ašundas godova, čudinas pe lešče sikavipešče. 34 Kana e fariseja ašundine kaj o Isus pire alavenca phandadas e sadukejengo muj, čidine pe vi von, 35 a jek lendar savo sas učitelj e zakonesko phučlas e Isuse te crdel les ande zamka: 36 "Učiteljina, savi si majvažno zapovest ande Mojsijesko zakono?" 37 A o Isus phendas lende: "'Volisar e Gospode čire Devle saste ileja, čire saste dušava, thaj čire saste godava!' 38 Godoja si prvo thaj majvažno zapovest. 39 A e dujto zapovest si isto gajda važno: 'Volisar čire pašutnes sago korkoro tut!' 40 Sa aver zapovesti ande Mojsijesko zakono thaj sa e spisurja e prorokonende ačhen pe akala duj zapovesti." 41 Dok e fariseja sas još zajedno, o Isus phučla len: 42 "So gndin palo Hristo, kasko si vo čhavo?" A von phendine: "E carosko Davidesko." 43 A vo askal phučla len: "Sostar askal o David nadahnime e Sveto Duhosa akharda e Hristo pire Gospodesa kana phenel: 44 'Phenel o Gospod mungre Gospodešče: Beš pe mungri počasno desno rig dok či čhav čire dušmajen tale čire pungere'? 45 Pa kana korkoro o David akhardas les pire Gospodeja, sar askal šaj avilosas lesko čhavo?" 46 Thaj khonik či džanglas te odgovoril lešče ni alav. Katar godova des khonik majbut khanči či usudisaile te phučel les.

23 Askal o Isus phendas e but e themešče thaj pire učenikonende: 2 "E učitelja e Mojsiješče zakonestar thaj e fariseja sikaven e Mojsijesko zakon. 3 Zato ašunen thaj čeren sa so phenen tumende, ali na čeren okova so von čeren, kaj von korkoro či čeren okova so avren sikaven. 4 Von čhon pe manuša phare tereturja, save phare šaj indarenpe, a korkoro ni e najesa či mrdnon te pomognin te indaren godova pharipe. 5 Sa so čeren, čeren pale godova te e manuša dičhen len. Na primer buljaren pire kutijice e stihonenca andar o Sveto lil po čikat thaj lundžaren e rese pe piro ogrtači. 6 Pe gozbe Volin te bešen pe počasne thana ande sinagoge thaj pe gozbe. 7 Lačhe si lende kana e manuša pozdravin len pe javne thana thaj kana akharen len 'učiteljina.' 8 A tumen na te akharen tumen učiteljenca, kaj si tumen samo jek Učitelj, a savora tumen sen phral thaj pheja. 9 Thaj khonikas pe phuv na akharen tumare dadesa, kaj si tumen samo jek Dad – okova po nebo. 10 Thaj na akharen tumen vođe kaj si tumen samo jek Vođa – o Hristo. 11 Savo si majbaro maškar tumende avela tumende sluga! 12 Ko korkoro pes uzvisil, avela ponizime, a ko korkoro pes ponizil,

avela uzvisime. 13 Teško tumende, učiteljurja e Mojsiješće zakonestar thaj farisejalen! Licemerja! Tumen phandaven o Carstvo nebesko angle manuša. Korkoro či den ande leste, a či mučen te den ande leste ni okola save godova kamen. 14 [Teško tumende, učiteljurja e Mojsiješće zakonestar thaj farisejalen! Licemerja! Kaj han e udovicende čera, a čeren tumen kaj sen pobožne gajda kaj molin lundže molitve anglo them. Pale godova avena majstrože osudime.] 15 Teško tumende, učiteljurja e Mojsiješće zakonestar thaj farisejalen! Licemerja! Putujin e moreja thaj e phuvjava te pridobin ječe ande tumari vera, a kana postanil tumaro sledbeniko, čeren lestar te avel manuš savo zaslužil duvar majgore muke ando pakao nego so avela tumen! (Geenna g1067) 16 Teško tumende, kore vođe! Tumen phenen: 'Te vareko hal solah e Hramosa, godova khanči či mol. Ali te vareko hal solah e Hramošće sunakajesa, askal si phanglo godole solahasa.' 17 Tumen sen dile thaj kore! Pa so si majbaro – o sunakaj ili o Hramo savo posvetil o sunakaj? 18 Thaj još phenen: 'Te vareko hal solah e žrtvenikosa, godova khanči či mol. Ali te vareko hal solah e darosa savo si po žrtveniko, askal si phanglo godole solahasa.' 19 Koralen! So si majbaro – o daro ili o žrtveniko savo posvetil o daro? 20 Ko dakle hal solah e žrtvenikosa, hal solah e žrtvenikosa thaj okolesa so si sa pe leste. 21 A ko hal solah e Hramosa, hal solah e Hramosa thaj e Devlesa savo si ande leste. 22 Ko hal solah e nebosa, hal solah e Devlešće troneja thaj e Devleja savo bešel pe leste. 23 Teško tumende, učiteljurja e Mojsiješće zakonestar thaj farisejalen! Licemerja! Kaj redovno den deš posto katar e nana, katar mirodija thaj katar o kimo, a mukline okova so si majvažno ando zakon: pravda, milosrđe thaj paćipe. Trubun te den deš posto, ali či troman te zanemarin majvažne stvarja andar o zakon. 24 Kore vođe! Cedin o paj te či pen e pajesa vi e cincares, a kadre sen, te nakhaven e saste kamila! 25 Teško tumende učiteljurja e Mojsiješće zakonestar thaj farisejalen! Licemerja! Thoven tumaro tahtaj thaj tumaro čaro avrjal, a andral sen pherde pohlepa thaj želja te ugodin korkoro tumende. 26 Koro farisejina! Majsigo thov o tahtaj andral thaj avela čisto vi avrjal. 27 Teško tumende učiteljurja e Mojsiješće zakonestar thaj farisejalen! Licemerja! Tumen sen sago okrečime limorja. Avrjal izgledin šukar, a andral sen pherde mulikane kokala thaj svakojako melalipe! 28 Gajda vi tumen e manušende avrjal sikaven tumen pravedne, ali andral sen pherde licemerje thaj bezakonje. 29 Teško tumende učiteljurja e Mojsiješće zakonestar thaj farisejalen! Licemerja! Tumen e prorokonende vazden limorja thaj kitin e spomenikurja e pravednikonende, 30 thaj tumen phenen: 'Te amen trajisardamas ande vrjama amare pradađendi, či

avilosas amen talo lenca ande godova te čoras o rat e prorokonengo.' 31 Gajda korkoro protiv tumende svedočin kaj sen potomkurja okolende save mudardine e prorokonon. 32 Tumen dovršin, dakle, godova so von započnisardine! 33 Tumen sapende čhavra! Otrovnno leglona! Sar našena katar e paklošči bari jag? (Geenna g1067) 34 Pale godova, ake, bičhalav tumende e prorokonon, e mudracen thaj e učiteljen e Mojsiješće zakonestar. Varesaven lendar mudarena thaj razapnina, a averen bičuina pe sinagoge thaj progonina len katar o gav dži ko gav 35 gajda perela pe tumende o rat sa e pravednikonengo savo si čordo pe phuv, katar o rat e Aveljesko savo sas pravedno dži ko rat e Zaharijasko, e Varahijjesko čhavesko, saves tumen e Židovurja mudardine maškar e svetinja e hramošči thaj maškar o žrtveniko. 36 Čače phenav tumende, kaj sa godova rat perela pe akava naraštaj." 37 "Jerusalime, Jerusalime, savo mudares e prorokonon thaj čhudes e bara dži ko smrto pe okola save si e Devlestar bičhalde tuče! Kozom drom lijem te čidav čire čhavren, sago e kvočka savi čidel pire pujen tale pešće phaka, ali tumen či kamline! 38 Ake, akana tumaro čher ačhela pusto. 39 Kaj phenav tumende, či dičhena man majbut dok či phenen: 'Blagoslovime si okova savo avel ando alav e Gospodesko!'"

24 Kana o Isus inklijsto andar o Hramo thaj teljarda majdur, avile leste lešće učenikurja thaj sikadine lešće e hramošće zgrade. 2 A o Isus phendas lende: "Dičhen sa akava? Čače phenav tumende, či ačhela katar akava ni bar pe bareste. Svako avela harado." 3 Kana o Isus bešelasi pe Maslinsko gora, lešće učenikurja avile leste pe rig thaj phendine lešće: "Phen amende kana o hramo avela harado thaj savo avela o znako kana palem aveja thaj kana avela o krajo e themesko." (aiōn g165) 4 O Isus phendas lende: "Len sama te či vareko hohavel tumen, 5 kaj but avena ande mungro alav thaj phenena: 'Me sem o Hristo' thaj e buten hohavena. 6 Kana ašunena pale raturja thaj kaj čerel pe svato pale raturja, na te uznemirin tumen kaj godova moraš te dogodil pe, ali godova još naj o krajo. 7 Zaratila o them protiv o them thaj o carstvo protiv o carstvo. Avela potresurja ande but e krajurja e themesće thaj zavladila e bari bok. 8 Sa godova si samo o početko e bare mukengo sago kaj si e manušnja kana trubul te bijanel. 9 Askal predaina tumen te aven mučime thaj mudarena tumen, a zbog mande sa o them mrzala tumen. 10 Thaj but o them askal hasarela o paćipe thaj jek avren izdaina thaj mrzana. 11 Avena e but hohamne prorokurja thaj hohavena e bute manušen. 12 Zbog o baro bezakonje e butendi ljubav šudrola. 13 Ali ko god ačhel verno dži ko krajo avela spasime. 14 E

bahtali nevimata palo Carstvo nebesko propovedila pes pe sasti phuv sago svedočanstvo sa e themende, a askal konačno avela o krajo. **15** A kana dičhena 'e grozota savi anel uništenje' pale savo phendas o proroko Danilo, kaj ačhel po sveto than ando Hramo (ko akava čitol neka svatil) **16** askal okola save si ande Judeja neka našen ande gore. **17** Taj ko aračhel pe po čher, neka či fuljel tela ando čher te lel vareso! **18** A ko aračhela pe ande njive, neka na boldel pe čhere te lel o ogrtači! **19** Teško e khamne manušnjende taj okolende save den čuči e čhavren ande godola đesa. **20** Molin tumen e Devlešće te tumaro našipe či avel ando ivend ili ando savato. **21** Kaj askal avena gajda strašne nevolje save nas katar o postanko e themesko, niti varekana avena. **22** Kana godola đesa či harnjardinesaspe khonik či ačhilosas džudo. Ali zbog okola saven o Del izabirisardas, godola đesa avena harnjarde." **23** O Isus majdur phendas: "Ako vareko askal phenel tumende: 'Ake, o Hristo si akate!' ili: 'Eketalo, okote si!', na paćan. **24** Kaj avena e hohamne hristurja taj e hohamne prorokurja save čerena čudesne znakurja taj čudurja sar hohadinesas, ako si moguće, čak vi okolen saven o Del izaberisardas. **25** Ake, anglal upozorisardem tumen. **26** A, te phendine tumende: 'Ake, o Hristo si ande pustinja', na džan okote. Ili ako phenen: 'Aketalo ande tajne sobe', na paćan lende. **27** Kaj avela očitó sago kana e munja sevníl katar o istoko taj zasvetíl sa dži ko zapado, gajda avela vi kana me, o Čhavo e Manušesko, avava. **28** Godova avela očitó sago kaj čiden pe e lešinarja okote kaj si o mulo telo. **29** A odma pale nevolje godola đes, 'o kham kaljola, taj o čhonut majbut či sijola, e čereja perena katar o nebo, taj e nebeske sile avena uzdrómome.' **30** Askal po nebo sikadola o znako e Manušesće Čhavesko. Taj sa e plemenurja pe phuv marena pe ando kolin taj rovena kana dičhena man, e Čhaves e Manušesće, sar avav pe nebeske oblakurja, e silava taj e bare slavava. **31** Taj bičhalava mungre andelen e glasno trubasa taj von čidena okolen saven me losardem katar sa e štar riga sa e themešće, katar jek krajo dži ke aver krajo nebesko. **32** Sićon katar e smokva. Kana laće krاندže kovljon taj mućen pešće patrja, džanen kaj paše si o milaj. **33** Gajda vi tumen kana dičhen sa akala događaja, džanen kaj si vo paše anglo vudar. **34** Čaće phenav tumende: Akava naraštaj či načhela dok sa akava či avel. **35** O nebo taj e phuv načhena, ali mungre alava či načhena. **36** A pale godova đes taj pale godova sato khonik khanči či džanel kana godova avela, ni e andelurja po nebo, ni o Čhavo, nego samo o Dad. **37** Sago kaj sas ande Nojašči vrjama, gajda avela kana avava me, o Čhavo e Manušesko. **38** Baš sago ande okoja vrjama,

majsigo nego so sas o potop, e manuša hanas, pijenas, ženinas pe taj udajinas pe sa dži ke okova đes kana o Noja dijas ando baro brodo, **39** taj khanči či haćardine so avela dži kaj god či avilo o potop taj sa indarda len, gajda avela vi kana avela o Čhavo e Manušesko. **40** Askal avena duj džene pe njive jek lela pes, a aver mućela pe. **41** Duj manušnja ando mlinó meljina o điv, Jek lela pes, a aver mućela pe. **42** Zato aven džungade taj len sama, kaj či džanen savo đes avela tumaro Gospod. **43** Ali akava džanen: te o domaćino džanglasas ande savi vrjama e raćaći avela o čor, avilosas džungado taj či muklasas te o čor provalil ande lesko čher. **44** Pale godova vi tumen aven spremne, kaj me, o Čhavo e Manušesko, avava ando časó kana či oćekuín man." **45** "Paćivalo taj mudro sluga si okova saves o gospodari čhuta pe sa aver sluge te del len habe ande pravo vrjama. **46** Blago godole slugašće saves lesko gospodari, kana avela, aračhel kaj čerel gajda. **47** Čaće, phenav tumende, o gospodari čhola godole slugone te upravljil lešće saste barvalipeja. **48** Ali te o bilaćho sluga phenel ande piro ilo: 'Mungro gospodari či avela gajda brzo', **49** taj počnil te marel e aver slugen taj hal taj pijel e matarnenca, **50** avela lesko gospodari ande godova đes kana vo či ni gindil taj ando časó kana vo či ni džanel, **51** taj strogo kaznila les taj odredila lesko than maškar e licemerja, okote avela o roipe taj o škripice e dandenca."

25 O Isus askal phendas: "O Carstvo nebesko avela sago kana e deš čheja line pire stenkurja taj inklijstine anglo mladoženja. **2** Pandž čheja sas dile a pandž mudre. **3** E dile čheja line pesa pire stenkurja, ali či line vi zetino kozom trubulas len. **4** A e mudre čheja line pire stenkurja taj vi zetino ande pire posude. **5** Sar o mladoženja kasnilas, sa e čhejen lijas e lindri taj o soviipe. **6** A ande opaš e rjat ašundili e vika: 'Ake, areslo o mladoženja! Inklijen angle leste!' **7** Askal sa e čheja uštile taj pripremisardine pire stenkurja. **8** A e dile čheja askal phendine e mudre čhejende: 'Den amen cara katar tumaro zetino, kaj amare stenkurja mudardona.' **9** Ali e mudre phendine lende: 'Nisar! Kaj sigurno či avela dosta vi pale tumende taj vi pale amende. Džan majlaćhe taj činen tumende zetino.' **10** Ali, kana von đeletar te čin zetino, avilo o mladoženja, taj okola čheja save sas spremne dine lesa andre pe svaturja, a o vudar phandadilo pale lende. **11** Pale godova aviline vi okola aver čheja taj ačhile te čhon muj: 'Gospode! Gospode, putar amende!' **12** Ali vo mothoda lende: 'Čaće phenav tumende: Či pindžarav tumen.' **13** Zato aven džungade taj len sama, kaj či džanen ni o đes ni o sato ande savo avava!" **14** O Isus majdur

motholas: "Askal o Carstvosa nebesko avela sago varesavo manuŝes kana teljarel po drom. Akhardas pire slugen thaj poverisardas lende piro barvalipe. 15 Jecheŝte dija pandž gone sunakaj, ko dujto dijas duj gone, a ko trito dijas jek gono sunakaj, gajda svakoneŝče dijas prema godova kozom ko sas sposobno, thaj askal delotar po drom. 16 O sluga savo dobisarda pandž gone sunakaj odma delo, ułožisardas o sunakaj thaj zaradisarda joŝ pandž gone. 17 Isto gajda, okova kaj dobisardas duje gone sunakaj zaradisarda joŝ duj. 18 A o sluga savo dobisardas jek gono, hanadas hv ande phuv thaj ande late garadas e gospodareŝče love. 19 Pale lungo vrjama bolda pe o gospodari thaj manglas katar e sluge te položin leŝče o računo. 20 Kana avilo leste okova kaj dobisarda pandž gone sunakaj, andas joŝ pandž thaj phendas: 'Gospodarina, dijan man pandž gone sunakaj. Ake, me zaradisarem lenca joŝ pandž.' 21 A o gospodari phendas leŝče: 'Lače, lačo thaj pačivalo slugona! Sanas pačivalo ande cikne stvarja, zato čhava tut te upravis pe majbare stvarja. Av thaj raduisar tut čire gospodaresa!' 22 Askal avilo leste o sluga savo dobisardas duj gone sunakaj thaj phendas: 'Gospodarina, mande poverisardan duj gone sunakaj. Ake, me zaradisardem joŝ duj.' 23 A o gospodari phendas leŝče: 'Lače, lačo thaj pačivalo slugona! Sanas pačivalo ande cikne stvarja zato čhava tut te upravis pe majbare stvarja. Av thaj raduisar tut čire gospodaresa!' 24 Askal avilo leste vi okova sluga saveŝče dijas jek gono thaj phendas: 'Gospodarina, Džanglem kaj san pharo manuŝ, žanjis okote kaj či sijosardan thaj čides okote kaj či posadisardan. 25 Zato darajlem thaj garadem čiro gono ande phuv. Ake, le čiro gono e sunakajesa!' 26 Ali o gospodari phendas leŝče: 'Bilačo thaj leno slugona! Džanglan kaj žanjiv okote kaj či sijosardem thaj kaj čidav kaj či posadisardem? 27 Trubujanas askal barem te ułožis mungre love ande banka thaj kana me boldemas man lijemas mungre love e kamatenca. 28 Zato len lestar e love thaj den okoleŝče kas si deŝ gone sunakaj! 29 Kaj okoles kas si, dela pe leŝče joŝ, thaj avela les ando izobilje, a okoles kas naj, lela pe lestar vi okova so si les. 30 Zato akale beskorisno slugos čhuden avri ando majhanduk tunjariko. Okote avela roipe thaj škripie e dandenca.'" 31 A o Isus phendas: "Kana avela o Čhavo e Manuŝesko ande piri slava thaj lesa sa leŝče andelurja, beŝela po prestolje pire slavako. 32 Askal sa o them čidela pe angle leste, a vo sago kaj o pastiri odvoil e bakhren katar e buzinja. 33 Gajda odvoila e pravednikonen pe piri desno rig, a averen pe piri levo rig. 34 Askal o caro phenela okolende pe desno rig: 'Tumen, saven mungro Dad blagoslovisarda, aven thaj primin ando nasledstvo o

carstvo savo si pripremimo pale tumende katar o postanko e themesko! 35 Kaj semas bokhalo, a tumen dine man te hav; semas truŝalo, a tumen dine man te pijav; semas stranco, a tumen primisardine man; 36 nango semas, a tumen dine pe mande drze; semas nasvalo, a tumen vodinas e briga pale mande; semas ande tamnica, a tumen aviline mande.' 37 Askal e pravednikurja phenena leŝče: 'Gospode! Kana dikhlam tut kaj sanas bokhalo, thaj dijam tut te has? Ili kana sanas truŝalo, thaj dijam tut te pijes? 38 Kana dikhlam tut sago strancone, thaj primisardam tut? Ili bi drzengo thaj dijam pe tute? 39 Kana dikhlam tut kaj sanas nasvalo ili ande tamnica, thaj avilam tute?' 40 A o caro phenela lende: 'Čače phenav tumende: Sogod čerdine jecheŝče katar akala mungre majcikne phral, mande čerdine!' 41 Askal phenela vi okolende kaj si pe leŝči levo rig: 'Džantar mandar proklete ando večno oganj savo si pripremimo e bendeŝče thaj leŝče andelende. (aiñnios g166) 42 Kaj semas bokhalo, a tumen či dine man te hav; truŝalo semas, a tumen či dine man te pijav; 43 stranco semas, a tumen či primisardine man; nango semas, a tumen či dine pe mande drze; nasvalo semas thaj ando phanglipe, a tumen či vodinas briga pale mande.' 44 Askal vi von phenena leŝče: 'Gospode! Kana dikhlam tut kaj sanas bokhalo ili truŝalo, ili sago stranco, ili nango, ili nasvalo ili ande tamnica, thaj či pomognisardam tuče?' 45 A vo phenela lende: 'Čače phenav tumende: kana god či čerdine vareso pale akala majcikne, mande či čerdine.' 46 Gajda von džana ande večno kazna, a e pravednikurja ando večno trajo." (aiñnios g166)

26 Kana o Isus sas gata sa godole alavenca, phendas pire učenikonende: 2 "Džanen kaj si pale duj deŝ o prazniko e bi kvascoŝče mangrengo. Askal man, e Čhavo e Manuŝeŝče, izdaina te čhon man po truŝul." 3 Askal čidine pe e ŝorvale raŝaja thaj e themeŝče stareŝine ando dvoro e bare raŝajesko savo akhardolas Kajafa 4 thaj dogovorisajle te astaren e Isuse po hohaibe thaj te mudaren les. 5 Thaj phendine: "Ali či tromas godova te čeras dok si o prazniko Pasha, te či pobunilpe o them." 6 A o Isus sas ande Vitanija ando čher e Simonesko e gubavcesko. 7 Dok sas pale sinija, avili dži leste varesavi manuŝnji e vasurjava savi sas čerdi katar o kuč bar pherdi e kuč mirisosa savo čordas pe Isusesko ŝoro. 8 Kana dikhline godova, e učenikurja holjajle thaj phendine: "Sostar kasavo rspi! 9 Godova miris ŝaj kuč te bičindasas pe, a e love te den pe e čorende." 10 O Isus džanglas so čeren svato thaj phendas lende: "Sostar zamerin akale manuŝnjače? Voj čerda mande lačo delo. 11 Kaj e čore manuŝen uvek avela tumen paŝe tumende, a man či avela tumenca. 12 Kana čordas akava mirisno pomast

pe mande, čerda godova pale mungro prahope. **13** Čače phenav tumende, kaj po sasto them propovedila pe akaja Bahtali nevimata, čerela pe svato vi pale akava so voj čerda, lače palo spomen." **14** Askal jek katar e dešuduj apostolurja, akhardo Juda andar o gav Iskariot, delo ke šorvale rašaja, **15** thaj phendas: "Kozom počinena mande te izdajiv tumende e Isuse?" Von đinadine lešče trijanda rupune kovanice. **16** Katar askal o Juda počnisarda te rodel lači vrjama te izdail les. **17** Prvo đes kana sas o prazniko bikvascošče mangrengo e učenikurja phučline e Isuse: "Kaj kames te čeras tuče e pashalno večera?" **18** A vo phendas lende: "Džan ando Jerusalem ke okova thaj okova manuš, thaj phenen lešče: 'O učitelj phenel: Mungri vrjama si paše. Tute slaviva e pasha mungre učenikonenca.'" **19** E učenikurja čerdine sar phendas lende o Isus thaj pripremisdardine e pashalno večera. **20** A kana peli e rjat, o Isus sas pale sinija e dešuduje učenikonenca. **21** Dok hanas vo phendas lende: "Čače phenav tumende, jek tumendar izdaila man." **22** Von zurale ražalostisajle thaj jek pale avreste počnisardine te phučen les: "Te naj sem možda me Gospode?" **23** A vo phendas lende: "Okova savo bolel o mangro manca ando čaro, godova izdaila man. **24** Vi čače me, o Čhavo e Manušesko, moraš te merav sago kaj ramol ando Sveto lil. Ali teško okolešče savo izdail man, e Čhaves e Manušesče! Majlače avilosas lešče te či ni bijandilosas!" **25** A lesko izdajniko o Juda phučla: "Te naj sem me godova, učiteljina?" A o Isus phendas lešče: "Korkoro phenes." **26** Dok hanas o Isus lija o mangro, zahvalisarda pale leste thaj phagla les, askal dijas pire učenikonende thaj phendas: "Len, thaj han akava si mungro telo." **27** Askal lijas o tahtaj mol, zahvalisarda e Devlešče pa dijas e učenikonende thaj phendas: "Pijen andar leste savora, **28** kaj akava si mungro rat, o rat savo utemeljil o savezo, thaj čhordol pe pale butende te jartonpe lende bezeha. **29** Thaj phenav tumende: či majbut pijava mol sa dži ke okova đes kana pijava tumenca nevi mol ando carstvo mungre Dadesko." **30** Askal đilabadine e psalmurja thaj uputisajle ande Maslinsko gora. **31** Askal o Isus phendas lende: "Arjat savora tumen mučena man, kaj ando Sveto lil ačhel ramome: 'Dava dab e pastire thaj e bakhre andar o stado našena.' **32** Ali kana uštava andar e mule, džava angle tumende ande Galileja." **33** A o Petar phendas lešče: "Te mukline tut savora, me nisar či mukava tut!" **34** A o Isus phendas lešče: "Čače phenav tuče, još akaja rjat, majsigo nego so o bašno zakukuričil, trin drom hohaveja kaj či pindžares man." **35** O Petar phendas lešče: "Te trubul vi te merav tusa, me nisar či mukava tut." A gajda phendine vi e sa aver učenikurja. **36** Askal o Isus delo

e učenikonenca po than savo akhardolas Getsimanija, thaj phendas lende "Bešen akate dok me džav inča te molima." **37** Lijas pesa e Petre thaj e liduj Zevedejevešče čhaven, thaj astarda les e žalost thaj o pharipe. **38** Askal phendas lende: "Mungri duša si žalosno dži ko smrto. Ačhen akate thaj aven džungade manca." **39** Askal delotar cara majdur lendar, thaj pelo e mujesa dži ke phuv thaj molisajlo e alavenca: "Dade mungreja, te šaj, te načel man akava tahtaj patnje! Ali neka či avel mungri volja, nego čiri volja." **40** Askal bolda pe ke trin učenikurja thaj arakhla len sar soven, thaj phendas e Petrešče: "Gajda askal, našti ačhiline džungade manca ni jek sato! **41** Ačhen džungade thaj molin tumen te či peren ande kušnje! Kaj o duho kamel te čerel okova so si lače ali o telo si slabo." **42** Askal po dujto drom palem delotar lendar thaj molisajlo e alavenca: "Dade mungreja, ako naj moguče te načel man akava tahtaj patnje, neka avel čiri volja." **43** A kana bolda pe palem arakhla len sar soven. Lende jakha korkoro phandadonas. **44** Palem mukla len thaj delo po trito drom te molil pe iste alavenca. **45** Askal bolda pe ke učenikurja thaj phendas lende: "Još soven thaj odmorin tumen? Ake, avili e vrjama kana me, o Čhavo e Manušesko, avava dino ande vas e bezehalende. **46** Ušten! Hajde te džastar! Kaj, ake akate si okova savo izdaila man!" **47** Dok o Isus još čerelas svato, areslo o Juda, jek katar e dešuduj učenikurja. A lesa avilo vi o but o them e mačonenca thaj e rovljenca, saven bičaldine e šorvale rašaja thaj e themešče starešine. **48** A e Isusesko izdajniko dogovorisaajlo lenca kaj dela len znako. Phendas lende: "Saves čumidava, godova si. Les astaren." **49** Vo odma avilo dži ko Isus thaj phendas lešče: "Zdravo, učiteljina!" thaj čumida les. **50** A o Isus phendas lešče: "Drugarina, čer godova pale soste avilan!" Askal e manuša aviline dži ko Isus, čhutine e vas pe leste thaj astardine les. **51** Thaj ande data jek katar okola save sas e Isuseja astarda pe palo mačo, inkalda les thaj peklas lesa e bare rašaješče sluga thaj čhinda lesko kan. **52** Askal o Isus phendas lešče: "Bolde čiro mačo pe lesko than, kaj svako ko astarel pe palo mačo, katar o mačo vi merela. **53** Zar či hačares kaj šaj te zamoliv mungre Dade thaj vo odma bičaldas mande majbut milje andelurja? **54** Ali te čerdem godova, sar askal pherdilesas e Svete lila, save phenen kaj gajda moraš te avel?" **55** Askal phendas e themešče: "Teljardine pe mande e mačonenca thaj e rovljenca sago po razbojniko! Svako đes bešavas ando Hramo thaj sikavavas, pa ipak či astardine man. **56** Ali, sa akava trubul te avel te pherdol okova so e prorokurja majsigo ramosardine pale mande." Askal godova sa e učenikurja mukline les thaj našline. **57** Okola save astardine e Isuse indardine les ko

baro rašaj o Kajafa, ke savo čidine pe e učitelja e zakonestar thaj e starešine. **58** A o Petar dadural džalas pale leste dži ke avlija e bare rašaješči, pa dijas andre ande avlija thaj bešlo e slugenca te dičhel so avela. **59** E šorvale rašaja thaj sasto baro veće rodenas hohavne dokazurja protiv o Isus sar šaj te mudardinesas les. **60** Ali či arakhline len vi ako pojavisajle e but e hohavne svedokurja. Napokon aviline duj džene **61** thaj phendine: "Akava phendas: 'Me šaj haravav o Hramo e Devlesko thaj pale trin đes palem te vazdav les.'" **62** Askal uštilo o baro rašaj thaj phučla e Isuse: "Khanči či pheneja pe akava so phenen protiv tute?" **63** A o Isus samo ačelas. A o baro rašaj phendas lešče: "Dav tut solah e džude Devlesa te phenes amende dali san tu o Hristo, e Devlesko Čhavo?" **64** A o Isus phendas lešče: "Tu korkoro phenes. Thaj još phenav tumende kaj katar akana dičhena man, e Čhave e Manušesče, sar bešav pe desno rig e Svemočno Devlešče thaj avav pe nebeske oblakurja." **65** Pe godova o baro rašaj pharadas pe peste o ogrtači thaj phendas: "Hulil po Del! So trubul amen još svedokurja. Ake, akana ašundine lešči hula! **66** So gndin?" A von phendine: "Zaslužisardas smrto!" **67** Askal čhungarenas e Isuse po muj thaj denas les dab e dumukhenca. A aver denas les dab e palmenca po muj **68** thaj phenenas: "Prorokuisar amende, Hriste, ko dija tut dabi!" **69** Dok o Petar bešelav avri ande avlija, avili dži leste varesavi sluškinja thaj phendas: "Vi tu sanas e Isuseja andar e Galileja!" **70** A o Petar angle savorende hohadas: "Či džanav so phenes!" **71** A kana đelo prema e kapija, dikhla les jek aver sluškinja, thaj phendas okolende save sas okote: "Vi akava sas e Isuseja andar o Nazaret!" **72** Vo palem hohadas thaj još hala solah: "Či pindžarav godole manušes!" **73** A cara pale godova aviline dži leste e manuša save sas okote thaj phendine: "Pa tu san čače jek lendar! Izdail tut o galilejsko naglasko." **74** Askal o Petar počnisarda te hal solah e alavenca: "Hav solah kaj či pindžarav godole manušes!" Thaj odma zakukuričisarda o bašno. **75** Vo askal dija pe gođi so phendas lešče o Isus: "Majsigo nego so o bašno zakukuričil, trin drom hohaveja kaj či pindžares man." Inkljisto andar e avlija thaj zurale rujas.

27 Detharinako rano sa e šorvale rašaja thaj e themešče starešine dogovorsajle te mudaren e Isuse. **2** Phangline les, inđardine thaj predaisardine les ko Pilato savo sas rimsko upravniko. **3** Kana o Juda, e Isusesko izdajniko, dikhla kaj e Isuse osudisardine po smrto, zažalisarda thaj inđardas e trijanda rupune kovanice palpale te boldel len e šorvale rašajende thaj e starešinende. **4** Askal phendas lende: "Čerdem doš! Izdaisardem e manušes savo naj

došalo pale khančeste!" A von askal phendine lešče: "So amen hal briga pale godova? E doš perela pe tute!" **5** Pe godova o Juda čhuda e rupune kovanice ande svetinja e hramošči, askal đelo thaj ungladilo. **6** E šorvale rašaja čidine e rupune kovanice thaj phendine: "O zakono či mučel amende te čhas akala love ande hramsko blagajna, kaj si ratvale love." **7** Askal dogovorisajle thaj pale godola love čidine e Lončarešči njiva, te avel limorja pale strancurja. **8** Zato godoja njiva vi akana akhardol "Ratvali njiva." **9** Gajda pherdilo okova so sas phendo preko proroko Jeremija: "Line trijanda rupune kovanice pale leste kaj gadiči varesave katar e Izraelcurja phendine kaj lesko trajo mol, **10** thaj godole lovenca čidine e Lončarešči njiva, sago kaj o Gospod zapovedisardas mande." **11** O Isus ačhilo anglo rimsko upravniko savo bučholas Pilato. Vo phučla les: "Dali san tu o caro e Židovengo?" A o Isus phendas lešče: "Tu korkoro phenes." **12** E šorvale rašaja prnas e Isuse vi palo but aver bilačhipe, ali o Isus khanči či motholas. **13** Askal o Pilato phučla les: "Zar či ašunes so sa svedočin protiv tute?" **14** Ali o Isus či delas lešče odgovor niti ječe alaveja, zato o Pilato zurale začudisajlo. **15** A e upravniko sas običaj te po prazniko e Pasha mučel pe sloboda ječe phangle manuše saves o them manglasas. **16** Baš ande godoja vrjama ando phanglipe inčarenas ječe manuše savo sas pindžardo kriminalaco savo akhardolas Varava. **17** Kana o them čida pes, o Pilato phučla len: "Kas kamen te mukav tumende: e Varava ili e Isuse savo akhardol Mesija?" **18** O Pilato džanelas kaj e Isuse predaisardine zato kaj sas ljubomorne pe leste. **19** Dok o Pilato bešelav pe sudačko stolica, avili lešče e poruka katar lešči romnji: "Inčar tut majdur katar godova pravedno manuš kaj arjat but namučisajlem ando suno zbog leste!" **20** A e šorvale rašaja thaj e starešine pherenas o šoro e themešče te roden te mučel lende e Varava, a Isuse te mudaren. **21** A o upravniko phučla e themes: "Kas katar akala duj džene kamen te mukav tumende?" Von phendine: "E Varava!" **22** A o Pilato phučla len: "A so te čerav e Isuseja savo akhardol Hrist?" A von čhonas muj "Razapnisar les!" **23** A o Pilato phučlas: "Sostar? Savo bilačhipe čerda?" Ali o them još majzurale čholas muj: "Razapnisar les!" **24** Kana o Pilato dikhla kaj godoja rasprava či džal nikaj, nego još majbari buna vazdel pe, lijas paj thaj anglo them thoda pire vas thaj phendas: "Me naj sem došalo palo rat akale manušesko – e doš perela pe tumende!" **25** Pe godova sa o them phendas: "Neka lesko rat perel pe amende thaj pe amare čhavra!" **26** O Pilato askal mukla lende e Varava, a e Isuse dijas te maren e bičosa thaj te razapnin les. **27** E Pilatošče vojnukurja inđardine e Isuse ande bari palata thaj čidine pes pe leste

sasti četa vojnurja. 28 Askal čhudine lestar e drze thaj dine pe leste lolo ogrtači sago kaj inđaren e carurja. 29 Khudine kruna katar e kangre thaj čhutine pe lesko šoro, a ande lesko desno vas čhutine trska sago caresko žezlo. Dine koča angle leste, marenas muj lestar thaj mothonas: "Nek trajil o caro e Židovengo!" 30 Askal čhungarenas pe leste thaj marenas les e trskava po šoro. 31 Kana ačhile te maren muj lestar, čhudine lestar o ogrtači thaj dine pe leste lešče drze. Askal inđardine les te razapnin les. 32 Dok inđarenas les te razapnin les, dromesa maladine varesošče manuše andar e Kirina savo akhardolas Simon, thaj les tradine te inđarel e Isusesko trušul. 33 Kana aviline dži ko than savo akhardolas Golgota (so značil "o than lobanja"), 34 dine e Isuse te pijel mol hamime e fajrasa, ali kana lija ando muj či kamlas te pijel. 35 Kana razapnisardine les, podelisardine lešče drze maškar pende gajda kaj čhudenas kocka pale lende. 36 Askal bešline okote thaj lenas sama pe leste. 37 Opre angle lesko šoro čhutine lešče tabla pe savi sas ramome lešči doš: "Akava si o Isus, caro e Židovengo." 38 Askal zajedno lesa razapnisardine vi duje razbojnikonen, ječe pe lešči desno rig, a avres pe lešči levo rig. 39 A okola save načenas okotar vreden las thaj čerenas e šoresa 40 thaj mothonas: "Tu savo haraves e svetinja e hramošči thaj vazdes lat ande trin đesa, spasisar korkoro tut! Fulji katar o trušul, ako san Čhavo e Devlesko!" 41 Isto gajda vi e šorvale rašaja, e učitelja e Mojsiješče zakonestar, thaj e starešine, marenas muj lestar thaj phenenas: 42 "Spasisardas avren, a korkoro pes našti te spasil! Vo si caro e Izraelosko! Pa neka akana fuljel katar o trušul, askal amen pačasa ande leste! 43 Pačalas ando Del, pa neka akana o Del spasil les ako kamel! Kaj phenelas: 'Me sem o Čhavo e Devlesko.'" 44 Isto gajda vreden las vi e razbojnikurja save sas lesa razapnime. 45 A katar o mismeri dži ko trito sato palo mismeri o tunjariko učharda e sasti phuv. 46 A katar o trito sato o Isus čhuta muj andar sasto glaso: "Eli, Eli, lama sabahtani?" (so značil "Devla mungreja, Devla mungreja, sostar muklan man?"). 47 A kana varesave manuša save ačhenas okote ašundine godova, phendine: "Akava akharel e prorokos Ilija!" 48 Jek lendar odma prastaja, lijas o sunder, bolas les ando šut, čhuta pe trska, thaj ponudisardas e Isuse te pijel. 49 A aver phenenas: "Ačh, te dikhas dali avela o Ilija te spasil les." 50 A o Isus palem čhuta muj andar sasto glaso, thaj mukla pesko di. 51 Pe godova e firanglje ande svetinja e hramošči pharadile pe opaš, katar opral dži tele. E phuv čhinosajli, a e bare bara pharle. 52 E limorja putajle, thaj e telurja e bute svete manušendar uštile andar e mule. 53 Pale godova kana o Isus uštilo andar e mule von inklijistine andar pire

limorja thaj đele ando sveto gav Jerusalem thaj sikadine pes e bute manušende. 54 Kana dikhla o rimsko kapetano thaj okola save lenas sama po Isus kaj e phuv čhinosajli thaj sa so dogodisajlo, astarda len e bari dar thaj phendine: "Akava manuš sas čače Čhavo e Devlesko!" 55 A sas okote vi e but manušnja save sa godova dičhenas dadural. Von pratinas e Isuse andar e Galileja thaj služinas lešče. 56 Maškar lende sas e Marija andar e Magdala, e Marija e dej e Jakovešči thaj e Josifešči thaj e dej e Zevedejevešče čhavendi. 57 A kana peli e rjat, avilo varesavo barvalo manuš andar o gav e Arimateja, savo akhardolas Josif. Vo vi korkoro sas e Isusesko učeniko. 58 Vo delo ko Pilato thaj manglas e Isusesko telo, a o Pilato zapovedisarda te den les. 59 O Josif lijas o telo e Isusesko thaj pačarda les ande nevo fino pohtan, 60 askal čhuta o telo ando piro nevo limori savo sas čerdo ande stena. Thaj spidas o baro bar po vudar e limoresko thaj delotar. 61 A e Marija andar e Magdala thaj e aver Marija bešenas okote thaj dičhenas karingal o limori. 62 Thejara o đes, ando savato, čidine pe e šorvale rašaja thaj e fariseja ko Pilato, 63 thaj phendine lešče: "Gospodarina, dijam men godi kaj okova hohamno, dok sas još džudo phendas. 'Pale trin đesa uštava andar e mule.' 64 Zato naredisar te lel pe sama po limori, dži ko o trito đes, te na aven lešče učenikurja thaj čoren lesko telo, a askal phenen e themešče: 'Uštilo andar e mule!' Te avilo gajda godova poslednjo hohaipe avela majbaro nego okova prvo!" 65 A o Pilato phendas lende: "Si tumen stražarja. Džan thaj len sama po limori majlače sar džanen." 66 Askal đele, čhutine pečato po bar thaj čhutine straža.

28 Posle o savato, ande zora savo sas prvo đes ando kurko, avili e Marija andar e Magdala thaj e aver Marija te dičhen o limori. 2 Thaj katar jekhvar sas o baro potres, kaj e Gospodesko anđelo fuljisto andar o nebo, avilo dži ko limori, spidas o bar katar o vudar e limoresko thaj bešlo pe leste. 3 A vo sijalas sago munja, thaj e drze pe leste sas parne sago o iv. 4 E stražarja izdranas e daratar thaj peline ando nesvest kana dikhline les. 5 Askal o anđelo phendas e manušnjende: "Tumen na daran! Kaj džanav kaj roden e Isuse savo sas razapnime. 6 Ali vo naj akate! Uštilo andar e mule sago kaj vi phendas tumende! Aven te dičhen o than kaj pašljolas, 7 pa sigo džan thaj phenen lešče učenikonende: 'Uštilo andar e mule thaj akana džal angle tumende ande Galileja. Okote dičhena les.' Ake so sas man phendem tumende." 8 Pherde dar ali vi bahtale, e manušnja sigo teljardine katar o limori thaj prastajine te javin godova lešče učenikonende. 9 Katar jekhvar angle lende

avilo o Isus thaj phendas lende: "Zdravo!" Von avile majpaše leste, astardine lešće pungere thaj poklonisajle lešće. **10** Askal o Isus phendas lende: "Na daran! Džan thaj javin mungre phralende te džan ande Galileja. Okote dičhena man." **11** Dok e manušnja sas po drom karingal e učenikurja, varesave katar e stražarja đele ando gav thaj phendine e šorvale rašajende sa so dogodisajlo. **12** Askal e šorvale rašaja sastaisajle e starešinenca thaj dogovorisaile te den e vojnikonende but love. **13** Thaj phendine lende: "Phenen, 'Arjat dok amen sovasas aviline e Isusešće učenikurja thaj čordine les.' **14** A te pale akava ašunel o upravniko, amen ćerasa lesa svato te tumen či avel problemurja." **15** E vojnিকurja line e love thaj ćerdine sago kaj sas lende phendo. Gajda akava svato buljilo maškar e Židovurja thaj zadržisajlo sa dži ađes. **16** E dešujek učenikurja đeletar ande Galileja, pe gora, pe savi naredisarda lende o Isus te džan. **17** Kana dikhline e Isuse, poklonisajle lešće. Ali varesave lendar palem posumnjisardine. **18** Askal o Isus avilo dži lende thaj phendas: "Dini si mande sa e vlast po nebo thaj pe phuv. **19** Zato džan thaj ćeren sa e themen te aven mungre učenikurja! Bolen len ando alav e Dadesko thaj e Čavesko thaj e Sveto Duhosko, **20** thaj sikaven len te inćaren sa so zapovedisardem tumende. Ake me sem tumenca ande sa e đesa, sa dži ko krajo e themesko." (aiōn g165)

Marko

1 Akava si početko e Bahtale nevimatako katar o Isuso Hristo, Čhavo e Devlesko. **2** Sago kaj ramol ando Sveto lil e prorokosko Isaijasko: "Ake, me bičhalav angle tute mungre glasnikones thaj vo lačharella o drom angle tute. **3** Vo si o glaso savo čhol muj ande pustinja: 'Pripremin o drom palo Gospod, vorton e staze pale leste!'" **4** Gajda avilo o Jovano savo bolelas ande pustinja thaj propovedilas kaj e manuša trubun te obratin pe e Devlešće te jartol lenđe e bezeha thaj te bolen pe. **5** Avenas leste e but manuša andar e sasti Judeja thaj savora andar o Jerusalem, priznainas pire bezeha, a vo bolelas len ande reka jordanošči. **6** Po Jovano sas drze katar e kamilaće bal, a sas les oko maškar morčhaći haravliji. Halas skakavcurja thaj o divljo medo. **7** Vo propovedilas: "Pale mande avel jek majmočno mandar. Me naj sem dostojno ni te bandijav te putarav e haravlije pe lešće sandale. **8** Me bolav tumen e pajesa, a vo bolela tumen e Sveto Duhosa." **9** Ande godoja vrjama avilo o Isus andar o Nazaret ande Galileja thaj o Jovano bola les ande reka e Jordanošči. **10** Čim o Isus inklijisto andar o paj, dikhla o putardo nebo thaj e Sveto Duho sar sago golubo fuljel pe leste. **11** A katar o nebo ašundilo o glaso: "Tu san mungro volime Čhavo! Tu san mungri bah." **12** Thaj odma o Duho bičhaldas e Isuse ande pustinja. **13** Okote o Isus ačhilo štarvardeš desa, a o Sotona probilas les po bezeh. Sas maškar e divlje životinje, a e anđelurja služinas lešće. **14** Nakon so o Jovano sas čhudino ande tamnica, o Isus delo ande Galileja thaj propovedilas e Devlešči Bahtali nevimata. **15** Motholas: "Avilo o časoi! Paše si e Devlesko carstvo! Pokajin tumen thaj paćan ande Bahtali nevimata!" **16** Dok o Isus načhelas pašo Galilejsko more, dikhla e Simone thaj lešće phrale e Andrija, sar čhuden e mreže ando more, kaj von sas ribarja. **17** O Isus phendas lenđe: "Aven pala mande thaj me ćerava tumendar ribarja save astarena manušen sago e mačhen!" **18** Thaj von odma mukline pire mreže thaj teljardine pale leste. **19** Kana delo cara majdur, dikhla e Jakove e Zevedejevešće čhaves thaj lešće phrales e Jovano sar ande lađica lačharen pire mreže. **20** O Isus odma akharda len, thaj von mukline ando čamco pešće dades e Zevedejes e manušenca save ćerenas bući lenđe, thaj dele pale leste. **21** Thaj avile ando Kafarnaum, o Isus ando savato dija ande sinagoga thaj teljarda te sikavel e theme. **22** O them čudilas pe lešće sikavipešće, kaj sikavelas sago okova saves si autoriteto, a na sago e učitelja e Mojsiješće zakonestar. **23** Askal okote ande lendi sinagoga sas jek manuš ande savo sas o bilaćho duho thaj katar jekhvar ačhilo te čhol muj thaj

te mothol: **24** "So kames amendar, Isuse andar o Nazaret? Avilan te uništis amen? Džanav ko san: Sveco e Devlesko!" **25** A o Isus oštro phendas lešće: "Phandav čiro muj thaj inkliji andar leste!" **26** Askal o bilaćho duho zurale činosarda e manušes thaj e riknjimava andar o sasto glaso inklijisto andar leste. **27** Savora sas but začudime, thaj phućenas jek avres: "So si akava? Sosko si akava nevo thaj silno sikavipe. Vo čak vi e bilaće duhonende zapovedil thaj von pokorin pe lešće!" **28** Thaj o glaso pale leste odma ašundilo pe sasti okolina e Galilejaći. **29** Čim inklijistine andar e sinagoga, dele e Jakoveja thaj e Jovanova ando ćher e Simunesko thaj e Andrijasko. **30** A e Simunošči sokra pašljolas nasvali ande groznica, pa čim aresline odma mothodine Isusešće pale late. **31** O Isus avilo dži late, lija lat palo vas thaj vazda lat. A e groznica nakhli latar thaj voj poslužilas len. **32** Tale rjat, kana mukla pe o kham, anenas leste sa e nasvalen thaj okolen ande save sas e bilaće duhurja. **33** O sasto gav ćida pe anglo vudar. **34** Thaj o Isus sastardas e bute nasvalen katar o razno nasvalipe. Trada e bute bilaće duhonen andar e manuša, ali či mućelas e bilaće duhonende te ćeren svato kaj džanenas ko si vo. **35** Rano detharinako, dok sas još o tunjariko, o Isus uštilo, inklijisto thaj delo pe jek pusto than thaj okote molilas pe. **36** A o Simon thaj okola aver kaj sas lesa svugde rodenas les. **37** Thaj kana arakhline les, phendine lešće: "Savora roden tut!" **38** A o Isus phendas lenđe: "Hajde džastar varekaj pe aver pašutne gava te vi okote propovediv, kaj me zbog godova avilem." **39** Gajda džalas pe sasti Galileja, propovedilas ande lenđe sinagoge thaj tradelas andar e manuša e benđen. **40** Jek gubavco avilo ko Isus thaj počnisarda pe kočja te molil les: "Te kames šaj te sastares man katar e guba!" **41** O Isus sažalisajlo, inzarda pesko vas pe leste thaj phendas: "Kamav, av sasto!" **42** Thaj e guba odma peli lestar thaj vo sastilo. **43** O Isus askal odma naredisarda lešće te džaltar thaj strogo phendas lešće: **44** "Le sama te na ćeres svato khonikašće pale akava, nego dža thaj sikav tut e rašaješće thaj prinesisar pale čiro šilaipe okova so Mojsije odredisardas palo svedoćanstvo lenđe." **45** Ali o manuš, samo so delotar lestar, ačhilo savorende te mothol so dogodisajlo lešće, zbog godova o Isus našti majbut delas javno ando gav, nego moraš te ačhelas pe puste thana. A e manuša avenas leste katar sa e riga.

2 Varekozom desa majposle, kana o Isus palem dijas ando Kafarnaum, ašundilo kaj si o Isus ćhere, **2** pa ćida pe gadići them kaj nas than čak ni anglo vudar. A o Isus propovedilas lenđe o Alav e Devlesko. **3** Askal avile dži ko Isus varesave štar džene, save anenas leste e nepokretno

manušes. 4 Ali, sar katar o but o them našti inđardine les andre ando čher dži ko Isus, čerdine hv po krovo opral po than kaj ačhelas o Isus pa mukline e nasvale kroz e hv pe nosilje maškare anglo Isus. 5 Kana o Isus dikhla lengo pačipe, phendas e line manušešće: "Čhaveja, jartonpe tuće čire bezeha!" 6 A okote bešenas varesave učitelja e Mojsiješće zakonestar thaj ande peste gndinas: 7 "Sostar akava gajda čerel svato? Vo vredol e Devle! Ko šaj te jartol e bezeha osim o jedino Del?" 8 A o Isus odma džanglas ande pesko duho kaj von gajda gndin thaj phučla len: "Sostar gajda gndin?" 9 So si majloće te phenel pe akale nepokretne manušešće: "Jartome si tuće e bezeha" ili "Ušti! Le čiri nosila thaj dža?" 10 Ali dokaživa tumende kaj man, e Čhaves e Manušesće, si vlast pe phuv te jartov e bezeha." Askal bolda pe ko manuš thaj phendas: 11 "Tuće phenav: Ušti, le čiri nosila thaj dža čhere." 12 Thaj o manuš uštilo, odma lijas e nosilja thaj angle savorende inklijsto avri. A savora sas zadivime thaj počnisardine te slavin e Devle, e alavenca: "Gajda vareso još či dikhlam!" 13 O Isus palem đelo pe obala e jezerošči. A but o them avilo dži leste thaj vo sikavelas len. 14 Sar načelas okotar, dikhla e Levije, e Alfejevešće čhave, sar bešel po than kaj počinelas pe o porezo thaj phendas lešće: "Av pala mande." Vo uštilo thaj teljardas pala leste. 15 Dok o Isus halas ande Levijesko čher, lesa thaj lešće učenikonenca hanas vi e but carinikurja thaj e bezehale, kaj sas but okola save džanas pale leste. 16 A kana varesave učitelja e Mojsiješće zakonestar, save sas fariseja dikhline kaj o Isus hal e bezehalenca thaj e carinikonenca, phučline lešće učenikonen: "Sostar tumaro učitelj hal e carinikonenca thaj e bezehalenca?" 17 O Isus godova ašundas, thaj phendas lenđe: "Naj e sastende potrebno o doktori, nego e nasvalenđe. Me či avilem te akharav te pokajin pe e pravednikurja, nego e bezehale." 18 E učenikurja e Jovanošće savo bolelas thaj e fariseja postinas. Varesave manuša aviline ko Isus, thaj phučline les: "Sostar e Jovanošće thaj e farisejende učenikurja postin, a čire učenikurja či postin?" 19 O Isus phendas lenđe: "Šaj li e svaturja te postin dok si o mladoženja lenca? Sa dok si o mladoženja lenca von našti te postin. 20 Ali, avela e vrjama kana otmına lendar e mladoženja. Askal von postina. 21 Khonik či suvel nevo kotor katar o platno pe purani haljina. Kaj te čerda godova, kana thovela e haljina o nevo kotor čidela pe thaj pharavela e haljina thaj avela još majbari hv. 22 Khonik či čhol e nevi mol ande purane morčhaće trjaste kaj kana e mol počnila te del vras e purane morčhaće trjaste pharona, a e mol čhordola pe thaj gajda avena uništite vi e morčhaće trjaste vi e mol. Zato e nevi mol čhol pe

ande neve morčhaće trjaste." 23 Kana o Isus jek savato načelas kroz e njive e đivesa, lešće učenikurja počnisardine e dromesa te trgon o điv. 24 Kana e fariseja dikhline godova phendine e Isusešće: "Dik! Čire učenikurja čeren savatone, okova so po zakono naj muklo te čerel pe savatone." 25 Ali o Isus phendas lenđe: "Sigurno čitosardine ando Sveto lil so o David čerda, kana vo thaj okola save sas lesa bokhajle, a nas len so te han. 26 Sas godova ande vrjama e Avijatarešči e šorvale rašaješči. O David dijas ande Devlesko čher thaj halas e posvetime mangre save sas prinesime e Devlešće. A khonik osim e rašaja, či tromanas te han godola mangre, a o David još podelisarda okolenca save sas lesa." 27 Askal phendas lenđe: "O savato si stvorime te služil e manušešće, a na o manuš e savatošće. 28 Dakle me, o Čhavo e Manušesko, sem Gospodari vi e savatosko."

3 Kana o Isus palem dija ande sinagoga, okote sas jek manuš e šuće vastesa. 2 Varesave andar e sinagoga inčarenas e jakha pe leste te dičhen dali sastarel lat ando savato te došaren les. 3 O Isus askal phendas e manušešće e šuće vastesa: "Ušti thaj av akate maškare!" 4 Askal phučla e aver manušen: "Dali tromal pe savatone te čerel pe lačhipe ili bilačhipe, o trajo te spasil pe ili te mudarelpel?" Ali von khanči či mothonas. 5 O Isus ande holji dikhla pe lenđe thaj sas zurale žalosno zbog lenđe barune ile, askal phendas e manušešće: "Inzar čo vas." Vo inzarda pesko vas thaj lesko vas sas palem sasto. 6 Askal e fariseja inklijstine thaj odma e Irodešće manušenca dogovorinas pe sar te mudaren e Isuse. 7 O Isus pire učenikonenca crda pe po Galilejsko jezero, a pala leste teljardas o but o them andar Galileja thaj andar e Judeja, 8 andar o Jerusolim, thaj andar e Idumeja, katar okoja rig e reka Jordanošči, thaj vi andar e okolne thana pašo Tiro thaj pašo Sidon. Sa godova but them avelas leste, zato kaj ašundine sa so vo čerelas. 9 A kana o Isus dikhla e silno themes kaj avel leste, phendas pire učenikonende, te avel o čamco spremno sar či avilosas zgñečime maškar o them, 10 kaj već e bute manušen sastardas, thaj e nasvale manuša ispidenas pe te dotaknin les thaj te saston. 11 Kana e manuša ande save sas e bilačhe duhurja dičhenas e Isuse, perenas pe kočla angle leste thaj čhonas muj: "Tu san o Čhavo e Devlesko!" 12 A o Isus strogo phenelas lenđe te na mothon ko si vo. 13 Askal o Isus đelo pe gora thaj akhardas o kolen saven vo kamlas, thaj von aviline leste. 14 Lendar losarda dešudujen – save još akhardas apostolurja – te aven lesa thaj te bičhalel len te propovedin 15 thaj te avel len vlast te traden e benđen. 16 Akala si e alava e dešudujengo saven o Isus losarda: o Simon, saves

akhardas Petar, 17 o Jakov e Zevedejevesko čhavo thaj o Jovan o phral e Jakovesko saven akharda Voanirges, so značil "čhave e gromošče" 18 o Andrija, o Filip, o Vartolomej, o Matej, o Toma, o Jakov čhavo e Alfejevesko, o Tadej, o Simun pobunjeniko, 19 thaj o Juda Iskariot savo izdaisarda e Isuse. 20 Askal o Isus dijas ando čher kaj bešelasa, a okote palem čida pes gači but them kaj našti ni mangro hanas. 21 Kana pale godova ašunda lešči dej thaj lešče phral avile pale leste te indaren les, kaj gndinas kaj vo naj dži peste. 22 A e učitelja e Mojsiješče zakonestar save avile andar o Jerusalam phenenas: "O Veelzevul, o vladari e bendengo si ande leste, thaj lešče silava izgonil e benden." 23 Pe godova o Isus akharda len peste thaj motholas lenđe ande prispodoba: "Sostar o Satana izgonisardasas e Satanes? 24 Ako si varesavo carstvo ande peste podelime, našti te održila pes. 25 Thaj te ande varesavo čher e familija ačhel jek protiv avreste, godoja familija našti održila pes. 26 Thaj te o Satana uštilo korkoro protiv peste thaj razdelil pes, askal našti ačhel, nego avilo lesko krajo. 27 Ali khonik našti del ando čher e zurale manušesko te otmil lešče stvarja, a te majsigo či phandel les. Tek askal šaj otmil e stvarja andar lesko čher. 28 Čače phenav tumende: E manušenje šaj avena jartome sa e bezeha thaj e bilače alava save mothon. 29 Ali ko god mothol bilače alava po Sveto Duho, godova bezeh či avel lešče jartome nikad, nego avela došalo pale sa e vrjama." (aiōn g165, aiōnios g166) 30 Akava phendas kaj e učitelja e Mojsiješče zakonestar mothonas: "O bilačo duho si ande leste." 31 Ande godova aresline e Isusešči dej thaj lešče e phral. Dok ačhenas avri, bičhaldine leste ječe manuše te akharel les. 32 A oko leste bešelasa o but o them, thaj phendine lešče: "Ake avri roden tut čiri dej thaj će phral." 33 Askal o Isus phučla len: "Ko si mungri dej thaj mungre phral?" 34 Askal dikhla pe okola kaj bešenasa oko leste ando krugo thaj phendas: "Ake akala si mungri dej thaj mungre phral! 35 Kaj ko god čerel e Devlešči volja, godova si mungro phral, mungri phen thaj mungri dej."

4 O Isus palem počnisarda te sikavel e themes pašo jezero. A o silno them čida pe oko leste gajda kaj vo dija ande lađica po jezero thaj bešlo, a sa o them ačhelas pe obala. 2 Thaj but godova sikavelas len kroz e paramiče. A dok sikavelas len, phendas: 3 "Ašunen! Jek des inklijsto o sejači te sejol. 4 Dok sejolas, varesavo seme pelo po drom thaj avile e čiriklja thaj sa haline les. 5 Aver seme pelo pe barutni phuv kaj nas but phuv thaj odma inklijsto kaj e phuv nas handuk. 6 A kana inklijsto o baro kham, phabilo thaj šučilo, kaj nas les handuk koreno. 7 A varesavo

seme pelo ande kangre, a e kangre barile thaj tasadine les, pa o seme či bijanda plodo. 8 A varesavo seme pelo pe lači phuv, niknosardas, barilo thaj dija plodo savo sas trijanda, šovardeš, thaj čak vi šel drom majbut nego so sas posadime." 9 Askal phendas: "Ašunen kana več si tumen kan." 10 A kana o Isus ačhilo korkoro, okola save sas oko leste thaj e dešuduj učenikurja phučline les so značil godola paramiče. 11 A o Isus phendas lenđe: "Tumende si dino te džanen e tajna pale Devlesko carstvo. A okolende save si avrijal e Devlešče carstvostar, sa phenav ande paramiče, 12 gajda kaj: 'E jakhenca lače dičhen, ali či dičhena e dela mungre, e kanenca lače ašunen, ali či hačarena so phenav, te či obratin pe thaj te o Del či jartol lenđe.'" 13 Askal o Isus phučla len: "Zar či hačaren akaja paramiči? Sar askal hačarena aver paramiče? 14 O sejači si okova manuš savo sejol e Devlešči poruka. 15 Varesave manuša si sago o seme savo si posadime po drom, von si okola manuša save ašunen o alav e Devlesko, ali odma avel o Sotona thaj indarel o alav e Devlesko savo sas posadime ande lenđe. 16 A varesave si sago o seme savo si posadime pe barutni phuv. Kana ašunen e Devlesko alav, odma prihvatin les e bahtasa, 17 ali pošto o alav e Devlesko či astarda koreno ande lengo trajo, inčarenpe varesavi vrjama, pa kana aven e nevolje thaj o progon zbog e Devlesko alav, von odma peren katar o pačipe. 18 A varesave si sago o seme savo si posadime ande kangre. Godova si okola save ašunen e Devlesko alav, 19 ali e brige akale themešče, o barvalipe savo si primamljivo thaj e aver požude tasaven o alav thaj o alav e Devlesko ačhel bi plodosko. (aiōn g165) 20 A varesave si posadime pe lači phuv. Godova si okola save ašunen o alav e Devlesko, primin o alav thaj anen plodo – varesave trijanda drom majbut, varesave šovardeš drom majbut a varesave šel drom majbut katar okova so sas posadime." 21 Askal o Isus phučla len: "Dali o stenko anen andre te čhon les talo čaro ili talo kreveto te garaven lesko svetlo? Nipošto! O stenko del pe jag te čhol pe po čirako. 22 Kaj, sogod si tajno, avela javno, thaj so god si garado, inklijela po videlo. 23 Ako varekas si kan, nek ašunen!" 24 Thaj još phendas lenđe: "Len sama so ašunen. Save merasa merin, kasave merasa merila pe tumende thaj još dodaila pe tumende. 25 Okoles kas si džanglipe, dela pe lešče još majbut, a okoles kas naj, lela pe lestar vi okova so sile." 26 O Isus isto phendas lenđe: "E Devlesko carstvo si sago o manuš savo posadisardas o seme ande phuv. 27 Račava thaj e desesa, dali sovel ili uštel, o seme niknil thaj barjol, a o manuš či džanel sar. 28 E phuv korkoro pestar anel pesko plodo: majsigo inkjel e stabiljka, o klaso, a askal o

klaso pherdo điv. 29 A kana o điv paćol, o manuš odma lel o srpo, kaj avili e vrjama pale žetva." 30 Askal o Isus phendas lende: "Sova uporedisaras e Devlesko carstvo? Save paramičasa te objasnisaras les? 31 Vo si sago o seme e gorušicako, majcikno katar sa o seme savo sejol pes pe phuv. 32 Ali kana sejol pe, barjol thaj avel majbaro katar sa e biljke ande bar, thaj mućel gajda bare ranja kaj e čiriklja šaj čeren gnezdurja ande lesko hlado." 33 O Isus phenelas kasave paramiče te sikavel e theme e Devlesko alav gaći kozom šaj ašunenar, 34 thaj bi e paramičengo khanči či phenelas lende. Ali kana sas korkoro pire ućenikonenca, askal sa objasnilar lende. 35 Isto godova đes kana peli e rjat, o Isus phendas pire ućenikonende: "Džas pe okoja rig e jezerošči." 36 Mukline e theme thaj dine ande lađica ande savi već bešelar o Isus. A pale lende teljardine vi varesave aver manuša e lađicenca. 37 Thaj vazda pe gajda bari oluja kaj e talasurja pherenar e lađica e pajesa. 38 A o Isus sas po paluno kraj o lađicako thaj sovelar po šerand. E ućenikurja džungadine les thaj phendine: "Ućiteljina, zar či hal tut e briga kaj tasadivar?" 39 O Isus ućtilo thaj oštro phendas e bavlajaće thaj e jezerošće: "Ačh! Smiri tut!" E balval aćhili thaj sas bari tišina. 40 Askal o Isus phendas e ućenikonende: "Sostar gadići daran? Zar još naj tumen paćipe?" 41 A len lijar e bari dar, thaj phućenar jek avres: "Ko si akava te e balval thaj o jezero pokorin pe lešće."

5 Askal avile pe aver rig katar o jezero, ando gerasinsko kraj o. 2 Thaj samo so o Isus inklijsto andar e lađica, odma angle leste avilo andar e limorja jek manuš ande savo sas o bilaćho duho. 3 Akava manuš trajilar ande limorja thaj khonik majbut našti phandelar les čak ni ande lancurja. 4 But drom phandenar lešće vas thaj lešće pungre ande lancurja, ali vo trgolar e lancurja thaj phadelar e okurja pe pešće pungre, thaj khonik nas gaći zuralo te inćarel les. 5 Stalno, e đesenca thaj e raćenca lutilar pe limorja thaj pe bregurja, rknilar thaj pećelar korkoro pes e barenca. 6 Kana dadural dikhla e Isuse, prastaja dži leste thaj pelo angle leste pe pešće koća, 7 thaj andar o sa glaso e rknimava phendas: "So kames mandar, Isuse, Čhaveja e Majbare Devlesko? Dav tut solah e Devleja te na mućis man!" 8 Kaj, o Isus već phendas lešće: "Bilaćho duhona, inkliji andar o manuši!" 9 Askal phućla les: "Sar bućhos?" A vo phendas lešće: "Mungro alav si legija kaj sam but duhurja ande akava manuš sago vojska." 10 Thaj uporno molilar e Isuse te na tradel len andar godova kraj o. 11 A okote po brego čarjolar o baro krdo bale, 12 thaj e bilaće duhurja zamolisardine e Isuse: "Bićhal amen ande okola bale, te das ande lende." 13

O Isus mukhla len thaj e bilaće duhurja inklijstine andar o manuš thaj dine ande bale. Pe godova o sasto krdo varekaj katar duj milje bale, prastajine e bregostar ando more thaj tasadile. 14 Pe godova e manuša kaj lenar sama pe bale našline ande pašutne gava thaj pe okolne thana thaj phendine pale akava so dikhline, thaj o them avelar te dićel so sas godova. 15 Kana avile ko Isus, dikhline e manušar ande savo sas vojska bengar, sar bešel furjardo ande drze thaj sar si sasto ande godi. E dar askal dija pe lende. 16 A okola kaj lenar sama pe bale phendine lende sa so dogodisajlo e manušar thaj e balenca, 17 thaj e manuša askal zamolisardine e Isuse te džaltar andar lengo kraj o. 18 Kana o Isus delar ande lađica, okova manuš ande savo sas e bilaće duhurja zamolisarda e Isuse te mućel les te džal lesa. 19 Ali o Isus či mukhla les, nego phendas lešće: "Bolde tut čere ke čiri familija thaj phen lende so čerda tuće o Gospod, thaj sošči bari milost dija tut." 20 O manuš đelotar thaj aćhilo te čerel svato po Dekapolis e themešće sa so o Isus čerda lešće. Thaj savora sas zadivime. 21 Kana o Isus palem nakhlar e lađicava pe aver rig e jezerošči, oko leste čida pes o but them. Thaj dok sas vo još pašo jezero, 22 avilo leste jek vođa e sinagogako alavesar Jair, thaj kana dikhla e Isuse, pelo pe pešće koća angle lešće pungre e mujesar dži ke phuv 23 thaj zurale molilar les: "Mungri čhejori si po meripe. Av thaj čho čire vas pe late, te sastol thaj te trajil." 24 O Isus đelo lesa. A palo Isus teljardar vi okova but them, savo spidelar pe oko leste. 25 A sas okote maškar lende vi jek nasvali manušnji savi dešuduj brš patilar katar o ratvalipe. 26 But patisajli dok phirelar pe but doktorja, thaj potrošisardar sa so sas lat, ali khanči či pomognisardar laće, nego sas laće sa majgore. 27 Kana ašundar palo Isus, nakhli maškar o them thaj avili leste katar lešće dume thaj dotaknisarda lesko ogrtači, 28 kaj phendas ande peste: "Te dotaknisardem samo lešće drze, avava sasti!" 29 Thaj isto čas o ratvalipe aćhilo latar, a voj haćarda ande pesko telo kaj sastili katar piro baro nasvalipe. 30 O Isus odma haćarda kaj e sila inklijsti andar leste, thaj bolda pe ko them thaj phućlar: "Ko dirda e drze pe mande?" 31 Lešće ućenikurja phendine lešće: "Dićhes kaj o them spidel pe oko tute, a tu phućes ko dirda man?" 32 Ali o Isus dićhelar oko peste te dićel ko čerda godova. 33 A e manušnji, izdralar e daratar kaj džangla kaj sastili, avili angle leste thaj peli pe koća e mujesar dži ke phuv thaj phendas lešće sa o čaćipe. 34 A vo phendas laće: "Čorije čiro paćipe sastarda tut. Dža ando miro thaj av sasti katar čiro baro nasvalipe!" 35 Dok o Isus još godova motholar, avile varesave manuša andar e Jairesko čer thaj phendine: "Čiri čej muli. Sostar majbut

mučis e učitelje?" 36 Ali o Isus či marilas pale lende alava, nego phendas e Jairošče: "Na dara! Samo pačal!" 37 Thaj či mukla khonikas te džal pale leste osim e Petar, e Jakove thaj e Jovane e phrale e Jakovešče. 38 Kana aresline ando čher e sinagogače vođasko, o Isus dikhla kaj o them rknil, rovel thaj kukil ando baro muj, 39 dija andre thaj phendas lende: "Sostar gači kukin thaj roven? E čhori či muli, samo sovel." 40 A von asanas lestar. O Isus sa trada len avri, lija pesa samo e čhorače dade, thaj lače deja thaj okole trin učenikonen kaj sas lesa, thaj dija andre okote kaj pašljolas e čhori. 41 Askal astarda e čhoro palo vas thaj phendas lače: "Talita kumi!" so značil: "Čhejorije, tuče phenav, ušti!" 42 E čhori odma uštili thaj ačhili pe phirel (sas lat dešuduj brš) a von zaprepastisajle katar o čudo. 43 Askal o Isus zurale zapovedisarda lende te na mothon khonikašče pale akava, thaj phendas lende te den e čhoro te hal.

6 Askal o Isus đelotar okotar thaj avilo ando gav ande savo barilo, a lesa avilene vi lešče učenikurja. 2 Kana avilo o savato, vo počnisarda te sikavel e manušen ande sinagoga, a but okola save ašunenas les sas zadivime thaj phenenas: "Katar akale sa gadava? Kaj steknisarda kasavi mudrost? Pe savo način vo pire vastenca čerel čudurja?" 3 Pa vo si samo varesavo stolari, e Marijako čhavo, a e Jakovesko, Josijasko, Judasko thaj e Simunesko phral. Naj li lešče pheja akate maškar amende?" Razočarisajle thaj či prihvatisardine les. 4 Askal o Isus phendas lende: "E prorokos poštuin svugde, osim ande lesko gav kaj barilo, maškar lešči familija thaj ande lesko čher." 5 Thaj okote našti čerda ni jek čudo, osim kaj pe varekozom nasvale manuša čhuta pire vas thaj sastarda len. 6 O Isus sas začudime kaj nas len pačipe. Askal džalas pe okolne gava thaj sikavelas e theme. 7 O Isus akhardas peste e dešuduj učenikonen, dija len vlast te traden andar o them i bilače duhonen thaj bičhaldal len po duj džene. 8 Zapovedisarda lende te na len pesa po drom khanči osim rovlji, ni mangro, ni trjasta, ni bakarne lovora. 9 "Nego len pe tumare pungere e sandale thaj len tumenca samo okola drže save si pe tumende." 10 Još phendas lende: "Kana boravin ande varesosko gav, ačhen ande jek čher thaj na načhen andar o čher ando čher dok či džan ande aver gav. 11 Ako či primina tumen ande varesavo than thaj či čhona kan tumende, džantar okotar thaj činon o praho katar tumare pungere, sago znako kaj či prihvatisardine o alav e Devlesko." 12 Gajda e učenikurja đele thaj počnisardine te propovedin kaj e manuša trubun te pokajin pe. 13 Andar e manuša tradine e bute demonen thaj e bute nasvalen sastardine gajda kaj mačhenas len

e uljeja. 14 A pale godova ašundas vi o caro Irod, kaj e Isusesko alav postanisardas pindžardo. Jek phenenas: "Godova si o Jovano savo bolelas. Uštilo andar e mule, thaj zato akana šaj čerel e silne čudurja." 15 Aver phendine: "Godova si o proroko Ilija." A varesave phendine kaj vo si proroko sago jek katar e purane prorokurja. 16 Kana o Irod godova ašundas, phendas: "Me dijem te čhinen e Jovanesko šoro, a vo akana uštilo andar e mule!" 17 Kaj o Irod majanglal zapovedisardas te astaren e Jovane thaj te čhuden les ande tamnica. Čerda godova zbog e Irodijada, savi sas romnji lešče phralešči e Filipešči. 18 O Irod Ilija lat romnjače a o Jovano stalno phenelas lešče: "Či tromas te les pale romnji čire phralešče romnja!" 19 Zbog godova e Irodijada inčarelas e holji po Jovano thaj kamlas te mudarel les, ali našti čerelas godova, 20 kaj o Irod daralas lestar. Džanglas kaj si o Jovano pravedno thaj sveto manuš thaj zato štitilas les. Volilas te čhol kan leste vi ako e Jovanešče alava zurale uznemirinas les. 21 Ali e Irodijadače sikadili lači prilika, kana o Irod pale piro rođendan pripremisardas gozba pale pire bare službenikurja, vojne zapovednikurja, thaj pale šorvale andar e Galileja. 22 Kana dija andre e Irodijadači čhej thaj počnisarda te chelel, godova zurale svidosajlo e Irodešče thaj lešče gostonende. Thaj o caro phendas e čhejače: "Mang mandar sa so kames, thaj dava tut." 23 Thaj hala lače solah: "Dava tut sa so mandes, čak vi opaš mungro carstvo." 24 Voj inkljisti thaj phučla pire deja: "So te mangav katar o caro?" A lači dej phendas lače: "Mang o šoro e Jovanesko savo bolelas." 25 E čhej odma siđardas ko caro thaj phendas lešče: "Kamav te odma des man pe tacna o šoro e Jovanesko savo bolelas." 26 O caro zurale ražalostisajlo, ali zbog godova kaj halas solah angle gosturja či kamla te odbil lat. 27 Nego odma naredisarda e dželatošče te anel e Jovanesko šoro. Akava đelo, čhinda lesko šoro ande tamnica, 28 anda les pe tacna thaj dija les e čhejače, a voj pire dejače. 29 Kana pale godova ašundine e Jovanošče učenikurja, avile te len e Jovanesko telo thaj te čhon le ando limori. 30 E apostolurja boldine pe thaj cidine pe oko Isus thaj phendine lešče sa so čerdine thaj so sikadine e manušen. 31 Askal o Isus phendas lende: "Hajde aven manca pe varesavo čučo than te avas korkoro thaj te cara odmorin tumen." Godova phendas lende zato kaj o but o them džalas thaj avelas thaj nas len kana ni te han. 32 Gajda von korkoro teljardine e čamcosa pe jek čučo than. 33 Ali, but e manuša dikhline len sar džantar thaj odma pindžardine len, pa andar sa e gava siđardine phujatar thaj aresline okote majsigo lendar. 34 Kana o Isus inkljisto andar e lađica, dikhla e bute theme thaj sažalisajlo pe lende, kaj

von sas sago e bakhre bi pastiresko, thaj počnisarda te sikavel len but godova. **35** Već sas kasno pa e učenikurja avile dži ko Isus thaj phendine: "Akava si pusto krajo, a već si kasno. **36** Muk e theme te džantar pe okolne thana thaj gava te činen pešće vareso te han." **37** A o Isus phendas lenđe: "Den len tumen te han." A von phendine lešće: "So? Sar činasa gaći mangro? Trubujasas men duj šela rupune lovora te pravaras sa akale manušen." **38** A o Isus phučla len: "Kozom mangre si tumen? Džan thaj proverin!" Kana đinadine e mangre, phendine: "Si amen pandž mangre thaj duj mače." **39** O Isus askal naredisarda lenđe te bešen ande grupe pe zeleno čar. **40** Thaj o them bešlo ande grupe po šel thaj po pandžvardeš džene. **41** Askal o Isus lijas e pandž mangre thaj e duj mače, dikhla opre ando nebo, zahvalisarda e Devlešće askal phaglas e mangre, thaj dijas pire učenikonende te čhon anglo them. Gajda podelisarda savorende vi e duj mače. **42** Savora haline thaj čaljile. **43** E učenikurja još čidine dešuduj pherde korpe kotora save ačhiline katar e mangre thaj e mače. **44** A haline pandž milje muškarcurja. **45** Odma pale godova, o Isus naredisarda pire učenikonende te den ande lađica thaj te džan angle leste ande Vitsaida, pe okoja rig e jezerošči, dok vo či mućel e theme te džantar. **46** A kana mukla e theme te džantar, đelo po brego te molil pe. **47** Kana peli e rjat, lešće učenikurja sas ande lađica maškara po jezero, a o Isus sas korkoro pe phuv. **48** O Isus dikhla sar e učenikurja phare veslin kaj phurdelas e suprotno balval, pa varekaj katar o trito dži ko šovto sato detharinako, o Isus avilo dži lende gajda kaj phirelas po paj. Kamlas te načel paše lende, **49** ali kana e učenikurja dikhline sar phirel po paj, gndisardine kaj si duho, thaj počnisardine te čhon muj. **50** Kaj savora izdranas e daratar kana dikhline les, a o Isus odma phendas lenđe: "Aven hrabre! Me sem! Na daran!" **51** Askal dijas lende ande lađica thaj e balval ačhili. A e učenikurja sas zurale začudime, **52** kaj či hačardine o čudo e mangrenca, kaj lenđe ile zurajle thaj či paćanas. **53** Kana o Isus thaj lešće učenikurja nakhline pe okoja rig e jezerošči, aresline ando Genisaret thaj okote phandadine o čamco. **54** Čim inklijstine andar o čamco o them odma pindžardas e Isuse, **55** thaj prastajine pe sasto krajo te razglasin kaj avilo o Isus, a o them teljarda te anen e nasvalen pe nosilje okote kaj ašundine kaj si o Isus. **56** Thaj kaj god džalas, ande baro ili cikno gav, o them čholas pire nasvalen pe glavne sokača thaj molinas e Isuse te mućel len te dotakin samo o teluno čoško katar lesko ogrtači. Thaj savora save dotaknisardine les, sastile.

7 Oko Isus čidine pe varesave fariseja thaj e učitelja palo Mojsijesko zakono save aviline andar o Jerusalim. **2** Von dikhline varesave lešće učenikonen kaj han mangro bithode vastenca so značil kaj lenđe vas sas obredno melale. **3** A e Židovurja, posebno e fariseja, či hanas mangro, a te majsigo či laće thodinesas obredno pire vas, pa gajda inćarenas e purane običajja katar pire prapapurja. **4** Thaj kana avenas čhere katar o pijaco, či hanas, a te majsigo či obredno thodinesas pe. A sas len još majbut purane običajja save inćarenas, sago kaj si: o obred te thoven pe e tahta, e bokalurja thaj e bakrene vasurja. **5** Thaj zbog godova e fariseja thaj e učitelja palo Mojsijesko zakono phučline e Isuse: "Sostar čire učenikurja či inćaren e purane običajja save mukline amende amare prapapurja, nego han e melale vastenca?" **6** A o Isus phendas lenđe: "Licemerja! Lače prorokuisardas o Isaija pale tumende sago kaj o Del phendas ando Sveto lil: Akala manuša samo e alavenca poštuin man, ali lengo ilo si dur mandar. **7** Ivja lenđe kaj slavin man, kana e manušenje zapovesti sikaven sago kaj si mungro sikavipe. **8** E Devlešće zapovesti mukline, a inćaren e manušenje običajja." **9** Thaj još phendas lenđe: "Baš škar tumendar, odbacin e Devlešće zapovesti te šaj inćaren tumare običajja. **10** O Mojsija phendas: 'Poštuisar čire dades thaj će deja' thaj: 'Ko del romaja pire dade ili pire deja, neka avel kaznime po smrto.' **11** A tumen phenen: 'Lače si te o manuš phenel pire dadešće ili pire dejaće: "Sa sova šaj pomogniv tut si te prinesiv kurbano – so značil žrtveno daro e Devlešće"', **12** gajda tumen či mućen e manušen te vodil briga pale piro dad ili pale piri dej. **13** Thaj gajda odbacin e Devlesko alav tumare običajjenca save sikaven avren. Thaj but gajda vareso čeren." **14** Askal palem akharda e theme peste thaj phendas: "Ašunen man savora thaj haćaren! **15** Khanči so avrjal del ando manuš našti meljarel e manuše andral. Nego okova so inkijel andar o manuš meljarel e manuše andral. **16** [Ako varekas si kan, nek ašunel!]" **17** A kana đelotar e themestar thaj dijas ando čher, e učenikurja phučline les te objasnil lenđe akaja paramiči. **18** A o Isus phučla len: "Pa ni tumen či haćaren? Sar či haćaren kaj khanči so del avrjal ando manuš našti meljarel e manušen, **19** kaj či džal lešće ando ilo, nego džal ande lesko ođi, thaj inkijel avri andar lesko telo?" (Gajda o Isus mothodas kaj si sa o hamasko čisto.) **20** Thaj još majdur motholas: "Okova so inkijel andar e manušesko ilo čerel e manuš te avel melalo anglo Del. **21** Kaj andral, andar e manušesko ilo, aven e bilače gindurja, o blud, o čoripe, o mudaripe, **22** o preljub, e pohlepa, o bilačo narav, e prevara, o biladžavipe, e zavist, o vredope, o barikanipe thaj o dilipe. **23** Sa akava bilačipe

inkljel andar o manuŝ thaj meljarel e manuŝes anglo Del." 24 Pale godova o Isus andar e Gaileja delo ande tirske thaj sidonske krajurja thaj smestisajlo ande varesosko čher. Či kamlas te bilo ko džanel kaj si okote, ali naŝti ačhilo garado. 25 Varesavi manuŝnji ande kaŝči čhejori sas o bilačo duho, čim ašunda pale leste avili thaj peli angle leŝče pungere pe koča e mujesa dži ke phuv. 26 A godoja manuŝnji nas Židovka thaj sas bijandi ande sirisko Fenikija. Molilas e Isuse te tradel e benđe andar lači čhej. 27 O Isus phendas lače: "Muk majsigo te čaljon e čhavra, kaj naj lače te lel pe o mangro katar e čhavra thaj te čhudel pe e džučelorende." 28 A voj phendas: "Gajda si, Gospode, ali vi e džučelora tale sinija han e pruŝuka kaj peren e čhavrende." 29 Askal o Isus phendas lače: "Zbog godova kaj phendan akava, dža čhere. O bilačo duho inkljisto andar čiri čhej." 30 Kana e manuŝnji deli čhere, arakhla e čhora sar paŝljol ando kreveto, a o bilačo duho već inkljisto andar late. 31 Askal o Isus delotar andar e tirske krajurja, thaj preko Sidono areŝlo dži ko Galilejsko jezero ande dekapoljsko krajo. 32 Okote andine leŝče ječe kaŝuče manuŝe, savo vi phare čerelas svato thaj zamolisardine e Isuse te čhol piro vas pe leste. 33 O Isus indarda les cara majdur katar o them te ŝaj avel lesa korkoro, čhuta peŝče naja ande leŝče kan, thaj peŝče čhungarava dotaknisardas leŝči čhib. 34 Dikhla ando nebo, uzdahnisarda thaj phendas leŝče: "Efatai", so značil: "Putar tut!" 35 Thaj odma bolda pe e manuŝesko sluho, thaj leŝči phangli čhib putajli thaj ŝaj lače čerelas svato. 36 O Isus zabranisarda e themeŝče te mothon bilo kaŝče pale akava. Ali so vo majbut branilas lenđe, von sa majbut čerenas svato pale akava. 37 But divinas pe thaj phenenas: "Sa so čerel si zurale lače – vo čerel te e kaŝuče manuŝa ašunen thaj e neme te čeren svato!"

8 Ande godoja vrjama palem čida pes o but o them. A sar nas len so te han, o Isus akhardas peste pire učenikonen thaj phendas lenđe: 2 "Žao si mande katar o them, kaj si već trin des manca, a najlen so te han. 3 Ako bičhalav len čhere bokhalen, malaksina po drom. A varesave lendar avile dadural." 4 Leŝče učenikurja phučline les: "Sar vareko pe akava pusto than ŝaj arakhla sas dosta mangro pale sa akala manuŝa te han?" 5 O Isus phučla len: "Kozom mangre si tumen?" A von phendine: "Efta." 6 Askal o Isus phendas e themeŝče te bešen tele pe phuv. Lijas e efta mangre, zahvalisarda e Devleŝče, phagla e mangre thaj dijas e učenikonende, a von podelisardine e themeŝče. 7 A sas len vi varekozom mačhora. O Isus zahvalisarda pale lenđe thaj phendas e učenikonende te vi len podelin e themeŝče. 8 E

manuŝa haline thaj čaljile. A e učenikurja čidine efta korpe kotora katar o okova habe kaj ačhilo. 9 A okote sas varekaj katar ŝtar milje muŝkarcurja. Askal o Isus mukla len te džantar čhere. 10 Odma pale godova o Isus dija ande lađica pire učenikonenca thaj uputisajle ande dalmanitsko krajo. 11 Askal aviline e fariseja thaj počnisardine te raspravin pe e Isuseja thaj te iskušin les, gajda kaj rodenas lestar te sikavel lenđe varesavo znako andar o nebo. 12 Kana o Isus godova ašunda, handuk uzdahnisarda thaj phendas: "Sostar akava naraŝtaj rodel znako? Čače phenav tumende: Nisavo znako či dela pe tumende." 13 Askal delotar lendar, dijas palem ande lađica thaj otplovisarda pe aver rig e jezeroŝči. 14 A e učenikurja bistardine te len pesa mangro, pa ande lađica sas len samo jek mangro. 15 Dok načenas prekal o jezero, o Isus upozorisarda len: "Len tumen sama katar o farisejsko thaj e Irodesko kvasco!" 16 A von počnisardine te raspravin pe maŝkar peste: "Kava phendas zato kaj či lijam amenca mangro!" 17 O Isus džanglas so gndin thaj phendas lenđe: "Sostar raspravin tumen kaj naj tumen mangro? Joŝ uvek či razumin thaj či hačaren o značenje? Zar tumaro ilo gadiči barosajlo?" 18 Jakha si tumen, a či dičhen thaj kan si tumen, a či ašunen. Zar či den tumen gođi? 19 Kana phaglem okola pandž mangre thaj prvardem pandž milje muŝkonen, kozom pherde korpe čidine kotora save ačhiline?" A von phendine: "Deŝuduj." 20 "A kana phaglem okola efta mangre thaj pravardem ŝtar milje muŝkonen, kozom pherde bare korpe kotora čidine?" A von phendine: "Efta." 21 Pe godova phendas lenđe: "Zar joŝ či hačaren?" 22 Kana areŝline ande Vitsaida, varesave manuŝa andine ko Isus ječe kore manuŝe, thaj zamolisardine les te čhol pire vas pe leste. 23 O Isus lijas e kore manuŝe palo vas thaj indarda les avri andar o gav, čhungarda ande leŝče jakha thaj čhuta peŝče vas pe leste thaj phučla les: "Šaj dičhes vareso?" 24 A o manuŝ dikhla thaj phendas: "Dikhav e manuŝen, ličin mande sago e kaŝ save phiren." 25 Askal o Isus palem čhuta pire vas pe leŝče jakha, thaj e manuŝeŝče godova drom skroz bolda pe o vido. Thaj sa jasno dičhelas. 26 Askal o Isus bičhaldla les čhere thaj phendas leŝče te na del ando gav. 27 Askal o Isus thaj leŝče učenikurja đele ande okolne gava oko e Kesarija e Filipeŝči. Dok sas joŝ po drom, o Isus phučlas pire učenikonen: "So phenel o them, ko sem me?" 28 A von phendine leŝče: "Jek phenen kaj san o Jovano savo bolelas, aver e phenen kaj san o proroko Ilija, a varesave phenen kaj san varesavo katar e prorokurja." 29 Askal phučla len: "A tumen, so gndin ko sem me?" O Petar phendas: "Tu san o Hristo!" 30 O Isus oŝtro phendas lenđe te či phenen khonikaŝče akava pale leste. 31 Askal počnisarda

te sikavel len e alavenca: "Me, o Čhavo e Manušesko, moraš but te pativa. E starešine, e šorvale rašaja thaj e učitelja e Mojsiješće zakonestar moraš te odbacina man. Avava mudardo thaj pale trin đes uštava andar e mule." 32 O Isus phendas lende godova gajda jasno. Askal o Petar lija les pe rig thaj lijas te ukoril les. 33 O Isus bolda pe, dikhla pe pire učenikurja thaj ukorisarda e Petre alavenca: "Džatar mandar, Sotono, kaj tu či gndis pe okova so si e Devlesko, nego so si e manušesko." 34 Askal akharda peste e theme thaj pire učenikonen thaj phendas lende: "Ako vareko kamel te džal pale mande, askal neka odreknil pe korkoro pestar, neka lel piro trušul, thaj neka džal pale mande. 35 Kaj svako ko kamel te spasil piro trajo, hasarela les, a ko hasarel piro trajo zbog mande thaj zbog e Bahtali nevimata, spasila les. 36 Kaj so mol e manušešće te dobil o sasto them, a te hasarel piro trajo? 37 So o manuš šaj del sago zamena pale piro trajo? 38 Kaj ko ladžal mandar thaj katar mungre alava angle akava bipačivalo thaj bezehalo naraštaj, vi me, o Čhavo e Manušesko, ladžava lestar kana avava ande slava mungre Dadešči e svete andelencia."

9 O Isus majdur phendas lende: "Čače phenav tumende, si akate varesave kaj ačhen maškar tumende, von sigurno či merena dok majsigo či dičhena e Devlesko carstvo kaj avel ande sila." 2 Šov đes majposle o Isus lija pesa e Petre, e Jakove thaj e Jovane thaj đelo lenca pe vuči gora, kaj sas lenca korkoro thaj okote angle lende promenisaajo e Isusesko izgled. 3 Lešće drže čerdile blistavo, gajda parne sar ni jek manuš pe phuv našti parnjardasas len. 4 Pe godova angle lende sikadilo o proroko o Ilija thaj o Mojsija thaj line te čeren svato e Isuseja. 5 A o Petar phendas e Isusešće: "Učiteljina, lače si kaj sam akate! Te vazdas trin senice: jek pale tute, jek palo Mojsije thaj jek palo Ilija." 6 O Petar či džanelas so aver te mothol kaj lija len e bari dar. 7 Askal sikadilo jek oblako thaj učharda len pire senkava thaj askal ašundilo o glaso andar o oblako: "Akava si mungro volime Čhavo! Les ašunen." 8 Thaj katar jekhar kana e učenikurja dikhline oko peste, majbut khonikas či dikhline osim e Isuse. 9 Thaj kana fuljenas katar e gora, o Isus naredisarda lende kaj či troman te mothon khonikašće so dikhline, dok vo, o Čhavo e Manušesko, či uštel andar e mule. 10 Von inčardine godova pale peste, ali čerdine svato maškar pende so gindilas o Isus kana phendas kaj "uštela andar e mule." 11 Askal e učenikurja phučline les: "Sostar e učitelja e Mojsiješće zakonestar phenen kaj majsigo katar o Mesija trubul te avel o Ilija?" 12 O Isus phendas lende: "Čače o Ilija avela prvo thaj sa obnovila, ali sostar si askal

ramome ando Sveto lil palo Čhavo e Manušesko kaj but patila thaj kaj avela odbacime? 13 A me phenav tumende: O Ilija već avilo, a von čerdine lesa sar kamlu pe lende, sago kaj si pala leste vi ramome." 14 Kana o Isus thaj lešće okola trin učenikurja boldine pe katar e gora ke aver učenikurja, dikhline e bute themes oko lende thaj e učiteljen e Mojsiješće zakonestar sar traden pe e učenikonenca. 15 A o them kana dikhla kaj avel o Isus, zurale iznenadisajle thaj odma prastajine te pozdravin les. 16 O Isus phučla len: "Oko soste traden tumen lenca?" 17 A jek manuš andar o them phendas lešće: "Učiteljina, andem tute mungre čhaves, savo našti te čerel svato, kaj si ande leste o bilačo duho thaj zbog godova si nemo. 18 Kana astarel les, čudel les pe phuv, thaj e spuma del lešće po muj, škripol e dandencia thaj kočil pe. Phučem čire učenikonen te traden e nemo duhos andar leste, ali von našti tradine les." 19 O Isus pe godova phendas lende: "O bipačivalo naraštajona, dži kaj još trubula te avav tumenca? Dži kaj još trpiva tumen? Anen e čhavre mande." 20 Thaj von andine e čhavres leste. Kana o duho dikhla e Isuse, odma zurale čhinosarda e čhavres, savo pelo pe phuv thaj ačhilo te valiji pes pe sa e riga, a po muj delas lešće e spuma. 21 O Isus askal phučla lešće dades: "Kozom vrjama si kasavo?" O dad phendas: "Katar lesko ciknipe. 22 Svako cara o duho čudel les vi ande jag vi ando paj te mudarel les. Ali te šaj vareso te čeres, smiluisar tut amende thaj pomožisar amen!" 23 O Isus phendas lešće: "Phučes man: 'Te šaj'? Sa si moguće okolešće savo pačal!" 24 A e čhavesko dad odma čhuta muj: "Pačav! Pomožisar mande te majbut pačav!" 25 Kana o Isus dikhla kaj sa majbut them prastajas dži lende, strogo ukorisarda e bilače duho gajda kaj phendas: "Duhona savo phandaves e manušende čhibja te našti čeren svato thaj lende kan te aven kašuče, zapovediv tuče inklji andar leste thaj majbut na te boldes tut ande leste!" 26 Thaj o bilačo duho čhuta muj thaj zurale čhinosarda e čhavres thaj inkljisto andar leste. A o čhavo ačhilo te pašljol tele sago mulo thaj but džene phendine kaj mulo. 27 Ali o Isus lija les palo vas, vazda les opre thaj o čhavo uštalo. 28 Kana dija andre ando čer, lešće učenikurja phučline les korkoro pe rig: "Sostar amen našti tradam godole bilače duhos?" 29 A o Isus mothodas lende: "Akaja vrsta šaj tradel pe samo e molitvava." 30 Kana đeletar okotar, načhenas kroz e Galileja. A o Isus či kamlu te o them pale godova džanel, 31 kaj sikavelas pire učenikonen gajda kaj phenelas lende: "Me, o Čhavo e Manušesko, avava dino ande vas e bilače manušende thaj von mudarena man, ali pale trin đes me uštav andar e mule." 32 Ali e učenikurja či hačardine so motholas, a sas lende dara te

phučen les. **33** Kana o Isus thaj lešće učenikurja arese ando Kafarnaum thaj kana dine ando čher, o Isus phučla len: "So godova tradenas tumen dromesa maškar tumende?" **34** A von khanči či mothonas kaj e dromesa tradenas pe jek avresa ko si maškar lende majbaro. **35** Askal o Isus bešlo, akhardas peste e dešduje apostolen thaj phendas lende: "Ko kamel te avel prvo neka avel maškar savorende zadnjo thaj neka avel sluga savorende!" **36** Askal lija ječe čhavre, čuta les maškar lende, dijale mrtiko thaj phendas: **37** "Ko prihvatił ječe kasave cikne čhavre zbog mande, man prihvatił. A ko man prihvatił, či prihvatił samo man već e Devles savo bičhaldal man." **38** O Jovano phendas e Isusešće: "Učiteljina, dikhlam ječe manuše sar ande čiro alav tradel e bilače duhonen. Amen phendam lešće te na čerel godova kaj či džal pale tute thaj naj jek amendar." **39** O Isus phendas lende: "Na branin lešće, kaj khonik ko čerel čudo ande mungro alav či mothol bi lačhipe pale mande. **40** Kaj, ko naj protiv amende, godova si pale amende. **41** Kaj, ko del tumen samo vi tahtaj paj zato kaj sen e Hristošće učenikurja, čače phenav tumende: godova manuš sigurno dobila piri nagrada." **42** "Ko crdel po bezeh ječe katar kala ciknen save ande mande paćan, majlače avilosas lešće te unglaven lešće o mlinisko bar pe kor thaj te čhuden les ando jezero. **43** Te crdel tut čiro vas po bezeh, čin čo vas tutar. Kaj majlače si tuće bi vastengo te des ando večno trajo, nego liduj vastenca te džas ande pakao, ande večno jag savi nikad či mudardola, (Geenna g1067) **44** [kaj lengo čermo či merela thaj e jag či mudardola]. **45** Te crdel tu čiro pungro po bezeh, čin čo pungro tutar. Kaj majlače si tuće bi pungrengo te des ando večno trajo, nego liduj pungrenca te aves čhudino ando pakao, (Geenna g1067) **46** [kaj lengo čermo či merela thaj e jag či mudardola]. **47** Te crdel tu čiri jakh po bezeh, inkal čiri jakh tutar. Kaj majlače si tuće te des ande Devlesko carstvo ječe jakhasa, nego te avel tut liduj jakha, a te aves čhudino ando pakao, (Geenna g1067) **48** kaj lengo čermo či merela thaj e jag či mudardola. **49** Kaj svako avela šilado e jagasa sago kaj si e žrtva šiladi e loneja. **50** O lon si lačo. Ali te o lon hasarel pesko londipe sova londarena? Aven sago o lon thaj trajin ando miro jek avresa!"

10 O Isus đelotar okotar thaj đelo ande judejske krajurja, preko e reka e jordanošći. Thaj palem avilo leste o but o them, a vo sago vi uvek sikavelas len. **2** Avile dži leste varesave fariseja thaj phučline les gajda te iskušin les: "Dali tormal o rom te rastavił pe katar piri romnji?" **3** A o Isus phučla len: "So o Mojsije zapovedisardas tumende?" **4** A von phendine: "O Mojsija mukla e romešće te del pešće romnja

rastavno lil thaj askal šaj mućel lat." **5** Askal o Isus phendas lende: "O Mojsije ramosarda tumende godoja zapoved zbog tumare barune ile. **6** Ali, ando početko kana o Del sa čerda, 'čerda len muško thaj žensko.' **7** 'Zato o rom mućela pire dade thaj pire deja thaj avel jek pire romnjasa, **8** thaj von duj džene avena jek telo' gajda naj majbut duj nego jek telo. **9** Zato o manuš neka či rastavił okova so o Del sastavisarda." **10** A kana sas palem andre ando čher, e učenikurja phučline les pale godova. **11** A o Isus phendas lende: "Ko rastavił pe katar piri romnji thaj lel aver romnja, čerel preljub prema piri prvo romnji. **12** Thaj e romnji, ako rastavił pe katar piro rom thaj lel aver rome, čerel preljub." **13** Varesave manuša anenas anglo Isus pire čhavren te čhol pire vas pe lende thaj blagoslovił len, a e učenikurja godova braninas lende. **14** Kana o Isus dikhla so čeren, holjajlo thaj phendas lende: "Mućen e čhavroren te aven mande. Thaj na branin lende, kaj kasavende pripadił e Devlesko carstvo. **15** Čače phenav tumende: ko či primil e Devlesko carstvo sago cikno čavro, sigurno či dela ande leste." **16** Askal dijas mrtiko e čhavren, čuta pire vas pe lende thaj blagoslovisarda len. **17** Kana o Isus sas palem po drom, prastajas dži leste varesavo manuš, pelo pe koča angle leste thaj phučla les: "Lačheja učiteljina, so trubul te čerav te naslediv o večno trajo?" (aiōnios g166) **18** A o Isus phendas lešće: "Sostar man akhares lačheja? Khonik naj lačo osim o jedino o Del. **19** E zapovesti džanes: 'Na mudar, na čer preljub, na čor, na svedočisar hohamne, na prevarisar, poštuisar čire dades thaj čire dejal!'" **20** A o manuš phendas lešće: "Učiteljina, sa gadava inčarav katar mungro ternipe." **21** O Isus dikhla pe leste pherdo ljubavi thaj phendas lešće: "Još samo jek falil tuće: dža thaj bićin sa so si tut, a e love de e čorende thaj avela tut barvalipe ando nebo. Askal av thaj sledisar man." **22** Čim o Isus godova phendas lešće, o manuš mukla po muj. Rastužisajlo thaj đelotar, kaj či kamlas te bićineli piro baro barvalipe. **23** O Isus dikhla oko peste, thaj phendas pire učenikonende: "Sar si phare e barvalende te den ande Devlesko carstvo!" **24** E učenikurja začudisajle pe godova so phendas. Zato o Isus palem phendas lende: "Čhavralen mungralen, sar si phare te den ande Devlesko carstvo. **25** Maj loće si e kamilače te načel kroz e suvjače kan nego e barvalešće te del ande Devlesko carstvo." **26** E učenikurja još maj but začudisajle, thaj phućenas jek avres: "Pa ko askal šaj te spasił pes?" **27** A o Isus dikhla pe lende thaj phendas: "E manušenje si godova nemoguće, ali e Devlešće naj, kaj e Devlešće si sa moguće." **28** Askal o Petar phendas e Isusešće: "Ake, amen muklam sa thaj teljardam pale tute." **29** Askal o Isus phendas: "Čače phenav tumende, svako ko mukla pesko čher, ili pe

phralen, ili pe phejen, ili pe dade thaj pe deja, ili pe čhavren, ili pe njive pale mande thaj pale Bahtali nevimata, 30 akana, ande akaja vrjama, sigurno dobila šel drom majbut: čhera, phrala, pheja, deja, čhavra, thaj phuvja. Ali sa godolesa avena vi e progonurja, a ande vrjama savi avela, večno trajo.

(aiōn g165, aiōnios g166) 31 A but okola save si akana prve, avena poslednje, a okola poslednje avena prve." 32 Kana o Isus thaj lešće učenikurja teljardine karingal o Jerusalam, a o Isus džalas angle lende, e učenikurja sas začudime kaj džal ando Jerusalam, a okolen save džanas pale leste lijas e dar. O Isus palem lijas e dešduje učenikonen pe rig thaj motholas lende so avela lesa: 33 "Ake das ando Jerusalam. Okote man, e Čhaves e Manušešće, predaina ande vas e šorvale rašajende thaj e učiteljende e Mojsiješće zakonestar thaj von osudina man po smrto. Askal predaina man ke okola save naj židovurja 34 thaj von marena muj mandar, čhungarena man, bičuina man, thaj mudarena man. Ali me trin đes pale godova uštava andar e mule." 35 Askal avile dži ko Isus o Jakov thaj o Jovano, e Zevedejevešće čhave, thaj phendine lešće: "Učiteljina, kamas te čeres pale amende sa so zamolisa tut." 36 A o Isus phučla len: "So kamen te čerav pale tumende?" 37 A von phendine lešće: "Muk amen te bešas tusa kana deja ande čiri nebesko slava, pe počasne thana, jek pe čiri desno rig a aver pe čiri levo rig." 38 A o Isus phendas lende: "Či džanen so manden. Dali šaj pijen andar o tahtaj andar savo me pijava ili te bolen tumen sago kaj me bolava man?" 39 A von phendine: "Šaj." Pe godova o Isus phendas lende: "Ej čače pijena andar o tahtaj patnje andar savo me pijava thaj bolena tumen ande patnje sago kaj me bolava man. 40 Ali naj mungro te odrediv ko bešela pe mungri levo ili desno rig. Godola thana pripadin okolende pale kaste o Del odredisardas." 41 Kana godova ašundine e aver deš učenikurja, holjajle po Jakov thaj po Jovano. 42 O Isus akharda len peste thaj phendas lende: "Tumen džanen kaj okola save inčaren pe kaj si e manušeđe vladarja, vladin pe lende, thaj okola save si majbare lendar volin te gospodarin lenca. 43 Ali maškar tumende nek či avel gajda, nego savo kamel te avel majbaro maškar tumende, neka avel tumaro sluga. 44 Thaj ko kamel te avel maškar tumende prvo, neka savorende avel robo. 45 Kaj ni me, o Čhavo e Manušeško, či avilem te služin mande nego te me služiv averende, thaj te dav mungro trajo sar počin pale e but manuša." 46 Askal arešline ando gav o Jerihon. Kana o Isus, lešće učenikurja thaj o but o them inkljenas andar o Jerihon, pašo drom bešelasi o koro prosijako, savo akhardolas Vartimej, so značil e Timejesko čhavo. 47 Kana ašunda kaj godova načel o Isus

andar o Nazaret, počnisarda te čhol muj: "Isuse e Davidešće Čhaveja, smiluisar tut mandel!" 48 But džene opomeninas les te ačhel, ali vo još majzurale čholas muj: "E Davidešće Čhaveja, smiluisar tut mandel!" 49 O Isus ačhilo thaj phendas: "Akahren les akaring!" Von akhardine e kore manuše thaj phendine lešće: "Hrabro, ušti! O Isus akharel tut." 50 O koro manuš čhuda pestar o ogrtači, huklo pe pungre thaj avilo anglo Isus. 51 O Isus phučla les. "So kames te čerav pale tute?" O koro manuš phendas: "Učiteljina, kamav te šaj te dikhav." 52 A o Isus phendas lešće: "Dža, čiro pačipe sastarda tut!" Thaj o koro odma šaj dichelas, thaj teljarda dromesa palo Isus.

11 Kana o Isus thaj lešće učenikurja avile majpaše dži ko Jerusalam thaj arešle paše ke gava Vitfaga thaj ke Vitanija, pe maslinsko gora, bičhalda pire duje učenikonen anglal. 2 Phendas lende: "Džan ando gav savo si angle tumende. Sar den ande leste, aračhena e phangle magare pe savo khonik či jašisarda. Putaren e magare thaj anen les akaringal. 3 A ako vareko phučel tumen: 'sostar godova čeren?', tumen phenen: 'Trubul e Gospodešće, ali vo sigo boldela les.'" 4 E učenikurja đele thaj arakhlina e phangle magare pale kapija, avri po sokako, thaj putardine les. 5 A varesošće manuša save okote ačhenas phučline len: "Sostar putren e magare?" 6 A e učenikurja phendine lende gajda sar o Isus phendas lende te mothon, thaj e manuša mukline len po miro. 7 Askal andine ko Isus e magare, thaj čhutine prekal leste pire ogrtača, a o Isus bešlo pe leste. 8 But manuša buljarenas pire ogrtača po drom, a varesave katar e manuša buljarenas zelene krاندže save čhindine ando polje. 9 E manuša save džanas anglo Isus thaj pale leste čhonas muj: "'Hosana! Blagoslovime okova savo avel ando alav e Gospodesko!" 10 Blagoslovime si o carstvo amare pradadesko e Davidesko savo avel! 'Hosana e Devlešće ande visina!" 11 Gajda o Isus dijas ando Jerusalam thaj đelo ando Hramo thaj sa razgledilas, ali sar sas već kasno, đelotar e dešduje apostolenca ande Vitanija. 12 Thejara o đes teljardine andar e Vitanija, a o Isus bokhajlo. 13 Dadural dikhla ječhe smokva savi sas sa ande patrja thaj đelo dži late te aračhel vareso pe late te hal. Ali kana avilo late, či arakhlas pe late khanči osim laće patrja, kaj još nas e vrjama te e smokva bijanel pesko plodo. 14 Askal o Isus phendas e smokvače: "Dži ko veko neka khonik majbut či hal čiro plodo tutar!" A godova ašundine vi lešće učenikurja. (aiōn g165) 15 Kana avile palem ando Jerusalam, o Isus dijas ande avlija e Hramošči thaj ačhilo te tradel avri andar o Hramo savoren save okote činenas thaj bičinenas thaj delas mujal e

sinije kolende kaj phađen as e love, a kolende kaj bičinenas e golubonen haravelas lende klupe. **16** Thaj khonikašče či mukla te indarel vareso kroz e Hramošči avlija te bičinel. **17** Askal lijas te sikavel len: "Naj li ramome ando Sveto lil: 'Mungro čher akhardola molitveno čher pale sa o them?' A tumen čerdine lestar than kaj čiden pe e razbojnikurja!" **18** A kana ašundine pale godova e šorvale rašaja thaj e učitelja e Mojsiješče zakonestar, ačhile te roden način sar te mudaren e Isuse, kaj daranas lestar andar godova kaj sa o them divilas pe lešče sikavipešče. **19** Kana peli e rjat, o Isus thaj lešče učenikurja inklijstine andar o gav. **20** Kana o Isus thaj lešče učenikurja aver detharin nachenas paše okoja smokva, line sama kaj e smokva šučili andar o koreno. **21** A o Petar askal dija pe godi thaj phendas e Isusešče: "Dik učiteljina! Šučili e smokva savja dijan romaja!" **22** O Isus phendas lende: "Nek avel tumen pači pe ando Del. **23** Vi čače phenav tumende, ko god phenel akale gorache: 'Vazde tut thaj čhude tut ando more!' thaj či sumnjil ande piro ilo, nego pačal kaj avela gajda sar phendas – gajda avela lešče. **24** Andar godova phenav tumende: sa so roden ande tumare molitve, pačan kaj primina, thaj avela tumende dino. **25** Thaj kana len te molin tumen, jartosaren te si tumen vareso protiv varekaste, te vi tumende tumaro nebesko Dad jartol tumare bezeha." **26** [A te tumen či jarton averende, askal ni tumaro nebesko Dad či jartola tumende.] **27** Thaj palem o Isus thaj lešče učenikurja avile ando Jerusalam. Kana o Isus phiravelas pes pe avlija e Hramošči, avile dži leste e šorvale rašaja, e učitelja e Mojsiješče zakonestar thaj e starešine, **28** thaj phučline les: "Ande kašči vlasti čeres akava? Ko dija tut vlast te čeres kasave stvarja?" **29** A o Isus phendas lende: "Vi me phučava vareso tumen, te tumen mothodine mande. Vi me mothava tumende ande kašči vlast čerav akava. **30** Dali o Del phendas e Jovanošče te bolel e manušen, ili e manuša phendine lešče te čerel godova? Phenen mande akava!" **31** A von ačhile maškar peste te raspravin: "Te phendam 'o Del phendas lešče', phučela men 'Sostar askal či pačajine lešče?' **32** A či kamas te phenas kaj e manuša phendine lešče. Ipak daranas katar o them, kaj savora inčarenas kaj o Jovano sas čačo proroko." **33** Andar godova phendine e Isusešče: "Či džanas." Askal o Isus phendas lende: "Ni me askal či phenava tumende ande kašči vlast čerav akava!"

12 Askal o Isus počnisarda te čerel lende svato ande paramiče sago kaj si akaja: "Jek manuš zasadisardas vinograd, ogradisarda les e ograda, hanadas ande leste than kaj gnječila pe e drak, thaj vazdas stražarsko kula. Askal o vinograd iznajmisardas e vinogradarende thaj delotar

dur. **2** Kana avili e vrjama pale berba, bičhaldas pire slugos te lel katar e vinogradarja o deo katar e drak savi pripadil lešče. **3** Ali e vinogradarja astardine e slugos, mardine les thaj tradine les palpale čuče vastenca. **4** O gospodari e vinogradesko bičhaldas aver slugos. Ali e vinogradarja pharadine lesko šoro thaj lažardine les. **5** Askal bičhalda vi e trito slugos, ali les mudardine. Bičhaldas lende vi bute e aver slugen, ali e vinogradarja ječhen mardine, a averen mudardine. **6** Thaj ačhilo les samo još jek: lesko volime čhavo. Po krajo bičhaldas vi les, kaj gindisarda: 'Mungre čhave sigurno poštuina.' **7** Ali kana e vinogradarja dikhline les phendine jek avrešče: 'Akava si o nasledniko. Hajde te mudaras les, thaj o nasledstvo ačhela amende.' **8** Astardine les, mudardine les thaj lesko telo čhudine avri andar o vinograd. **9** So akana čerela o gospodari e vinogradesko? Avela thaj mudarela godole vinogradaren, a o vinograd dela ando najam aver vinogradarende. **10** Sigurno čitosardine ando Sveto lil akava: 'O bar savo e zidarja odbacisarde postanisarda bar e temeljesko. **11** O Gospod godova čerda, thaj čudesno si ande amare jakha?' **12** E židovske vođe askal rodenas način sar te astaren e Isuse kaj džangline kaj godoja paramiči si namenime lende. Ali daranas katar o them. Andar godova delotar thaj mukline les. **13** Pale godova e židovske vođe bičhaldine ko Isus varesave farisejen thaj e Irodešče manušen te šaj optužin e Isuse kaj phendas vareso bilače. **14** Von avile leste thaj phendine: "Učiteljina, džanas kaj tu mothos o čači pe, thaj kaj naj san pe khonikašči rig niti dičhes ko si ko, nego čači peja sikaves e theme palo drom e Devlesko. Dali amen e Židovurja trubul te das e carošče o porez ili či trubul? Dali te počinas o porez ili te či počinas?" **15** A o Isus džangla kaj si licemerne thaj phendas lende: "Sostar kamen te crden man ande tumari zamka? Anen mande e kovanica savjava počinen o porez te dikhav lat thaj phenava tumende." **16** Andine leste e kovanica, a vo phučla len: "Kasko si akava šoro thaj natpiso pe kovanica?" A von phendine lešče, "E carosko." **17** Askal o Isus phendas lende: "Den e carošče so si e carosko, a e Devlešče so si e Devlesko." Pe godova von zadivisajle lešče. **18** Askal avile ko Isus varesave sadukeja save phenen kaj naj uštipe andar e mule, thaj phučline les: **19** "Učiteljina, o Mojsije ramosarda amende te mulo varekasko phral thaj mučel e romnja, a nas len čhavra, lesko phral trubul te oženil pe godole romnjasa sar voj bijandas čhaves savo avela nasledniko e mulesko thaj te indarel lesko prezime. **20** Sas gajda efa phrala. O prvo phral oženisajlo thaj mulo, a nas les čhavra. **21** Askal o dujto phral oženisajlo lešče udovicava, ali vi vo mulo, a či mukla čhavra pale peste. Isto

dogodisajlo vi e trito phralešće. 22 Thaj ni jek katar e efa phral či mukla pale peste čavra. Po krajo muli vi e romnji. 23 Thaj kana e manuša uštena andar e mule, kašči romnji voj avela? Kaj, sa e phral sas oženime isto romnjasa." 24 O Isus phendas lende. "Ande zabluda sen, pale godova kaj či hačaren o Sveto lil ni e Devlešči sila. 25 Kaj, kana e manuša uštena andar e mule, či ženina pe niti udajina pe, nego avena sago e anđelurja ando nebo. 26 A palo uštipe andar e mule, sigurno čitosardine ande Mojsiješči knjiga, kaj ramol palo okova grmo, kana o Del phendas e Mojsiješće: 'Me sem o Del e Avraamesko, e Isakosko thaj e Jakovesko', save dumut muline. 27 A o Del naj o Del e mulengo, nego o Del e džudengo. Tumen sen prema godova ande bari zabluda." 28 Varesavo učitelj e zakonesko avilo thaj ašundas lendi rasprava. Kana dikhla sar o Isus lačhe phendas lende, phučla les: "Savi si majvažno zapovest katar sa e zapovesti?" 29 O Isus phendas lešće: "Majvažno si akaja: 'Ašun, Izraele, o Gospod amaro Del si jedino Del. 30 Voli e Gospode, čire Devle, saste čire ileja, čire saste dušava, čire saste godasa thaj čire saste snagava.' 31 A dujto si zapovest: 'Voli čire pašutne sago korkoro tut.' Naj majbare zapovesti katar akala duj." 32 O učitelj e zakonesko phendas lešće: "Lačhe phendan, učiteljina. Si tut pravo kana phenes kaj si samo jek Del thaj kaj naj aver osim leste." 33 Te volis e Devle čire saste ileja, saste godasa, saste snagasa thaj te volis čire pašutnes sago korkoro tut majvažno si katar sa e žrtve paljenice thaj katar sa aver žrtve. 34 Kana o Isus ašundas sar o manuš mudro čerel svato, phendas lešće: "Tu naj san dur katar e Devlesko carstvo." Katar godoja vjama khonik majbut či usudisajlo khanči te phučel les. 35 Kana o Isus sikavelas e theme ando Hramo, phučla len: "Sostar e učitelja e Mojsiješće zakonestar phenen kaj si o Hristo samo čavo e carosko Davidesko? 36 Korkoro o David pherdo e Sveto Duhosa, phendas: 'Phenel o Gospod mungre Gospodešće: Beš pe mungri počasno desno rig dok či čhav čire dušmajen tale čire pungre.' 37 Ako o korkoro David akharda e Hristo pire Gospodeja, sar askal šaj o Hristo te avel lesko potomko?" A o but o them oduševime ašunenas les. 38 Dok sikavelas len, o Isus phendas lende: "Len tumen sama katar e učitelja e zakonešće. Von volin te o them dičhel len ande kuč ogrtačurja thaj te o them časno pozdravil len pe trgurja. 39 Volin te bešen pe počasne thana ande sinagoge thaj pe gozbe. 40 Von čoraren e udovicende čera thaj godova učaren gajda kaj lungo molin pe e Devlešće. Pale godova avena kaznime majbut katar sa aver." 41 Pale godova o Isus đelo thaj bešlo ando hramo dži ke kutija kaj čidenas pe e love thaj dičelas sar o them čholas ande late

love. A e but barvale manuša čhonas but love. 42 Askal avili jek čori udovica thaj čhuta andre duj bakarne lovora save vredinas zurale cara. 43 Askal o Isus akhardas peste pire učenikonen, thaj phendas lende: "Čače phenav tumende: akaja čori udovica čhuta andre majbut love nego savora aver. 44 Kaj, savora von dine katar piro viško, a voj gajda čori dijas sa so sas lat."

13 Kana o Isus inkijelas andar o Hramo, jek katar lešće učenikurja phendas lešće: "Učiteljina, Dik! Čefal šukar bara katar o Hramo thaj sošči šukar građevina!" 2 A o Isus phendas lešće: "Dičhes akala bare građevine? Čače phenav tumende, či ačhela katar akava ni bar pe bareste. Sa avela harado." 3 Kana o Isus bešelasa pe Maslinsko gora, pe okoja rig katar o Hramo, o Petar, o Jakov, o Jovan thaj o Andrija phučline les pe rig: 4 "Phen amende, kana godova avela thaj savo znako si kaj sa akava pherdola?" 5 A o Isus ačhilo te mothol lende: "Len sama te na vareko hohavel tumen. 6 But džene avena ande mungro alav thaj phenena: 'Me sem o Mesija' thaj e bute manušen hohavena. 7 Kana ašunena pale raturja thaj e glasurja pale raturja, na daran, kaj sa godova moraš te avel, ali godova još naj o krajo. 8 Kaj o them uštela po them thaj o carstvo uštela po carstvo. E phuv činola pes pe razne riga thaj avela bok. Akava si samo o početko e mukengo sago kana e manušnji džal te bijanel. 9 Ali tumen len sama pe tumende! Kaj avena dine pe sudurja thaj marena tumen ande sinagoge. Inkalena tumen angle vladarja thaj angle carurja andar godova kaj sen mungre sledbenikurja. Godova avela tumende prilika te svedočin pale mande. 10 E Bahtali nevimata trubul majsigo te propovedil pe sa e themende. 11 A kana indarena tumen te sudin tumende, na han briga majanglal so phenena, kaj avela tumende dino so te phenen. Mothon okova so avela tumende dino ande godova čas kaj či čerena svato tumen, nego o Sveto Duho. 12 O phral e phrale dela po mudaripe, a o dad pire čhavre. E čavra uštena pe pire dada thaj pe pire deja thaj dena len po mudaripe. 13 Savora mrzana tumen zbog mande, ali ko god ačhel verno dži ko krajo avela spasime. 14 A kana dičhena 'e grozota savi anel uništenje' sar ačhel po than kaj či tromajasas te avel askal okola save si ande Judeja, neka našen ande gore. (Ko akava čitol neka hačar so phenel pe!) 15 Ko avela opre po čher, nek na fuljel te del ando čher te lel vareso, 16 thaj ko avela ande njiva, neka na boldel pe te lel o ogrtači! 17 Teško e khamne manušnjende thaj okolende save još den čuči e čhavren ande godola đesa! 18 Nego molin tumen te tumaro našipe či avel ando ivend. 19 Kaj ande godola đesa avela

nevolje save nas sar o Del stvorisarda o them sa dži akana, niti posle avela. **20** Thaj te o Gospod či harnjarel o brojro godole đesengo, khonik či ačhilosas džudo. Ali harnjarda godola đesa, zbog okola manuša saven o Del losardas. **21** A te askal vareko phendas tumende: 'Ake o Hristo si akate!' ili: 'Eke okote sil!', na paćan. **22** Kaj uštena e but hohamne mesije thaj e hohamne prorokurja thaj čerena znakurja thaj čudurja te šaj hohaven, ako si moguće, vi e Devlešće izabrane manušen. **23** Len sama pe tumende! Kaj ake sa majanglal phenav tumende! **24** A ande godola đesa – posle akale nevolje – 'O kham kaljola, thaj o čhonut majbut či sijola. **25** E čereja perena katar o nebo thaj e nebeske sile avena uzdrumme'. **26** Askal e manuša dičhena e Čhave e manušešće sar avel ande oblakurja e silava thaj e bare slavava. **27** Vo askal bičhalela e andelen thaj čidela pire losarde manušen katar sa e štar riga e themešće, katar o krajo e phuvjako dži ko krajo e nebesko." **28** "Sićon katar e smokva. Kana laće krandže kovljon thaj mućen pešće patrja, džanen kaj paše si o milaj. **29** Gajda vi tumen kana dičhen kaj si akate sa akava so phendem tumende, džanen kaj si vo paše anglo vudar. **30** Čače phenav tumende: akava pokoljenje či načhela dok sa akava či avela. **31** O nebo thaj e phuv načhena, ali mungre alava či načhena." **32** "A savo si godova đes thaj vrjama khonik či džanel, ni e andelurja po nebo, pa čak niti o Čhavo, već samo Dad. **33** Aven džungade thaj len sama, kaj či džanen kana avela godoja poslednjo vrjama. **34** Godova si sago kana o manuš džaltar po drom, a pesko čher mućel te vodin lešće sluge. Askal sa jek slugašće zapovedil so trubun te čere, a e manušešće kaj lelas sama po vudar phendas te čhol straža. **35** Dakle aven džungade, kaj či džanen kana o gospodari avela čhere – dali avela talerjat, ili ande opaš e rjat, ili kana e bašne ašundona, ili ande detharin – **36** te na avel iznenada thaj te na arachel tumen sar soven. **37** A so phenav tumende, savorende phenav: ačhen džungade!"

14 Sas duj đesa dži ke pasha thaj dži ko prazniko e bikvascošće mangrengo. E šorvale rašaja thaj e učitelja e zakonešće rodenas sar te astaren e Isuse po hohaipe thaj te mudaren les. **2** Phenenas: "Či tromas te čeras godova dok si o prazniko, te či pobunil pe o them." **3** A o Isus sas ande Vitanija thaj halas ando čher e Simonesko saves sas guba. Askal avili dži leste jek manušnji e čuposa savo sas čerdo katar o kuć bar, ande savo sas zurale kuć mirisno ulje savo sas čerdo katar o čisto nard. Putardas o čupo thaj čordas o ulje pe Isusesko šoro. **4** A varesave katar e učenikurja holjajle zbog godova thaj ačhile maškar pende

te mothon: "Sostar akava mirisno ulje gajda rspil pe? **5** Godova ulje šaj bićinda pe pale majbut katar jek bršešći poćin, a e love šaj dine sas pe e čore manušeđe." Thaj čhutine muj pe late. **6** A o Isus phendas: "Mućen lat po miro! Sostar čeren te avel laće neprijatno? Voj čerda mande lačno delo. **7** Kaj čore manušen uvek avela tumen maškar tumende thaj šaj te pomožina lende kana got kamena, a man či avela tumen uvek tumenca. **8** Voj čerda so voj šaj: majanglal makhlas mungro telo palo prahope. **9** Čače phenav tumende: kaj god po them propovedila pe e Bahtali nevimata, mothola pe vi pale akava so voj čerda, sago uspomena pe late." **10** Askal o Juda Iskariotski, jek katar e dešuduj učenikurja, delo ke šorvale rašaja te izdail lende e Isuse. **11** A von, kana ašundine, raduisajle thaj obećisardine kaj dena les love. Katar askal o Juda počnisarda te rodel lačni vrjama te izdail les. **12** Po prvo đes kana sas o prazniko e bikvascošće mangrengo, kana delas pe čhurjasa o pashalno bakhro, e učenikurja phućline e Isuse: "Kaj kames te džas te pripremisaras tuće te has e pashalno večera?" **13** O Isus askal bičhaldas pire duj učenikonen e alavenca: "Džan ando gav ando Jerusalam okote malavena manušes savo inđarel ando čupo paj. Džan pale leste, **14** pa ande savo čher del andre, tumen phenen godole domačinešće: 'O Učitelj phućel ande savi soba šaj te hal e pashalno večera pire učenikonenca?' **15** Vo sikavela tumende bari soba opre po sprato savi si pripremime. Okote spremin amende e večera." **16** E učenikurja đele ando gav thaj arakhline sa sar o Isus phendas lende thaj okote čerdine e pashalno večera. **17** Talerjat, o Isus avilo e dešuduje učenikonenca. **18** Dok hanas pale sinija, o Isus phendas lende: "Čače phenav tumende, kaj jek tumendar savo akana hal manca, izdaila man." **19** E učenikurja zurale ražalostisajle thaj jek pale avreste phućenas les: "Te naj sem me godova?" **20** A o Isus phendas lende: "Godova si jek tumendar e dešudujendar, savo bolel o mangro manca ando isto čaro. **21** Kaj o me o Čhavo e Manušesko, moraš te merava sago kaj ramol pale mande ando Sveto lil. Ali teško okolešće savo izdail man e Čhaves e Manušesće. Pale leste avilosas majlačhe te nikada či ni bijandilosas." **22** Dok hanas, o Isus lija o mangro, zahvalisarda pale leste thaj phagla les, askal dijas pire učenikonende thaj phendas: "Len, akava si mungro telo." **23** Askal lijas tahtaj mol, zahvalisarda e Devlešće thaj dijas pire učenikonende thaj savora piline andar o tahtaj. **24** Thaj phenelas lende: "Akava si mungro rat, rat savo potvrdil o savezo thaj savo čordol pale butende. **25** Čače phenav tumende: či majbut pijava mol sa dži ke okova đes kana pijava tumenca nevi mol ande Devlesko carstvo." **26** Askal

e diljenca slavisardine e Devle thaj teljardine karingal e maslinsko gora. 27 A o Isus phendas lenđe: "Savora tumen mučena man, kaj o Del phenel ando Sveto lil: 'Mudarava e pastire thaj e bakhre našena.' 28 Ali kana uštava andar e mule, džava angle tumende ande Galileja." 29 A o Petar phendas lešće: "Vi ako savora mučen tut, me či mukava tut!" 30 A o Isus phendas lešće: "Čače phenav tuće ađes, još akaja rjat, maj sigo nego so o bašno dujto data zakukuričil, trin drom hohaveja kaj či pindžares man." 31 Ali o Petar još maj odlučno phendas: "Čak vi ako trubul te merav tusa, nikada či odrekniva man tutar!" A gajda mothonas vi savora aver. 32 Askal aviline ando masleniko savo akhardolas Getsimanija. A o Isus phendas pire učenikonende: "Bešen akate dok me džav te molima!" 33 Pesa inđarda e Petre, e Jakove, thaj e Jovano. Askal lija les e bari žalost thaj sas lešće pharo. 34 Thaj phendas lenđe: "Mungri duša si žalosno dži ko smrto. Ačhen akate, na soven thaj stražarin." 35 Askal đelo cara majdur, pelo e mujesa dži ke phuv thaj molisajlo, te ako si moguće, či načel kroz e patnja savi ažučarel les. 36 Molisajlo: "Abba! Dade! Tu sa šaj. Le mandar akava tahtaj patnje! Ali neka či avel mungri volja, nego čiri." 37 Askal bolda pe ke pire učenikurja, arakhla len sar soven thaj phendas e Simone Petrešće: "Soves li Simone? Našti ačhilar džungado ni jek sato te stražaris? 38 Ačhen džungade, stražarin thaj molin tumen, te na peren ando iskušenje. O duho si spremno ali o telo si slabo." 39 O Isus palem đelotar lendar thaj molisajlo iste alavenca. 40 Kana palem bolda pe ke učenikurja, arakhla len sar soven. Lenđe jakha phandadonas thaj či džangline so te phenen lešće. 41 Kana bolda pe po trito drom, phendas lenđe: "Zar još soven thaj odmorin tumen? Dosta sas! Avilo o čas! Ake man, e Čhave e Manušešće, predain ande vas e bezehalende. 42 Ušten! Ake, mungro izdajniko avel!" 43 Dok o Isus još motholas, areslo o Juda, jek katar e dešduj učenikurja, a lesa avilo vi o but o them, e mačonenca thaj e rovljenca, saven bičaldine e šorvale rašaja, e učitelja e zakonešće thaj e starešine. 44 O Juda, lesko izdajniko, majanglal dija len znako: "Okova saves čumidav, godova si. Astaren les thaj inđaren les e stražarenca." 45 Thaj čim avilo dži ko Isus, o Juda phendas lešće: "Učiteljina" thaj čumida les. 46 Pe godova e manuša čutine pire vas po Isus thaj astardine les. 47 A jek katar e učenikurja, savo ačhelas okote paše, inkalda o mačo thaj peklas e bare rašaješće slugos thaj činda lesko kan. 48 A o Isus phendas lenđe: "Aviline pe mande sago po razbojniko e mačonenca thaj e rovljenca te astaren man. 49 A svako đes semas tumenca ando Hramo thaj sikavavas, ali či astardine man. Sa akava sas te pherdol okova so ramol

pale mande ando Sveto lil." 50 Pe godova sa e učenikurja mukline e Isuse thaj našline. 51 A pale leste džalas jek terno manuš savo sas nango thaj učardo samo e kuč čaršapeja. Kana vi les line te astaren, 52 vo čudas pestar o čaršapo thaj našlo nango. 53 E Isuse andine anglo baro rašaj, thaj okote čidine pe sa e šorvale rašaja, e starešine thaj e učitelja e zakonešće. 54 A o Petar dadural džalas pale leste thaj dija ande avlija e bare rašaješći. Bešlo okote zajedno e slugenca thaj tatolas paše jag. 55 A e šorvale rašaja thaj o sasto veče rodenas varesavo dokaz protiv o Isus, te šaj osudin les po smrto, ali či arakhline khanči protiv leste. 56 But manuša hohamne svedočinas protiv leste, ali lengo svedočanstvo či slažolas pe. 57 Askal uštiline varesave manuša thaj počnisardine hohave te svedočin protiv leste: 58 "Ašundam les sar mothol: 'Haravava akava Hramo, saves čerdine e manušenje vas, thaj pale trin đes vazdava aver, save či čerena e manušešće vas.'" 59 Ali ni godova lengo svedočanstvo či slažolas pe. 60 O baro rašaj askal ačhilo maškare maškar lende, thaj phučla e Isuse: "Sostar khanči či mothos? So akava akala manuša svedočin protiv tute?" 61 A o Isus samo ačhelas thaj khanči či motholas. O baro rašaj palem phučla les: "San tu o Hristo, Čhavo e Blagoslovime Devlesko?" 62 A o Isus phendas: "Sem. Thaj dičhena man, e Čhave e Manušešće, sar bešav pe desno počasno rig e Svemoguće Devlešći thaj avav pe nebeske oblakurja." 63 Pe godova o baro rašaj pharada pe peste e drze thaj phučlas: "So trubul men majbut svedokurja? 64 Ašundine les sar hulil! So mothon?" A von savora phendine kaj si došlo thaj kaj zaslužisarda smrto. 65 Varesave počnisardine te čhungaren les, te učaren lesko muj thaj denas le dab dumukhenca thaj marenas muj lestar: "Proreknisar ko dija tut dab?" Askal astardine les e sluge thaj mardine les e palmenca po muj. 66 Dok o Petar sas tele ande avlija, avili jek sluškinja e bare rašaješći. 67 Kana dikhla e Petre sar tatol paše jag, lačhe dikhla pe leste thaj phendas: "Vi tu sanas okole Isuseja andar o Nazaret!" 68 A o Petar hohada: "Či džanan niti hačarav so phenes." Thaj inklijsto ando prvo deo e avlijako. A o bašno askal zakukuričisarda. 69 Kana e sluškinja dikhla les, palem phendas okolende save okote ačhenas: "Okova manuš si jek lendar!" 70 A o Petar palem phenelas kaj naj. Cara majposle, vi okola aver manuša save sas okote mothonas e Petrešće: "Tu san čače jek lendar, kaj san vi tu andar e Galileja!" 71 A o Petar ačhilo te del pe romaja thaj te hal solah: "Či pindžarav godole manuše pale savo phenen." 72 Thaj odma pale godova o bašno po dujto drom zakukuričisarda, a o Petar dija pe godi so phendas lešće o Isus: "Maj sigo nego so o bašno duj data zakukuričil,

trin drom odrekniija tut mandar." Thaj askal ačhilo zurale te rovel.

15 Thaj odma rano ande detharin ćerdine svato maškar phende e šorvale rašaja, e starešine, e učitelja palo Mojsijesko zakon thaj o sasto Baro veće. Phangline e Isuse thaj indardine les ko Pilato savo sas rimsko upravniko. **2** O Pilato phučla les: "Dali san tu o caro e Židovengo?" A o Isus phendas lešće: "Tu korkoro phenes." **3** A e šorvale rašaja došarenas e Isuse pale but godova. **4** O Pilato palem phučla les: "Naj tut khanči te phenes pe akava? Dik pale so sa došaren tut." **5** Ali o Isus majbut khanči či motholas lešće, gajda kaj o Pilato but začudisajlo. **6** A o Pilato svako brš po prazniko mućelas andar o phanglipe ječe manušes saves o them rodasas lestar. **7** Ando phanglipe askal sas vi varesavo manuš savo akhardolas Varava zajedno e razbojnikonenca save ande pobuna ćerdine mudaripe. **8** O them avilo thaj rodenas katar o Pilato te ćerel okova so vo obično ćerelas po prazniko. **9** A o Pilato phučla len: "Dali kamen te mukav tumende e Židovsko caro?" **10** Džanelas kaj e šorvale rašaja predaisardine leste e Isuse andar e zavist. **11** Ali e šorvale rašaja pherdine e manušengo šoro te roden te mućel lende majradije e Varava. **12** A o Pilato palem phučla len: "A so kamen te ćerav akalesa saves akharen caro e Židovengo?" **13** A von čutine muj: "Razapnisar les!" **14** "Ali andar soste?" Phučas o Pilato: "Sosko bilačipe ćerda?" Ali von još majzurale čhonas muj: "Razapnisar les!" **15** A o Pilato, zbog godova kaj kamlas te ugodil e themešće, mukla andar o phanglipe e Varava, a e Isuse dija te izbičujin thaj te razapnin les po trušul. **16** Askal e vojnijkurja indardine e Isuse ande palata, pindžardi sago pretorijum, thaj čida pes okote sasti četa vojnijkurja. **17** Dine po Isus grimizno ogrtači, a po šoro čutine lešće khuvdi kruna katar e kangre. **18** Askal marenas muj lestar thaj mothonas: "Nek trajil o caro e Židovengo!" **19** Denas les dab e trskasa po šoro, čhungarenas pe leste, perenas pe kočja thaj ćerenas pe kaj klanjinpe lešće. **20** Kana ačhiline te maren muj lestar, askal fuljardine lestar o grimizno ogrtači thaj dine pe leste lešće drže thaj indardine les te razapnin les po trušul. **21** Varesavo manuš andar e Kirinija načelas okotar kaj boldelas pe andar e njive. Vo akhardolas Simon thaj sas dad e Aleksandresko thaj e Rufosko. E vojnijkurja tradine les te indarel e Isusesko trušul. **22** Askal andine e Isuse dži ko than savo akhardol Golgota (so značil "lobanja"). **23** Denas les mol hamime e smirnava te ločaren lešće e duk, ali vo či kamlas te pel. **24** Askal razapnisardine les, a lešće drže razdelisardine gajda kaj čhudine kocka pale

lende, te dičen ko so lela. **25** Sasinja saturja ande detharin kana razapnisardine les. **26** Okote sas o natpis pe savo ramolas lešči doš: "Caro e Židovengo". **27** Zajedno lesa razapnisardine vi duje razbojnikonen, ječe katar lešči desno rig a avres katar lešči levo rig. **28** [Godolesa ispunisajlo okova so sas ramome ando Sveto lil: "Dičhenas pe leste sago pe zločincurja."] **29** E manuša kaj načenas okotar kušenas les. Čerenas e šoresa pe leste thaj mothonas: "Ej, tu kaj haraves o Hramo thaj ande trin đes vazdes les, **30** spasisar akana korkoro tut thaj fulji katar o trušul." **31** Gajda marenas muj lestar vi e šorvale rašaja thaj e učitelja palo Mojsijesko zakon thaj jek avrešće phenenas: "Averen spasisardas, a korkoro pes našti spasi! **32** Neka akana godova Hristo, Caro e Izraelosko, fuljel katar o trušul, te dikhas thaj te pačas!" Gajda vredonas les čak vi okola kaj sas lesa razapnime. **33** Ando mismeri mukla pe o tunjariko pe sasti phuv thaj sas sa dži ke trin saturja palo mismeri. **34** Ande trin saturja o Isus ando baro glaso čhuta muj: "Eloi, Eloi, lama sabahtani?", so značil: "Devla mungreja, Devla mungreja, sostar muklan man?" **35** A kana varesave kaj ačhenas okote ašundine akava, phendine: "Dičen, akharel e proroko Ilija!" **36** A jek manuš prastaja te bolel o sunder ando šut, čhuta les pe trska, dija e Isuse te pel thaj motholas: "Ažučaren te dikhas dali avela o Ilija te fuljarel les!" **37** A o Isus čhuta muj andar o baro glaso, thaj mukla pesko di. **38** Askal e firanglja ande svetinja e hramošči pharadili po opaš, katar opral dži tele. **39** Kana o rimsko kapetano savo ačhelas anglo Isus ašundas sar o Isus čhuta muj thaj gajda mukla pesko di, phendas: "Akava manuš vi čače sas Čavo e Devlesko!" **40** A sa godova dadural dičhenas vi varesave manušnja. Maškar lende sas e Marija andar e Magdala, e Marija e dej e majterne Jakovešči thaj o Josije, thaj e Saloma. **41** Von džanas pale leste thaj pomožinas les dok sas ande Galileja. Akate sas vi but aver manušnja save avile lesa ando Jerusalem. **42** Kana već skoro perelas o tunjariko, pošto sas đes kana ćerenas pe e pripreme, godova sas đes majsigo o savato, **43** o Josif andar e Arimateja, savo sas ugledno člano andar o Baro veće savo vi korkoro ažućerelas e Devlesko carstvo, bi darako đelo anglo Pilato thaj manglas lestar e Isusesko telo. **44** O Pilato sas začudime kaj o Isus već mulo thaj akhardas e kapetano te phućel les kozom si sar o Isus mulo. **45** Kana ašunda godova katar o kapetano askal dijas e Isusesko mulo telo e Josifešće. **46** O Josif čindas čaršapo, fuljarda e Isusesko telo katar o trušul, paćarda les ando čaršapo thaj čhuta les ando limori savo sas isklesime ande stena. Askal čhuta o bar po vudar e

limoresko. 47 A e Marija andar e Magdala thaj e Marija e dej e Josiješči dičhenas kaj čhutine e Isusesko telo.

16 Kana nakhlo o savato, e Marija andar e Magdala, e Marija e deja Jakovešči thaj e Saloma čindine mirisno pomast te mačhen e Isusesko telo. 2 Pa detharinako rano prvo đes ando kurko čim inkljisto o kham, đe po limori. 3 Thaj dromesa phučen as jek avrja: "Ko lela amende o bar majdur katar o vudar e limoresko?" 4 Ali kana aresline, dikhline kaj o bar sas već spidino majdur katar o limori vi ako sas godova zurale baro bar. 5 Kana dine andre ando limori, dikhline pe desno rig terne manuše ande parne haljina sar bešel. E manušnja darajle. 6 A vo phendas lenđe: "Na daran! Tumen roden e razapnime Isuse andar o Nazaret. Vo naj akate. Uštalo andar e mule! Ake dičhen o than kaj pašljolas. 7 Ali tumen džan thaj phenen lešće učenikonende, thaj e Petrešće: 'O Isus džal angle tumende ande Galileja. Okote dičhena les, sago vi kaj phendas tumende.'" 8 E manušnja inkljistine andar o limori thaj našline okotar kaj astarda len o izdrape thaj e dar gajda khonikašće khanči či phendine, kaj daranas. 9 (note: The most reliable and earliest manuscripts do not include Mark 16:9-20.) [Kana o Isus uštalo andar e mule detharinako rano prvo đes ando kurko, majsigo sikadilo e Marijače andar e Magdala, andar savi majsigo trada efa bilačhe duhonen. 10 Voj đeli thaj javisarda godova okolende save sas lesa, a save akana tugujin thaj roven. 11 Kana von ašundine kaj si o Isus džudo thaj kaj voj dikhla les, či paćajine. 12 Pale godova e Isusesko izgled promenisa jlo thaj sikadilo pire duje učenikonende dok džanas ande aver gav. 13 Kana pindžardine les, boldine pe thaj godova javisardine aver učenikonende, ali ni lenđe či paćajine. 14 Pale godova o Isus sikadilo e dešduje apostolende dok hanas pale sinija. Thaj ukorisarda len pale lengo bipačipe thaj lenđe zurale ile kaj či paćajine okolende save dikhline les nakon so uštalo andar e mule. 15 Askal phendas lenđe: "Džan pe sasto them thaj propovedin e Bahtali nevimata sa e themešće! 16 Ko paćala thaj bolel pe, spasila pe, a ko či paćala, osudila pe. 17 A akala čudesne znakurja pratina okolen save paćan: ande mungro alav tradena e bilačhe duhonen andar e manuša, čerena svato neve čhibjenca, 18 lena e sapen ande vas, ako vareso otrovno pijen, či naudila lenđe, čhona pire vas pe nasvale manuša thaj von sastona." 19 Pale godova kana o Gospod Isus godova phendas lenđe, sas vazdino ando nebo thaj bešlo pe Devlešči desno rig. 20 E učenikurja đe thaj propovedinas e Bahtali nevimata pe sa e thana. A o Gospod pomožilas lenđe thaj prekal lende potvrdilas pire alava e čudesne znakonenca save pratinas len.]

Luka

1 Poštuime Teofile, ramov tuće zbog godova kaj but džene line te ramon okola događajurja save o Del obećisarda majsigo prekal e prorokurja, a save dogodisajle maškar amende. **2** Von godova ramosardine prema okova so majanglal phendine e očevicurja thaj sluge e Alavešće. **3** Zato vi me odlučisardem Teofile, te ramov tuće sa po redo, pošto pomno sa katar o početko istražisardem, **4** gajda aveja sigurno kaj si okova sikavipe savo primisardan pouzdano. **5** Ande vrjama kana vladilas o Judejsko caro o Irod, sas varesavo rašaj savo akhardolas Zaharije andar e Avijasko rašajesko redo. A lešči romnji sas isto andar e Aronosko pleme. Lako alav sas Jelisaveta. **6** A liduj sas pravedne anglo Del, thaj trajinas sa po zakono thaj pe okova so sas odredime anglo Gospod, bi manako. **7** A nas len čavra, kaj e Jelisaveta našti ačhelas khamni, a liduj već phurile. **8** Jek đes kana o Zaharija služilas e Devlešće ando Hramo kaj po dužnost avilo o redo kana lešči grupa rašaja trubunas te služin, **9** prema e rašajengo običaj odabirisardine les gajda kaj čudine e kocka te del ando Svetište e Gospodesko te kadil. **10** Pale vrjama kana kadilas pe ando Hramo, sa o them sas avri thaj molinas pe. **11** A e Zaharijašće sikadilo o anđelo e Gospodesko savo ačhelas pe desno rig e žrtvenikosko katar savo kadilas pe. **12** Kana dikhla les o Zaharije, zurale darajlo. **13** A o anđelo phendas lešće: "Na dara, Zaharija! Kaj si ašundi čiri molitva: čiri romnji e Jelisaveta bijanela tuće čhave thaj tu de les alav Jovan. **14** Zbog leste aveja bahtalo thaj radosno thaj e buten raduila lesko bijandipe, **15** kaj avela baro anglo Gospod. Či pijela mol niti pimo savo matarel. Pherdola e Sveto Duhosa još ando đi pire dejako. **16** Vo boldela e but Izraelconen e Gospodešće lende Devlešće. **17** Džala anglo Gospod sago glasniko pherdo duho thaj sila, sago o proroko Ilija. Pomirila e daden lende čhavenca a e nepokorne umurja boldela gajda te prihvatin o razumnost okolengo save si pravedne. Pripremila e theme pale e vrjama kana o Gospod avela." **18** A o Zaharija phendas e anđelošće: "Sar me džanava kaj godova avela čače? Kaj me sem purano thaj e romnji mungri dija ande pire purane brš." **19** A o anđelo phendas lešće: "Me sem o anđelo Gavriilo, savo ačhav anglo Del te služiv thaj bičhaldo sem te ćerav svato tusa thaj te javiv tuće akaja bahtali nevimata. **20** A akana andar godova kaj čiči paćajan zanemija thaj našti ćereja svato džiči ko đes dok čiči avel e vrjama pale godova thaj mungre alava čiči pherdon." **21** A o them ažućerelas avri e Zaharija thaj začudisajle so gaćiči zadržisajlo ando svetište e Hramosko. **22** A kana

napokon inljisto, našti ćerelas svato, nego e zakononca probisarda te phenel lende so sas ando Hramo thaj von haćardine kaj sas les videnje ando svetište e Hramosko. **23** Thaj kana završisajle e đesa lešće službaće ando Hramo o Zaharije đelotar ćhere. **24** A posle godola đesa, lešči romnji e Jelisaveta aćhili khamni thaj pandž čhon čiči inkjelas avri andar piro ćher thaj motholas: **25** "O Gospod milostivo dikhla pe mande kaj fuljardas mandar o ladžavo anglo them." **26** Kana e Jelisaveta sas khamni šov čhon, o Del bičhaldas e anđele Gavriilo ando cikno galilejsko gav savo akhardolas Nazaret, **27** ke Marija savi sas još čhej thaj sas mangli palo manuš, savo akhardolas Josif, savo sas potomko e carosko Davidosko. **28** Kana o anđelo dijas late andre phendas laće: "Raduisar tut, kaj o Del si pherdo milosti prema tute! O Gospod si tusa." **29** Pe godola alava e Marija uznemirisajli thaj počnisarda te gindil so značil godova pozdrav. **30** A o anđelo phendas laće: "Na dara Marija! Kaj o Del iskažisardas tuće piri ljubav." **31** Ake ačheja khamni thaj bijaneja čhave saves deja alav Isus. **32** Vo avela baro thaj akhardola Čhavo e Majbare Devlesko thaj o Gospod Del dela les autoriteto te vladil sago o caro David savo sas lesko prapapo. **33** Vo vladila e Jakovešće plemenova džiči ko veko thaj lešće carstvošće čiči avela krajo. (aiōn g165) **34** A e Marija phendas e anđelošće: "Sar godova avela kana sem još čhej?" **35** A o anđelo phendas laće: "O Sveto Duho fuljela pe tute thaj e sila e Majbare Devlešćiči avela pe tute thaj zasenila tut. Zato vi okova savo bijandola avela sveto thaj akhardola o Čhavo e Devlesko. **36** Ake vi čiči bibi e Jelisaveta, aćhili khamni ande piri purani vrjama thaj avela lat čhavo. Okoja isto manušnji pale savi phenenas kaj našti avel lat čhavra, već si šov čhon khamni. **37** Kaj, e Devlešće khañčiči naj nemoguće!" **38** A e Marija phendas lešće: "Ake, sluškinja sem e Gospodešćiči, neka avel mande pe ćire alava." Thaj o anđelo đelotar latar. **39** Varesave đesa majposle e Marija siđardas ande gorsko krajo e Judejako. **40** Kana aresli okote dija ande Zaharijasko ćher thaj pozdravisajli e Jelisavetava. **41** Kana e Jelisaveta ašunda e Marijako pozdrav, o čhavo huklo ando lako điči, a e Jelisaveta pherdili e Sveto Duhosa. **42** Pale godova e bahtatar čhuta muj e bare glasosa: "Majblagoslovime san tu, Marijo, katar sa e manušnja thaj blagoslovime o čhavo ande ćiro điči. **43** Savi čast si man, te tu e dej mungre Gospodešćiči aves mande! **44** Kaj ake čiči ćiro pozdrav avilo džiči ke mungre kan, e bahtatar o čhavo huklas ande mungro điči. **45** Blago tuće kaj paćajan kaj pherdola okova so phendas tuće o Gospod!" **46** E Marija askal phendas: "Barjarel e duša mungri e Gospode! **47** Thaj raduil pe o duho mungro e Devlešće mungre Spasitelješće. **48** Kaj milostivo dikhla pe

mande pe piri ponizno sluškinja, katar akana sa e manuša akharena man blagoslovime. **49** Kaj o silno Del, savesko si alav sveto, čerda mande baro lačhipe. **50** Kaj o Del si milostivo; e milost lešči si katar e čang dži ke čang okolende save daran lestar. **51** Pire močno vastesa čerel silne dela thaj odbacisardas pestar okolen save si barikane ande pire ile. **52** Čhudas tele katar o prestolje e vladaren, a vazdas e poniznen. **53** E bokhalen čaljarda e lačhipeja, a e barvalen mukla čuče vastenca. **54** Huklo ando pomoč pire slugende e Izraelconende thaj či bistardas te avel milostivo **55** sago kaj obečisarda amare prapaponende, e Avramešče thaj lešče potomkonende dži ko veko." (aiōn g165) **56** A e Marija ačhili ke Jelisaveta varekaj katar trin čhon thaj askal bolda pe čhere. **57** A e Jelisavetače avili e vrjama te bijanel thaj bijanda čhaves. **58** Kana ašundine lače komšije thaj lači familija kaj o Gospod sas gajda lačo thaj milostivo prema late, raduisajle zajedno lasa. **59** A kana e čhavres sas ohto đes o them čida pes po obred te obrezin e čhavre. Thaj line te den les alav Zaharija, sago kaj bučhol lesko dad. **60** Ali e Jelisaveta phendas: "Na! Lesko alava avela Jovan!" **61** A von phendine lače: "Pa khonik ande čiri familija či bučhol gajda." **62** Zato e znakonenca phučline e čhavrešče dades sar vo kamel te del alav e čhavres. **63** O Zaharija manglas e pločica pe savi šaj te ramol thaj ramosarda: "Jovan si lesko alav." Thaj savora začudisajle. **64** Thaj odma o Del putardas lesko muj thaj oslobodisardas lešči čhib thaj o Zaharija počnisarda te čerel svato thaj te slavil e Devle. **65** A e Devlešči dar Ilija sa lende komšijen po gorsko krajo e judejako thaj čerelas pe svato pale akala dogadžaja. **66** Thaj savora save ašundine pale akala dogadžaja, gndinas thaj phučenar pe ande peste: "So avela katar akava čhavro? Čače si o vas e Gospodesko pe leste." **67** O Zaharije, o dad e čhavresko, pherdilo e Sveto Duhosa, thaj prorokuisardas alavenca: **68** "Blagoslovime o Gospod o Del e Izraelosko kaj avilo thaj izbavisarda pire theme! **69** Vazdas amende silno spasitelje andar o potomstvo pire slugasko e Davidesko, **70** sago kaj dumut obečisarda po muj pire svete prorokonengo (aiōn g165) **71** kaj izbavila men katar amare dušmaja thaj andar e vas savorende save mrzin men. **72** Sas milostivo amare pradađende thaj ispunisardas piro sveto savezo, **73** e solah savi dija e Avramešče amare pradadešče. **74** Izbavisarda men andar amare dušmajende vas, te šaj služisaras lešče bi darako, **75** ando svetost thaj ande pravda angle leste dokle god sam džude. **76** A tu, Jovane čhaveja mungreja, akhardoja proroko e Majbare Devlesko kaj džaja anglo Gospod te lačhaves lesko drom. **77** Sikaveja e Devlešče theme sar te pindžaren o spasenje kroz o jartipe lende bezehendar. **78** Zbog e bari milost amare

Devlešči, osvanila amende andar e visine e nevi detharin **79** te anel svetlo okolende save trajin ando tunjariko thaj ande dar katar o smrto thaj te upravisares amare korakurja po drom e mirosko." **80** A o čhavro Jovano barjolas thaj zuravolas ando duho. Kana barjilo, trajilas ande pustinja sa dok či započnisardas e javno služba angle Izraelcurja.

2 Ande godoja vrjama kana bijandilo o Jovano, inklijsti e zapoved katar o rimsko caro Avgusto te sa o them savo trajilas ando Rimsko carstvo avel ramome ando popis stanovništva. **2** Akava sas o prvo zapis kana o Kvirinije vladilas e Sirijava. **3** Sa e manuša teljardine ande pire gava te ramon pe palo popis. **4** Gajda vi o Josif teljardas andar o gav Nazaret andar e galilejsko regija, ando Vitlejem e judejsko regija kaj sas o David bijando, kaj o Josif sas potomko e carosko Davidesko **5** te prijavil pe palo zapis zajedno pire verenicasa e Marijasa savi sas khamni. **6** Dok sas ando Vitlejem avili lači vrjama te bijanel, **7** thaj bijandas pire prvo čhaves, pačarda les thaj čhuta les ande jasle kaj nas than ande gostijonica. **8** Ande godoja isto regija savi sas paše pašo Vitlejem sas e pastirja save inčarenas e račači straža pe pašnjakurja ke pire bakhre. **9** Andar jekhvar o anđelo e Gospodesko ačhilo maškar lende thaj obasjaisarda len e slava e Gospodešči, a von zurale darajle. **10** A o anđelo phendas lende: "Na daran! Kaj ake, anav tumende e Bahtali nevimata pe bari bah sa e themešče. **11** Kaj ađes bijandilo tumende o Spasitelj, savo si o Gospod Hrist ando gav kaj bijandilo o caro David! **12** Ake o znako pe savo pindžarena les: aračhena e čhavre pačarde sar pašljol ande jasle." **13** Ande data e anđelošče pridružisajli e bari vojska anđelurja thaj slavinar e Devle alavenca: **14** "Slava e Devlešče ande nebeske visine, thaj pe phuv miro e themešče savenca si o Del zadovoljno!" **15** Čim e anđelurja boldine pe ando nebo, e pastirja phenenar jek avrešče: "Hajde džas dži ko Vitlejem, te dikhas so godova okote dogodisajlo, so phendas amende o Gospod." **16** Sigo aviline ando than o Vitlejem thaj arakhline e Marija, thaj e Josife thaj e čhavres savo pašljol ande jasle. **17** A kana dikhline e čhavres, e pastirja phendine savorende sa so o anđelo phendas lende palo čhavro. **18** A savora save ašunenar e pastiren divisajle okolešče so phenenar pale godova čhavro. **19** A e Marija sa akala alava aračhelas ande piro ilo thaj stalno gindilas pale lende **20** Pale godova e pastirja boldine pe palpale, hvalinas thaj slavinar e Devle pale sa so dogodisajlo sago kaj vi phendas lende o anđelo. **21** A kana avilo o ohtoto đes sar o čhavro bijandilo, trubujine te obrezin e čhavres, thaj dine les alav Isus, sago kaj phendas o anđelo dok još e Marija či ačhili

khamni. 22 Kana navršisajle e đesa katar lengo šilaipe prema e Mojsijesko zakon o Josif thaj e Marija inđardine e čhavres ando Jerusalem te predain les e Gospodešće 23 (sago kaj si ramome ando zakono e Gospodesko: "Svako prvo bijando, a muško čhavo neka posvetil pe e Gospodešće") 24 thaj den e žrtva (sago kaj phenel e Gospodesko zakon: "duj grlice ili duj terne goluburja"). 25 Ande godoja vrjama trajilas ando Jerusalem varesavo manuš savo akhardolas Simeon. Vo sas zurale pravedno thaj pobožno manuš thaj ažučarelas te avel o Mesija te spasil e Izraelcen. O Sveto Duho sas pe leste 26 thaj objavisarda lešće kaj či merela dok či dičhel e Gospodešće Mesija. 27 Potaknime katar o Sveto Duho avilo ando Hramo baš kana o dad thaj e dej anenas e čhavre e Isuse te izvršin okova so rodelas o Mojsijesko zakon. 28 O Simeon lija e čhavres ande pire vas thaj hvalisarda e Devle alavenca: 29 "Akana, Gospode, šaj me čiro sluga te merav ando miro sago kaj phendan. 30 Kaj e jakha mungre dikhline o spasenje čiro, 31 savo pripremisardan angle sa o them, 32 o svetlo te prosvetlil aver themen pe slava čire themešči e Izraelošči." 33 E Isusesko dad thaj lešči dej divisajle okolešće so o Simeon phenelas pale leste. 34 O Simeon askal blagoslovisarda len thaj phendas e Isusešće dejaće e Marijaće: "O Del odredisardas pale akava čhavro te e but e manušenje ando Izrael avel palo propast thaj butende palo vaskrsenje. Vo si odredime te avel e Devlesko znako, ali o but o them odbacila les. 35 Akava avela sar te sikadon e gindimata save si garade ande but e ile. A vi tuće korkoraće o mačo hvarela čiro ilo." 36 A okote sas vi e Devlešči proročica savi akhardolas Ana, e Fanulovešči čhej, voj sas andar e Asiresko pleme thaj sas zurale purani. Trajilas pire romesa samo efa brš, 37 a pale godova trajilas korkoro sar udovica dži ke ohtovardeš thaj štar brš. Voj sas stalno ando Hramo, služilas e Devlešće dešaja thaj e račava, postilas thaj molilas pe. 38 Thaj samo so o Simeon završisarda vi voj avili thaj hvalilas e Devles thaj phenelas palo Isus savorende save ažučarenas te o Del otkupil o Jerusalem. 39 Kana o Josif thaj e Marija dine gata so sas po zakono e Gospodesko, boldine pe ande Galileja ando piro gav Nazaret. 40 A o čhavro Jovano barjolas thaj zuravolas thaj pherdolas mudrost, a e milost e Devlešči sas pe leste. 41 E Isusesko dad thaj lešči dej svako brš džanas ando Jerusalem ande đesa kana sas o prazniko Pasha. 42 A kana sas e Isuse dešuduj brš, von aviline Lesa ando Jerusalem te slavin o prazniko. 43 Kana sas gata godola đesa, thaj kana boldenas pe čhere, o čhavro Isus ačhilo ando Jerusalem, a o Josif thaj e čhavrešči dej e Marija či džangline kaj si vo. 44 Nego gndisardine kaj si e društvo anglal. Kana nakhlo

već jek đes phiripe počnisardine te roden les maškar e familija thaj maškar okola kasa džanenas. 45 Sar či arakhline les boldine pe ando Jerusalem te roden les. 46 Thaj o trito đes arakhline les ando Hramo sar bešel maškar e učitelja thaj čholas kan lende thaj phučelas len. 47 A savora save ašunenas les divisajle lešće godaće thaj lešće odgovorende. 48 Kana dikhline les začudisajle, a lešči dej phendas lešće: "Čhaveja! Sostar čerdan amende gadava? Ake me thaj čiro dad e darasa rodam tut." 49 A o Isus phendas lende: "Sostar rodine man zar či džangline kaj me trubul te avav ando čher mungre Dadesko?" 50 Ali von či hačardine so o Isus kamlas te phenel lende. 51 Askal bolda pe lenca ando Nazaret thaj čholas kan lende. A e dej lešči lelas sama pe sa akala događajurja ande piro ilo. 52 A o Isus napreduilas ande mudrost thaj barjolas ande milost anglo Del thaj anglo them.

3 Sas dešupandžito brš sar vladilas o caro Tiberija e rimske carstvosa, o Pontije Pilato vladilas e judejava, o Irod vladilas e galilejava, a lesko phral o Filip vladilas ande Itureja thaj ande Trahonitada, o Lisanije vladilas ande Avilina, 2 o Ana thaj o Kajafa sas e šorvale rašaja, a o Del askal objavisarda piro alav e Jovanošće e Zaharijašće čhavešće ande pustinja. 3 Thaj o Jovano savo bolelas nakhlas e sasti okolina oko e reka e Jordan thaj propovedilas e themešće kaj e manuša trubun te obratin pe e Devlešće te jartol lende bezeha thaj te bolen pe. 4 Sago kaj ramol ando Sveto lil e prorokosko Isaijasko: "Vo si o glaso savo čhol muj ande pustinja: 'Pripremin o drom palo Gospod, vorton e staze pale leste! 5 Neka svako dolina pherdol a svako gora neka slegnilpe! Sa e bande droma neka ispravim pe thaj e grbave droma postanina ravne. 6 Thaj svako manuš dičhela o spasenje savo avel katar o Del.'" 7 O Jovano phenelas okolende save avenas te bolen pe: "Tumen e sapešće čhavra! Koli upozorisarda tumen te našen katar e Devlešči bari holji savi avel? 8 Sikaven tumare trajosa thaj tumare delenca kaj odvoisajle katar o bezeh thaj kaj obratisajle e Devlešće. Na hohaven tumen kaj si tumende dosta te phenen: 'Amen sam e Avramešće potomkurja,' kaj phenav tumende kaj o Del šaj vi katar akala bara te vazdel čhavra e Avramešće." 9 Kaj o tover e Devlešće sudosko već si čhutino po koreno e kaštesko. Svako kaš savo či bijanel lače plodurja činela pe thaj čhudela pes ande jag. 10 Askal o them phučla les: "So askal te čeras?" 11 A o Jovano phendas lende: "Kas si duj gada neka del jek okole kas naj. Thaj kas si habe neka del okoles kas naj." 12 Aviline vi e carinikurja te o Jovane bolel len thaj phendine lešće: "Učiteljina, so amen te čeras?" 13 A o Jovane phendas

lende: "Na roden majbut porezo nego so odredil tumende e vlast." 14 E vojnukurja isto phucline: "A amen so te čeras?" A vo phendas lende: "Khonikastar na len love pe sila, na optužin khonikas hohamne thaj aven zadovoljno tumare počinava." 15 Ande godoja vrjama o them ažučarelas e Mesija thaj savora ande pire ile phučenas pe te naj možda o Jovano Mesija. 16 Zato o Jovano phendas savorende: "Me bolava tumen e pajesa, ali avel vareko pale mande ko si majmočno mandar, kašče me naj sem dostojno ni e haravlja pe sandale te putrav. Vo bolela tumen e Sveto Duhosa thaj e jagasa. 17 Vo si spremno te losarel o kučin e đivesko katar e pleva. O điv čidela thaj spremila ande piri žitnica, a e pleva dela jag e jagasa savi našti mudardol." 18 Thaj but kasave opomene o Jovano phendas e themešče thaj navestilas lende e Bahtali nevimata. 19 A o Irod o vladari kas o Jovano ukorisarda zato kaj lijas e Irodijada savi sas romnji lešče phralešči, thaj pale sa aver bilačhimata save čerda, 20 pe sa godova još vi e Jovane čhuda ande tamnica. 21 Kana o Jovano bolelas sa e themes, bolape vi o Isus. Dok o Isus molisajlo, putajlo o nebo, 22 thaj fuljisto pe leste o Sveto Duho ando telesno obliko sago golubo, thaj andar o nebo ašundilo o glaso savo phendas: "Tu san mungro voljeno Čhavo. Tu san mungri bahl!" 23 Kana o Isus započnisardas e javno služba katar o Del, sas les varekaj katar trijanda brš. Inčarelas pe kaj si o Isus čhavo e Josifesko. O Josif sas e Ilijesko čhavo, 24 o Ilija sas e Matatesko čhavo, a o Matat e Levijesko čhavo, o Leviye sas e Melhijesko čhavo, o Melhi sas e Janajesko čhavo, o Janaj e Josifesko čhavo, 25 o Josif sas e Matatesko čhavo, o Matatija sas e Amosesko čhavo, o Amos sas e Naumasko čhavo, o Naum sas e Eslijesko čhavo, o Eslija sas e Nangejesko čhavo, 26 o Nangej sas e Maatesko čhavo, o Maat sas e Matatijesko čhavo, o Matatija sas e Semeinasko čhavo, o Semein sas e Josihesko čhavo, o Josih sas e Jodasko čhavo, 27 o Joda sas e Joananesko čhavo, o Joanan sas e Risasko čhavo, o Risa sas e Zorovavelesko čhavo, o Zorovavel sas e Salatillesko čhavo, o Salatiil sas e Nirjasko čhavo, 28 o Niri sas e Melhijesko čhavo, o Melhi sas e Adijasko čhavo, o Adi sas e Kosamesko čhavo, o Kosam sas e Elmadamesko čhavo, o Elmadam sas e Iresko čhavo, 29 o Ir sas e Isusesko čhavo, o Isus sas e Eliezeresko čhavo, o Eliezer sas e Jorimesko čhavo, o Jorim sas e Matatesko čhavo, o Matat sas e Levijesko čhavo, 30 o Leviye sas e Simeonesko čhavo, o Simeon sas e Judasko čhavo, o Juda sas e Josifesko čhavo, o Josif sas e Jonamesko čhavo, o Jonam sas e Eliakimesko čhavo, 31 o Eliakim sas e Melejasko čhavo, o Meleja sas e Menasko čhavo, o Mena sas e Matatesko

čhavo, o Matata sas e Natanesko čhavo, o Natan sas e Davidesko čhavo, 32 o David sas e Jesejesko čhavo, o Jesej sas e Jovidesko čhavo, o Jovid sas e Voozesko čhavo, o Vooz sas e Salmonesko čhavo, o Salmon sas e Naasonesko čhavo, 33 o Naason sas e Aminadavesko čhavo, o Aminadav sas e Adminesko čhavo, o Admin sas e Arnijesko čhavo, o Arni sas e Esromesko čhavo, o Esrom sas e Faresesko čhavo, o Fares sas e Judasko čhavo, 34 o Juda sas e Jakovesko čhavo, o Jakov sas e Isakosko čhavo, o Isak sas e Avraamesko čhavo, o Avram sas e Taresko čhavo, o Tara sas e Nahoresko čhavo, 35 o Nahor sas e Seruhesko čhavo, o Seruh sas e Ragavesko čhavo, o Ragav sas e Falekesko čhavo, o Falek sas e Everesko čhavo, o Ever sas e Salasko čhavo, 36 o Sala sas e Kainamesko čhavo, o Kainam sas e Arfaksadesko čhavo, o Arfaksad sas e Simesko čhavo, o Sim sas e Nojesko čhavo, o Noje sas e Lamehesko čhavo, 37 o Lameh sas e Matusalinesko čhavo, o Matusalin sas e Enohesko čhavo, o Enoh sas e Jaretlesko čhavo, o Jaret sas e Malaleilesko čhavo, o Malaleil sas e Kainamesko čhavo, 38 o Kainam sas e Enosesko čhavo, o Enos sas e Sitesko čhavo, o Sit sas e Adamesko čhavo, o Adam sas e Devlesko čhavo.

4 O Isus, pherdo e Sveto Duhosa, bolda pe katar e reka Jordan thaj o Sveto Duho inčardale ande pustinja, 2 okote o beng iskušilas les štarvardeš đesa thaj khanči či hala pale godoja vrjama, a kana nakhline godola đesa vo bokhajlo. 3 A o beng phendas lešče: "Ako san Čhavo e Devlesko, phen akale barešče te postanil mangro." 4 A o Isus phendas lešče: "Ando Sveto lil ačhel ramome: 'Či trajil o manuš samo katar o mangro.'" 5 O beng inčarda les pe vuči gora thaj sikadas lešče sa e carstvurja akale themešče ando treno e jakhako. 6 Thaj phendas lešče o beng: "Tuče dava sa akaja vlast thaj e slava lendi, kaj si mande predaima thaj me šaj te dava len kašče me kamav. 7 Ako peres pe koča angle mande thaj slavis man, sa avela čiro." 8 A o Isus phendas lešče: "Ando Sveto lil ačhel ramome: 'De koča samo anglo Gospod čiro Del, thaj jedino les slavi.'" 9 Thaj o beng inčarda les ando Jerusalem thaj čhuta les po vrho e Hramosko thaj phendas lešče: "Ako san tu Čhavo e Devlesko, čhude tut katar tele 10 kaj ando Sveto lil ramol: 'Pire anđelende zapovedila pale tute te len sama pe tute', 11 thaj: 'von pe vas inčarena tut te či pečas e pungresa ando bar.'" 12 A o Isus phendas lešče: "Ramome si vi akava: 'Na iskušisar e Gospode čire Devle.'" 13 Thaj kana o beng završisarda te iskušil les, đelotar lestar pale varesošči vrjama. 14 O Isus bolda pe ando galilejako krajo pherdo e Sveto Duhošče

silava thaj o glaso pale leste buljilo pe sasto godova krajo. 15 Sikavelas pe lende sinagoge, thaj savora šukar mothonas pale leste. 16 Thaj avilo ando gav savo akhardolas Nazaret kaj barilo thaj pe piro običaj ando savato dija ande sinagoga thaj uštilo te čitol, 17 a dine les o lil katar o proroko Isaija, putardas o lil thaj arakhla o than kaj si ramome: 18 "O Duho e Gospodesko si pe mande zato makhlas mungro šoro e uljeja thaj bičhaldal man te anav e Bahtali nevimata e čorende, bičhaldal man te propovediv e phanglende kaj avena oslobodime, thaj e korende kaj dičhena, a e mučime kaj avena oslobodime 19 thaj te proglasiv o brš milosti e Gospodesko". 20 Phandada o Lil, dija les ko sluga thaj bešlo te sikavel, a savora save sas ande sinagoga dičhenas pe leste. 21 Thaj počnisarda te phenel lende: "Adeš akava Lil savo ašundine tumare kanenca pherdilo." 22 Savora phenenas sa majšukar pale leste thaj divinas pe e šukar alavende kaj inkļjenas andar lesko muj thaj phenenas: "Naj li akava o čhavo e Josifesko?" 23 Askal phendas lende: "Tumen mande bi sumnjako mothona akaja poslovica: 'Doktorina! Sastar korkoro tut!' Čer vi akate ande čiro gav kaj barilan so ašundam kaj čerdan ando Kafarnaum." 24 Askal ačhilo majdur te mothol: "Čače phenav tumende: 'Nijek proroko či lače avilo ande piro gav kaj bajrilo.' 25 A čače phenav tumende: E but udovice sas ando Izrael ande vrjama kana sas o Ilija proroko, askal o nebo phandadilo pe trin brš thaj šov čhon thaj sas bari bok pe sasti phuv e Izraelošči. 26 Ali niječače lendar nas bičhaldal o Ilija osim varesave udovicače ando gav Sarepta, savo sas ando Sidonsko krajo. 27 Thaj but gubavcurja sas ando Izrael pale vrjama kana sas o Jelisej proroko ali ni jek lendar či sastilo nego samo o Neman andar e Sirija." 28 Thaj savora ande sinagoga zurale holjajle kana ašundine akava. 29 Uštile thaj tradine les avri andar o gav thaj inčardine les po vrho e gorako kaj sas sazidome lengo gav te čhuden les opral. 30 Ali vo nakhlo maškar lende thaj đelotar. 31 Thaj avilo ando galilejsko gav savo akhardolas Kafarnaum thaj sikavelas len ando savato. 32 A o but o them čudilas pe lešče sikavipešče kaj lesko svato sas pherdo sile. 33 Ande sinagoga sas varesavo manuš ande savo sas bilačo duho e bendesko, vo čhuta muj zurale glasosa: 34 "So kames amendar, Isuse andar o gav Nazaret? Avilan te uništis men? Džanav ko san: Sveco e Devlesko." 35 A o Isus zapovedisardas lešče: "Phande čiro muj thaj inkļi andar leste!" Askal o demono harada les angle savorende, inkļjisto andar leste thaj ni cara či naudisardas lešče. 36 Savora sas but začudime thaj phenenas jek avrešče: "Sosko si godova svato, te ando autoriteto thaj ande sila zapovedil e bilače duhonende thaj

von inkļjen!" 37 Thaj o glaso pale leste buljilo pe sa e okolne thana. 38 Kana inkļjisto andar e sinagoga thaj đelo ande Simonesko čer. E Simonešče sokra sas e bari jag thaj činolas lat e groznica, pa zamolisardine les te sastarel lat. 39 Vo bandilo paše late thaj zapovedisardas e jagače te mučela thaj e jag nestanisardas. Voj odma uštili thaj ačhili te služil len. 40 Kana nakhlas o savatosko đes, sa e nasvalen katar razne nasvalimata, anenas ko Isus, a vo pe savorende čholas pire vas thaj von sastonas. 41 A vi e bilače duhurja inkļjenas andar e but e manuša thaj čhonas muj thaj phenenas: "Tu san Čhavo e Devlesko!" A vo pretilas lende thaj zabranisarda lende te na čeren svato, kaj von džanenas kaj si vo o Hristo. 42 A kana svanosardas o đes, inkļjisto thaj đelotar po pusto than. A o them rodelas les. Kana arakhline les avile leste thaj kamline te ačhaven les te na džaltar lendar. 43 A vo phendas lende: "Vi e manušende andar e aver gava trubul te anav e Bahtali nevimata pale Devlesko carstvo, kaj zato o Del bičhaldal man." 44 Thaj nastavisarda te propovedil pe judejske sinagoge.

5 Jekhvar kana o Isus ačhelas pe obala ko galilejako jezero, o them spidelas pes pe leste te ašunen o alav e Devlesko. 2 O Isus lija sama e duj čamcurija kaj ačhenas pe obala andar save inkļjistine e ribarja thaj halavenas pire mreže. 3 Thaj dija ande jek katar o čamco savo sas e Simonesko thaj zamolisarda les te spiden les cara majdur katar e obala. Bešlo andre thaj počnisarda te sikavel e theme andar o čamco. 4 A kana o Isus ačhilo te čerel svato e themešče, phendas e Simonešče: "Otplovisar okote kaj si handuk o paj thaj čhude e mreže čire thaj astar e mačhen." 5 A o Simon phendas lešče: "Učiteljina! Sasti rjat trudišajlam thaj khanči či astardam, ali ako tu gajda phenes, čhudava e mreže." 6 Kana čerdine godova, astardine but mače, gači kaj pharjonas lende mreže. 7 Dine znako pire drugarende ando aver čamco te aven te pomožin len. Kana von aviline, pherdine e liduj čamcurija gajda kaj gata potonisardine. 8 A kana dikhla o Simon Petar, pelo pe pire koča angle Isusešče pungere thaj phendas: "Džatar mandar, Gospode! Me sem bezehalo manuš." 9 Thaj sas ando čudo o Petar thaj savora save sas lesa zbog e bute e mače kaj astardine. 10 A gajda vi o Jakov thaj o Jovano sas ando čudo. Von sas e čhave e Zevedeješče thaj e drugarja e Simonešče. A o Isus phendas e Simonešče: "Na dar! Katar akana e manušen astareja sago e mačhen." 11 Thaj crdine e čamcurja pe phuv, mukline sa thaj teljardine pale leste. 12 Kana sas o Isus ande jek gav, dijas pe jek manuš savo sas sa ande guba. Dikhla e Isuse thaj pelo angle leste e mujesa dži ke phuv, thaj

zamolisarda les: "Gospode! Te kames šaj te sastares man katar e guba." 13 Vo čhuta po vas pe leste thaj phendas: "Kamav, av sasto!" Thaj e guba odma peli lestar. 14 A o Isus zapovedisardas lešće: "Na phen khonikašće, nego dža thaj sikav tu e rašaješće thaj prinesisar čiri žrtva palo čiro sastipe, sar odredisardas o Mojsije. Godova avela sago dokazo e manuše." 15 A o glaso pale leste još majbut buljolas thaj o but o them čidelas pe te ašunen les thaj te sastarel len katar lende nasvalimata. 16 A vo delotar ande pustinja te molil pe e Devlešće. 17 Jek des dok o Isus sikavelas e themes, bešenasa lesa e fariseja thaj e učitelja e Mojsiješće zakonestar save aviline andar sa e galilejske gava, judejske thaj andar o Jerusalem. A e sila e Gospodešči sas e Isuseja te sastarel e nasvalen. 18 Askal aviline varesošće manuša save inčarenas pe nosilje e manušes savo sas lino. Kamline te anen les andre thaj te čhon les anglo Isus. 19 Ali, sar katar o but o them našti dine lesa andre, line pe po krovo e čheresko thaj kroz o krovo mukline les tele zajedno e nosiljasa maškare anglo Isus. 20 Kana o Isus dikhla lengo pačipe, phendas e line manušešće: "Manušeja, jartompe tuće čire bezeha." 21 E fariseja thaj e učitelja e Mojsiješće zakonestar počnisardine te gndin: "Ko si akava kaj hulil po Del? Ko šaj te jartol e bezeha osim o Del?" 22 A o Isus džangla lende gindimata thaj phendas lende: "Sostar gajda gndin ande tumare ile? 23 So si majloće te phenel pe: 'Jartime si tuće čire bezeha' ili te phenel pe: 'Ušti thaj phir'? 24 Dokaživa tumende kaj man, e Čhaves e Manušešće, si vlast pe phuv te jartosarv e bezeha." Askal phendas e line manušešće: "Tuće phenav: 'Ušti, le čire nosilje thaj džatar tuće čhere!'" 25 Vo odma uštilo angle lende thaj lija pe soste pašljolas thaj delotar pire čherešće thaj hvalilas e Devle. 26 Savora sas ando čudo, slavinas e Devle thaj pherde dar phenenas: "Čudurja ades dikhlam!" 27 Pale godova o Isus inklijsto thaj dikhla e cariniko savo bučholas Levije kaj bešel po than kaj počinelas pe o porezo thaj phendas lešće: "Av pale mande." 28 O Levije mukla sa, uštilo thaj teljarda pale leste. 29 Pale godova o Levije čerda lešće ande piro čher bari gozba. Leja pale sinija bešenasa but carinikurja thaj vi aver manuša. 30 Askal e fariseja thaj lende učitelja e Mojsiješće zakonestar počnisardine te mrmljan pe leste thaj phendine lešće učenikonende: "Sostar han thaj pijen e carinikonenca thaj e bezehalenca?" 31 A o Isus phendas lende akaja izreka: "'Či trubun e saste manuša e doktore nego e nasvale'. 32 Gajda vi me či avilem te akharav e pravednikonen, nego e bezehalen te bolden pe katar pire bezeha ko Del." 33 Von askal phendine lešće: "Sostar e Jovanošće učenikurja često postin thaj molin pe, isto gajda

vi e farisejende učenikurja, a čire či postin nego han thaj pijen?" 34 A o Isus phendas lende: "Tugujin li e svaturja dok si o džamutro lenca? Nisar! 35 Nego avela o des kana otmina lendar e džamutre thaj askal postina ande godola des." 36 O Isus phendas lende još jek paramiči ande slike: "Khonik či činel o nevo kotor katar e nevi haljina te suvel pe purani haljina. Ako godova čerel, e nevi haljina čhindola, a e purane haljinače či ačhela o kotor katar e nevi haljina. 37 Khonik či čhol e nevi mol ande purani morčhači trasta, kaj e nevi mol pharavala e trasta thaj e mol čhordola, a e morčhači trasta propadnila. 38 Nego e nevi mol ande nevi morčhači trasta trubul te čhol pe. 39 Thaj khonik ko pijel e purani mol, či kamel e nevi, kaj phenel e purani mol si majlači."

6 Jek savato kana o Isus načelas maškar e njive, lešće učenikurja trgonas o div e vastenca thaj hanas. 2 A varesave katar e fariseja phendine e Isusešće: "Sostar čeren, okova so po zakono naj muklo te čerel pe savatone?" 3 A o Isus phendas lende: "Sigurno čitosardine ando Sveto lil so o David čerda, kana vo thaj okola save sas lesa bokhajle a nas len so te han. 4 Dijas ande Devlesko čher thaj lijas e svete mangre save či tromal te hal khonik osim e rašaja, hala thaj dija vi okolende save džanas pale leste." 5 Thaj phendas lende: "Kaj me, o Čhavo e Manušesko, gospodari sem e savatosko." 6 A jek aver savato, o Isus dija ande sinagoga thaj sikavelas, a okote sas jek manuš e šuće vastesa. 7 E fariseja thaj e učitelja e Mojsiješće zakonestar inčarenas e jakha pe leste te dičhen dali sastarel lat ando savato te došaren les. 8 A vo džanglas e gindimata lende thaj phendas e manušešće e šuće vastesa: "Ušti thaj ačh maškare." A vo uštilo thaj ačhilo angle manuša. 9 A o Isus phendas lende: Te phučav tumen: "Dali tromal pe savatone te čerel pe lačhipe ili bilačhipe, o trajo te spasil pe ili te hasarelpel?" A von samo ačhenas. 10 O Isus dikhla pe lende savorende thaj phendas e manušešće e šuće vastesa: "Inzar čo vas." A vo čerda gajda thaj o vas lesko sastilo thaj sas sasto sago vi aver. 11 A e fariseja thaj e učitelja e Mojsiješće zakonestar holjajle thaj čerdine svato maškar pende so te čeren e Isuseja. 12 Ande godoja vrjama o Isus delo pe gora te molil pe. Okote ačhilo sasti rjat thaj molilas pe e Devlešće. 13 Thaj kana avilo o des, akhardas pire e učenikonen thaj losarda maškar lende e dešudujen, thaj akharda len apostolurja a lende alava sas: 14 O Simon (saves akharenas Petar), thaj o Andrija (e Petresko phral), o Jakov thaj o Jovan, o Filip thaj o Vartolomej, 15 o Matej thaj o Toma, o Jakov (savo sas čhavo e Alfejevesko) thaj o Simon (savo sas pobunjeniko), 16 o Juda (čhavo e Jakovesko), thaj o Juda (andar o gav Iskariot,

savo izdaisarda les). 17 Pale godova o Isus fuljisto lenca tele katar e gora thaj ačhilo po ravno than. Okote sas baro broj o leščé učenikurja thaj o silno them andar o krajo e judejako, andar o Jerusalem, andar e tirske thaj andar e sidonske gava pašo more. 18 Von aviline te ašunen les thaj te sastarel len katar lenđe nasvalimata, a avenas vi kola saven mučinas e bilačhe duhurja, a o Isus oslobodilas len. 19 Thaj sa o them rodela te čhon pire vas pe leste, kaj andar leste inkjelas e sila thaj von sa sastonas. 20 Vo dikhla pe pire učenikurja thaj phendas: "Blago tumende save sen čore, kaj si tumaro e Devlesko carstvo. 21 Blago tumende save sen akana bokhale, kaj čaljona. Blago tumende save akana roven, kaj asana. 22 Blago tumende kana e manuša mrzana tumen, kana odbacina tumen, kana ladžarena tumen, thaj kana phenena pale tumende kaj sen bilačhe, zbog godova kaj paćan ande mande, ando Čhavo e Manušesko! 23 Radujin tumen ande godola đesa thaj čhelen e bahtatar, kaj bari si tumari nagrada po nebo! Kaj sa godova bilačipe isto gajda amaro them čerelas amare prorokonende ande lendi vrjama. 24 Ali teško tumende save sen akana barvale, kaj već primisardine e uteha tumari. 25 Teško tumende kaj sen akana čaljarde, kaj bokhavona. Teško tumende kaj asan akana, kaj rovena thaj tugujina. 26 Teško tumende kana savora lačhe mothona pale tumende, kaj isto gajda amaro them čerelas amare hohamne prorokonende ande lenđe vrjama." 27 "Ali tumende save ašunen phenav: Volin tumare dušmajen! Čeren lačipe okolende save mrzan tumen! 28 Blagoslovin okolen kaj den tumen romaja! Molin tumen e Devleščé pale okola save vředon tumen. 29 Ako vareko pećel tut pe jek rig e muješći, bolde leščé vi aver rig. Ako vareko iljas čiro ogrtači, de les vi čiro gad. 30 Ko mandel tutar vareso, de les. A okolestar kaj otmil čiro, na rode palpale. 31 Thaj askal sar kamen te čeren e manuša tumende, gajda čeren vi tumen lenđe. 32 Ako volin samo okolen save tumen volin, sošći avela tumari nagrada? Kaj vi e bezehale volin samo okolen save len volin. 33 Thaj ako čeren lačipe samo okolende kaj tumende čeren lačipe, sošći avela tumari nagrada? Kaj vi e bezehale čeren gajda. 34 Thaj te den udžile samo okolen katar save ažučaren te bolden tumende, sošći avela tumari nagrada? Kaj vi e bezehale den e bezehalen udžile te šaj palem dobin palpale. 35 Volin tumare dušmajen, čeren lenđe lačipe, den len udžile thaj na ažučaren khanči te bolden tumende. Ako čeren gajda, avela bari tumari poćin, thaj avena čhave e Majbareščé, kaj si vo lačo čak vi okolende kaj si nezahvalne thaj vi e bilačhende. 36 Aven dakle bare ileja sago kaj si vi tumaro nebesko Dad bare ileja." 37 Na sudin thaj či sudila pe tumende. Na osudin

thaj či avena osudime. Jartosaren thaj jartola pe tumende. 38 Den thaj dela pe tumende. Čhordola pe tumende ande angalja lači mera, nabime, čhinosardi thaj preobilno kaj soščé merava merin kasave merava merila pe tumende. 39 Thaj phendas lenđe akaja paramiči ande slike: "Dali šaj o koro e kore te vodi? Či li perena liduj ande hv? 40 Nijek učeniko naj majbaro katar piro učitelj. Svako savo si sikado dži ko krajo, avela sago vi o učitelj lesko. 41 Sostar dičhes e kaštešći prušuk ande jak čire phralešći, kana či hačares o baro kaš ande čiri jak? 42 Sar šaj phenes čire phraleščé: 'Phrala, ažučar te inkalav e kaštešći prušuk savi si ande čiri jak', kana ni korkoro či hačares o baro kaš ande čiri jak? Licemernona! Majsigo inkal o baro kaš andar čiri jak thaj majlačhe dičheja e kaštešći prušuk te inkal les andar čire phralešći jak." 43 Lačo kaš či bijanel bilačhe plodurja, a bilačo kaš či bijanel lačhe plodurja. 44 Kaj svako kaš pe piro plodo pindžarel pes. E smokva thaj e drak či kušen pe katar e kangre. 45 O lačo manuš andar e lači riznica pire ilešći inkalel lačipe, a o bilačo manuš andar piro bilačo ilo inkalel o bilačipe, kaj andar o muj inkjel sova si pherdo o ilo. 46 "Sostar akharen man: 'Gospode! Gospode! A naj sen paćivale okoleščé so phenav tumende? 47 Sikavava tumende pe kaste anel svako savo avel mande, ašunel mungre alava thaj si paćivalo mungre alavende: 48 Slično si sago o manuš savo agajda čerda piro čher: hanadas handuk thaj čhuta o temelji pe stena. Kana avili e poplava, o paj navalisarda po čher, ali našti harada les kaj sas lačhe sagradime. 49 A okova savo ašundas mungre alava a naj paćivalo mungre alavende, vo si sago o manuš savo vazdas piro čher pe phuv bi temeljesko, pe savo navalisarda o paj, odma harada o čher thaj katar godova čher sas bari ruševina."

7 Kana o Isus dija gata sa godola alava anglo them, dija ando gav Kafarnaum. 2 Varesave rimske kapetano sas robo savo sas nasvalo po smrto, a vo sas leščé but drago. 3 A kana o kapetano ašundas palo Isus, bičhaldas leščé e židovske starešinén thaj molisarda les te avel te sastarel leščé slugo. 4 A von aviline ko Isus thaj počnisardine ilestar te molin les alavenca: "Zaslužisarda te čeres leščé godova, 5 kaj volil amare theme thaj vo vazdas amende e sinagoga." 6 A o Isus teljarda lenca. Thaj kana sas već paše ko čher, bičhalda o kapetano pire drugaren leste te phenen leščé: "Gospode! Na trudi tu, kaj Naj sem dostojno te des ande mungro čher. 7 Zato vi či inčara man dostojno te avav angle tute, nego samo phen alav thaj o sluga mungro sastola. 8 Kaj, vi me sem manuš tale vlast thaj si man tale mande

voinjurja. Taj kana phenav ječešče: 'Džal', vo džaltar. Taj kana phenav averešče: 'Avl', vo avel. Taj kana phenav mungre robošče: 'Čer godova!' vo čerel." 9 A kana godova ašundas o Isus, zadivisajlo e kapetanošče taj bolda pe ko them savo džalas pale leste taj phendas: "Phenav tumende: kasavo pačipe či arakhlem ke nijek manuš ando Izrael!" 10 A kana okola kaj sas bičhalde katar o kapetano boldine pe čhere, arakhline e robo kaj si sasto. 11 Pale godova o Isus teljarda ando gav savo akhardolas Nain. Pale leste džans e učenikurja taj o but o them. 12 Kana avilo paše ke gavesko vudar, baš askal inkalenas e mule, čhave savo sas jedinco pire dejako savi sas udovica. Lava sas o but o them andar o gav. 13 Kana dikhla lat o Gospod, sažalisajlo pe late taj phendas lače: "Na rov!" 14 Pale godova avilo ko mohto, čhuta pire vas pe leste taj okola kaj indarenas o mohto ačhiline. A vo phendas: "Čhaveja, tuče phenav: Ušti!" 15 O mulo vazda pe, bešlo taj počnisarda te čerel svato. A o Isus dija les lešče dejače. 16 A savora zadivisajle taj počnisardine te hvalin e Devle alavenca: "Baro proroko avilo maškar amende!" taj: "O Del avilo ando pomoč pire themešče!" 17 Taj godova glaso pale leste buljilo pe saste judejske krajurja taj pe sasti okolina. 18 E Jovanošče učenikurja javisardine e Jovanošče so o Isus čerda. A vo akhardas pire dujen učenikonen 19 taj bičhaldala len ko Gospod te phučen les: "Dali san tu okova saves o Del obečisarda kaj bičhalela les ili te ažučaras avres?" 20 Kana akala duj manuša aresline leste, phendine: "O Jovano savo bolel bičhaldala amen tute te phučas tut: 'Da li san tu okova saves obečisarda o Del kaj trubul te avel, ili te ažučaras avres?'" 21 O Isus baš ande godova čas sastarelas e buten katar lende muke, razne nasvalimata taj katar e bilače duhurja taj e bute kore manušende boldas o vido. 22 A o Isus phendas lende: "Džan taj phenen e Jovanošče so upravo dikhline taj so ašundine: e kore dičhen, e bande phiren, e gubavcurja saston, e kašuče ašunen, e mule bolden pes ando trajo, a e čorende propovedil pe e Bahtali nevimata. 23 Blago okolešče savo či sablaznil pe zbog mande." 24 A Kana e Jovanošče učenikurja đeletar, o Isus počnisarda te mothol e themešče palo Jovano: "So đeline te dičhen ande pustinja? E trska, savja ljulil e balval? Na! 25 So đeline te dičhen? Manušes savo lija pe peste šukar drze? Na! E manuša save indaren pe peste e šukar drze taj trajin ando raskoš, von si ande carošče dvorurja. 26 So dakle inklijistine te dičhen? E proroko? Ej, me phenav tumende, vo si majbut vi katar o proroko. 27 Kaj o Jovano si okova pale savo o Del phendas ando Sveto lil: 'Ake, me bičhalav angle tute mungre glasniko savo pripremila o drom angle tute.' 28 Phenav tumende:

katar sa e manuša save sas ikada bijande, khonikal naj majbaro katar o Jovano savo bolelas, a okova savo si majcikno ande Devlesko carstvo majbaro si lestar." 29 Kana sa o them taj vi e carinikurja save sas bolde e Jovanošče boldimasa, ašundine e Isuse sar čerel svato priznaisardine kaj si e Devlesko sikavipe ispravno. 30 A e fariseja taj e učitelja e Mojsiješče zakonestar, či kamenas te bolel len o Jovano. Von odbisardine so o Del planirisarda pale lende. 31 O Isus phendas: "Kasa te usporediv e manušen katar akaja generacija? Kašče si slične? 32 Lenca si sago e čhavrenca save bešen po sokako taj jek avrešče čhon muj: 'Svirosardam tumende veselo, a tumen či čheldine, đilabadam tumende tužno, a tumen či rujine!' 33 Gajda avilo o Jovano savo bolelas. Niti halas mangro niti pijelas mol, a tumen phenen: 'O bilačo duho si ande leste!' 34 Avilem me, o Čhavo e Manušesko. Vi hav vi pijav, a tumen phenen: 'Dik, o manuš halapljivo taj matarno, drugari e carinikonengo taj e bezehalengo.' 35 Savora save prihvatn e Develešči mudrost sikaven kaj si voj čači." 36 Varesavo farisejo zamolisarda e Isuse te hal leste. O Isus dija ande farisejsko čher taj lijas than pale sinija. 37 Kana ake avili varesošči manušnji savi sas bezehali ando gav. Ašunda kaj si o Isus pale sinija ande farisejsko čher, avili taj andas e alabasterosko čaroro ande savo sas kuč mirisno ulje. 38 Ačhili pale lešče pungre, rovelas taj e jasvenca thovelas lešče pungre a pire balenca khoselas len. Čumidelas len taj mačhelas len e mirisne uljeja. 39 Kana godova dikhla o fariseji savo akharda e Isuse ande piro čher, gndisardas ande peste: "Kana akava avilosas proroko, džanglasas ko si taj sošči si akaja manušnji, savi diril les, kaj si bezehali." 40 O Isus phendas lešče: "Simone, si man vareso te phenav tuče." A vo phendas: "Phen, učiteljina." 41 O Isus majdur motholas: "Sas varesavo manuš savo delas averende udžile love. Gajda sas duj džene save sas lešče udžile. Jek sas lešče udžile pandž šela rupune lovora, a aver pandžvardeš. 42 Sar našti te boldine e love save sas lešče udžile, vo jartosardas liduj dženenende o dugo. Savo lendar majbut volila les?" 43 O Simon phendas: "Gndiv kaj okova savešče si majbut jartome." A o Isus phendas lešče: "Lače phenes." 44 Gajda bolda pe ke manušnji taj phendas e Simonešče: "Dičhes akala manušnja? Dijem ande čiro čher, a tu ni paj či dijan man te thovav mungre pungre, a voj pire jasvenca thoda mungre pungre taj pire balenca khosla len. 45 Tu či ni čumidan man, a voj, sar dija andre, či ačhili te čumidel mungre pungre. 46 Uljeja mungro šoro či makhlan, a voj e mirisne kuč uljeja mungre pungre makhlas. 47 Zato, phenav tuče: 'Voj sikadas but ljubav kaj si lače jartome e but e

bezeha, a majcara ljubav sikadas okova savo si majcara svesno kaj si lešće jartome lešće bezeha.” 48 A o Isus phendas e manušnjaje: “Jartome si tuće čire bezeha.” 49 A okola save sas pale sinija počnisardine te mothon maškar pende: “Ko si akava kaj vi e bezeha jartol?” 50 A vo phendas e manušnjaje: “Zbog čiro paćipe tu san spasime. Dža ando miro!”

8 Pale godova o Isus džalas pe sa e bare thaj cikne gava, propovedilas thaj navestilas e Bahtali nevimata palo o carstvo e Devlesko. Pale leste džanas e dešuduj apostolurja 2 thaj varesave manušnja saven o Isus oslobodisardas katar e bilačhe duhurja thaj sastarda len katar e nasvalimata: e Marija andar e Magdala, andar savi trada eŧta demonurja, 3 e Jovana, romnji e Huzošći savo sas e Irodosko upravitelj, e Suzana, thaj but aver save pomožinas e Isusešće thaj e dešuduje apostolende pire lovenca thaj okoleja so sas len. 4 Dok još čidelas pe o but o them andar e razne gava, o Isus phendas lende akaja paramiči: 5 “Jek đes inklijsto o sejači te sejol. Dok sijolas, varesavo seme pelo po drom thaj o them uštada les a e čirklja aviline thaj haline les. 6 Aver seme pelo pe barutni a kana inklijsto odma šučilo kaj nas les dosta vlage. 7 Varesavo seme pelo maškar e kangre thaj e kangre tasadine les sar barjonas zajedno lesa. 8 A varesavo napokon pelo pe lačhi phuv, niknosarda thaj bijanda šel drom majbut.” Kana phendas godova thaj čhuta muj: “Ašunen kana već si tumen kan!” 9 E učenikurja phučline e Isuse so značil godoja paramiči. 10 A vo phendas lende: “Tumende si dino te džanen e tajne e Devlešće carstvošće, a averende si dino samo ande paramiča, kaj ando Sveto lil ačhel ramome: ‘vi ako dičhen či primetin, vi ako čhon kan či hačaren.’ 11 A akava si so značil e paramiči: O seme si sago o alav e Devlesko. 12 Okova seme savo pelo po drom si sago e manuša save ašunen o alav, ali avel o beng thaj indarel o alav e Devlesko andar lende ile te na paćan thaj te či spasin pe. 13 A varesave si sago o seme savo si posadime pe barutni phuv. Kana ašunen e Devlesko alav, odma prihvatin les e bahtasa, ali najlen koreno. Varesavi vrjama paćan, ali kana aven e kušnje von peren katar o paćipe. 14 A okova seme savo pelo ande kangre si sago e manuša save ašunen o alav, ali još pe lengo drom e trajošće brige tasaven len e barvalipeja thaj akale trajošće nasladenca thaj či anen lačno plodo. 15 Okova seme savo pelo pe lačhi phuv si sago e manuša save ašunen o alav thaj inčaren les ando lačno thaj plemenito ilo thaj ustrain dok či anen plodo.” 16 “Khonikal kana del jag o stenko či čhol les talo čaro niti talo kreveto, nego čhon les po čirako, te dičhen o svetlo okola

save den andre. 17 Sa so si garado thaj čerdo tajno avela sikado javno thaj inkijela po videlo. 18 Len sama sar ašunen, kaj kas si dela pe lešće, a kas naj lela pe lestar vi okova so gindil kaj si les.” 19 Ko Isus aviline lešći dej thaj lešće phral, ali katar o but o them našti čerdine lesa svato. 20 A vareko javisarda e Isusešće: “Čiri dej thaj čire phral ačhen avri thaj kamen te dičhen tu.” 21 O Isus phendas lende: “Mungri dej thaj mungre phral si okola save ašunen thaj izvršisaren o alav mungre Devlesko.” 22 Jek đes o Isus phendas pire dešuduj učenikonende: “Hajde te nakhas pe koja rig e jezerošći.” O Isus thaj lešće učenikurja dine ando čamco thaj isplovisardine. 23 Dok plovinas, e Isuse lija e lindri. Ande godova mukla pe e oluja po jezero. E lađica počnisarda te pherel pe e pajesa a von arakhline pe ande bari briga pale piro trajo. 24 Aviline ko Isus, džungadine les thaj čhutine muj: “Učiteljna, učiteljna, tasadosa!” Vo džungadilo, thaj zapovedisarda e bavlajaće thaj e talasende thaj e talasurja smirosajle thaj nastanisarda tišina. 25 A o Isus phendas lende: “Kaj tumaro paćipe?” A von ande dar thaj ando čudo phučenar jek avres: “Ko si akava te zapovedil e paješće thaj e bavlajaće, a von te pokorin pe lešće?” 26 Askal o Isus thaj lešće učenikurja otplovisardine pe obala ke gerasinsko kraj, savo si pe koja rig katar o Galilejako jezero. 27 Dok o Isus inkijelas pe obala, avilo angle leste o manuš ande savo sas e bilačhe duhurja. Već dugo či indarelas e drže pe peste, niti trajilas ando čher nego trajilas ande limorja. 28 Kana o manuš dikhla e Isuse, čhuda pes pe koča angle leste thaj ande sasto glaso čhuta muj: “So kames mandar, Isuse, majbare Devlešće čhaveja? Moliv tut na muči mar!” 29 (Kaj o Isus zapovedisardas e bilačhe duhošće te inkijel andar godova manuš. Kaj već lungo vrjama o bilačno duho inčarelas les ande piri vlast, Čak vi kana phandenar les ande lancurja thaj ande okurja, o manuš trgoles e lancurja thaj o beng indarelas les ande pustinja.) 30 O Isus pe godova phučla les: “Sar bučhos?” Vo phendas: “Legija”, kaj ande leste dine e but bilačhe demonurja. 31 Thaj zamolisardine e Isuse te na naredil lende te džantar ando bezdan. (Abyssos g12) 32 A okote ande gora sas bari gomila bale save čarjonas. Askal e demonurja zamolisardine e Isuse te mučel len te den ande bale. Thaj vo mukla len. 33 Askal e bilačhe demonurja inklijstine andar o manuš thaj dine ande bale. Thaj e bale pojurisardine niz o brego ando jezero thaj tasadile. 34 A kana dikhline okola manuša kaj lenas sama pe bale so sas, našline thaj phendine pe gava thaj pe okoline thana so dikhline. 35 A o them inklijsto te dičhel so sas. Avile dži ko Isus thaj dikhline e manuše andar savo inklijstine e bilačhe demonurja sar

bešel dži ke Isusešče pungere, furjardo ande drže thaj saste godasa e dar askal dijas pe lende. 36 A okola kaj lenas sama pe bale phendine averende, sar o Isus oslobodisardas e manuše ande savo sas e demonurja. 37 Askal e Isuse zamolisarda sa o them andar e gerasinsko krajo te džaltar lendar kaj lija len e bari dar. O Isus dija ando čamco thaj teljarda palpale ande Galileja. 38 A o manuš andar savo o Isus trada e bilačhe demonen, zamolisarda e Isuse te šaj ačhel lesa, ali o Isus phendas lešče: 39 "Bolde tut čhere thaj phen sa so čerda tuče o Del." Thaj o manuš delotar thaj razglasisarda pe sasto gav so čerda lešče o Isus. 40 A kana o Isus bolda pe palpale pe koja rig e jezerošči, malada les o them kaj željno ažučarenas les. 41 Thaj dik, avilo o manuš kasko alav sas Jair, savo sas jek katar e vođe ande sinagoga. Thaj pelo pe pire koča angle Isusešče pungere thaj zamolisarda les te del ande lesko čher 42 kaj sas po meripe lešči jedino čhej savja sas varekaj katar dešuduj brš. Dok o Isus džalas ande Jairesko čher oko leste čicidelas pe sa o them katar sa e riga. 43 A maškar o them sas jek manušnji savi sas nasvali katar o godova kaj dešuduj brš thavdelas o rat latar. Sa so sasla dija pe doktorja thaj khonik našti te sastarelas lat. 44 Nakhli palal leste thaj astarda pe e čoškostar katar e Isusešči haljina, thaj o rat odma ačhilo latar. 45 A o Isus phendas: "Ko astarda pe pale mungri haljina?" Savora počnisardine te branin pe, a o Petar phendas: "Učiteljina, o but o them čicidel tut thaj spidel pe, a tu phučes ko astarda pe pale mande." 46 A o Isus phendas: "Vareko astarda pe pale mande. Hačardem sar e sila inklijsti andar mande thaj vareko sastilo." 47 Kana e manušnji dikhla kaj či ačhili neprimetno, izdralas e daratar thaj peli pe koča angle leste thaj angle sasto them phendas sostar astarda pe pale leste thaj sar odma sastili. 48 A vo phendas lače: "Čhejo, čiro pačipe sastarda tut. Dža ando mirol!" 49 Dok o Isus još čerelas svato e manušnjasa, avilo vareko andar e Jairesko čher ko Jair savo sas vođa ande sinagoga thaj phendas: "Čiri čhej muli. Na mučisar majbut e učitelje." 50 Ašunda godova o Isus thaj phendas: "Na dara! Samo pača thaj voj trajila!" 51 Kana o Isus areslo ando čher, či mukla khonikašče te den andre lesa osim o Petre, o Jovane, o Jakov thaj e čhorako dade thaj lače deja. 52 A savora save sas ando čher rovenas thaj žalinas pale čori. A o Isus phendas lende: "Na roven! Či muli, nego samo sovel!" 53 A von asanas lestar kaj džangline kaj muli. 54 O Isus astarda lat palo vas thaj čhuta muj: "Čhorije, ušti!" 55 Thaj lako duho bolda pe ande late thaj voj odma uštili, a vo naredisarda te denla te hal. 56 A lako dad thaj lači dej čudisajle, a vo zapovedisarda lende te na phenen khonikašče so sas.

9 O Isus akhardas e dešuduj apostolen thaj dija len moč thaj vlast pe sa e bilačhe duhurja thaj te sastaren katar e nasvalimata. 2 Bičhalda len te navestin e Devlesko carstvo thaj te sastaren e nasvalen. 3 Thaj phendas lende: "Na len tumenca po drom ni rovlji, ni trasta ni so hana, ni love thaj na te avel tumen tumenca po duj haljine! 4 Kana den ande varesosko gav, ačhen ande jek čher dok či džan ande aver gav. 5 Ande savo gav či primin tumen, inkljen andar godova gav thaj činon o praho katar tumare pungere. Godova avela znako kaj mukline les lešče sudošče." 6 Thaj e učenikurja teljardine majdur: obilazinas e gava, navestinas e Bahtali nevimata thaj sastarenas e nasvalen. 7 Kana ašunda o vladiri o Irod so dogodisajlo, sas zbnunime, kaj varesave phenenas kaj o Jovano savo bolelas uštilo andar e mule. 8 Aver phenenas pojavisajlo pe phuv o Ilija, a aver palem phendine: "Uštilo andar e mule varesavo proroko andar e purani vrjama." 9 A o Irod phendas: "Me čindem e Jovanesko šoro. Ko si askal akava pale kaste gači ašunav?" Thaj rodelas prilika te dičhel e Isuse. 10 Kana e apostolurja boldine pe katar e okolne krajurja, phendine e Isusešče sa so čerdine. Askal o Isus indarda len pesa te avel lenca korkoro, paše pašo gav savo akhardol Vitsaida. 11 Ali kana godova ašunda o them, teljarda pale leste. Vo primisarda len thaj phenelas lende pale Devlesko carstvo thaj sastardas savoren ko trubuja sastipe. 12 Kana avilo majpaše o krajo e đeseko kasno mismere avile ko Isus majpaše e dešuduj učenikurja thaj phendine e Isusešče: "Akava si pusto krajo, a već si kasno. Muk e theme te džal pe okolne gava thaj e thana te činen pešče vareso te han! kaj sam akate ando samotno krajo?" 13 A o Isus phendas lende: "Tumen den len te han!" A von phendine, "Naj amen majbut katar pandž mangre thaj duj mačhe, osim te džas te činas hamasko pale sa o them." 14 A sas varekaj katar pandž milje muškarcurja (či đinavenas pe e manušnja thaj e čavra). O Isus phendas pire učenikonende: "Phenen lende te bešen ande skupine po pandžvardeš džene." 15 Thaj savora bešline. 16 A o Isus lijas e pandž mangre thaj e duj mačhe, dikhla prema o nebo thaj blagoslovisarda len. Askal phagla o mangro pa dija pire učenikonende te podelin e themešče. 17 Savora haline thaj čaljile. Thaj katar okova so ačhilo e themešče čidine dešuduj pherde korpe kotora mangre thaj mačhe. 18 Jekhvar dok o Isus crda pe po korkoro than te molil pe, lesa sas samo lešče dešuduj učenikurja. Pale godova phučla len: "So phenel o them, ko sem me?" 19 Von phendine: "Varesave phenen kaj san o Jovano savo bolelas, aver kaj san o proroko Ilija, a trite palem kaj uštilo andar e mule varesavo katar aver purane prorokurja." 20 A vo phučla len: "A tumen, so tumen phenen,

ko sem me?" A o Petar phendas: "Hristo Pomazaniko e Devlesko!" 21 A o Isus zapovedisardas lende te na phenen khonikašće kaj si vo o Mesija. 22 Taj phendas: "Me, o Čhavo e Manušesko, trubul but te trpiv. E starešine, e šorvale rašaja thaj e učitelja e Mojsiješće zakonestar odbacina man. Mudarena man, a me o trito đes uštava andar e mule." 23 Pale godova o Isus phendas savorende: "Ako vareko kamel te avel mungro sledbeniko, neka odreknil pe korkoro pestar, nek svako đes lel piro trušul thaj nek džal pale mande. 24 Kaj svako ko kamel te spasil piro trajo, hasarela les; a ko hasarel piro trajo zbog mande, godova spasila les. 25 Savi korist si e manuše, ako zadobil sa o them, a korkoro pes hasarel ili pešće naudil?" 26 Ko ladžal mandar thaj mungre alavendar, lestar vi me, o Čhavo e Manušesko, ladžava kana avava ande slava mungri thaj e slava mungre Dadešči thaj e svete anđelendi. 27 "Čače phenav tumende: 'Varesave save si akate tumendar či merena dok či dichea e Devlesko carstvo.'" 28 A kana nakhla varekaj katar ohto đes katar godola alava o Isus lijas pesa e Petre, e Jovano thaj e Jakove ande gora te molin pe. 29 Dok molilas pe, lesko muj promenisaajo, a e drze pe leste postanisardine parne thaj sjajne. 30 Ande godova pojavisaajo duj manuša thaj čerenas svato e Isuseja. Sas godova o Mojsija thaj o Ilija. 31 Pojavisaajo ande slava thaj čerenas lesa svato pale lesko smrto savo trubuja te podnesil ando Jerusalem te pherdol o Lil. 32 E Petre thaj lešće drugaren lija e lindri. Kana džungadile, dikhline lešči slava thaj duj manušen save ačhenas lesa. 33 Taj dok godola duj džene džanastar lestar, o Petar phendas e Isusešće: "Učiteljina, lačhe kaj sam kate. Te čeras trin senice: jek pale tute, jek palo Mojsije thaj jek palo Ilija." Či džanelas so phenel. 34 Dok vo još čerelas svato, pojavisaajo o oblako thaj zasinisarda len. Kana o oblako učarda len, lija len e bari dar. 35 Askal andar o oblako ašundilo o glaso savo phendas: "Akava si mungro Čhavo saves odabirisardem! Leste čhon kan." 36 Baš kana ašundilo o glaso, o Isus ačhilo korkoro. E učenikurja ačhenas thaj askal još khonikašće khanči či phendine pale okova so dikhline. 37 A kana thejara o đes o Isus thaj lešće učenikurja fuljistine katar e gora, avilo angle leste o but o them. 38 Askal varesosko manuš savo sas maškar o them čhuta muj: "Učiteljina, moliv tut dik mungre čhave, kaj si mande jedinco. 39 Inčarel les o bilačo duho. Andar jekhvar počnil te čhol muj; čhudel pes thaj e spuma del lešće po muj. Gata nikada či mućel les thaj uništil les. 40 Molisardem čire učenikonen te traden e bilače duho andar leste avri ali von našti tradine les." 41 A o Isus phendas lende: "O bilače thaj bi paćako manušalen! Kozom semasa tumenca,

a tumen či paćan. Phuća man kozom još trpiva tumen! An akaring čire čhave!" 42 Dok o čhavo avelas paše, o bilačo duho harada les pe phuv thaj činosaursa les. A o Isus zapretisardas e bilače duhošće thaj odma sastarda e čhave thaj dijale lešće dadešće. 43 Savora divisaajo okolešće so o Isus čerda. Taj dok savora čudinas pe okolešće so čerelas o Isus, o Isus phendas pire učenikonende: 44 "Lačhe zapamtin so phenav tumende: Me, o Čhavo e Manušesko, avava dino ande vas e manušende." 45 Ali e učenikurja či hačardine so motholas, kaj nas lende dino te hačaren, o značenje sas lendar garado, a daranas te phućen les te objasnil lende. 46 E učenikurja počnisardine te raspravin pe ko maškar lende šaj avilosas majbaro. 47 O Isus džangla so si ande lende ile thaj lija e cikne čhave, čhuta les paše peste 48 taj phendas lende: "Ko god primil akale cikne čhave zbog mande, man primil. A ko man primil, primil e Devles savo bičhaldal man. O Del smatril kaj si majvažno okova savo si majponizno maškar tumende!" 49 Askal o Jovano phendas e Isusešće: "Učiteljina, dikhlam ječe manuše sar ande čiro alav tradel e bilače duhonen. Amen phendam lešće te na čerel godova, kaj či džal pale tute." 50 A o Isus phendas lešće: "Na branin lešće! Kaj ko naj protiv tumende, pale tumende si!" 51 Kana avili majpaše e vrjama te o Isus boldel pe ando nebo, vo zurale odlučisarda te džan ando Jerusalem. 52 Taj bičhaldal e glasnikonen angle peste. Von đele thaj dine ande varesosko samarijsko gav te pripremin lešće than kaj račarela. 53 No okote o them či kamlas te primin les kaj sas po drom palo Jerusalem. 54 Kana godova dikhline lešće učenikurja o Jakov thaj o Jovano, phućline les: "Gospode! Kames te amen phenas te fuljel o oganj andar o nebo thaj uništil len?" 55 A o Isus bolda pe lende thaj phendas lende kaj či gndin lačhe. 56 Taj deletar ande aver gav. 57 Dok džanas dromesa, varesosko manuš phendas e Isusešće: "Džava pale tute kaj god tu te džas." 58 A o Isus phendas lešće: "E lisicen si lende jazbine, thaj e čirikljen lende gnezdurja, a man e Čhave e Manušesće naj kaj mungro šoro te čhav." 59 Varesave avrešće phendas o Isus: "Teljar pale mande!" A vo phendas lešće: "Gospode, muk man majsigo te džav te prahov mungre dade." 60 O Isus phendas lešće: "Muk e mulen te prahon pire mulen, a tu dža thaj navestisar e Devlesko carstvo." 61 Još vareko phendas: "Me džava pale tute Gospode, ali muk man te džav prvo te jartoman katar mungri familija." 62 A o Isus phendas lešće: "Ni jek savo lel o plugo ande pire vas te oril thaj askal dićhel palpale, naj dostojno pale Devlesko carstvo."

10 Pale godova o Gospod odredisarda aver eftavardeš thaj duj učenikonen thaj bičhaldal len po dujen angle peste ande svako gav thaj ande svako than kaj kamlas te džal. **2** Majsigo so bičhaldal len phendas lende: "E žetva si bari, a radnikurja si cara. Molisaren e Gospodare katar e žetva te bičhalel e radnikonen ande piri žetva. **3** Džan! Ake, bičhalav tumen sago e bakhroren maškar e ruva. **4** Na indaren tumenca ni love, ni trasta, ni so pođina. Dromesa na te hasaren tumari vrjama gajda kaj pozdravina e theme thaj čerena svato lenca. **5** Ande savo god čer den, prvo phenen: 'Miro akale čherešče!' **6** Te avilo okote vareko dostojno palo tumaro miro, tumaro miro ačhela pe leste. A ako naj khonik dostojno tumaro miro boldela pe tumende. **7** Kana aven ande varesosko čer, na načhen andar o čer ande aver čer, ačhen pe jek than han thaj pijen sa so inkalen angle tumende. Kaj o radniko zaslužil piri počin." **8** Kana den ande savo gav thaj primin tumen, han so ponudin tumen. **9** Sastaren e nasvalen save si ande godova gav thaj phenen lende: Akaleja pašilo tumende e Devlesko carstvo! **10** A kana den ande varesavo gav thaj či primin tumen, inklijen pe lešče sokača thaj phenen: **11** Čak vi o praho andar tumaro gav, savo astarda pe pale amare pungre, khosas amendar sago o znako kaj o Del sudila tumende. Ali kava džanen: Pašilo tumende e Devlesko carstvo! **12** Phenav tumende: Ando đes e sudosko majloče avela e themešče andar e Sodoma nego e themešče andar akava gav. **13** Teško tumende manušalen andar o gav Horazin! Teško tumende manušalen andar o gav Vitsaida! Kaj te e čudurja save dogodisajle tumende dogodisajle sas ando rumome gava o Tiro thaj o Sidon, e manuša andar godola gava već dumut obratisajlesas thaj bešline sas ande hrapavo thaj neudobne drže ando praho sago znako palo pokajanje. **14** Ali e manušende andar o gav Tiro thaj andar o Sidon po sudo avela majloče nego tumende. **15** Vi tumen manušalen andar o Kafarnaum! Zar dži ko nebo avena vazdine? Dži ko than kaj si e mule haradona kaj si o tunjariko thaj e jag. (Hadēs 986) **16** Pale godova phendas e učenikonenđe: "Ko tumende čhol kan, mande čhol kan. Ko tumen odbacil man odbacil, a ko man odbacil, odbacil okoles savo bičhaldal man." **17** Kana e eftavardeš thaj duj učenikurja boldine pes bahtale phendine: "Gospode, čak vi e bilače duhurja pokorin pe angle amende ande čiro alav!" **18** A o Isus phendas lende: "Dikhlem e bendende poglavica sar perel sar e munja andar o nebo. **19** Ake dijem tumen vlast te uštaven pe sapa thaj pe škorpionurja thaj pe sa e sila e dušmaješči thaj khandi či naškodila tumende. **20** Ali na raduin tumen kaj e bilače duhurja pokorin pe tumende, Ali raduin tumen zbog godova kaj si tumare alava ramome

ande Devlesko svitak ando nebo." **21** Ande godova čas o Isus pherdo bah ando Sveto Duho phendas: "Slaviv tut, Dade, tut savo san Gospodari e nebesko thaj e phuvjako, kaj garadan čiro čačipe katar okola save smatrin pes mudre thaj umne, a objavisardan e ciknende. Ej Dade! Gajda tuče svidosajlo. **22** Mungro Dad sa dija man thaj khonik či džanel ko si o Čhavo, nego samo o Dad; niti ko si o Dad osim o Čhavo thaj okova kašče o Čhavo godova kamel te objavil." **23** Askal bolda pe ke učenikurja kana sas korkoro lenca thaj phendas lende: "Blago e manušende save dičhen okova so tumare jakha dičhen! **24** Phenav tumende: But prorokurja thaj e carurja kamline te dičhen man thaj te ašunen man, ali či dikhline man thaj či ašundine man!" **25** Jekhvar uštilo jek učitelj e Mojsiješče zakonestar te probil e Isuse thaj phučlas: "Učiteljina, so trubul te čerav te dobiv večno trajo?" (aiōnios g166) **26** A vo phendas lešče: "So ramol ando Mojsijesko zakono? So okote čitosardan?" **27** Askal o manuš phendas "Čumide e Gospode Devle čire saste ileja, čire saste dušava, čire saste snagasa čire saste godasa, thaj volisar čire pašutne sago kaj volis korkoro tut!" **28** Pe godova phendas lešče o Isus: "Lačhe phendan. Godova čer thaj avela tut večno trajo." **29** Ali vo lja te sikavel pes pravedno, thaj phučla e Isuse: "A ko si mungro pašutno?" **30** A o Isus phendas: "Varesosko manuš fuljelas andar o Jerusalem ando gav savo akhardolas Jerihon. Thaj astardine les e razbojnikurja. Von čhudine lestar e drže, mardine les thaj đeletar. O manuš ačhilo te pašljol opaš mulo. **31** Slučajno godole dromesa načhelas varesosko židovsko rašaj, dikhla les thaj nakhlo gajda kaj zaobiđisarda les. **32** A gajda vi o levito e rašajesko pomoćniko: nakhlo okotar, dikhla les thaj nakhlo paše leste. **33** Varesosko putniko Samarijanco areslo dži leste, dikhla les, thaj sažalisajlo pe leste. **34** Avilo dži leste thaj thoda e rane lešče e uljesa thaj e molasa thaj pačarda len. Thaj čuta les pe piro magarco, indardale ande gostijonica thaj pobrinisajlo pale leste. **35** Thejara o đes inkalda duj rupune lovora, dija len e gostijoničarešče thaj phendas: 'Le sama pe leste. Ako so majbut potrošil, počinava tuče kana boldava man.'" **36** Askal o Isus phučla les: "So phenes, savo katar akala ponašisajlo sago pašutno prema okova saves astardine e razbojnikurja?" **37** A vo phendas: "Okova savo pomognisarda lešče." Pe godova o Isus phendas lešče: "Dža thaj vi tu čer gajda!" **38** Dok o Isus thaj lešče učenikurja gajda putuinas majdur prema o Jerusalem, dine ande varesosko gav. Okote sas varesavi manušnji savi akhardolas Marta, primisarda len ande piro čer. **39** A sas lat phen savi akhardolas Marija. Voj bešelasa dži ke Gospodešče pungre thaj ašunelas o alav lesko. **40** A

e Marta sas but zauzmime godolesa kaj poslužilas. Voj avili leste thaj phendas: "Gospode! Zar či maris kaj mungri phen mukla man korkoro te posluživ? Phen laće te pomožil man." 41 A o Gospod phendas laće: "Marta, Marta! Na ha holji thaj uznemiri tut pale but godova, 42 a samo jek si važno. E Marija godova svatisardas thaj godova či lava latar."

11 Jekhvar kana o Isus završisarda e molitvava, avilo dži leste jek katar e učenikurja thaj phendas lešće: "Gospode, sikav men te moli men sago kaj o Jovano savo bolelas sikada pire učenikonen." 2 O Isus phendas lende: "Kana molin tumen, phenen: 'Dade amareja ando nebo! Neka avel sveto čiro alav! Neka avel čiro carstvo! 3 Mangro amaro de amen svako đes! 4 Thaj jarto amende amare e bezeha, sago kaj amen jartosaras svakonešće ko sagrešil protiv amende thaj na de te peras ande kušnja!'" 5 Askal o Isus phendas lende: "Zamislín te džan ke tumaro drugari ande opaš e rjat thaj phenen lešće: 'Drugarina, deman udžile trin mangre. 6 Kaj avilo mungro drugari katar o drom, a naj man so te čhav angle leste te hall! 7 A okova andral phenel lešće: 'Na dosadisar mande! O vudar si već phandado, a e čhavrora si manca ando kreveto thaj soven. Našti uštav te dav tut.' 8 Phenav tumende: Ako či ni uštel te de les kaj si lesko drugari, uštela te del les zbog godova kaj lešće drugare naj ladžavo te avel uporno. 9 Isto gajda phenav tumende: Manden thaj dela pe tumende! Roden thaj aračena! Maren po vudar thaj putrela pe tumende! 10 Kaj ko god mandel, primil. Ko rodel, aračhel. Ko marel po vudar, putrel pe lešće. 11 Savo dad maškar tumende kana o čhavro lesko mandel lestar mačo, del les umesto mačo sap? 12 Ili kana mandel angro, zar dela les škorpijono? 13 Ako tumen, vi ako sen bilače, džanen te den lače darurja tumare čhavrende, kozom majbut tumaro nebesko Dad dela Sveto Duho okolen save manden lestar!" 14 Jekhvar o Isus trada e bilače duho andar o manuš savo sas nemo. Kana inklijsto o bilačo duho, o nemo manuš počnisarda te čerel svato. Thaj o but o them divisajlo. 15 A varesave lendar phendine: "Vo tradel e bilače duhonen e Veelzevulešće silava, savo si e bendengo knezo." 16 A aver iskušisardine e Isuse gajda kaj rodenas lestar varesosko znako andar o nebo kaj o Del bičhaldas les. 17 Ali o Isus džangla lende gindimata thaj phendas lende: "Ako e manuša andar isto carstvo borin pes maškar peste von uniština piro carstvo. Vi ako e familijače članurja borin pes maškar pende, uniština piri familija. 18 Ako si o beng ande peste podelime, sar ačhela lesko carstvo? A tumen phenen kaj me e Veelzevulešće silava tradav e bilače duhonen andar e manuša. 19 Ako me e Veelzevulešće silava

tradav e bilače duhonen andar e manuša, kašće silava askal tumare učenikurja traden len? Gajda von korkoro dokažina kaj naj sen ando pravo. 20 Ali ako me e Devlešće silava tradav e bilače duhonen, čače avilo tumende o carstvo e Devlesko." 21 O Isus još phendas: "Dži kaj god o zuralo manuš, lače naoružime, aračhel piro čher, lesko barvalipe si sigurno. 22 Ali te avel o majzuralo lestar, svladila les thaj otmil lešće sa lesko oružje ande savo uzdilaspes, a o pleno razdelila." 23 Zato ko naj manca protiv mande si. Thaj ko manca či čidel, rspil. 24 Askal o Isus phendas: "Kana o bilačo duho inklijel andar o manuš, lutil pe puste thana thaj rodel pešće than kaj šaj te odmoril pes. A kana či aračhel o than, phenel: 'Boldava man ande mungro čher, ando manuš andar savo inklijstem.' 25 Thaj kana areslo o bilačo duho arakhlas e manuše savo si sago o čučo čher, šilado thaj lačhardo. 26 Askal džal thaj lel pesa ehta aver duhurja, majgore lestar thaj del andre thaj okote nastanil pe. Po krajo godole manušešće avela majgore nego kaj sas lešće po početko." 27 Dok o Isus godova phenelas, varesošči manušnji kaj sas maškar o but o them čhuta muj: "Blagoslovime o đí čire dejako savo indarda tu thaj e čuča save pilan!" 28 O Isus phendas: "Još majblagoslovime si okova savo ašunel o alav e Devlesko thaj ačhel pačivalo!" 29 A vo phendas laće: "Tumen manušalen save trajin ande akaja vrjama sen bilače manuša. Tumen roden znako. Ali aver znako či dela pe tumende osim e čudurja save o Del čerda palo Jona. 30 Kaj okova so sas e Jonasa sas znako e manušende save trajinas ando gav savo akhardolas Niniva, ande savo o Del bičhaldas les. Gajda okova so manca dogodila pe avela znako kaj man, e Čhave e Manušešće, o Del bičhaldas akale themešće. 31 Po đes kana avela e Devlesko sudo, e carica savi dumut vladilas e južno phujava, savi akhardolas Saba, uštela thaj osudila e manušen save si ađes džude. Kaj dadural avili te ašunel e care Solomone savo sas zurale mudro, a akate si vareko majbaro vi katar o Solomon, a tumen či kamen te čhon kan leste! 32 E manuša save majsigo trajinas ando gav savo akhardolas Niniva, uštена po đes kana avela e Devlesko sudo thaj osudina e manušen save akana trajin. Kaj von pokajisajle kana o Jona propovedilas, a ake, akate si vareko majbaro katar o Jona, a tumen još či pokajisajle!" 33 O Isus majdur sikavelas: "Khonik či del jag o stenko te čhol les po garado than, niti tale korpa, nego po čirako te okola kaj den andre dičhen o svetlo. 34 Čiri jak si stenko čire telošće. Kana si čiri jak sasti, sasto čiro telo si ando svetlost. Ali, ako si čiri jak nasvali, čiro telo si ande tama. 35 Zato le sama te okova so gndis kaj si ande tute svetlost naj li tama. 36 Ako si sasto čiro

telo osvetlime thaj ni cara tama naj ande tute, askal sasto aveja prosvetlime, sago kana o stenko pire svetlosa osvetlil tut." 37 Kana o Isus dija gata o svato, avilo leste varesavo fariseji thaj akharda les ande piro čher te hal. Vo dija andre thaj lijas than pale sinija. 38 Kana godova dikhla o farisej, začudisajlo kaj o Isus bešlo pale sinija majsigo nego so thoda pire vas sago kaj trubujas prema e židovengo običaj. 39 A o Gospod phendas lešće: "Tumen e fariseja gadići trudin tumen te thoven tumaro tahtaj thaj o čaro avrjal, a andral sen pherde pohlepe thaj e bilačipe. 40 Bi godavalen! Naj li o Del okova kaj stvorisarda e manušeš thaj pindžarel les andral sago vi avrjal? 41 Zato den okova so si andral andar e tahta thaj andar e čare so handžvale inčaren samo pale tumende, okolende savende si majpotrebno sago milostinja thaj saste avena čiste andral thaj vi avrjal. 42 Ali teško tumende, farisejalen! Kaj den deš posto katar sa e začinurja thaj katar o povrče, a či marin pale pravda e manušeđi thaj pale ljubav e Devlešći so si majvažno. Trubun te den deš posto, ali či troman te zanemarin majvažne stvarja andar o zakono. 43 Jao tumende farisejalen! Kaj volin te bešen pe prve thana ande sinagoge thaj te e manuša pozdravin tumen pe javne thana. 44 Teško tumende farisejalen kaj sen sago e limorja, save naj obeležime, pe save e manuša phirena, a či džanen kaj si okote o limori thaj postanin duhovno melale!" 45 Askal varesosko katar e učitelja e Mojsiješće zakonestar phendas e Isusešće: "Učiteljina, dok gajda phenes, vi amen vredos." 46 A o Isus phendas: "Jao vi tumende, učiteljurja e Mojsiješće zakonestar! Kaj čhon pe manuša o pharipe gajda kaj den len pravilo save našti te indaren, a tumen korkoro ni e najesa či mrdnon te pomognin lende te indaren godova pharipe. 47 Teško tumende, kaj vazden e prorokonende spomenikurja, a tumare pradada mudardine len. 48 Godolesa kaj či trajin so e prorokurja sikavenas svedočin kaj odobrin okova so čerdine tumare pradada: von mudardine len, a tumen spomenikurja vazden lende! 49 Zato vi o Del mudro phendas: 'Bičhalava lende e prorokonen thaj e apostolen. Varesaven lendar mudarena, a varesaven progonina.' 50 Zato tumaro naraštaj smatrla pe došalo palo rat kaj sas čhordo e prorokonengo katar o postanko e themesko, 51 katar o rat e prvo prorokosko dži ko rat e poslednjo prorokosko, e Aveljesko dži ko rat e Zaharijasko, savo sas mudardo maškar o žrtveniko thaj o svetište. Ej phenav tumende, kaj rodela pe o računo katar akaja generacija tumaro naraštaj avela odgovorno pale godova rat savo sas čhordo! 52 Jao tumende, učiteljurja e Mojsiješće zakonestar! Kaj line e čija katar o džanglipe pale Devlesko carstvo thaj garadine katar e manuša. Korkoro či

den andre ando carstvo, a či mučen te den andre okola save kamen te den." 53 Kana o Isus inklijsto okotar, e učitelja e Mojsiješće zakonestar thaj e fariseja počnisardine zurale te holjavon pe leste thaj navalisardine pe leste te phučen les but vareso. 54 Von dičhenas te astaren les ande varesavo pogrešno alav sar optužisardinesas les.

12 Askal čida pes majbut milje manuša, gajda kaj jek avrešće uštavenas e pungre. Ali o Isus prvo phendas pire učenikonende: "Len tumen sama kaj o farisejsko licemerje buljol sago o kvasco savo šukljarel sasto humer. 2 Kaj avel e vrjama kana sa so si garado avela arakhado thaj sa so si tajno ašundola angle savorende. 3 Zato, sa so phendine ande tama ašundola po svetlo thaj sa so phendine varekašće po kan ande sobe, katar e krovurja propovedila pe." 4 O Isus nastavisarda: "Phenav tumende mungre drugarende na daran katar okola save šaj te mudaren samo o telo, a pale godova našti čeren tumende khanči. 5 Ali phenava tumende kastar trubun te daran: daran katar o Del savo, šaj lel o trajo thaj askal čudel les ando pakao. Lestar daran! (Geenna g1067) 6 Pa či li bičinen pe pandž čirklja pale samo duj lovora? Pa palem ni ječe lendar o Del či bistrel. 7 A tumende si svako bal po šoro đinado. Zato na daran! Kaj sen e Devlešće majvredne nego but e čirklja!" 8 "Ko akate pe phuv anglo them priznail kaj pripadil mande, pale leste me o Čhavo e Manušesko phenava, angle anđelurja e Devlešće kaj pripadil mande. 9 Ali okova savo odreknil pe mandar angle manuša akate pe phuv, gajda vi me odrekniava man lestar angle anđelurja e Devlešće. 10 Ali phenav tumende ko mothol vareso protiv o Čhavo e Manušesko, jartola pe lešće. Ali okolešće ko hulil po Sveto Duho, či jartola pe lešće. 11 A kana anena tumen po sudo thaj ande sinagoge, angle poglavarja thaj angle vlast, na vodin briga so phenena te branin tumen! 12 Kaj o Sveto Duho ande godova časo sikavela tumen so te phenen." 13 Vareko maškar o them phendas lešće: "Učiteljina, phen mungre phralešće te podelil manca so mukla amende amaro dad." 14 Pe godova o Isus phendas lešće: "Manušeja, ko čhuta man te avav tumaro sudco ili deliv maškar tumende?" 15 Askal phendas savorende: "Len tumen majdur katar svako pohlepa, kaj o čačo trajo či avel katar okova so si tumen." 16 Askal o Isus phendas lende akaja usporedba: "Varesave barvale manušešće e phuv but bijanda 17 thaj ačhilo te gindil ande peste: 'So te čerav? Kaj naj man kaj te čhav sa akava so bijanda mande e phuv.' 18 Thaj phendas: 'Ake so čerava! Haravava mungre žitnice thaj vazdava majbare thaj okote čhava sa mungro điv thaj mungro lačipe. 19 Askal phenava

korkoro mande ake situ ande zalihe but lačhipe pale but e brš kaj aven. Dušo mungrije, akana odmori tut, ha, pi thaj veselitu! 20 Ali o Del phendas lešče: 'Bigodavereja! Več arjat mereja! A sa so čidan, kasko avela?' 21 Gajda avela okoleja kaj čidel pešče barvalipe, a či čidel o barvalipe savo si vredno ande Devlešče jakha." 22 Askal o Isus phendas pire učenikonende: "Zato phenav tumende, na daran pale tumaro trajo so hana, ni palo telo so lena pe tumende. 23 Kaj o trajo si majvredno katar o habe, a o telo katar e drze. 24 Dičhen pe gavranurja! Niti sadin niti čiden, najlen spremište ni žitnice, thaj tumaro Dad nebesko pravarel len. Kozom sen tumen majvredne nego e čiriklja! 25 A ko tumendar šaj e brigenca te lundarel piro trajo samo pale jek des? 26 Dakle, ako tumen našti čeren ni okova so si majcara, sostar askal stalno han holji pale sa aver? 27 Lačhe dičhen e divlje luluda sar barjon! Či trudin pe niti suven pešče drze. A phenav tumende kaj ni o caro Solomon ande sa piro barvalipe či indarelas pe peste gajda šukar drze sago akala divlje luluda. 28 Ako o Del gajda šukar furjarel e poljsko čar, savi ades si, a več thejara čhudel pe ando bov te phabon, kozom majbut šukar furjarela tumen. Tumen cara pačivalen! 29 Zato vi tumen na samo gndisaren pe godova dali si tumen dosta te han thaj te pijen. Na uznemirin tumen zbog godova! 30 Sa godova roden e manuša save či pindžaren e Devles. Tumaro nebesko Dad džanel kaj sa godova trubul tumen. 31 Nego roden e Devlesko carstvo, a sa godova nadodaila pe tumende! 32 Na dara mungro cikno stado! Kaj si e volja tumare Dadešči te del tumen o Carstvo. 33 Bičinen okova so si tumen thaj e love den e čorende! Gajda čidena tumende trjaste save či phurjon thaj barvalipe savo či propadnila, večno blago savo si ando nebo kaj o čor či avel thaj kaj o moljco či hala les. 34 Zato, kaj si čiro barvalipe, okote avela vi čiro ilo." 35 O Isus phendas lende vi akava: "Aven spremne te služin thaj tumare stenkurja neka phabon. 36 Aven sago okola kaj ažučaren pire gospodare kana boldel pe andar e svaturja te odma putren lešče čim aresel thaj marel po vudar, 37 Blago okole slugonende saven o gospodari, kana avela, aračhel džungade! Čače phenav tumende, kaj korkoro o gospodari čhola len pale sinija te bešen thaj čhola pe peste o keceljko, te poslužil len. 38 O gospodari šaj te boldel pe ande opaš e rjat ili ande zora a blago e slugende saven o gospodari aračhela kaj si još džungade thaj ažučaren les. 39 Ali akava džanen: te o domačino džanglasas ande savo časo avela o čor, či muklasas te o čor provalil ande lesko čher. 40 Vi tumen aven spremne, kaj me, o Čhavo e Manušesko, avava ando časo kana či očekuina man." 41 Pe godova o Petar phendas: "Gospode, phenes li godoja

usporredba samo pale amende ili vi pale savorende?" 42 A o Gospod Isus phendas: "Ko si okova verno thaj razumno upravniko saves o gospodari čhola te vladil pe lešče sluge thaj te del len habe ande pravo vrjama? 43 Blago godole slugašče saves lesko gospodari, kana avela, aračhel kaj čerel gajda. 44 Čače, phenav tumende, o gospodari čhola godole slugone te upravljil lešče saste barvalipeja. 45 Ali ako godova sluga phenel ande piro ilo: 'Mungro gospodari či avela gajda sigo' thaj ačhel te marel e slugonen thaj e sluškinjen, te hal, te pijel thaj te matol, 46 avela lesko gospodari ande godova des kana vo či očekuil thaj ando časo kana vo či ni džanel, thaj strogo kaznila les thaj odredila lesko than maškar okola save či pačan, 47 O sluga savo pindžarel e volja pire gospodarešči, a khanči či čerda te pripremil pe pale vrjama kana boldela pe lesko gospodari, avela strogo kaznime. 48 A okova sluga kaj či džanglas e gospodarešči volja, a čerda vareso so zaslužil kazna, cara avela mardo. A katar okola kašče but dijas lendar majbut vi rodela. Okolestar kašče si but poverime lestar but vi rodela pe." 49 Askal o Isus phendas: "Me avilem te čhudav jag e sudošči pe phuv! Sar volisardemas te več počnisarda te phabol! 50 Ali majsigo trubul te pretrpiv e muke thaj o smrto, zurale si mande pharo dok godova či avel gata! 51 Gndisaren kaj me avilem te anav miro pe phuv maškar o them? Nisar. Avilem te anav razdor. 52 Kaj katar akana e familija rspila pe: trin džene avena pe mungri rig, a aver duj protiv ili duj pe mungri rig, a trin protiv mande. 53 Boldela pe o dad protiv o čhavo, thaj o čhavo protiv o dad, e dej protiv e čhej, thaj e čhej protiv e dej, e sokra protiv e bori thaj e bori protiv e sokra." 54 A e bute themešče o Isus phendas: "Kana dičhen kaj o kalo oblako avel katar o zapad, odma phenen: 'Dela o bršnd! Thaj gajda si. 55 Kana dičhen kaj phurdel e balval katar e pustinja po jugo, phenen: 'Avela tati vrjama', thaj gajda avela. 56 Licemerja! Džanen te prosudin o izgled e nebesko thaj e phuvjako. Sar askal či pindžaren mungre znakurja save trubuinesas te pindžaren! 57 Tumen korkoro trubuinesas te pindžaren so si ispravno! 58 Sago vi ako vareko prl tumen zbog o dugo savo či počindine thaj kamel te indarel tumen po sudo, još e dromesa den sa tumendar te e nagodbasa rešin tumen lestar, te či inkalel tumen anglo sudo. O sudco dela tumen ko stražari, a o stražari čhudela tumen ande tamnica. 59 Phenav tuče: či inkljeja okotar dok či počines sa so san udžile dži ko poslednjo lovoru."

13 Askal aviline varesave manuša thaj phendine e Isusešče kaj o Pilato savo sas rimsko upravniko dijas naredba te mudaren pe varesave manuša andar e Galileja.

Thaj sas mudarde ando jerusalimsko Hramo dok anenas e žrtve. 2 O Isus phendas lenđe: "Dali si godova dokaz kaj godola Galilejcurja save nasradisardine sas majbut bezehale katar aver Galilejcurja?" 3 Nisar! Phenav tumende: vi tumen gajda avena duhovno hasarde ako či obratin tumen ko Del! 4 Ili gndin kaj okola dešuohto, pe save haradili e Siloamsko kula thaj mudarda len sas majbut bezehale katar sa e manuša save trajinas ando Jerusolim?" 5 Nisar! Phenav tumende: vi tumen gajda avena duhovno hasarde ako či obratin tumen ko Del." 6 Askal o Isus phendas lenđe akaja usporedba: "Varesave manuše sas zasadime smokva ande lesko vinograd. Avelas te rodel plodo pe late, ali či arakhla. 7 Zato phendas e vinogradarešče: 'Ake, več trin brš avav thaj rodav plodo pe akaja smokva thaj či arakhav les. Čhin lat. Sostar te crpil e phuv?' 8 A o vinogradari phendas lešče: 'Gospodarina, mukla još akava brš, a me hanavava oko late thaj čhava oko late o štalsko gunoj. 9 Možda ipak pe okova brš bijanel. A ako či bijanel askal čhineja lat.'" 10 Jek savato dok o Isus sikavelas ande jek sinagoga. 11 Okote sas varesavi manušnji savi dešuohto brš sas grbavo thaj našti uspravilaspe. Ande late sas o bilačo duho savo čerelas te avel nasvali. 12 Kana o Isus dikhla lat, akharda lat peste thaj phendas: "Manušnije, oslobodime san katar čiro nasvalipe!" 13 Thaj čhuta pire vas pe late, a voj odma uspravisajli thaj počnisarda te slavil e Devle. 14 A okova savo sas vođa ande sinagoga holjajlo kaj o Isus sastardas ando savato, thaj phendas e themešče: "Šov si đes ando kurko kana trubul te čerel pe buči! Ande godola đesa aven thaj saston, a na ande savatosko đes!" 15 O Gospod askal phendas lešče: "Licemerja! Vi tumen čeren buči savatone. Zar či svako tumendar savatone odrešil pire guruve ili magarco katar e jasle thaj indarel les po paj te napoil les?" 16 Naj li vi voj čhej andar e Avraamesko plemeno, savja o Sotona phangla već dešuohto brš, či li trubujasas vi lat o Del te odrešil katar godova nasvalipe savo si lače okurja ande savatosko đes?" 17 Pe godova sa lešče protivnikurja ladžajle, a sa aver raduisajle e šukar delende save o Isus čerda. 18 Pale godova o Isus phendas: "Sova si slično e Devlesko carstvo? Sova te usporediv les?" 19 Slično si e gorušicače zrnosa savo si zurale cikno, kana o manuš lel les thaj čhude les ande piri bar. Barjol thaj čerdol ando kaš thaj e čiriklja čiden pe thaj čeren gnezdurja ande lešče ranja." 20 Thaj palem phučla len: "Sova te usporediv e Devlesko carstvo?" 21 Vo si sago o kvasco savo lel e manušnji thaj šukljarel les ando but aro, dok sa či vazdel pe." 22 Gajda o Isus načelas kroz e gava thaj kroz e varošice, sikavelas thaj putuilas ando Jerusolim. 23 Askal vareko phendas lešče: "Gospode, dali si

cara okola kaj spasin pe?" A o Isus phendas lenđe: 24 "O vudar nebesko si usko. Trudin tumen te den andre kroz leste, kaj phenav tumende, but rodena te den kroz leste, ali našti dena. 25 Kana o gospodari e čheresko zaključil o vudar avela prekasno. Askal ačhena avri marena po vudar thaj phenena: 'Gospode, putar amende!' Vo phenela tumende: 'Či džanav ko sen, ni katar sen.' 26 Askal počnina te phenen: 'Pa amen tusa halam thaj pilam, a tu sikavejas pe amare sokača!' 27 A vo phenela tumende: 'Či džanav ko sen. Džantar mandar savora save nepravda čeren!' 28 okote avela o roipe thaj o škripice e dandena kaj avena gajda holjarike kana dičhena e Avraame, e Isako, e Jakove thaj sa e prorokonon ande Devlesko carstvo, a tumen avena čhudine avri. 29 Askal avela o but o them katar o istok thaj katar o zapad, katar o severo thaj katar o jugo thaj bešena pale sinija ande Devlesko carstvo. 30 Thaj dik, okola save si akana prve askal avena pe poslednjo than, a okolen save akate smatrin kaj si poslednje avena majbare." 31 Ande godova čas aviline varesave fariseja thaj phendine e Isusešče: "Inklji thaj džatar akatar, kaj o caro Irod kamel te mudarel tut." 32 A o Isus phendas lenđe: "Džan thaj phenen godole lisičace: 'Ake, tradav e bilače duhonen thaj sastarav ađes thaj thejara, thaj trito đes avava gata.' 33 Ali ađes, thejara thaj overthara moraš te nastaviv o drom, kaj valda e prorokurja našti aven mudarde avrjal o Jerusolim. 34 Jerusalime, Jerusalime, savo mudares e prorokonon thaj čhudes e bara dži ko smrto pe okola save si e Devlestar bičhalde tuče! Kozom drom lijem te čidav čire čharen, sago e kvočka savi čidel pire pužen tale pešče phaka, ali tumen či kamline! 35 Ake akana, tumaro čer avela pusto! Thaj phenav tumende, či dičhena man dok či avel o čas kana phenena: 'Blagoslovime o okova savo avel ando alav e Gospodesko!'"

14 Jek savato avilo o Isus ando čher ke jek vođa e farisejengo te hal lesa. Okola save sas okote lačhe lenas sama pe leste so čerela. 2 Kaj pojavisajlo anglo Isus varesavo manuš savo sas nasvalo gajda kaj sas les paj thaj šuljolas lestar. 3 Pe godova o Isus phučla e učitelja e Mojsiješče zakonestar thaj e farisejen: "Dali si muklino prema e Mojsijesko zakono te savatone sastarel pe o manuš ili naj?" 4 A von khanči či phendine. Askal o Isus čhuta pire vas po nasvalo manuš, sastarda les thaj phendas lešče kaj šaj džaltar. 5 A o Isus phendas: "Ko tumendar savatone či čerel buči? Ako varekašče tumendar o čhavro ili o guruv perel ande haing, zar či odma inkalena les?" 6 Pe godova nas len so te phenen. 7 Kana o Isus dikhla sar okola kaj si akharde pe gozba len pešče prve thana te bešen, phendas

lende e usporedba: **8** "Kana vareko akharel tut pe svaturja, na beš po prvo than kaj so ako si akhardo vareko ko si majvažno tutar?" **9** Te či o domačino savo akhardas tut thaj vi les phenela tuće: 'Ušti thaj de o than okole manušeće.' Askal ladžavoja, ušteja thaj bešeja po paluno than. **10** Nego kana vareko akharel tut dža thaj beš pe paluno than, thaj kana avela okova kaj akharda tut, phenel tuće: 'Drugarina pripremisardem tuće majlačo than!' Askal aveja počastime angle sa save si akharde. **11** Kaj, svako ko korkoro pes uzvisil, avela ponizime, a ko korkoro pes ponizil, avela uzvisime." **12** A askal o Isus bolda pes ko domačino thaj phendas lešće: "Kana čeres habe ili večera, na akhar čire drugaren, ni čire phralen, ni čire familija, ni čire barvale komšijen, te či vi von možda tut akhardinesas thaj pe akava način boldinesas tuće. **13** Nego kana čeres gozba akhar e čoren, sakaten, banden, thaj koren. **14** Kaj len naj sova te bolden tuće. Gajda aveja blagoslovime kaj o Del pale godova nagradila tut kana vo vaskršnila e pravedne manušen andar e mule." **15** Kana godova ašunda jek katar e manuša pale sinija, phendas e Isusešće: "Blago okolešće savo hala ande Devlesko carstvo!" **16** A o Isus phendas lešće: "Varesosko manuš čerda bari večera thaj akhardas e but e themes. **17** Kana e večera sas gata, bičhaldas e sluga te phenel e gostonende: 'Sa si gata. Aven!' **18** A von jek pale avreste phendine kaj našti te aven. O prvo phendas lešće: 'Čindem njiva thaj trubul te džav te dikhav lat. Moliv tut, jartosar man ke godova manuš.' **19** Aver phendas: 'Čindem deš guruva, thaj trubul te džav te isprobiv len dali si lače. Moliv tut, jartosar man ke godova manuš.' **20** O trito phendas: 'Upravo ženisajlem thaj zato našti te avav.' **21** O sluga bolda pe thaj javisarda godova pire gospodarešće. Askal o gospodari holjajlo thaj phendas e slugašće: 'Inklji brzo pe sokača e gavešće thaj an akaring e čoren, sakaten, koren thaj e banden.' **22** Kana o sluga gajda čerda, javisardas e Gospodarešće: 'Gospodarina, čerdo si so phendan thaj još si than.' **23** O gospodari phendas e slugašće: 'Inklji pe droma avrajli o gav thaj trade len te aven te pherdol mungro čere e themesa. **24** Kaj phenav tumende: Ni jek katar okola manuša save sas majsigo akharde či hana ni zalogaj katar e gozba savi čerdem.'" **25** E Isuseja putuilas o silno them. O Isus bolda pe thaj phendas lende: **26** "Ako vareko kamel te avel mungro učeniko, moraš te volil man majbut nego pire dade, deja, romnja, čhavren, phralen, phejen, pa majbut vi katar piro trajo. Inače našti avel mungro učeniko! **27** Ko či lel piro trušul thaj či džal pale mande thaj naj spremno te merel pale mande, našti avel mungro učeniko! **28** Kaj khonik tumendar, kana kamel te sagradil e kula, či prvo bešel thaj

proračunil e troškurja te dičhel dali si les sova te završil. **29** Inače, šaj dogodisajlo sas lešće te uspil samo te čhol o temelji thaj najles dosta love te završil, a askal savora save godova dikhline sas mardinesas muj lestar **30** thaj phenena: 'Akava manuš počnisarda te gradil, a našti završil!' **31** Ili savo caro teljardasas ando rato aver caronenca, a te majsigo či bešel thaj gindil dali šaj pire deš milje vojnikonenca te svladil okoles savo avel pe leste pire biš milje vojnikonenca? **32** Ako procenil kaj našti te svladil len, bičhalela pire manušen te roden miro dok si lende protivnikurja još dur po drom. **33** Zato khonikal našti postanil mungro učeniko savo či mučel sa so si les zbog mande." **34** Askal o Isus još phendas lende: "O lon si lačo. Ali ako o lon naj londo, sova askal londarela pe? **35** O bilondo lon naj lačo ni pale phuv, ni palo gnoište, nego samo te čhudel pes. Ašunen kana već si tumen kan!"

15 Oko o Isus čida pes e but e carinikurja thaj e bare bezehale manuša te ašunen les sar sikavel. **2** Zato e fariseja thaj e učitelja e Mojsiješće zakonestar mrmiljinas: "Družilpe e bezehalenca thaj još čak vi hal lenca!" **3** Pe godova o Isus phendas lende akaja usporedba: **4** "Ko tumendar, ako si les šel bakhre thaj hasarel ječe či mučela okolen injavardeš thajinja ande divljina, thaj či đelosas te rodel godole ječe dok či aračhel les? **5** A kana aračelas, pherdo bah čhol les pe dume **6** thaj boldel les čere thaj čim aresel čere akharel pire komšijen thaj pire drugaren thaj phenel lende: 'Raduin tumen manca! Arakhlem mungre hasarde bakhres.' **7** Phenav tumende, gajda savora ando nebo avena majbahtale pale jek bezehalo manuš savo pokajil pe nego pale injavardeš thajinja save gndin kaj si pravedne thaj kaj o pokajanje naj lende potrebno." **8** O Isus phendas lende: "Savi godoja manušnji, ako si lat deš rupa thaj jek hasarel, či del jag o stenko, lače šilavel o čer thaj rodel dok či aračhel les? **9** A kana aračhel les, akharel pire komšinicen thaj pire drugaricen thaj phenel lende: 'Raduin tumen manca! Arakhlem o rup savo hasardem.' **10** Phenav tumende, kaj gajda e Devlešće anđelurja raduinape pale jek bezehalo savo obratil pe." **11** Thaj o Isus nastavisarda te čerel svato: "Varesave manuše sas duj čhave. **12** O majterno phendas pire dadešće: 'Dade, deman akana mungro nasledstvo savo pripadil mande.' Thaj o dad podelisarda o barvalipe. **13** Kana nakhline varesave đesa o majterno čavo čida sa piro thaj otputuisarda ande dur phuv thaj okote potrošisarda sa piro barvalipe pire bilače trajosa. **14** Kana potrošisarda sa, dija e bari bok ande godoja phuv, thaj nas les so te hal. **15** Askal đelo thaj zaposlisajlo sago sluga ke jek manuš ande godoja phuv thaj čarjarelas lešće balen. **16** O čhavo

sas gajda bokhalo kaj rado halasas vi e ljuške katar e maune save hanas e bale, ali khonikal či delas len lešće. 17 Kana napokon avilo peste, phendas: 'Ke mungro dad e najamnikonen si habe gači kaj uvek vi ačhel, a me akate merav bokhatar! 18 Uštava, teljarava ke mungro dad thaj phenava lešće: 'Dade, sagrašisardem protiv tute thaj protiv o Del ando nebo! 19 Naj sem majbut dostojno te akhara man čire čhavesa. Primi man sago ječe katar čire najamnikurja.' 20 Uštalo thaj teljarda ke piro dad. Dok sas još dur katar piro čher, lesko dad dikhla les dok sas još po drom thaj sažalisajlo pe leste thaj prastajas angle leste, dija les mrtiko thaj čumida les. 21 A o čhavo phendas lešće: 'Dade, sagrašisardem protiv tute thaj protiv o Del! Naj sem majbut dostojno te akhara man čire čhavesa.' 22 A o dad phendas e slugende: 'Brzo inkalen e majšukar haljina thaj den pe leste! Čhon lešće e angrušči po naj thaj e sandale pe lešće pungre! 23 Anen e majthule guruve thaj denle čhurjasa, pa te pogostime thaj te veselime. 24 Kaj, akava mungro čhavo sas mulo thaj akana bolda pe ando trajo, hasardo sas thaj akana arakhadilo! Thaj počnisardine te veselin pe. 25 Pale godoja vrjama lesko majpurano čhavo čerelas buči ande njive. A kana bolda pe thaj sas već paše, andar o čher ašundolas e muzika thaj o čhelipe. 26 Pa akhardas ječe slugo te phučel so si godova. 27 A o sluga phendas: 'Bolda pe čiro phral thaj čiro dad dija čhurjasa e thule guruve te proslavil kaj lesko čhavo bolda pe džudo thaj sasto.' 28 O majpurano phral holjajlo thaj či kamlu te del andre. Askal o dad inklijsto thaj počnisarda te molil les te del andre. 29 A vo phendas pire dadešće: 'Me ake gači brš služiv sago robo tuče thaj nikada či obisardem te čerav so phendan mande, a tu nikada ni jarco či dijan man te proveselima mungre drugarenca. 30 A kana avilo kava čiro čhavo savo e bludnicenca haljarda sa čiro barvalipe, tu dijan lešće čhurjasa majthule guruve.' 31 Pe godova o dad lesko phendas lešće: 'Čhaveja, tu san uvek manca thaj sa mungro vi čiro si. 32 Ali trubul te raduji men thaj veselimen kaj akava čiro phral sas mulo thaj akana bolda pes ando trajo, hasardo thaj arakhadilo!'''

16 O Isus askal phendas pire učenikonende e usporedba: "Sas varesavo barvalo manuš saves sas upravitelj saves e manuša prnas kaj rspil o barvalipe pire gospodaresko. 2 O barvalo manuš akharda pire upravitelje thaj phendas lešće: 'So godova ašunav pale tute? Sikav mande o računo kaj ramosardan sar vodijs e briga pale mungro barvalipe zato kaj majbut našti aves mungro upravitelj!' 3 Pe godova o baro sluga phendas ande peste: 'So te čerav kana mungro gospodari či del više te čerav buči pale leste? Te džav te hanavav naj man snaga. Te prosiv? Ladžavo si mande.

4 Džanav so čerava! Thaj kana gajda čerava e manuša lače primina man ande pire čera, kana majbut či avava e gospodaresko upravitelj.' 5 Askal akhardas ječe po ječe katar o okola save sas udžile lešće gospodarešće. Thaj phučla e prvo manuše savo sas udžile: 'Kozom san udžile mungre gospodarešće?' 6 'Šel bačve maslinsko zetino', phendas o okova savo sas udžile. A o baro sluga phendas lešće: 'Le čiro računo beš thaj odma ramosar pandžvardeš.' 7 Pale godova phendas e aver manušešće: 'A tu, kozom san tu udžile?' A vo phendas lešće: 'Šel mere div.' Phendas vi lešće: 'Le čiro računo thaj ramosar pe ohtovardeš.' 8 Thaj o gospodari pohvalisarda e bilače upravitelje kaj sas snalažljivo. Kaj e manuša akale themešće majsnalažljivo postupin prema okola save si lende slične, nego e manuša katar o svetlost. (aiōn g165) 9 A me phenav tumende, steknin tumende drugaren gajda kaj ispravno koristin akale themesko barvalipe thaj kana o barvalipe majbut či avela korisno o Del primila tumen ande večne stanurja ando nebo. (aiōnios g166) 10 Ako šaj pačas e manušešće ande cikne buča, askal šaj pačas lešće vi ande bare buča thaj ako našti pačas e manušešće ande cikne buča askal našti pačas lešće ni ande bare buča. 11 Ako naj senas pačivale ande e themesko barvalipe, sar o Del poverila tumende duhovno barvalipe te upravin lesa? 12 Thaj ako ande averesko barvalipe naj senas pačivale, sar o Del dela tumen tumaro? 13 Ni jek sluga našti robujil duje gospodarende ande isto vrjama. Kaj ječe mrzala, a averes volila; ili ječešće avela pačivalo a avres prezirila. Našti služin e Devlešće thaj e barvalipešće ande isto vrjama." 14 Sa gadava ašundine e fariseja save sas pohlepne pale love thaj marenas muj katar o Isus. 15 A o Isus phendas lende: "Tumen čeren tumen kaj sen pravedne anglo them, ali džanel o Del tumare ile. Kaj so e manuša smatrin vredno, e Devlešće grjacolpe." 16 Askal o Isus phendas lende: "E Mojsijesko zakono thaj e knjige save ramosardine e purane prorokurja važinas sa dok či avilo o Jovano savo bolelas, a katar askal navestilas pe e Bahtali nevimata palo carstvo e Devlesko. Thaj katar askal nagovorisarar savoren te den ande Devlesko carstvo. 17 Ali godova či značil kaj e Mojsijesko zakon majbut či vredil kaj majloče nestanila o nebo thaj e phuv, nego te propadnil jek tačkica andar o zakono. 18 Sago kaj ramol ando zakon: svako ko rastavil pe katar piri romnji thaj lel avrja, čerel preljub; thaj ko oženil pe e romnjasa savi si rastanime, preljub čerel." 19 Askal o Isus nastavisarda: "Sas varesosko barvalo manuš, savo lelas pe peste majšukar thaj majkuč drze, trajilas svako đes raikane thaj veselilas pe. 20 A angle lesko vudar pašljolas varesavo čoro manuš

savo sas sa ande čirurja. Lesko alav sas Lazar, 21 thaj čeznilas samo te čaljol e prušukenca save perenas katar e barvalešči sinija. Dok gajda pašljolas avenas e džučhela thaj čarnas e čirurja pe leste. 22 A kana mulo o čoro, e anđelurja inđardine les ande Avramešće angalja. Pale godova mulo vi o barvalo manuš, thaj prahosardine les. 23 A lešči duša đeli po than kaj si e mule, thaj dok sas ande bare muke vazda pire jakha thaj dadural dikhla e Lazare ande Avramešće angalja. (Hadēs 986) 24 Thaj čhuta muj: 'Dade Avraame, smiluitu mande thaj bičhal e Lazare te umočil piro naj ando paj thaj šudrjarel mungri čhib kaj zurale muči man ande akava plameno.' 25 Pe godova phendas o Avram: 'De tut gođi, čhaveja, kaj tu pale čiro trajo primisardan čiro lačhipe, a gajda vi o Lazar piro bilačhipe. Akana vo akate tešil pe, a tu mučis tut. 26 Osim godova, maškar amende thaj tumende si bari provalija thaj vi okola save kamline sas našti nachen okotar akaring, niti akatar okoring.' 27 Pe godova o barvalo manuš phendas: 'Moliv tut askal, dade, bičhal e Lazare ando čher mungre dadesko. 28 Kaj si man pandž phral pa neka džal thaj upozoril len te na vi von aven akaring ande kava than e mukengo.' 29 A o Avram phendas lešće: 'Opomenil len o Mojsija thaj e prorokurja ande pire zapisurja. Neka čiton thaj čhon kan lende.' 30 A vo phendas: 'O na, dade Avraame! Nego te avilo lende vareko andar e mule, obratina pe.' 31 A vo phendas lešće: 'Ako či ašunen e Mojsija thaj e prorokonon, či pačana sa vi te uštel thaj avel lende vareko andar e mule.'"

17 O Isus phendas pire učenikonende: "O iskušenje moraš te avel, ali teško e manušešće kroz savo avel o iskušenje. 2 Kasave manušešće avilosas majlače te phanden lešće mlinsko bar oko e kor, thaj te čhuden les ando more, nego te crdel po bezeh ječe katar akala manuša saven si cara pačipe. 3 Upozoriv tumen! Ako čiro phral savo si verniko pogrešil, ukori les thaj jartosar lešće ako pokajil pe. 4 Pa ako vi efa drom po đes sagrešil protiv tute thaj efa drom po đes avel thaj phenel tuče: 'Jartosar mande. Pogrešisardem!', jartosar lešće." 5 E apostolurja phendine e Gospodešće: "Trubul amen majbut pačipe. Phen amende sar te dobis!" 6 O Gospod phendas lende: "Te avel tumen pačipe gajda cikno sago kaj si e gorušicako zrno, phendinesas akale dudošće: 'Inkalto e korenosa thaj presadi tut ando more!', thaj vo presadisajlo sas. 7 Ko tumendar phenela pire slugašće savo oril ili lel sama pe stoka, kana boldela pes andar o polje thaj del ando čher: 'Av brzo thaj beš pale sinija?' 8 Či umesto godova phenena lešće gajda: 'Čer mande večera! Čhov e keceljko pe tute thaj služisar

man dok hav thaj pijav, pale godova tu haja thaj peja?' 9 E slugašće pale godova či zahvalil pe kaj vo samo čerel piri buči. 10 Gajda vi tumen: kana sen poslušne e Devlešće, phenen: 'Sluge sam save či zaslužin pohvala! Čerdam samo so samas udžile te čerasi!'" 11 Gajda dok putuilas majdur prema o Jerusalem, o Isus načhelas maškar e Samarijači thaj e Galilejači regija. 12 Kana delas ande varesosko gav, angle leste avile deš gubavcurja. Ačhiline cara majdur 13 thaj počnisardine te čhon muj: "Isuse, Učiteljina, smiluisar tut amende!" 14 Kana o Isus dikhla len, phendas lende: "Džan thaj sikaven tumen e rašajende te dičhen tumen thaj phenen dali sen saste!" Thaj dok džanas dromesa sastile katar e guba. 15 Jek lendar dikhla kaj sastilo, bolda pe thaj slavisarda e Devle andar sasto glaso. 16 Čhuda pes pe koča angle Isusešće pungre thaj zahvalisarda lešće. A sas godova varesavo manuš andar e Samarija. 17 O Isus phučla: "Či li sastile deš džene? Kaj si okolainja? 18 Dali nijek lendar či bolda pe te del slava e Devlešće osim akava tuđinco?" 19 Askal phendas e manušešće savo sastilo: "Ušti thaj dža. Čiro pačipe ande mande spasisarda tut!" 20 Jekhvar kana e fariseja phučline e Isuse kana avela e Devlesko carstvo, O Isus phendas lende: "E Devlesko carstvo či avela e znakonenca save šaj dičhen pe. 21 Našti phenela pe: 'Aketalo akate!', ili: 'Eketalo okote!' Ake e Devlesko carstvo si maškar tumende!" 22 Pale godova phendas e učenikonende: "Avela e vrjama kana kamena te dičhen jek katar e đesa kana me, o Čhavo e Manušesko, vladiva sago o caro, ali či dičhena godova đes. 23 Askal phenena tumende: 'Eketalo okote, aketalo akate!' Ali na džan thaj na prasten inča! 24 Kaj sago e munja kaj sevil pe jek krajo e nebesko thaj rasvetil sa dži ke aver krajo, gajda avela vi manca, e Manušesće Čhavesa, ando mungro đes. 25 Ali majsigo trubuv but te pretrpiv thaj akava naraštaj trubula te odbacil man. 26 Thaj sago kaj sas ande Nojašči vrjama gajda avela vi ando đes kana avava me o Čhavo e Manušesko. 27 E manuša hanas, pijenas, ženinas pe thaj udajinas pe dži ko đes dok o Noje či dijas ando baro brodo, thaj avilo o potop thaj uništisardas sa so nas ando baro brodo. 28 Askal avela sago kaj sas dumut kana trajilas o Lot: Kana e manuša ando gav savo akhardolas Sodoma, hanas thaj pijenas, činenas thaj bičinenas, sadinas thaj gradinas, 29 sa dži ke detharin kana o Lot inklijsto andar o gav Sodoma, a askal andar o nebo zapljuštisarda e jag thaj o sumpor thaj uništisardas sa okolen save ačhiline ando gav. 30 Isto gajda iznenada avela ando đes kana boldava man me o Čhavo e Manušesko. 31 Gajda ande okova đes, ko avela po krovo, a lešće stvarja si ando čher, neka na fuljel te

lel len. Taj ko si ande njive, neka či boldel pes palpale te lel vareso pesa. **32** Den tumen godi sar muli e Lotošči romnji! **33** Kaj ko lela sama pe piro trajo te arače les, hasarela les; a ko hasarel piro trajo zadobila les palo večnost. **34** Phenav tumende, ande koja rjat kana me boldava man avena duj džene ande jek kreveto. Jek lela pes, aver mučela pe. **35** Duj manušnja zajedno meljina o điv; jek lela pes, a aver mučela pe. **36** Duj džene avena ando polje; jek avela lino, a aver ačhela." **37** Pe godova e učenikurja phučline les: "A kaj godova Gospode?" A o Isus phendas lende: "Avela očito sago vi akaja poslovica: 'kaj čiden pes e lešinarja okote kaj si o mulo telo.'"

18 Askal o Isus phendas e učenikonende e usporedba te sikavel len sar uvek trubun te molin pe taj sar nikada či trubun te odustanin. **2** Taj phendas: "Ande jek gav sas jek sudija savo či daralas e Devlestar a e themestar či ladžalas. **3** A ande godova gav sas vi jek udovica savi stalno avelas leste taj molilas les: 'Deman pravda angle mungro protivniko.' **4** O sudija varesavi vrijeme či marilas pale godova, ali napokon phendas: 'Vi ako či darav katar o Del taj či mariv pale manuša, **5** ali dava pravda akale udovica, kaj, ako či dav lat pravda, dosadila mande dok či dobil piro pravo, kaj stalno dosadil man!'" **6** Askal phendas o Gospod Isus: "Dičen sar ispravno postupisarda o nepravedno sudija. **7** Kaj o Del strpljivo čhola kan ke lende molitve taj pobrinila pe te dobin pravda okola save pripadin lešče taj vapin lešče o des taj e rjat. **8** Phenav tumende kaj brzo dela len pravda. Ali kana me, o Čhavo e Manušesko, boldava man pe phuv, dali arakhava kasavo pačipe?" **9** Askal o Isus phendas još akaja usporedba varesavende save sas uverime ande piri vlastito pravednost, a averen prezirisarenas: **10** "Duj manuša dele ando Hramo te molin pe. Jek sas fariseji a aver cariniko. **11** O fariseji ačhelas taj molilas pe pale peste: 'Devla, nais tuče kaj naj sem sago aver manuša, grabežljivo, nepravedno, preljubniko, ili sago akava cariniko. **12** Me postiv duvar ando kurko; dav deš posto katar sa so si man.' **13** A o cariniko, ačhelas majdur, taj či usudilas pe ni pe jakha te vazdel prema o nebo, nego pečelas pe ando kolin te sikavel piri tuga taj phenelas: 'Devla av milostivo mande bezehalešče!' **14** Phenav tumende: vo bolda pe čhere pravedno anglo Del, a na o fariseji! Kaj svako ko korkoro pes uzvisil, avela ponizime, a ko korkoro pes ponizil, avela uzvisime." **15** A e Isusešče anenas vi e cikne čhaven te čhol pire vas pe lende te blagoslovil len, a kana godova dikhline e učenikurja braninas lende. **16** A o Isus akharda len taj phendas: "Mučen e čhaven te aven mande taj na

branin lende, kaj kasavende pripadil e Devlesko carstvo." **17** "Čače, phenav tumende, savo či primil e Devlesko carstvo sago cikno čhavo, či dela ande leste." **18** Varesavo židovsko vođa phučlas e Isuse: "Lače učiteljina, so trubul te čerav te dobiv o večno trajo?" (aiōnios g166) **19** A o Isus phendas lešče: "Sostar man akhares lačheja? Khonikal naj lačno, nego li samo o jedino Del. **20** A e zapovedi andar o Mojsijsko zakon džanes: 'Na čer preljub', 'Na mudar', 'Na čor', 'Na svedočisar hohamne', 'Poštuisar čire dades taj čire deja.'" **21** A vo phendas: "Sa gadava čerav katar mungro ternipe." **22** Kana godova ašunda o Isus, phendas lešče: "Još jek ačhilo tut: sa so si tut bičin taj podelisar e čorende taj avela tu barvalipe ando nebo. A askal av taj dža pale mande." **23** Kana vo godova ašundas, ražalostisajlo kaj sas zurale barvalo taj či kamlas te bičinel sa so sas les. **24** O Isus dikhla pe leste taj phendas: "Sar si phare e barvalešče te del ande Devlesko carstvo! **25** Majloče si e kamilače te načel kroz e suvjače kan nego o barvalo te del ande Devlesko carstvo." **26** Okola save godova ašundine, phendine: "Pa ko askal šaj spasil pe?" **27** A o Isus phendas: "So si nemoguče e manušende, moguče si e Devlešče." **28** Askal o Petar phendas: "Ake, amen muklam sa amaro taj teljardam pale tute te sledis tut." **29** A o Isus phendas lende: "Čače, phenav tumende, naj godova savo muklasas piro čer, ili pire romnja, ili pire phralen, ili pire dade taj pire deja, ili pire čhaven zbog e Devlesko carstvo, **30** a te či već pe akava them primila majbut nego so mukla, a pe okova them savo avel vi večno trajo." (aiōn g165, aiōnios g166) **31** O Isus čida oko peste e dešduj apostolen taj phendas lende: "Ake das ando Jerusalim, a okote dogodila pe sa so e prorokurja ramosardine ando Sveto lil, pale mande e Čhave e manušešče. **32** Von predaina man ande vas e nevernikonenđe, save marena muj mandar, ladžarena man, vredona man, **33** bičuina man taj mudarena man, ali me o trito des uštava andar e mule." **34** A e učenikurja khanči katar godova so o Isus phendas či hačardine. O značenje godole alavengo sas lendar garado taj našti hačardine so o Isus phenelas lende. **35** A kana o Isus avilo paše dži ko gav o Jerihon, varesavo koro manuš bešelasa po drom taj prosilas. **36** A kana o koro manuš ašunda kaj načel okotar o but o them, phučlas so si godova. **37** Phendine lešče: "Načel o Isus andar o Nazaret." **38** A vo pe godova čhuta muj: "Isuse e Davidešče Čhaveja, smiluitu tut mande!" **39** A okola kaj džanas anglal o Isus ačhavenas e kore manuše te na čhol muj, ali vo još majzurale čholas muj: "E Davidešče Čhaveja, smiluitu mande!" **40** Kana o Isus ašunda les ačhilo taj phendas te anen les leste. Kana e kore manuše andine

majpaše o Isus phučla les: **41** "So kames te čerav tuče?" A vo phendas: "Gospode, te šaj dikhav." **42** A o Isus phendas lešče: "Akana šaj te dičhes! Čiro pačipe sastarda tut." **43** E kore manušešče jakha odma putajle thaj počnisarda te dičhel, uputisajlo dromesa palo Isus thaj počnisarda te slavil e Devles. A sa o them savo godova dikhla dija slava e Devlešče.

19 O Isus dijas ando Jerihon. Dok načelas kroz o gav, **2** angle leste avilo o manuš savo akhardolas Zakej. Vo sas glavno cariniko thaj sas zurale barvalo. **3** Probilas te dičhel e Isuse, ali sas zurale cikno manuš thaj našti dikhla les katar o but o them savo sas oko leste. **4** Vo zato prastaja anglal, thaj lija pe opre pe smokva paše savi o Isus trubujas te načel te šaj dičhel les. **5** Kana o Isus areslo pe godova than, dikhla opre thaj phendas lešče: "Zakej, brzo fulji tele! Ađes trubul te avav gosto ande čiro čher." **6** O Zakej brzo fuljisto tele katar e smokva thaj pherdo bah ugostisarda les ande piro čher. **7** A sa save godova dikhline počnisardine te mrmljan: "Đelo ando čher e bezechalesko!" **8** A o Zakej ačhilo thaj phendas e Gospodešče: "Gospode ake, opaš mungro barvalipe dava e čorende! Thaj ako varekas hohadem, boldav štar drom majbut." **9** Pe godova o Isus phendas lešče: "Ađes ande akava čher avilo o spasenje kaj si vi akava manuš e Avraamesko čhavo!" **10** Me o Čhavo e Manušesko avilem te rodav thaj te spasiv okova so si hasardo!" **11** O but o them sa godova ašunelas, a o Isus phendas lenđe još jek usporedba zato kaj sas o Isus paše pašo Jerusalem thaj gndinas kaj odma pojavila pe e Devlesko carstvo. **12** Thaj phendas: "Sas varesavo ugledno manuš savo trubuja te otputuil ande dur phuv te okote okrunin les sago caros, a askal te boldel pe. **13** Zato akhardas pire deš slugonon, dija len svakones po opaš kila rup so sas štar čhonendi počin thaj phendas lenđe: 'Trguin akale rupesa dok či boldav man.' **14** A e manuša andar lešči phuv mrzanas les thaj bičhaldine pale leste e poslaniko te phenen e majbare carošče: 'Či kamas te akava caruisarel pe amende.' **15** Kana vo primisarda piro carstvo thaj bolda pe palpale, naredisarda te anen lešče okolen slugen savende dijas o rup te ašunel kozom zaradisardine. **16** O prvo sluga avilo thaj phendas: 'Gospodarina, o iznos savo dijan man čerdem te avel deš drom majbut.' **17** Phendas lešče: 'But lačhe! Lačho san sluga, zato kaj sanas verno ande cikno, dava tut te vladis pe deš gaval!' **18** Aver sluga avilo thaj phendas: 'Gospodarina o iznos savo dijan man čerdem te avel pandž drom majbut.' **19** Phendas lešče: 'Lačhe! Vladi pe pandž gaval!' **20** A o trito sluga avilo bi zaradako thaj phendas: 'Gospodarina, ale

tuče čiro rup, savo dijan man. Arakhavas les garado ando dikhloro. **21** Daravas tutar kaj san strogo manuš. Les so či uložisardan, thaj žanjis so či sadisardan.' **22** Phendas lešče: 'Pe čire alava aveja osudime, bilačho slugona! Džanglan kaj sem strogo manuš, kaj lav so či uložisardem thaj kaj čidav kaj či sadisardem? **23** Sostar askal či uložisardan mungre love ande banka? Gajda barem dobisardemas e kamatenca.' **24** Pe godova o caro phendas kolende save sas okote čidine: 'Len lestar o rup thaj den okolešče saves si deš.' **25** Phendine lešče: 'Ali gospodarina, pa les već si deš kile rup!' **26** O caro phendas lenđe: 'Phenav tumende: Okoles kas si, dela pe lešče još majbut, a okoles save naj, lela pes lestar vi okova cara so si les. **27** A mungre dušmajen okolen save či kamline man te me avav caro, anen len akaring thaj mudaren len angle mande.'" **28** Nakon so phendas lenđe godova, o Isus teljarda majdur karingal o Jerusalem. **29** Kana avilo paše dži ke gava e Vitfaga thaj e Vitanija save sas pe Maslinsko gora, bičhaldina anglal pire duj učenikonon **30** thaj phendas lenđe: "Džan ando gav savo si angle tumende. Čim den ande leste, aračhena phangle terne magarco saves još khonik či jašisarda. Putren les thaj anen les. **31** Ako vareko phučel tumen: 'Sostar putren e magare?' Gajda phenen: 'Trubun e Gospodešče', thaj odma mučena len." **32** Von dele thaj arakhline e magarco sago kaj o Isus phendas lenđe. **33** Thaj dok e učenikurja putrenas e magare, e magaresko gospodari phendas lenđe: "Sostar putren e magare?" **34** A von phendine: "Trubul e Gospodešče." **35** Andine e magare ko Isus thaj čhutine pire haljine po magarco thaj o Isus bešlo pe leste. **36** Thaj dok O Isus gajda džalas po magarco, e manuša buljarenas pire ogračurja po drom angle leste te sikaven lešče čast. **37** A kana već avilo paše te fuljel katar e Maslinsko gora, e but e manuša save džanas pale leste počnisardine pe sa o glaso te zahvalin e Devlešče pale sa e čudurja save dikhline. **38** Phenenas: "Blagoslovime o Caro, savo avel ando alav e Gospodesko! Miro po nebo thaj slava e Devlešče ande visine!" **39** Pe godova varesave fariseja save sas maškar o them phenenas e Isusešče: "Učiteljina, phen čire učenikonende te na phenen godova." **40** O Isus phendas: "Phenav tumende, ako von ačhen, e bara slavina!" **41** Kana o Isus avilo paše dži ko Jerusalem thaj dikhla o gav, o Isus rujas pale manuša andar leste. **42** Thaj phendas: "Sar volisardemas te ađes arakhline sas o drom e mirosko! Ali akana si kasno, thaj o miro si garado tumendar. **43** Avena e đesa kana o dušmano zauzmila čire zidurja, okolina tut thaj čićidena tu katar sa e riga. **44** O Jeruslime, savnina tut e phuvjasa thaj vi čire čhavren ande tute. Či ačhela tutar ni bar pe bareste kaj či pindžardan e

vrjama kana o Del avilo te spasil tut." 45 Kana o Isus dijas ando Hramo, počnisarda te tradel andar leste e trgovcen. 46 Taj phendas lende: "Ando Sveto lil ramol: 'Mungro Hramo trubul te avel o čer pale molitva', a tumen pretvorisardine les ande razbojničko pečina!" 47 Pale godova o Isus svako đes sikavelas ando Hramo, a e šorvale rašaja taj e učitelja e Mojsiješće zakonestar zajedno e gavešće šorvalenca gndinas sar te mudaren les, 48 ali či arakhline o način sar te čeren godova kaj o them pažljivo čolas kan ke lesko sikavipe.

20 Jek đes dok o Isus sikavelas e theme ando Hramo taj navestilas e Bahtali nevimata, aviline leste e šorvale rašaja, e učitelja e Mojsiješće zakonestar taj vi aver e židovske starešine 2 taj phučline les: "Phen amende ko dija tut vlast te čeres godova? Ko ovlasitisarda tut pale godova?" 3 A o Isus phendas: "Vi me tumen vareso phučava: Phenen mande 4 Dali o Del phendas e Jovanošće te bolel e manušen, ili e manuša phendine lešće te čerel godova?" 5 A von počnisardine te raspravin pe maškar peste: "Te phendam katar o Del, phenela amende sostar askal či pačaine lešće? 6 A te phendam katar o manuš, sa o them čudelape barenca pe amende dok či mudaren men. Kaj o them pačal kaj sas o Jovano proroko." 7 Zato phendine e Isusešće kaj či džanen kastar avilo e Jovanesko autoriteto te bolel. 8 A o Isus phendas lende: "Askal ni me či phenava tumende katar man vlast!" 9 Pale godova o Isus phendas e themešće akaja usporedba: "Varesavo manuš zasadisardas o vinograd taj iznajmisarda les e vinogradarende. A askal otputuisarda pe lungo vrjama. 10 Kana avili e vrjama pale berba, bičhaldas pire slugo ke vinogradarja te den les katar o plodo e drakako. Ali e vinogradarja mardine les taj bičhaldine les palpale čuče vastenca. 11 Pe godova vo bičhaldalende aver slugo. Ali von vi godole mardine, mardine muj lestar taj bičhaldine le palpale čuče vastenca. 12 Bičhaldas lende vi e trito. A von vi les izranisardine taj tradine les. 13 Pe godova o gospodari e vinogradesko phendas: 'So te čerav? Bičhalava lende mungre voljeno čaves. Les valda poštuina kaj si mungro čavo.' 14 Ali kana e vinogradarja dikhline e čaves, počnisardine te čeren svato maškar pende: 'Akava si o nasledniko. Ajde te mudaras les taj o nasledstvo avela amaro.' 15 Tradine les avri andar o vinogrado taj mudardine les. So gndin so čerela lenca o gospodari e vinogradesko kana ašunela so sas? 16 Avela taj mudarela godole vinogradaren, a o vinograd dela aver vinogradarende ando najam." A okola save ašunenas e Isuse phendine: "Amen vareso gajda nikad či čerdamas!" 17

A o Isus lačhe dikhla pe lende taj phendas: "A so askal značil okova odlomko savo ramol ando Sveto lil: 'O bar saves čudine e graditeljurja postanisardas o bar zaglavno?' 18 Te ko god perel pe godova bar phađela pes, a godova bar smrskola okoles pe kaste perel." 19 E učitelja e Mojsiješće zakonestar taj e šorvale rašaja kamline odma te astaren les kaj lačhe džangline kaj godoja usporedba odnosil pes pe lende, ali daranas katar o them. 20 Katar askal počnisardine te vrebil les taj bičhaldine e špijunen save čerenas pe kaj si iskrene te šaj optužin e Isuse kaj phendas vareso bilačhe taj te predain les e rimske upravitelješće. 21 Taj phučline e Isuse: "Učiteljina! Džanas kaj phenes čačipe taj sikaves ispravno, taj či dičhes ko si ko, nego čače sikaves e Devlesko drom. 22 Phen amende dali trubul te amen e Židovurja das e carošće o porez ili te či das?" 23 A o Isus dikhla kaj kamen te astaren les ande zamka taj phendas lende: 24 "Sikaven mande e kovanica savjava počinen o porez. Kasko si akava liko taj o alav pe late?" A von phendine: "E carošći." 25 "Askal den e carošće so si e carosko, a e Devlešće so si e Devlesko." 26 Gajda našti arakhline doš ande okova so o Isus phendas anglo them, nego ačihline zadivime lešće naukava taj ačihline bi alavesko. 27 Askal aviline leste varesave saduceja, save phenen kaj naj uštipe andar e mule. Taj phučline e Isuse: 28 "Učiteljina, o Mojsije ramosarda amende te mulo varekasko phral saves sas romnji, a nas les čavra, neka lesko phral lel lešće romnja sar voj bijandas lešće čavo savo nasledila e imovina okolešći savo mulo taj te indarel lesko prezime. 29 Gajda sas ehta phral. Prvo phral oženisajlo taj mulo, a nas les čavra. 30 Aver phral oženisajlo lešće romnjasa ali vi vo mulo, 31 askal o trito taj gajda vi sa ehta muline, a či mukline čavra. 32 Po krajo muli vi e romnji. 33 Kašći romnji askal voj avela kana e manuša uštena andar e mule kana sas romnji sa ehta phralendi?" 34 O Isus phendas lende: "E manuša akale themešće udajina pe taj ženina pe. (aiōn g165) 35 Ali okolen saven o Del dičhel kaj si dostojne te ušten andar e mule taj trajina ande okova them savo avela, či ženina pe niti udajina pe. (aiōn g165) 36 Von majbut našti ni merena, kaj avena slične sar e andelurja. Von si čave e Devlešće kaj vo bolda len palpale andar e mule. 37 A kaj e mule uštena, godova čak vi o Mojsije potvrdisarda ando odlomko po than kaj phabolas o grmo kaj e Gospode akhardas e Avraamešće Devleja, e Isakošće Devleja taj e Jakovešće Devleja dumut nakon so von muline. 38 A o Del naj Del e mulengo nego o Del e džudengo, kaj si savora ande leste džude." 39 Pe godova phendine lešće varesave učitelja e Mojsiješće zakonestar: "Učiteljina! Lačhe

phendan!" 40 Taj khonik majbut či usudisajlo te vareso phučel les. 41 Askal o Isus phučla len: "Sostar phenel pe kaj si o Hristo samo potomko e carosko Davidesko? 42 Pa korkoro o David phenel ande knjige psalmurja: 'Phenel o Gospod mungre Gospodešče: Beš pe mungri počasno desno rig 43 dok či čhav čire dušmajen tale čire pungre.' 44 Korkoro o David akhardas les pire Gospodeja. Sar askal avilosas samo lesko potomko?" 45 Askal anglo sa o them, o Isus phendas pire učenikonende: 46 "Len tumen sama katar e učitelja e Mojsiješče zakonestar, save volin te phiraven pe ande lundže haljine, volin te e manuša pozdravin len pe javne thana, taj te bešen pe prve thana ande sinagoge, taj e počelja pe gozbe. 47 Bi lađzavesko len katar e udovice okova so silen taj hohamne molin pe dugo e Devlešče. Von avena majstrogo osudime."

21 O Isus ando Hramo dikhla e barvalen sar čhon ande riznica love sago daro e Devlešče. 2 A dikhla vi varesošče čore udovica savi čhuta okote samo duj majcikne kovanice. 3 Taj phendas: "Čače, phenav tumende akaja čori udovice čhuta majbut savorendar. 4 Kaj savora von dine katar piro viško, a voj katar piro čoripe dijas sa so sila." 5 Dok varesave učenikurja čerenas svato pale godova sar si o Hramo šukar ukrasime e barenca taj e ukrasenca save e manuša andine e Devlešče, a o Isus phendas: 6 "Avela e vrjama kana katar akava so dičen či ačela ni bar pe bareste. Svako avela harado." 7 E učenikurja phučline les: "Učiteljina, a kana godova avela? Taj sar džanasa kaj godova uskoro avela?" 8 A vo phendas lende: "Len sama te na aven hohade kaj but džene avena ande mungro alav taj phenena korkoro pale peste kaj si von o Mesija taj phenena: 'avili e vrjama'. Na džan pale lende! 9 Kana ašunena pale raturja taj pale pobune, na daran. Kaj sa godova trubul te avel, ali godova još naj odma o krajo." 10 Askal još phendas lende: "O them borila pe protiv aver them, taj e carurja protiv aver carurja. 11 Pe sa e riga e themešče avena e potresurja, bokhalipe taj nasvalipe. Po nebo avena čudesne znakurja savendar dela e dar pe sa o them. 12 Ali, majsigo nego godova sa avel astarena tumen taj progonina tumen. Zbog mande predaina tumen e manušende ande sinagoge te sudin tumende. Inđarena tumen angle carurja taj angle upravitelja zato kaj sledin man. 13 Godova avela tumari prilika te den svedočanstvo. 14 Zato zapamtin na majjangel te gndin so phenena ande tumari obrana! 15 Me dava tumen alava taj kasavi mudrost savjače našti proturečila niti te odupril pe ni jek tumaro protivniko. 16 A izdaina tumen čak vi tumare dada, deja, phrala, drugarja taj tumari familija.

Varesaven tumendar vi mudarena. 17 Savora mirzana tumen zato kaj sledin man. 18 Ali či perela ni jek bal katar tumaro šoro. 19 Tumare duše spasina pe zbog godova, ako či odustanin." 20 O Isus nastavisarda te phenel lende: "A kana dičena kaj e vojska opkolisardas o Jerusalem, askal džanen kaj avili paše e vrjama kaj avela opustošime. 21 Askal okola save si ande Judeja neka našen ande gore taj save si ando gav neka inklijen andar leste, a ni o okola save si ando polje neka či bolden pe ando gav. 22 Kaj ande godola đesa avela e Devlešči kazna te pherdol sa so ramol ando Sveto lil. 23 Teško e khamne manušnjende taj okolende save den čuči e čhavren ande godola đesa! Kaj avena e bare nevolje pe phuv, taj e Devlesko gnjevo pe akala manuša. 24 Avena mudarde katar o oštro mačo, taj avena inđarde ando robstvo pe sasto them. A o Jerusalem uštavena okola save či džanen palo Del dok či isteknil e vrjama okolendi save či džanen palo Del." 25 O Isus phendas: "Pojavina pe e znakurja po kham taj po čhonut taj pe čereja. A e theme pe phuv astarela o očaj zbog e huka taj e talasurja andar o more. 26 O them merela e daratar taj katar godova kaj ažučarena so avela pe akava them, kaj vi e nebeske sile avena uzdrumome. 27 Askal dičena man, e Čhave e Manušešče, sar avav pe nebeske oblakurja e silava taj e bare slavava. 28 Kana počnila sa godova te avel, užten taj vazden tumare šore kaj o Del uskoro oslobodila tumen." 29 Pale godova o Isus phendas lende e usporedba: "Dičen e smokva ili bilo savo aver kaš. 30 Kana dičen kaj mučen e patrja, korkoro već džanen kaj paše si o milaj. 31 Gajda vi tumen kana dičen sa akala dogadžaja, džanen kaj si paše o carstvo e Devlesko. 32 Čače, phenav tumende, kaj akava naraštaj sigurno či načela dok sa akava či avel. 33 O nebo taj e phuv načena, ali mungre alava či načena nikad." 34 O Isus phendas lende: "Len sama te či zuravol tumaro ilo ando handžvali pe palo habe taj ando matipe ili ande traošče brige taj te či iznenadil tumen godova đes, 35 savo avela sago zamka, pe sa e manuša save trajin pe sasti phuv. 36 Zato stražarin taj molin tumen e Devlešče te šaj načnen sa akava so trubul te avel taj te ačhen sago pobednikurja angle mande, anglo Čhavo e Manušeško." 37 O Isus svako đes sikavelas ando Hramo, a račava inklijelas taj račarelas pe Maslinsko gora. 38 A sa o them već katar e rano detharin avenas leste ando Hramo te ašunen les.

22 Avili paše e Pasha savi sas prvo đes katar o prazniko e bi kvascošče mangrengo. 2 E šorvale rašaja taj e učitelja e Mojsiješče zakonestar rodenas sar te mudaren e Isuse. Ali daranas katar o them. 3 Askal o beng dijas ando Juda andar o gav Iskariot, jek katar e dešuduj e Isusešče

apostolurja. 4 Vo delo thaj dogovorisaſajo e ſorvale raſajenca thaj e Hramske straſarenca sar te predail lende e Isuse. 5 A von, kana aſundine, raduisajle thaj obećisardine kaj dena les love. 6 O Juda pristanisardas thaj katar askal poćnisarda te rodel laćhi vrjama te izdail e Isuse lende, a te na dićhel o them. 7 Kana avilo o prvo đes katar o prazniko e bikvascoſće mangrengo, ande savo trubujasas te ſſrtvujil pe o bakhro palo prazniko e pasha, 8 o Isus bićhald a Petre thaj e Jovano thaj phendas lende: "Hajde dſan thaj pripremin amende te has e pasha." 9 A e ućenikurja phućline les: "Kaj kames te pripremis lat?" 10 A vo phendas lende: "Ake, ćim den ando gav malavela tumen o manuſ savo indarel paj ando ćupo. Teljaren pale leste ando ćher savo vo del 11 thaj roden e domaćine ande godova ćher thaj phenen leſće: 'O ućitelj phućel ande savi soba ſaj hal e pashalno većera pire ućenikonenca?' 12 Vo sikavela tumende e bari soba po sprato. Okote pripremin." 13 E ućenikurja đele ando gav thaj arakhline sa sar o Isus phendas lende thaj okote pripremisardine e pashalno većera. 14 Kana avili e vrjama pale većera, o Isus lija than pale sinija e apostolenca. 15 Askal phendas lende: "Saste ileja ćeznisardem te hava tumenca akaja pashalno većera majsigo nego so aven mungre muke. 16 Kaj phenav tumende, ći majbut hava e pashalno većera dok ći pherdol laći svrha ande Devlesko carstvo." 17 Lijas o tahtaj e molasa, zahvalisarda e Devleſće thaj phendas: "Len thaj razdelin maſkar tumende. 18 Kaj, phenav tumende: ći majbut pijava mol sa dſi ke okova đes kana pijava tumenca nevi mol ando carstvo mungre Dadesko." 19 Askal o Isus lija o mangro, zahvalisarda e Devleſće pale leste, phagla les thaj dija pire ućenikonende thaj phendas: "Akava si mungro telo savo del pe pale tumende. Akava ćeren mande po spomen." 20 Gajda lija vo o tahtaj posle e većera thaj phendas: "Akava tahtaj si Nevo savez ande mungro rat, savo ćhordol pale tumende." 21 "Ali ake, mungro izdajniko beſel manca pale sinija. 22 Me o Čhavo e Manuſesko, moraſ te merav sar si odredime, ali jao okoleſće savo izdaila man!" 23 A e ućenikurja pe godova poćnisardine te phućen pe ko maſkar lende ſaj avilosas godova. 24 Askal e ućenikurja poćnisardine te prepirin pe maſkar pende ko si lendar majbaro. 25 A o Isus phendas lende: "E carurja akale themeſće gospodarin pe pire thema thaj okola saven si vlast pe thema kamen te o them phenel pale lende kaj si laće. 26 Ali tumen na ćeren gajda! Naprotiv, okova savo si majbaro maſkar tumende, neka avel majćikno, a o vođa sago okova kaj sluſil. 27 Kaj ko si majbaro? Okova savo beſel pale sinija ili okova savo sluſil les? Dali naj okova savo si pale sinija? A me ake sluſiv

maſkar tumende. 28 Aćhiline mande verne ande mungre kuſnje. 29 Zato dav tumen ando nasledstvo e carosko ćast kaj man dija lat mungro Dad 30 te han thaj te pijen pale mungri sinija ande mungro Carstvo thaj te beſen pe prestolja te sudin e deſuduj plemenurja e Izraeloſće." 31 A o Isus phendas: "Simone! Simone! Ake o Sotona rodel katar o Del te probil tumaro paćipe ande mande. Zato reſetila tumen sago o điv kroz o sito. 32 Ali me molisajlem pale tute te ćiro paćipe ande mande aćhel. A kana palem boldeja tu mande, ućvrſti ćire phralen." 33 O Petar phendas leſće: "Gospode, spremno sem tusa te dſav vi ande tamnica vi ando smrto." 34 A o Isus phendas leſće: "Phenav tuće Petre, aćes ni o baſno ći oglašila pes a tu trin drom hohaveja kaj ći pindſares man." 35 Thaj phendas: "Kana bićhaldem tumen po drom bi lovengo, bi trastako thaj bi sandalengo, dali failas tumende vareso?" A von phendine: "Khanći ći failas amende." 36 Ali akana phendas lende: "Kas si love, neka lel len pesa! Isto gajda vi e trasta! A kas naj maćo, neka bićinel pire gada thaj nek ćinel peſće maćo. 37 Kaj phenav tumende, moraſ te pherdol pe mande okova so si ramome ando Sveto lil: 'Ubrojime si maſkar e zloćinurja.' kaj sa so e prorokurja ramosardine pale mande pherdola pe." 38 Von phendine leſće: "Gospode, ake akate si amen duj maćurja!" A o Isus phendas lende: "Dosta si!" 39 Askal inklijſto okotar thaj po obićaj uputisaſajo pe maslinsko gora. Pale leste teljardine vi leſće ućenikurja. 40 Kana areslo okote phendas lende: "Molin tumen te na peren ande kuſnja!" 41 Pale godova delo majdur lendar kozom ſaj ćhudel pe o bar thaj pelo pe pire koća thaj molisaſajo: 42 "Dade! Ako kames, le mandar akava tahtaj patnje. Ali na te avel mungri nego ćiri volja!" 43 A askal sikadilo leſće o anđelo andar o nebo te ohrabil les. 44 A o Isus sa majzurala molilas pe, ande smrtno muka, a o znojo pe leste postanisardas sago kapljice e rateſće save perenas pe phuv. 45 Uſtilo katar e molitva, bolda pe ke ućenikurja thaj arakhla len sar soven, iscrpime katar e ſalost. 46 Pa phendas lende: "Sostar soven? Uſten! Molin tumen te na peren ande kuſnje!" 47 Dok o Isus joſ ćerelas svato, avilo o them thaj angle lende o Juda jek katar e deſuduj ućenikurja. Vo avilo paſe ko Isus thaj kamla te ćumidel les. 48 A o Isus phendas leſće: "Juda, zar e poljupceja kames te izdais man, e Manuſeſće Čhave?" 49 A kana e ostale ućenikurja dikhline so si, phućline: "Gospode, te napadnis len e maćesa?" 50 A jek lendar zamahnisardas e maćesa pe ſorvale raſajesko sluga thaj ćhinda lesko desno kan. 51 A o Isus phendas: "Mućen len te ćeren godova! Na oduprin tumen majbut!" Askal ćhuta o vas pe lesko kan thaj sastarda les. 52 Askal o Isus phendas e manuſende save aviline te

astaren les, e šorvale rašajende, e hramske stražarende thaj e židovske starešinende: "Sago po pobunjeniko aviline pe mande e mačonenca thaj e rovljenca! 53 Sostar či astardine man ando Hramo? Svako đes semas okote tumenca. Ali akava si tumaro časo thaj vladil e tama." 54 Astardine e Isuse thaj inđardine les ando čher e šorvale rašajesko. A o Petar dadural džalas pale leste. 55 A e stražarja maškare ande avlija astardine jag thaj bešline okolo late. A o Petar bešlo maškar lende. 56 Varesavi sluškinja dikhla les kaj bešel paše jag, oštro dikhla pe leste thaj phendas: "Vi akava sas e lesa!" 57 A o Petar hohadas: "Manušnjije pa me či pindžarav les." 58 Nedugo pale godova još vareko lija les sama thaj phendas: "Vi tu san jek lendar!" A o Petar phendas: "Naj sem, manušeja!" 59 Kana nakhlo varekaj katar jek sato, vareko aver odlučno phendas: "Vi akava sas čače lesa! Pa Galilejco sii!" 60 A o Petar phendas: "Manušeja, či džanav so phenes!" Isto časo dok još motholas, ogლისაჲო o bašno. 61 Askal o Gospod bolda pe thaj dikhla po Petar, a o Petar dija pe godi ke alava e Gosodešče, save phendas lešče: "Phenav tuče još akaja rjat majsigo nego so o bašno ašundol, trin drom hohaveja kaj či pindžares man." 62 O Petar inklijsto andar e avlija thaj zurale rujas. 63 A e čuvarja počnisardine te maren e Isuse thaj te maren muj lestar 64 Učardine lešče jakha thaj phenenas lešče: "Prorokuisar ko dija tut dabi!" 65 Thaj but aver podrugljive alava phenenas lešče. 66 A kana svanosardas o đes, čida pes o starešinstvo e themesko, e šorvale rašaja thaj e učitelja e Mojsiješče zakonestar thaj andine e Isuse anglo baro židovsko veče. 67 Von phendine lešče: "Ako san tu o Hristo, phen amende godova!" A o Isus phendas lende: "Ako phenav tumende, či pačana mande. 68 Ako phučav tumen dali sem me o Hristo, či odgovorina mande. 69 Ali katar akana me, o Čavo e Manušesko, bešava po počasno than pašo svemogučo Del." 70 Pe godova savora phendine: "Tu dakle tvrdis kaj san o Čavo e Devlesko!" Vo phendas lende: "Tumen korkoro pravo phenen! Me sem!" 71 Pe godova von phendine: "Či trubul amen majbut dokaz. Korkoro ašundam andar lesko muj!"

23 Askal sa e manuša save sas ando židovsko baro veče uštiline thaj inđardine e Isuse ko Pilato savo sas rimsko upravitelj 2 thaj optužisardine les: "Astardam les sar zavodil e theme thaj phenel lende te na počinen o porez e carošče, a pale peste phenel kaj si vo o Hristo, amaro caro." 3 O Pilato phučla les: "Dali san tu o caro e Židovengo?" A o Isus phendas lešče: "Gajda si sago kaj tu phenes!" 4 Askal o Pilato phendas e šorvale rašajende thaj e themešče: "Nisošči

doš či arakhav pe akava manuši!" 5 Ali von počnisardine još majbut te navalin: "Bunil e theme pire naukava ande sasti phuv e židovendi. Počnisarda ande regija e galilejači thaj avilo sa dži akaring ando Jerusolim!" 6 Kana godova ašundas o Pilato, phučla len, dali si godova manuš galilejco. 7 Kana potvrdisardine godova, o Pilato bičhaldas e Isuse ko Irod, savo vladilas ande galilejači regija. A o Irod baš askal arakhadilo ando Jerusolim. 8 A kana o Irod dikhla e Isuse, zurale raduisajlo kaj dumut već lija te dičhel les zbog okova kaj ašundas pale leste thaj nadisajlo kaj lestar dičhela varesosko čudo. 9 Thaj but phučlas e Isuse, ali vo khanči či phendas lešče. 10 A e šorvale rašaja thaj e učitelja e Mojsiješče zakonestar ačenas thaj žestoko prnas les. 11 O Irod zajedno pire vojnikonenca marda muj lestar. Dijas pe leste e carske haljine thaj bičhaldala le palpale ko Pilato. 12 Godova đes o Irod thaj o Pilato pomirisajle kaj sas majsigo dušmaja. 13 O Pilato akhardas e šorvale rašajen, e vođen thaj e themes 14 thaj phendas lende: "Andine mande akale manušes e optužbava kaj vo vazdel e themes pe buna. Me ake phučav les angle tumende thaj či arakhlem ni jek doš pe leste pale savi prn les. 15 A či arakhla e doš pe leste, ni o Irod thaj zato bičhaldala les palpale amende. Ake, vo či čerda khanči sova zaslužisardas smrto. 16 Zato dava naredba te bičuin les thaj askal mukava les." 17 [A svako brš kana sas o prazniko Pasha, mučenias lende po ječe phangles] 18 A sa o them ande jek glaso čhuta muj alavenca: "Mudar les a muk amende e Varava!" 19 (O Varava sas ande tamnica kaj mudardas, thaj kaj vazdas e buna ando Jerusolim.) 20 O Pilato probisarda te odgovoril len kaj kamelas te mučel e Isuse. 21 Ali o them čholas muj: "Razapnisar les! Razapnisar les!" 22 Phučla len o Pilato trin drom: "Ali savo zločino vo čerda? Me khanči či arakhav pe leste sova zaslužisardas smrto. Zato dava te bičuin les thaj mukava les." 23 A o them čholas muj thaj navalinas te razapnin e Isuse. Thaj čhonas muj sa majzurale thaj majzurale. 24 O Pilato presudisarda te udovoljil lende. 25 Thaj mukla o kole savo sas čhudino ando phanglipe zbog e pobuna thaj zbog o mudaripe, a e Isuse dijas ande vojnikonende vas te čeren lesa okova so o them kamlas. 26 Dok inđarenas e Isuse, astardine varesave Simone andar o gav e Kirinija, savo boldelas pe andar o polje thaj čhutine pe leste o trušul te inđarel palo o Isus. 27 Palo Isus džalas o but them thaj e manušnja save rovenas thaj kukinas pale leste. 28 O Isus bolda pe lende thaj phendas lende: "Manušnjalen andar o Jerusolim, na roven pe mande, nego roven pe tumende thaj pe tumare čhavra. 29 Kaj ake aven e desa kana phenela pe: 'Blago e nerotkinjende, blago e diješče savo či bijanda thaj blago e

čučenđe save či pravardine.' 30 Askal e manuša molina e gore te peren pe lende thaj e bregonen te učaren len. 31 Kaj ako gajda čerel pe e zelene kaštenca, so tek avela e šuće kaštenca?" 32 E Isuseja po mudaripe inđarenas vi aver duj zločinconen. 33 Kana aviline po than savo akhardolas Lubanja, okote razapnisardine e Isuse, a paše leste vi godole zločinconen, ječe pe lešči desno rig, a avre pe lešči levo rig. 34 A o Isus phenelas: "Jartosar lende, Dade Devla, kaj či džanen so čereni!" Pale godova e vojnukurja čhudine e kocka thaj gajda podelisardine maškar peste lešče drže. 35 O them ačhelas okote thaj dičhelas, a e verske vođe marenas lestar muj e alavenca: "Averen spasisardas, neka akana spasisarel korkoro pes ako si vo čače o Hristo e Devlesko izabraniko!" 36 Vi e vojnukurja marenas muj lestar, avenas paše leste thaj nudinas les e mol savi sas hamime e šuteja 37 thaj phenenas: "Ako san tu o caro e židovengo, spasi korkoro tut!" 38 A opral lesko šoro čhutine vi natpis pe savo ramolas: "Akava si o caro e židovengo." 39 Jek katar o razapnime zločinco vředolas e Isuse thaj phenelas: "Naj san li tu o Hristo? Pa spasi tut thaj vi amen!" 40 Askal aver phendas: "Zar či daras e Devlestar? Trpis isto kazna sago vi vo? 41 Ali pravedno si te amen trpis kaj primisardam so zaslužisardam amare trajosa, a akava manuš khañči bilače či čerda." 42 Askal phendas: "Isuse, kana počnija te vladis sago caro, de tut gođi pe mande thaj av mande milostivo." 43 A o Isus phendas lešče: "Čače phenav tuće: ađes aveja manca ando rajo!" 44 Kana već avilo o mismeri, pe sasti phuv nastanisarda o tunjariko thaj sas dži ke o trito sato mismere, 45 kaj o kham pomračisajlo, a e firanglje ando Hramo pharadile pe opaš. 46 A o Isus još jekhvar čhuta muj andar sasto glaso: "Dade Devla, ande čire vas predaiv mungro duho!" Godova phendas, thaj izdahnisarda. 47 Kana o rimsko stotniko dikhla so dogodisajlo, ačhilo te slavil e Devle thaj phendas: "Akava manuš sas čače pravedniko!" 48 Nakon godova sa o them savo čida pes te dičel godova prizor dikhline so sas, boldenas pe čere thaj marenas pe katar e tuga ando kolin. 49 Majdur ačhenas sa okola kaj pindžarenas e Isuse thaj e manušnja save džanas pale leste andar e Galileja thaj promatrinas. 50 Sas varesavo manuš savo akhardolas Josif. Vo sas versko večniko. Thaj sas lačo thaj pravedno manuš 51 andar e Arimateja, gav savo si ande Judeja. Vo či složisajlo e odlukava thaj e postupkosa so čerdine e Isusešče, nego ažučarelas te avel e Devlesko carstvo. 52 Vo delo ko Pilato thaj rodas lestar e Isusesko telo. 53 Pale godova fuljardine les katar o trušul, pačardine les ando pohtan thaj čhutine les ando isklesime limori ande savo još khonik nas čhutino. 54 Godova sas đes kana o

them pripremilas pe palo savato, savo uskoro započnila. 55 A godova sa pratinas e manušnja save aviline e Isuseja andar e Galileja. Thaj dičenas sar čhonas e Isusesko telo ando limori. 56 Pale godova boldine pe čere te pripremin e miomirisurja thaj o pomast savo koristilas pe palo prahope. A kana godova završisardine, već sas o savato pa sasto đes našti khañči čerdine kaj poštuinas e odredba andar o zakon.

24 Prvo đes ando kurko, detharinako rano, e manušnja aviline po limori e miomirisenca save von korkoro čerdine. 2 A kana aresline dži ko limori arakhline o bar spidino katar o limori. 3 Dine andre, ali či arakhline o telo e Gospode Isusesko. 4 Thaj dok ačhenas gajda zbunime, angle lende pojavisajle duj manuša ande blistavo parne haljine. 5 E manušnja darajle thaj poklonisajle e mujesa dži ke phuv, a e duj manuša phendine lende: "Sostar roden e džude maškar e mule? 6 Naj akate, nego uštilo andar e mule! Den tumen gođi sar phendas tumende dok još sas ande Galileja: 7 'Me o Čhavo e Manušesko moraš te avava dino ande vas e bezehalende thaj razapnina man, ali me o trito đes uštava andar e mule.'" 8 Askal e manušnja dine pe gođi kaj o Isus phendas godova. 9 Thaj boldine pe katar o limori thaj sa godova javisardine e dešujek apostolende thaj savorende averende. 10 A godola manušnja sas e Marija andar e Magdala, e Jovana, e Marija dej e Jakovešči, thaj još varesošče manušnja. Von sa godova so sas phendine e apostolende. 11 A e apostolende sa gadava činisajlo sago kaj umislisardine, thaj či pačaine e manušnjende. 12 A o Petar ipak, uštilo thaj prastaja karingal o limori. Kana areslo, provirisarda andre thaj dikhla andre o pohtan katar o lano sar pašljol ando limori. Pale godova bolda pes čere ando čudo savo dogodisajlo. 13 Godova đes e Isusešče duj sledbenikurja putuinas ando gav savo akhardolas Emaus, savo sas majdur katar o Jerusalim dešujek kilometrja. 14 Dromesa čerenas svato maškar pende pale sa so sas. 15 Thaj dok gajda čerenas svato thaj raspravinas, avilo dži lende o Isus thaj džalas lenca. 16 Ali nas dino lende jakhende te pindžaren les. 17 O Isus phučla len: "So godova raspravin dromesa?" Von ačhiline phađe katar e tuga. 18 Jek lendar, savo akhardolas Kleopa, phendas lešče: "Zar san tu jedino stranco ando Jerusalim savo či džanel so sas ando Jerusalim akala đesa?" 19 A o Isus phučla: "So sas godova?" A von phendine lešče: "Pa okova so dogodisajlo e Isuseja andar o Nazaret. Vo sas proroko, silno pe dela thaj ande alava anglo Del thaj angle sa o them: 20 Ali amare šorvale rašaja thaj e vladarja predaisardine les te avel osudime po smrto thaj te razapnin les. 21 A amen nadisajlam kaj

si vo okova savo izbavila o Izrael osim godova, akava si več trito đes sar gadava dogodisajlo. **22** A još vi varesave manušnja, save sas maškar amende, zbunisardine men: čim svanosardas đele po limori, **23** ali okote či arakhline lesko telo pa aviline thaj phendine amende kaj sikadile lenđe e anđelurja thaj phendine lenđe kaj si o Isus džudo. **24** Varesave amarendar prastajine po limori thaj arakhline sa sar e manušnja phendine, ali les či dikhline." **25** A o Isus pe godova phendas lenđe: "O sar sen nerazumne, nisar te paćan ande okova so phendine e prorokurja! **26** Dali či von prorokuisardine kaj o Hristo sa godova moraš te pretrpila majsigo nego so o Del proslavila les?" **27** Askal o Isus započnisardas te objasnil lenđe sa so sas ramome ando Sveto lil, katar o Mojsije dži ke e prorokurja. **28** Pe godova avile paše dži ko gav ande savo džanas, a lenđe pričinisajo sago kaj o Isus kamelas te nastavil majdur o drom. **29** Ali von nagovorinas les: "Ačh amenca! Kaj već peli e rjat, a o đes načel!" Vo ačhilo thaj dijas lenca ando čher. **30** Kana o Isus lijas te hal lenca, lijas o mangro, blagoslovisarda les, phagla les thaj dija len. **31** Pe godova putajle lenđe jakha thaj pindžardine les, ali vo nestanisardas angle lenđe jakha. **32** Askal von phendine jek avrešće: "Či li phabolos amaro ilo ande amende dromesa dok čerelas amende svato, thaj dok tumaćilas amende o Sveto lil?" **33** Odma spremisajle thaj boldine pe ando Jerusalim. Okote arakhline e dešujek apostolen thaj vi averen e Isusešće sledbenikonen, **34** save phendine lenđe: "O Gospod čaće uštilo andar e mule thaj sikadilo e Simonešće!" **35** Askal von phendine sar maladine e Gospode po drom palo Emaus thaj sar pindžardine les kana phaglas o mangro. **36** Dok von čerenas svato pale godova, o Isus katar jekhvar ačhilo maškar lenđe thaj phendas lenđe: "Miro tumende!" **37** Von, zbunime thaj darade, gndisardine kaj dićhen e duho. **38** A o Isus phendas lenđe: "Sostar darajle? Sostar kasavi sumnja dija ande tumare ile? **39** Dićhen mungre vas thaj mungre pungere! Me sem gadava! Pipnin man thaj dićhena! E duho naj kokala ni mas sago kaj dićhen kaj man si!" **40** Kana godova phendas lenđe, sikada lenđe e ožiljurja pe pire vas thaj pire pungere. **41** Katar o čuđenje thaj katar e bah našti paćaine. A vo phućla len: "Si tumen vareso hamasko?" **42** Von dine les kotor peko mačo. **43** Vo lija les thaj halas anglal lenđe. **44** Askal phendas: "Pale akava phenavas tumende dok još semas tumenca: Trubul te pherel pe sa so si ande Mojsijesko zakono, ande proročke lila thaj ande psalmurja ramome pale mande." **45** Askal putardas lendi godi te haćaren o Sveto lil. **46** Thaj phendas lenđe: "Ramome si ande Svete lila: O Hristo trpila thaj merela, a o trito đes uštela andar e mule. **47** Ande lesko

alav propovedila pe sa e manušende kaj trubun te pokajin pe gajda te o Del jartol lenđe e bezeha. A počnila katar o Jerusalim. **48** Tumen sen svedokurja pale godova. **49** A me bićhalava tumende e Sveto Duho, baš sago kaj mungro Dad obećisarda. Zato aćhen ando gav dok či len pe tumende e sila opral." **50** Pale godova o Isus inđarda len paše dži ko gav Vitanija. Okote vazdas pire vas thaj blagoslovisarda len. **51** Gajda sar blagoslovisarda len, durilo lendar thaj sas lino ando nebo. **52** Von peline pe koća angle leste thaj askal bare bahtasa boldine pe ando Jerusalim. **53** Thaj svako đes ando Hramo slavinas e Devle.

Jovan

1 Ando početko sas o Alav, thaj o Alav sas ko Del. Thaj o Alav sas o Del. **2** Vo sas ando početko ko Del. **3** Kroz leste sa postanisarda thaj bi leste či postanisardas khanči so postoil. **4** Ande leste sas o trajo, thaj godova trajo sas svetlo e manušenje. **5** O svetlo svetil ande tama, thaj e tama či nadvladisarda les. **6** Pojavisajlo manuš, bičhaldo katar o Del, e alavesa Jovan. **7** Vo avilo te svedočil palo svetlost, te savora kroz leste paćan. **8** O Jovano nas svetlo, nego svedočilas palo svetlo. **9** O čačutno svetlost, savo prosvetlil svako manuše – avilo po them. **10** Sas po them, thaj o them kroz leste postanisardas, ali o them či pindžarda les. **11** Avilo ande piro them, ali lešće manuša či primisardine les. **12** A savorende save primisardine les, save paćan ande lesko alav, dijas pravo te postanin čhavra e Devlešće, **13** čhavra bijande na e prirodno dromesa, ni e telošće voljatar, ni e romešće voljatar, već bijande e Devlestar. **14** Thaj o Alav postanisardas manuš thaj avilo te trajil maškar amende. Dikhlam lešči slava, slava savi si les sago jedino bijando savo avilo katar o Dad, pherdo milost thaj čačipe. **15** O Jovano svedočil pale leste thaj čholas muj: “Akava si okova pale savo phendem tumende: Okova savo avel pale mande, majbaro si mandar, kaj postoilas majsigo mandar.” **16** Katar lešči punina savora primisardam, thaj godova milost pe milost. **17** Kaj, o Zakono si dino prekal o Mojsije, a e milost thaj o čačipe avile prekal o Isuso Hristo. **18** E Devles nikad khonik či dikhla, osim o jedino bijando Čhavo savo si vi korkoro Del. Vo si e Dadešće majpaše thaj vo sikadas amende sosko si o Del. **19** A kava si e Jovanesko svedočanstvo. E Židovurja andar o Jerusalem bičhaldine leste e rašajen thaj e Leviten te phučen les: “Ko san tu?” **20** O Jovano jasno phendas lende thaj či garadas khanči: “Me naj sem o Hristo.” **21** Askal phučline les: “Pa ko san tu askal? San tu o proroko Ilija?” Vo phendas: “Naj sem.” “San tu o proroko saves ažućaras?” Vo phendas: “Naj sem.” **22** Askal phendine lešće: “Phen amende ko san tu, te šaj phenas okolende save amen bičhaldine. So tu phenes pale tute?” **23** Vo phendas lende: “Me sem ‘o glaso savo čhol muj ande pustinja: Vorton o drom te avel spremno kana avela o Gospod!’ sago kaj prorokuisarda o proroko Isaija.” **24** A varesave katar godola manuša save sas bičhalde sas fariseja. **25** Von phučline les: “Sostar askal boles ako naj san o Hristo, ni o Ilija, ni proroko savo trubul te avel?” **26** O Jovano phendas: “Me bolav e pajesa, ali maškar tumende ačhel jek saves tumen či pindžaren. **27** Vo avel pale mande, a me naj sem dostojno e haravlje te putarav pe

lešće sandale.” **28** Godova sas ande Vitanija, katar e istočno rig e reka jordanošči, kaj o Jovano bolelas. **29** Thejara đes o Jovano dikhla e Isuse sar avel leste, thaj phendas: “Ake o Bakhro e Devlesko, savo lel e bezeha themešće! **30** Akava si okova pale savo me phendem: ‘Pale mande avel o manuš savo si majbaro mandar, kaj postoilas majsigo mandar.’ **31** Me či pindžaravas les, ali avilem te bolav e pajesa, te vo šaj objavil pe e izraelsko themešće.” **32** Askal o Jovano gajda svedočisardas: “Dikhlem e Sveto Duho sar fuljel andar o nebo sago golubo thaj ačhel pe leste. **33** Me či pindžardemas les ko si vo, ali phendas mande okova savo bičhaldam man te bolav e pajesa: ‘Pe kaste dičhes kaj o Duho fuljel thaj pe leste ačhel, godova si okova savo bolel e Sveto Duhosa.’ **34** Thaj me dikhlem thaj svedočiv kaj si akava Čhavo e Devlesko.” **35** Thejara đes o Jovano palem sas okote pire duje učenikonenca. **36** Kana dikhla e Isuse sar načhelas okotar, phendas: “Ake o Bakhro e Devlesko!” **37** Kana okola duj učenikurja ašundine so phendas, teljardine palo Isus. **38** O Isus bolda pe thaj dikhla len kaj džan pale leste, thaj phučla len: “So kamen?” Von phendine lešće: “Rabbi” (so značil – Učiteljina) “kaj trajis?” **39** Vo phendas lende: “Aven thaj dičen.” Von đeline thaj dikhline kaj trajilas thaj godova đes ačhiline leste. Sas varekaj katar e štar saturja mismere. **40** Jek katar akala duj džene save ašundine e Jovane thaj teljardine palo Isus sas o Andrija, o phral katar o Simon Petar. **41** Vo odma arakhlas pire phrales e Simone thaj phendas lešće: “Arakhlam e Mesija” (so značil – e Hristo). **42** Thaj andas e Simone ko Isus. O Isus dikhla pe leste thaj phendas: “Tu san Simon, čhavo e Jovanesko. Akhareja tu Kifa” (so značil – Petar – “baro bar”). **43** Thejara o đes o Isus odlučisarda te džal ande regija Galileja. Arakhlas e Filipe thaj phendas lešće: “Teljar pale mande.” **44** O Filip sas andar e Vitsaida, andar e Andrijasko thaj e Petresko gav. **45** O Filip arakhlas e Natanail thaj phendas lešće: “Arakhlam okoles pale savo ramolas o Mojsije ando Zakono thaj pale kaste ramonas e prorokurja. Godova si o Isus, čhavo e Josifesko, andar o gav Nazaret.” **46** O Natanail phučla: “Šaj li vareso lače te avel andar o Nazaret?” A o Filip phendas lešće: “Av thaj dik.” **47** O Isus dikhla e Natanail sar avel leste, thaj phendas pale leste: “Ake o pravo Izraelco ande savo naj hohaipeli!” **48** O Natanail phučla les: “Katar pindžares man?” A o Isus phendas lešće: “Dikhlem tut dok sanas još tale smokva, majsigo nego so o Filip akharda tut.” **49** Pe godova o Natanail phendas lešće: “Rabi, tu san Čhavo e Devlesko! Tu san o Caro e Izraelosko!” **50** O Isus phendas lešće: “Paćas andar godova kaj phendem tuće kaj dikhlem tut tale smokva! Dičheja vi majbare stvarja katar akala.”

51 Askal phendas: "Čače, čače phenav tumende: dičhena putardo o nebo thaj e Devlešče anđelen sar den ando nebo thaj fuljen po Čhavo e Manušesko."

2 O trito đes sas e svaturja ando gav Kana Galilejači.

Okote sas e Isusešči dej, 2 a pe svaturja sas akharde vi o Isus thaj lešče učenikurja. 3 Kana nas len majbut mol, e Isusešči dej phendas lešče: "Najlen majbut mol." 4 A o Isus phendas lače: "Drago manušnjije, so si man tusa? Još či avilo mungro časol!" 5 Lešči dej phendas e slugende: "Čeren sa so phenel tumende." 6 A okote sas šov bare barune ćupurja palo paj, saven e Židovurja koristinas palo obredno thoipe. Thaj ande svako lendar šaj ačhelas katar ohtovardeš dži ke šel thaj biš litre. 7 O Isus phendas e slugende: "Pheren e ćupurja e pajesal!" Thaj von pherdine len dži ko vrho. 8 Askal phendas lende: "Akana len cara thaj inđaren ko manuša savo si zadužime palo habe thaj pipe." Thaj von ćerdine gajda. 9 O manuš probisarda o paj savo postanisardas mol, ali či džanglas katar si. Godova džangline samo e sluge save line o paj. O manuš askal akhardas e džamutre 10 thaj phendas lešče: "Svako manuš prvo inkalel e majlači mol, a kana e gosturja maton, askal e majslabo mol. A tu aračhejas e lači mol sa dži akana." 11 Gajda o Isus piro prvo ćudesno znako ćerda ande Kana Galilejači thaj javno sikadas piri slava, pa lešče učenikurja paćaine ande leste. 12 Pale godova o Isus đelo pire dejava, phralenca, thaj e učenikonenca ando gav Kafarnaum, kaj ačhiline varesave đesa. 13 Paše sas o Židovsko prazniko Pasha, pa o Isus đelo ando Jerusalem. 14 Ande hramošči avlija arakhlas e trgovcen save bićinenas e guruven, bakhren thaj e golubonen. Okote arakhlas vi e menjačen sar bešen thaj menjin e love. 15 O Isus ćerda bičo katar e dori thaj trada sa e trgovcen andar o Hramo, zajedno e bakhrenca thaj e guruvenca, a e menjačende rspiardas e love thaj prevrmisardas lende sinije, 16 a okolende kaj bićinenas e golubonen phendas: "Inđaren gadava akatar thaj na ćeren pijaca katar o ćher mungre Dadesko." 17 Lešče učenikurja askal dine pe godi kaj si ramome ando Sveto lil: "Hala man e revnost pale ćiro ćher." 18 Askal varesave katar e Židovske vođe phućline les: "Save ćudesne znakova dokažija amende kaj si tu pravo te ćeres godova?" 19 A o Isus phendas lende: "Haraven akava hramo thaj me palem vazdava les pale trin đes." 20 A e Židovurja phendine: "Akava Hramo vazdelas pe štarvardeš thaj šov brš, a tu vazdeja les pale trin đes?" 21 Ali o hramo pale savo o Isus phenelas sas lesko telo. 22 Kana uskrnsisardas andar e mule, lešče učenikurja dine pe godi ke godola alava thaj paćajine ande okova so ramolas

ande Svete lila thaj ande alava save o Isus phendas. 23 Dok o Isus sas ando Jerusalem ande vrjama kana sas o prazniko Pasha, but džene paćajine ande leste kaj dikhlina e ćudesne znakurja save ćerelas. 24 Ali korkoro o Isus či paćalas lende kaj sa pindžarelas len. 25 Khonikal či trubujas te phenel lešče sošće si kaj pindžarelas e manušengo ilo.

3 Varesavo ugledno manuš, savo akhardolas Nikodem, sas fariseji thaj jek katar e vodeće manuša maškar e Židovurja. 2 Vo avilo ko Isus raćava thaj phendas lešče: "Ućiteljina, džanas kaj san tu ućitelj saves o Del bićhaldas. Kaj khonik našti ćerel kasave ćudesne znakurja save tu ćeres, a te o Del naj lesa." 3 A o Isus phendas lešče: "Čače, čače phenav tuće: ako o manuš či bijandol palem, našti dićhel e Devlesko carstvo." 4 O Nikodem phućla les: "Sar šaj o manuš te bijandol kana si već phuro? Našti valda, po dujto data te del ando di pire dejako thaj palem te bijandol?" 5 O Isus phendas lešče: "Čače, čače phenav tuće: ako o manuš či bijandol katar o paj thaj katar o Duho, našti del ande Devlesko carstvo. 6 So si bijando e manušestar – manuš si, a so si bijando e Duhostar – duho si. 7 Na ćudisar tut kaj phendem kaj trubun palem te bijandon. 8 E balval phurdel kaj kamel. Ašunes lako šumo, ali či džanes katar avel niti kaj džal. Gajda si svakonesa savo si bijando katar o Duho." 9 A o Nikodem phućla e Isuse: "Sar šaj godova te avel?" 10 O Isus phendas lešče: "Tu san poštuime ućitelj ando Izrael, a godova či džanes? 11 Čače, čače phenav tuće: phenas okova so džanas, thaj svedoćisaras pale okova so dikhlam, ali tumen či prihvatin amaro svedoćanstvo. 12 Ako či paćan mande kana phenav tumende pale stvarja save si pe phuv, sar paćana kana phenav tumende pale stvarja save si po nebo? 13 Kaj nikad khonik či đelo po nebo thaj bolda pe osim o Čhavo e Manušesko savo fuljisto katar o nebo. 14 Thaj sago kaj o Mojsije ande pustinja vazdas pe rovlji e sapes katar e bronza, gajda moraš te avel vazdino vi o Čhavo e Manušesko, 15 te svako savo paćal ande leste avel les večno trajo." (aiōnios g166) 16 Kaj, o Del gadići volilas akava them kaj dija pire jedino bijande Čhave te ko god paćal ande leste, či propadnil, nego te avel les večno trajo. (aiōnios g166) 17 Kaj o Del či bićhaldas pire Čhaves po them te sudil e themešće, nego te o them spasil pe kroz leste. 18 Ko paćal ande leste, naj osudime, a ko či paćal već si osudime, kaj či paćaja ando alav e jedino bijande Devlešće Čhavesko. 19 A pale akava sudilpe lende kaj o svetlo avilo po them, ali o them volilas e tama umesto o svetlo, kaj lende dela sas bilače. 20 Ko god ćerel bilačipe, mrzil o svetlo thaj či inkijel po svetlo, te lešče dela či inkijen po videlo. 21 A ko

čerel so si čačipe, inkjelj po svetlo te sikadon pe kaj si lešče dela čerde kroz o Del. 22 Pale godova o Isus delotar pire učenikonenca ande Judejske gava. Okote ačhilo lenca thaj bolelas. 23 A o Jovano isto bolelas ando than Enon, paše ko gav Salim, kaj okote sas but paj thaj e manuša avenas thaj bolenas pe. 24 O Jovano askal još nas čhudino ande tamnica. 25 A maškar e Jovanošče učenikurja thaj varesavo aver Židovo avilo dži ke čingara zbog o obredno thoipe. 26 Askal e učenikurja avile ko Jovano thaj phendine lešče: "Učiteljina, okova kaj sas tusa pe istočno rig katar e reka Jordan, pale savo tu svedočisardan, eke bolel e manušen thaj savora džan leste umesto amende." 27 A o Jovano phendas: "Khonik našti čerel khanči, ako godova naj lešče dino katar o Del. 28 Tumen korkoro sen mungre svedokurja kaj phendem: 'Me naj sem o Hristo, nego bičhaldio sem angle leste.' 29 Pe svaturja samo o džamutro ženil pe, a o čirvo, savo ažučarel thaj čhol kan, pherdo si bah dok ašunel e džamutresko glaso. Askal godoja bah si mungri thaj akana si potpuno. 30 Vo trubul te avel sa majbaro, a me sa majcikno." 31 Okova savo avel opral, pe savorende si; a okova savo si katar akaja phuv, pripadil e phuvjače, thaj čerel svato pale akale phuvjače stvarja. Ali okova savo avel andar o nebo, pe savorende si. 32 Vo svedočil pale okova so dikhla thaj so ašundas, ali khonik či prihvatil lesko svedočanstvo. 33 Ko prihvatil lesko svedočanstvo, potvrdil kaj si o Del čačutno. 34 Okoles saves o Del bičhaldas, e Devlešče alava mothol, kaj o Del del les Duho ando izobilje. 35 O Dad volil e Čhaves thaj sa dija ande lešče vas. 36 Ko pačal ando Čhavo, si les večno trajo, a okova savo naj pačivalo e Čhavešče, či primila večno trajo, nego pe leste ačhel e Devlešči holji. (aiōnios g166)

4 Kana o Isus saznaisarda kaj e fariseja ašundine kaj vo pridobil thaj bolel majbut učenikonen nego o Jovano 2 – vi ako korkoro o Isus či bolelas, nego lešče učenikurja – 3 delotar andar e Judeja thaj bolda pe ande Galileja. 4 Po drom karingal e Galileja moraš te nakhlas kroz e Samarija. 5 Gajda avilo ando Samarijansko gav savo akhardol Sihar, paše phuv savi o Jakov dija pire čhavešče e Josifešče. 6 Okote sas vi e Jakovešči haing. O Isus sas umorno katar o drom thaj bešlo paše haing. Godova sas varekaj katar o mismeri. 7 Kana varesavi manušnji savi sas Samarijanka avili te astarel o paj, o Isus phendas lače: "De man te pijav", 8 kaj lešče učenikurja već majsigo dele ando gav te činin hamasko. 9 E manušnji phendas lešče: "Zar tu, Židovo, mandes paj mandar savi sem Samarijanka?" E Židovurja či družinaspe e manušenca andar e Samarija. 10 Pe godova o Isus phendas lače: "Kana samo džanglanas e Devlesko

daro thaj ko si okova savo phenel tuče: 'De man te pijav', zamolisardanas man, thaj me dijemas tut paj savo del trajo." 11 A e manušnji phendas lešče: "Gospodarina! Pa tut naj čak ni sova te astares o paj, a e haing si handuk. Katar tut askal džudo paj?" 12 Dali gndis kaj san tu majbaro katar amaro prasad o Jakov, savo dija amen akaja haing thaj pilas andar late vo, lešče čhave thaj lešči stoka?" 13 A o Isus phendas lače: "Ko god pijel katar akava paj palem trušavola. 14 A ko pijela o paj savo me dava les, nikada majbut či trušavola. O paj savo me dava les postanila ande leste o izvori e pajesko savo anela lešče večno trajo." (aiōn g165, aiōnios g166) 15 A e manušnji phendas lešče: "Gospodarina, de vi man godova paj pa te ni me majbut či avav trušali thaj te naj moraš te avav akaring palo paj!" 16 O Isus phendas lače: "Dža thaj akhar čire romes, pa bolde tut akaringal." 17 A e manušnji phendas lešče: "Naj man rom". A o Isus phendas lače: "Lače phendan: 'Naj man rom.' 18 Kaj sas tut pandž roma, a okova saveja san akana naj čiro rom." 19 E manušnji phendas lešče: "Gospodarina, dikhav kaj san proroko! 20 Amare samarijanske pradada klanjinaspe e Devlešče pe akaja gora, a tumen e Židovurja phenen kaj trubul te klanjlpe lešče ando Jerusalim." 21 O Isus phendas lače: "Pača mande manušnjije, kaj avela e vrjama kana či klanjina tumen e Devlešče samo pe akaja gora ni samo ando Jerusalim. 22 Tumen e Samarijancurja či džanen kašče klanjin tumen, a amen e Židovurja džanas kašče te klanjimen kaj o spasenje avel katar e Židovurja. 23 Ali avel e vrjama thaj već si akate – kana okola save čače klanjinpe, klanjinape e Dadešče ando duho thaj ando čačipe, kaj o Dad o Del baš kasave klaniteljel kamel. 24 O Del si Duho thaj okola save klanjinpe lešče, trubun ando duho thaj ando čačipe te klanjinpe lešče." 25 E manušnji phendas: "Džanav kaj avela o Mesija, savo akhardol Hristos. Kana vo avela sa objasnila amende." 26 A o Isus phendas lače: "Godova sem me, savo čerav svato tusa." 27 Pe godova boldine pe lešče učenikurja, thaj začudisajle kaj o Isus čerel svato e manušnjasa. Ali khonik či phučla les: "So rodes latar?" ili "Sostar čeres lasa svato?" 28 Askal e manušnji mukla piro čupo, deli ando gav thaj phendas savorende: 29 "Aven te dičhen e manuše savo phendas mande sa so čerdem. Te naj li vo o Hristo?" 30 E manuša teljardine andar o gav te dičhen e Isuse. 31 Pale godoja vrjama e učenikurja molisardine e Isuse: "Učiteljina, ha vareso!" 32 A vo phendas lende: "Man si habe pale savo tumen khanči či džanen." 33 Askal e učenikurja phendine jek avrešče: "Dali vareko andas lešče vareso te hal?" 34 A o Isus phendas lende: "Mungro habe si te čerav e volja okolešči savo bičhaldia man thaj te završiv o zadatko savo

poverisarda mande. 35 Zar tumen či phenen: 'Još štar čhon thaj ake e žetva?' A me phenav tumende: putren e jakha thaj dičen kaj si e manuša sago e njive! Već si paće pale žetva. 36 Okova savo čidel o điv već primil e počin thaj čidel o plodo, a o plodo si e manuša save dobina večno trajo, te o sejači thaj vi okova savo čidel o điv zajedno radujin pe. (aiōnios g166) 37 Čači si e izreka savi phenel: 'Jek sijol, a o dujto čidel o plodo.' 38 Me bičhaldem tumen te čiden okova oko soste tumen či trudasajle. Aver trudasajle, a tumen čidine e plodurja lende trudosko." 39 E but Samarijancurja andar godova gav paćajine ando Isus zbog e alava e manušnjače savi svedočisarda: "Phendas mande sa so ćerdem." 40 Kana e manuša andar e Samarija aviline leste, zamolisardine les te ačhel lende. Thaj okote ačhilo duj đes. 41 Askal još majbut paćaine lešće zbog lešće alava. 42 A e manušnjače phendine: "Akana pačas kaj vi korkoro ašundam les sar ćerel svato, a na zbog o okova so tu phendan amende. Džanas kaj si vo čaće Spasitelj e themesko." 43 Pale duj đes, o Isus đelotar lendar thaj zaputisajlo ande Galileja. 44 O Isus već majsigo svedočilas pale godova kaj e proroko či poštuin ande ando than kaj bajrilo. 45 Kana areslo ande Galileja, e manuša andar e Galileja šukar primisardine les, ali samo zato kaj dikhlina sa e čdurja save ćerda ando Jerusalem pale vrjama kana sas o prazniko Pasha, kaj vi von sas okote. 46 O Isus palem đelo ando gav Kana ande regija e Galilejači, kaj pretvorisardas o paj ande mol. A cara majdur ando gav Kafarnaum sas jek caresko službeniko savesko čhavo pašljolas nasvalo. 47 Kana ašundas kaj o Isus avilo andar e Judeja ande Galileja, avilo dži leste thaj zamolisarda les te džal ando Kafarnaum thaj sastarel lešće čhaves, kaj si po meripe. 48 A o Isus phendas lešće: "Kasave sen tumen e manuša! Dok či dičen e znakurja thaj e čdurja, či paćan." 49 E caresko službeniko phendas lešće: "Gospode, moliv tut, av majsigo nego so mungro čhavo merel!" 50 O Isus phendas lešće: "Dža čhere, čiro čhavo trajila." O manuš paćaja ande okova so o Isus phendas lešće thaj đelotar. 51 Dok sas još po drom, angle leste aviline lešće sluge thaj phendine lešće: "Čiro čhavo si džudo thaj sasto." 52 Vo phučla len kana lešće čhavešće teljardas te avel majlače, a von phendine lešće: "E groznica mukla les araci varekaj katar jek sato mismere." 53 E čhavesko dad dija pe gođi kaj baš ande godoja vrjama o Isus phendas lešće: "Čiro čhavo avela džudo thaj sasto." Thaj askal paćaja ando Isus – vo thaj vi savora save trajinas lesa ando čer. 54 Godova sas dujto čudesno znako savo o Isus ćerda sar avilo andar e Judeja ande Galileja.

5 Posle akava, o Isus đelo opre ando Jerusalem po židovsko prazniko. 2 Ando Jerusalem, ke Bakhрани kapija, sas bazeno savo pe židovsko čhib akhardolas Vitezda. Okote sas pandž terase. 3 Tale godola terase pašljonas but nasvale manuša: kore, bande thaj paralizime. [Ažućarenas te o paj zatalasil pe, 4 kaj o anđelo e Gospodesko, fuljelas ando bazeno ande određeno vrjama thaj talasilas o paj. O prvo manuš savo nakon godova dija sas ando paj sastilosas katar bilo savo nasvalipe.] 5 A sas okote jek manuš savo sas bango trijanda thaj ohto brš. 6 Kana o Isus dikhla les sar pašljol thaj džanelas kaj već lungu vrjama si nasvalo, phučla les: "Kames te aves sasto?" 7 O nasvalo phendas lešće: "Gospode, naj man khonik te mućel man ando bazeno kana o paj lel te talasilpe. Dok me avav dži inća, vareko aver del andre majsigo mandar." 8 O Isus phendas lešće: "Ušti, le čiri nosilja thaj phir!" 9 O manuš odma sastilo, lijas piri nosilja thaj ačhilo te phirel. A godova đes sas o savato. 10 Pa e židovske vođe phendine e sastile manušešće: "Ađes si o savato, thaj naj tuće muklo te inđares čiri nosilja!" 11 Vo phendas lende: "Okova savo sastarda man phendas mande: 'Le čiri nosilja thaj phir!'" 12 A von phućline les: "Ko si o manuš savo phendas tuće: 'Le čiri nosilja thaj phir!'" 13 O sastilo manuš či džanglas ko sas godova kaj sastarda les, kaj o Isus hasajlo lestar maškar o but o them savo sas pe godova than. 14 Majkasnije o Isus arakhlas e sastile manušes ande hramošći avlija thaj phendas lešće: "Ake, sastilan. Na ćer majbut bezeh, te na avel tuće vareso još majgore." 15 Askal o manuš đelotar thaj mothodas e Židovske vođenđe kaj si o Isus okova savo sastarda les. 16 Andar godova kaj ćerda gajda vareso ando savato, e Židovske vođe počnisardine te progonin e Isuse. 17 A o Isus phendas lende: "Mungro Dad stalno ćerel bući, gajda vi me slediv lesko primer." 18 Andar godova e Židovske vođe još majbut kamenas te mudaren les, kaj či prekršisardas samo o zakon ando savato nego vi e Devles akhardas pire Dadesa thaj gajda ćerelas pe kaj si jednako e Devlesa. 19 A o Isus phendas lende: "Čaće, čaće phenav tumende: O Čhavo korkoro pestar našti ćerel khanči; vo ćerel samo okova so dikhla kaj o Dad ćerel. So o Dad ćerel godova isto ćerel vi o Čhavo. 20 Kaj o Dad volil e Čhaves thaj sikavel lešće sa so ćerel. A sikavela lešće vi majbare dela katar akala thaj čudina tumen. 21 Kaj, sago kaj o Dad vazdel e mulen thaj del len trajo, gajda vi o Čhavo del trajo kašće vo kamel. 22 Kaj o Dad či sudil khonikašće, nego dijas e Čhave pravo te sudil svakonešće, 23 te savora poštuin e Čhaves sago kaj poštuin e Dade. Ko či poštuil e Čhave, či poštuil ni e Dade, savo bičhaldala les. 24 Čaće, čaće phenav tumende, svako savo ašunel mungre alava thaj

pačal okolešče savo bičalda man, si les večno trajo, thaj či avela osudime, nego več nakhla andar o smrto ando trajo. (aiōnios g166) 25 Čače, čače phenav tumende: avel o časo thaj več avilo, kana e mule ašunena o glaso e Devlešče Čhavesko, thaj save ašunen les, godola trajina. 26 Sago kaj e Dade si trajo ande peste, gajda vi e Čhavesče dijas te ave les trajo ande peste. 27 Thaj dija les vlast te sudil, kaj si vo o Čhavo e Manušesko. 28 Na čudin tumen godolešče. Kaj, avel e vrjama kana sa e mule ande limorja ašunena o glaso e Devlešče Čhavesko, 29 thaj inkljena andar pire limorja. Okola save čerenas lačhipe, uštena thaj primina večno trajo, a okola save čerenas bilačhipe uštena thaj primina osuda. 30 Me korkoro mandar našti čerav khanči, me sudiv gajda sar ašunav katar o Dad. Mungro sudo si pravedno kaj či rodav te čerav mungri volja, nego e volja okolešči savo bičalda man.” 31 “Ako me svedočiv korkoro pale mande, mungro svedočanstvo naj dovoljno. 32 Vareko aver svedočil pale mande thaj me džanav kaj okova so vo svedočil pale mande si dovoljno. 33 Tumen bičaldine e manušen ko Jovano savo bolelas, a vo svedočisardas tumende o čačipe. 34 Mande či trubul svedočanstvo e manušestar, nego mothav tumende akava palo Jovano te spasin tumen. 35 O Jovano sas svetiljka savi phabolas thaj svetilas, a tumen kamline pe harni vrjama te uživin ande lesko svetlo. 36 Ali man si svedočanstvo pale mande majbaro katar e Jovanesko: e dela save čerav. O Dad dija man te čerav len thaj von svedočin pale godova kaj o Dad bičalda man. 37 Thaj vi o Dad savo bičalda man svedočil pale mande. Lesko glaso nikad či ašundine, niti dikhline lesko liko. 38 Lesko alav naj ande tumende kaj či pačan okolešče saves vo bičalda. 39 Tumen sičon e Svete lila, kaj gndin kaj kroz lende si tumen večno trajo, a godola lila svedočin pale mande. (aiōnios g166) 40 A tumen ipak či kamen te aven mande te avel tumen večno trajo. 41 Me či prihativ slava e manušendar. 42 Ali pindžarav tumen thaj džanav kaj naj tumen ande tumende e Devlešči ljubav. 43 Me avilem ando alav mungre Dadesko, ali tumen či prihativin man. Ako vareko avel ande piro alav, les prihativin. 44 Sar pačana kana prihativin slava jek avrestar, a či roden slava e jedino Devlestar? 45 Na gndin kaj me prva tumen anglo Dad. Tumen prl o Mojsije, ande savo uzdin tumen. 46 Kaj te pačainesas e Mojsijašče, pačainesas vi mande, kaj vo pale mande ramolas. 47 A pošto či pačan ande okova so vo ramosarda, sar pačana ande mungre alava?”

6 Pale godova o Isus bolda pe ande Galileja pa delo pe istočno rig katar o Galilejsko jezero, (savo akhardol vi

Tiverijadsko jezero). 2 A pale leste teljardas o silno o them, kaj dikhline e čudesne znakurja save čerda kana sastardas e nasvalen. 3 A o Isus lijapes opre pe gora thaj okote bešlo pire učenikonenca. 4 A avelas paše e Pasha o židovsko prazniko. 5 Kana o Isus vazda pire jakha thaj dikhla e silno themes sar avel leste, phučas e Filipe: “Kaj šaj te činas mangro pale sa akala manuša te han?” 6 Godova phendas te probil les, kaj več džanglas so čerela. 7 A o Filip phendas lešče: “Ni duj šela rupune lovora či avilosas dosta te činel pe dosta mangro te svako dobil barem kotororo!” 8 A jek aver učeniko savo akhardolas Andrija, o phral katar o Simon Petar, phendas e Isusešče: 9 “Akate si jek čhavo saves si pandž mangre katar o ječam thaj duj mačhora. Ali so si godova pale gadiči them?” 10 O Isus phendas lende: “Neka o them bešel tele!” Pe godova than sas but čar, pa e manuša bešline. Sas okote varekaj katar pandž milje muškarcurja. 11 Askal o Isus lijas godola mangre, zahvalisarda e Devlešče thaj podelisardas e themešče save bešenas pe čar. A gajda čerda vi e mačhenca, thaj savora haline kozom kamline. 12 Kana savora čaljile, o Isus phendas pire učenikonende: “Čiden e kotorora save ačhiline, te khanči či propadnil.” 13 Gajda e učenikurja čidine dešduj korpe kotorora save ačhiline katar okola pandž ječmene mangre save o them halas. 14 Kana o them dikhla o čudesno znako savo o Isus čerda, phendine: “Akava si čače o Proroko savo trubul te avel po them!” 15 A o Isus džanglas kaj kamen te aven, te astaren les thaj pe sila te čhonle te avel lengo caro, pa palem crda pe ande gora te avel korkoro. 16 Kana peli e rjat, e Isusešče učenikurja fuljistine dži ko jezero. 17 Ali sar peli e rjat, a o Isus još či bolda pe, dine andre ande lađica thaj teljardine pe okoja rig e jezerošči, karingal o Kafarnaum. 18 Phurdelas e bari balval thaj vazdenas pe e bare talasurja. 19 Kana e učenikurja otplovisardine varekaj katar pandž dži ke šov kilometrja katar e obala, dikhline e Isuse sar phirel po paj thaj avel sa majpaše ke e lađica, a len astarda dar. 20 A o Isus phendas lende: “Me sem! Na daran!” 21 Askal line les ande lađica, thaj e lađica ande data arakhadili pe obala prema savi plovinas. 22 Thejara o đes o them savo ačhilo pe okoja rig e jezerošči primetisardine kaj si pe okoja rig samo jek lađica thaj kaj o Isus či dijas ande lađica pire učenikonenca, nego kaj von deletar korkore. 23 A varesave lađice andar e Tiverijada avile paše dži ke okova than kaj haline o mangro nakon so o Gospod zahvalisarda e Devlešče. 24 Kana o them dikhla kaj ni o Isus a ni lešče učenikurja naj okote, dine ande lađice thaj teljardine ando Kafarnaum te roden e Isuse. 25 Kana arakhline les pe okoja rig e jezerošči, phučline les: “Učiteljina, kana avilan akate?”

26 A o Isus phendas lende: "Čače, čače phenav tumende: Či roden tumen man zbog godova kaj hačardine e čudesne znakurja, nego zbog o mangro savo haline thaj čaljile. 27 Čeren bući, ali na palo habe savo si propadljivo, nego čeren bući palo habe savo ačhel palo večno trajo, a les dela tumen o Čhavo e manuško, kaj les ovlastisardas o Dad o Del." (aiōnios g166) 28 Von phučline les: "So trubul te čeras, a te avel okova so o Del kamel te čeras?" 29 A o Isus phendas lende: "Akava si o delo savo o Del kamel te čeren: te pačan ande okova saves vo bičhaldas." 30 Von askal phučline les: "Savo tu čudesno znako čereja, te kana dikhas les pačas ande tute? So dakle čereja? 31 Amare pradada haline mangro ande pustinja savo akhardolas mana, sago kaj si ramome ando Sveto lil: 'Dija len mangro andar o nebo te han.'" 32 O Isus phendas lende: "Čače, čače phenav tumende. Či dija tumen o Mojsije mangro andar o nebo, nego mungro Dad, a akana del tumen o čačutno mangro andar o nebo. 33 Kaj, o mangro savo del o Del si o okova savo avel andar o nebo thaj del trajo e themešče." 34 Askal phendine lešče: "Gospode, de amen uvek godova mangro." 35 A o Isus phendas lende: "Me sem o mangro e trajosko. Ko avel mande, či bokhavola thaj ko pačal ande mande nikada či trušavola. 36 Ali sago kaj phendem tumende, dikhline man, ali ipak či pačan. 37 Sa saven o Dad del man, avena mande, a okolen save aven mande či odbaciva. 38 Kaj, či fuljistem andar o nebo te čerav mungri volja, nego e volja okolešči savo bičhalda man. 39 A akava si e volja okolešči savo bičhalda man: te či hasarav ni ječe katar okola saven vo dija man, nego te vazdav len andar e mule ando Poslednjo des. 40 Kaj, akava si e volja mungre Dadešči: ko god dičhel man, e Čhave thaj pačal ande mande, te avel les večno trajo thaj te me vazdav les andar e mule ando Poslednjo des." (aiōnios g166) 41 Askal e Židovurja počnisardine te mrmrljin protiv o Isus zato kaj phendas: "Me sem o mangro savo fuljisto andar o nebo." 42 Phenenas: "Zar godova naj o Isus, e Josifesko čhavo? Zar či pindžaras lešče dade thaj lešče deja? Sar akana phenel: 'Fuljistem andar o nebo?'" 43 Pegodova o Isus phendas lende: "Na mrmrljan maškar tumende! 44 Khonikal našti avel mande ako či crdel les o Dad savo bičhalda man, a me vazdava len andar e mule ande Poslednjo desa. 45 E prorokurja ramosardine: 'O Del sikavela sa e themen.' Svako ko čhol kan ko Dad thaj sičol lestar, avel mande. 46 Ipak, khonikal či dikhla e Dade, osim okova savo avilo katar o Del. Vo dikhla e Dade. 47 Čače, čače phenav tumende: ko pačal ande mande, si les večno trajo. (aiōnios g166) 48 Me sem o mangro e trajosko. 49 Tumare pradada haline e mana ande pustinja thaj ipak muline. 50 A akava si o mangro savo

fuljel andar o nebo te kogod hal lestar či merel. 51 Me sem o džudo mangro savo fuljisto andar o nebo. Ko hala katar akava mangro, trajila zauvek. O mangro savo me dava si mungro telo, savo dava te e manuša po them šaj trajin." (aiōn g165) 52 Askal e Židovurja počnisardine maškar peste te raspravin pes e alavenca: "Sar akava šaj del amen piro telo te has?" 53 O Isus phendas lende: "Čače, čače phenav tumende, ako či han o telo e manušešče Čhavesko thaj či pijen lesko rat, naj tumen večno trajo ande tumende. 54 Ko hal mungro telo thaj pijel mungro rat, si les večno trajo thaj me vazdava les andar e mule ando Poslednjo des. (aiōnios g166) 55 Kaj mungro telo si čačo habe thaj mungro rat čačo pipe. 56 Ko hal mungro telo thaj pijel mungro rat, ačhel ande mande thaj me ačhav ande leste. 57 Sago kaj man bičhaldas o džudo Dad, thaj me trajiv zbog o Dad, gajda vi okova savo man hala trajila zbog mande. 58 Akava si o mangro savo fuljisto andar o nebo, thaj vo naj sago okova saves haline tumare pradada ande pustinja thaj muline. Ko hal akava mangro, trajila zauvek." (aiōn g165) 59 Akava o Isus phendas dok sikavelas ande sinagoga ando Kafarnaum. 60 Kana akava ašundine, but lešče učenikurja phendine: "Phare si akala alava. Ko šaj prihvatil len?" 61 O Isus korkoro pestar džanglas kaj lešče učenikurja mrmrljin thaj phendas lende: "Dali akava sikavipe navodil tumen te odustanin? 62 A so phendinesas kana dikhline sas man, e Čhave e manušešče sar džav opre ando nebo, okote kaj semas vi majsigo? 63 O Duho e Devlesko si okova savo del o trajo, a o telo našti te del les. E alava save me phendem tumende, von si o Duho thaj o trajo. 64 Ali si maškar tumende okola save či pačan mande." O Isus katar o početko džanglas save si okola save či pačana thaj savo si okova savo izdaila les. 65 Askal phendas: "Pale godova vi phendem tumende kaj khonik našti avel mande ako naj lešče dino katar o Dad." 66 Askal but lešče učenikurja mukline les thaj či majbut džanas pale leste. 67 Askal o Isus phučlas e dešuduje učenikonen: "Te či kamen vi tumen te džantar?" 68 A o Simon Petar phendas lešče: "Gospode, kaste te džas? Samo tut si alava palo večno trajo. (aiōnios g166) 69 Amen pačas thaj džanas kaj san tu o Sveco e Devlesko!" 70 A o Isus phendas lende: "Zar či me losardem tumen dešudujen? A palem jek tumendar si o beng." 71 O Isus phendas godova palo Juda savo sas čhavo e Simonesko andar o gav Kariot, kaj vo sas godova savo izdaila les, vi ako sas jek katar e dešuduj učenikurja.

7 Posle godova o Isus phirelas pe regija e Galilejači. Či kamlas te džal ande Judeja, kaj e židovske vođe rodenas prilika te mudaren les. 2 Ali kana avilo paše o židovsko

Prazniko senica, 3 e Isusešće phral phendine lešće: "Muk e Galileja thaj dža ande Judeja, te čire učenikurja dičhen e čudurja save čeres. 4 Khonik ko kamel te avel pindardo, či garavel okova so čerel. Kana već sa godova čeres, sikav tut e themešće." 5 Kaj čak ni lešće phral či paćanas ande leste. 6 A o Isus phendas lende: "Mungri vrjama još či avili, ali tumen šaj džan kana kamen kaj svako vrjama pale tumende si lači. 7 Tumen o them našti mrzal, ali man mrzal andar godova kaj me phenav e manušenje ande akava them kaj si lende dela bilače. 8 Tumen džan po prazniko, a me još či džava inča, kaj još či pherdili mungri vrjama." 9 Godova o Isus phendas thaj ačhilo ande Galileja. 10 Ali kana lešće phral đele po prazniko, đelo vi vo pale lende, ali na javno nego tajno. 11 A e židovske verske šorvale rodenas e Isuse po prazniko thaj stalno phučenas e themes: "Dali vareko dikhla les?" 12 A maškar o them but čerelas pe svato pala leste. Gajda varesave phenenas: "Lačo si!" A aver palem phenenas: "Naj lačo, nego zavodil e themes." 13 Ali khonik, či tromalas javno te ačhel pe lešči rig kaj daranas katar e židovske verske šorvale. 14 A kana već nakhlas o opaš prazniko o Isus delo ando Hramo thaj ačhilo te sikavel themes. 15 Askal e Židovurja začudisajle thaj phendine: "Katar akava džanel e Svete lila, a či sićolas andar lende?" 16 O Isus askal phendas lende: "Akava sikavipe či avel mandar, nego katar okova savo bičhaldal man. 17 Ko kamel te čerel okova so o Del kamel, džanela dali akava sikavipe avel katar o Del ili me čerav svato korkoro mandar. 18 Ko čerel svato korkoro pale peste, pešće rodel slava. A ko rodel slava pale okova savo bičhaldal les, vo si pošteno thaj ande leste naj nepravda. 19 Či li o Mojsije dija tumen o Zakono? A palem khonik tumendar či postupil po Zakono. Sostar kamen te mudaren man?" 20 O them phendas lešće: "O bilačo duho dijas ande tute! Ko kamel te mudarel tut?" 21 A o Isus phendas lende: "Čerdem jek čudo thaj savora čudin tumen. 22 Ali vi tumen čeren bući ando savato kana obrezin e manušes sago kaj phendas tumende o Mojsije. Godova običaj si, zapravo, majpurano katar e Mojsijesko Zakono, a avel katar e pradada. 23 Ako dakle o pravo časo palo obrezanje tumare čhavengo perel ando savato, tumen izvršina o obrezanje te na avel prekršime o Mojsijesko zakono. Sostar askal gaći holjavon pe mande kaj potpuno sastardem okole manuše ando savato. 24 Na sudin prema okova so dičhen avrjal, nego sudin pravedno." 25 Askal varesave manuša andar o Jerusalam čerenas svato maškar pende: "Naj li akava okova saves kamen te mudaren? 26 A ake, vo javno čerel svato thaj khonik khanči či phenel lešće. Te či amare šorvale vičače haćardine kaj si vo o Hristo?

27 Ali amen džanas katar si akava, a kana o Hristo avela, khonik či džanela katar si." 28 Dok sikavelas e themes ando Hramo, O Isus čhuta muj: "Ej, tumen pindžaren man! Thaj džanen katar sem! Či avilem korkoro mandar. Ali o čačutno si Okova savo bičhaldal man, saves tumen či pindžaren. 29 A me pindžarav les, kaj sem lestar thaj vo bičhaldal man." 30 Askal e židovske poglavarja dičhenas te astaren e Isuse, ali khonik či čhuta o vas pe leste, kaj lesko časo još či avilo. 31 A but džene maškar e manuša paćaine ande leste thaj phenenas: "Kana avela o Hristo, zar čerela majbare čudesne znakurja, nego so čerda akava?" 32 E fariseja ašundine so them šapućilaspe palo Isus thaj ando dogovor e šorvale rašajenca bičhaldine e stražaren te astaren e Isuse. 33 Askal o Isus phendas: "Još cara vrjama sem tumenca thaj askal džavtar okolešće savo bičhaldal man. 34 Rodena man, ali či aračhena man, thaj kaj sem me, tumen našti aven." 35 Askal e židovske vođe phendine maškar pende: "Kaj godova vo kanil te džal, a te amen či arakhasa les? Te či kanil te džal ke Židovurja save trajin rasejime maškar okola kaj naj Židovurja thaj te len sikavel. 36 So gndisardas godolesa kana phendas: 'Rodena man, ali či aračhena man' thaj 'kaj sem me tumen našti aven'?" 37 Poslednjo thaj majvažno đes e praznikosko, o Isus ačhilo anglo them thaj čhuta muj: "Ako si vareko trušalo, neka avel mande thaj neka pijel! 38 Ko god paćal ande mande, sago kaj phenel o Sveto lil, andar leste poteknina reke džude pajesko." 39 Akava phendas palo Sveto Duho save sas te primin okola kaj paćanas ando Isus. A o Duho ande godoja vrjama još či fuljisto, andar godova kaj o Isus nas još vazdino ande piri slava. 40 Kana varesave manuša andar e bari gomila ašundine akala Isusešće alava, phendine: "Akava si čače o proroko saves ažućaras." 41 A aver phenenas: "Akava si o Hristo!" A e trite palem phenenas: "Na, vo našti avel o Hristo! Zar o Hristo avela andar e Galileja? 42 Či li phenel o Sveto lil kaj o Hristo avela andar e caresko Davidesko potomstvo, thaj andar o gav Vitlejem, katar sas o David?" 43 Gajda zbog Isus avilo dži ke podela maškar e manuša. 44 Varesave kamline te astaren les, ali khonik či čhuta o vas pe leste. 45 Askal e stražarja boldine pe ke šorvale rašaja thaj ke fariseja, a von phućline len: "Sostar či andine Isuse?" 46 A e stražarja phendine lende: "Khonik nikada či čerelas gajda svato sago akava manuš." 47 A e fariseja phendine lende: "Zar vi tumen diljardas? 48 Dali vareko katar e šorvale ili katar e fariseja paćajine ande leste? Či. 49 Nego, akala manuša si proklete, kaj či pindžaren e Mojsijesko zakono!" 50 Askal phućla len o Nikodem, okova kaj sas majranije ko Isus thaj savo sas jek lendar: 51 "Zar amaro zakono osudil e manušes majsigo

nego so ašunel les thaj utvrdil so čerda?" 52 A von phendine lešće: "Dali san vi tu jadno Galilejco? Proučisar thaj dičeja kaj nijek proroko či avel andar e Galileja." 53 [Askal svako đelo pire čherešće,

8 A o Isus đelo pe Maslinsko Gora, 2 pa detharin palem avilo ando Hramo. Sa o them čida pes oko leste. Vo bešlo thaj teljarda te sikavel len. 3 A e zakonešće učitelja thaj e fariseja andine ječe manušnja savi sas astardi ando preljub thaj čhutine lat maškare anglo them. 4 Askal phendine e Isusešće: "Učiteljina, akaja manušnji si astardi kana čerda preljub. 5 O Mojsije ando zakon zapovedisardas amende te kasave manušnjen mudaras gajda kaj čhudasa bara pe lende. So tu phenes pe godova?" 6 Godova phučline te iskušin les, sar avilosas len vareso pale soste te optužin les. A o Isus samo bandilo thaj teljarda te ramol vareso e najesa pe phuv. 7 Ali, sar von vi majdur phučenass les, o Isus uspraviasajlo thaj phendas lende: "Ko tumendar nikada či čerda bezeh, neka prvo čhudel o bar pe late." 8 Askal palem bandilo thaj nastavisarda te ramol pe phuv. 9 Kana godova ašundine, teljardine te džantar jek po jek; e majpurane deletar prve. Po krajo o Isus ačhilo korkoro e manušnjasa savi još uvek ačhelas angle leste. 10 Askal o Isus uspraviasajlo thaj phučla lat: "Manušnjije, kaj si akala? Zar khonik či osudisarda tut?" 11 A voj phendas: "Khonik, Gospode." Askal o Isus phendas laće: "Ni me či osudiva tut. Dža thaj katar akana na čer majbut bezeh!" 12 O Isus palem phendas e themešće: "Me sem svetlo e themesko. Ko džal pale mande, nikada majbut či phirela ando tunjariko, nego avela les svetlo e trajosko." 13 Askal e fariseja phendine lešće: "Tu korkoro pale tute svedočis. Čiro svedočanstvo naj dovoljno!" 14 A o Isus phendas lende: "Čak vi ako svedočiv korkoro pale mande, mungro svedočanstvo si dovoljno, kaj džanav katar avilem thaj kaj džav. A tumen či džanen katar avilem ni kaj džav. 15 Tumen sudin pe manušendi mera, a me či sudiv khonikašće. 16 A vi ako sudiv, mungro sudo si čačo, kaj naj sem korkoro, nego sudiv e Dadesa savo bičhalda man. 17 Pa vi ande tumaro zakono ramol kaj kana duj džene svedočin o svedočanstvo si dovoljno. 18 Me svedočiv pale mande, a pale mande svedočil vi o Dad savo bičhalda man." 19 Pa von phučline les: "Kaj si čiro Dad?" A o Isus phendas: "Tumen či pindžaren ni man ni mungre Dade. Kaj te džangline sas ko sem me, džangline sas vi ko si mungro Dad." 20 O Isus sa godova phendas paše kutijice kaj čidenas pe e love dok sikavelas e manušen ando Hramo, thaj khonik či astarda les kaj lesko časo još či avilo. 21 O Isus palem phendas lende: "Me džavtar, a tumen

rodena man thaj merena ande tumaro bezeh. Kaj me džav, tumen našti aven." 22 Askal e Židovske vođe phendine: "Te či kamel te mudarelpel kana phenel: 'Kaj me džav, tumen našti aven?'" 23 A o Isus askal phendas lende: "Tumen sen akatar tele, katar e phuv, a me sem opral, andar o nebo. Tumen sen katar akava them, a me naj sem katar akava them. 24 Zato phendem tumende kaj merena ande tumare bezeha. Ako či paćan kaj Me sem, merena ande tumare bezeha." 25 Von phučline les: "Pa ko san tu askal?" A o Isus phendas lende: "Pa so katar o početko phenav tumende. 26 But godova šaj phendemas pale tumende pe tumari osuda. Ali me e themešće phenav samo okova so ašundem katar okova savo bičhalda man, a vo phenel čačipe." 27 Von či haćardine kaj phenel lende palo Dad. 28 Askal o Isus phendas lende: "Kana vazdena man, e Čhaves e Manušesće, askal džanena kaj Me sem thaj kaj či čerav khanči korkoro mandar, nego kaj phenav samo okova so o Dad sikada man. 29 A okova savo bičhalda man, manca si. Či mukla man korkoro kaj me uvek čerav okova so si lešće drago." 30 Dok o Isus godova phenelas, but džene paćaine ande leste. 31 Askal o Isus phendas e Židovende save paćaine ande leste: "Ako tumen inćaren mungro sikavipe, čače sen mungre učenikurja. 32 Pindžarena o čačipe thaj o čačipe oslobodila tumen." 33 A von phendine lešće: "Amen sam e Avraamešće potomkurja thaj nikada khonikašće či robuisardam. Sar askal tu phenes: 'Avena slobodne?'" 34 A o Isus phendas lende: "Čače, čače phenav tumende: svako ko čerel bezah, robo si e bezehesko. 35 O robo či ačhel zauvek ando čer savo služil, ali o čhavo zauvek pripadil ando čer. (aiōn g165) 36 Ako o Čhavo oslobodil tumen, askal čače avena slobodne. 37 Džanav kaj sen e Avraamešće potomkurja, ali tumen ipak kamen te mudaren man, kaj či prihvatin mungro sikavipe. 38 Me phenav tumende pale okova so dikhlem ke mungro Dad, a tumen čeren okova so ašundine katar tumaro dad." 39 A von phendine lešće: "Amaro dad si o Avraam." A o Isus pe godova phendas lende: "Te tumen čače avilinesas e Avraamešće čhavra, pherdine sas okova so čerelas o Avraam. 40 A tumen akana kamen te mudaren man, zato kaj phendem tumende čačipe savo ašundem katar o Del. O Avraam gajda vareso či čerelas. 41 Tumen čeren okova so čerel tumaro dad." Von phendine lešće: "Amen naj sam čhavra save či džanen ko si lengo dad. Amen si samo jek dad – o Del!" 42 A o Isus phendas lende: "Kana o Del avilosas tumaro dad, tumen volisardinesas man, kaj me avilem katar o Del thaj akana sem akate. Či avilem korkoro mandar nego vo bičhalda man. 43 Sostar či haćaren so phenav tumende? Zato kaj našti prihvatin mungre alava.

44 Tumen sen e bendešče čavra. Vo si tumaro dad thaj tumen kamen te čeren e volja tumare dadešči. Vo sas ubica katar o početko, thaj či ačhel ando čačipe, kaj ande leste naj čačipe. Kana hohavel, sikavel sosko si. Vo si hohamno thaj o dad e hohaimasko. 45 A mande zato kaj phenav tumende o čačipe, či pačan. 46 Ko tumendar šaj dokazil mande bezeh? Ako phenav tumende čačipe, sostar askal či pačan mande? 47 Ko si katar o Del, čhol kan ke Devlešče alava. A tumen či čhon kan leste zato kaj naj sen katar o Del." 48 E Židovurja pe godova phendine lešče: "Naj sam li amen ando pravo kana phenas kaj san tu Samarijancko thaj kaj si ande tute o bilačo duho?" 49 O Isus phendas: "Naj ande mande o bilačo duho, nego me poštuiv mungre Dade, a tumen či poštuin man. 50 Me či rodav slava pale mande. Vareko aver kamel te proslavil man, a vo vi sudil. 51 Čače, čače phenav tumende: ko inčarel mungro alav, nikada či dičhela o meripe." (aiōn g165) 52 A e Židovurja phendine lešče: "Akana džanas kaj si ande tute o bilačo duho. O Avraam mulo, sago vi e prorokurja, a tu phenes: 'Ko inčarel mungro alav, nikada či dičhela o meripe!' (aiōn g165) 53 Naj san valda majbaro katar amaro dad o Avraam, savo mulo? A vi e prorokurja muline. So tu gndis ko san tu?" 54 Askal o Isus phendas lenđe: "Ako me korkoro man proslaviv, mungri slava naj khanči. Man proslavil mungro Dad, pale savo tumen phenen kaj si tumaro Del. 55 Tumen či pindžaren les, ali me pindžarav les. Kana phendemas kaj či pindžarav les, avilemas hohavno sago vi tumen. Ali me pindžarav les thaj inčarav lesko alav. 56 Tumaro dad o Avraam raduilaspe kaj dičhela o đes kan me avava. Dikhla les thaj sas bahtalo." 57 Askal e Židovurja phučline les: "Sar šaj dikhlan e Avraame? Naj tut još ni pandžvardeš brš, a phenes kaj dikhlan e Avraame!" 58 O Isus phendas lenđe: "Čače, čače phenav tumende, majsigo nego so o Avraam bijandilo, Me sem!" 59 Pe godova von line e bara te čhuden len pe leste, ali o Isus lija pe majdur thaj inklijsto andar o Hramo.

9 Kana o Isus načelas okotar, dikhla e manušes savo sas koro katar piro o bijandipe. 2 A lešče učeníkurja phučline les: "Učiteljina, sostar akava manuš bijandilo koro? Zbog pire bezeha ili zbog e bezeha kaj čerdine lesko dad thaj lešči dej?" 3 A o Isus phendas: "Naj vo koro zato kaj čerdine bezeh vo, lesko dad ili lešči dej. Vo bijandilo koro te pe leste sikadol e Devlešči bari sila. 4 Dok si o đes, trubul te čeras buča katar okova savo bičhaldal man. Kaj avel e rjat, kana khonik našti čerela buči. 5 A dok sem po them, svetlo sem e themesko." 6 Kana godova phendas, čhungarda pe

phuven thaj katar e čhungara čerda čik, thaj godole čikasa makhlas e kore manušešče jakha. 7 Askal phendas lešče: "Dža thaj thov čo muj ando Siloamsko bazeno!" (Siloam značil "Bičhaldal".) O manuš delo, thoda piro muj thaj bolda pe čhere gajda kaj šaj dičhelas. 8 A lešče komšije thaj okola kaj majsigo dičhenas les kaj prosilas phučline: "Naj li godova okova koro manuš savo akate bešelas thaj prosilas?" 9 varesave phenenas: "Ej, vo si godova!", a aver phenenas: "Naj, samo anel pe leste." A vo phendas: "Ej, me sem godova manuš." 10 Askal phučline les: "Sar putajle će jakha te šaj dičhes?" 11 A vo phendas: "O manuš savo akhardol Isus čerda čik, makhlas mungre jakha thaj phendas: 'Dža thov čo muj ando Siloamsko bazeno.' Me đelem, thodem mungro muj thaj mungre jakha putajle katar o koripe." 12 Von phučline les: "Kaj si akana godova manuš?" A vo phendas: "Či džanav." 13 Askal e manušes savo sas varekana koro, indardine ke fariseja. 14 A godova đes kana o Isus čerda čik thaj putardas e kore manušešče jakha, sas savato. 15 E fariseja isto gajda phučline les sar putajle lešče jakha. A vo phendas lenđe: "Makhlas mungre jakha e čikasa, thodem mungro muj thaj akana dikhav!" 16 Varesave katar fariseja phendine: "Akava manuš naj katar o Del, kaj čerel buči ando savato." A aver phendine: "Sar o bezehalo manuš šaj čerel kasave čudesne znakurja?" Thaj gajda maškar lende avilo dži ko razdor. 17 Askal palem phučline godole manuše savo sas varekana koro: "So tu phenes pale godova manuš savo boldas tuče o vido?" O manuš phendas: "Proroko si." 18 A e Židovske vođe či pačanas kaj o manuš sas čače koro thaj kaj putajle lešče jakha, sa dok či akhardine lešče dade thaj lešče deja. 19 Askal lendar phučline: "Dali si akava tumaro čavo pale savo tvrdin kaj bijandilo koro? Sar godova te akana dičhel?" 20 Lesko dad thaj lešči dej phendine: "Džanas kaj si akava amaro čavo thaj kaj bijandilo koro, 21 ali či džanas sar akana šaj dičhel thaj ko putardas lešče jakha. Phučen lestar. Dosta si purano te korkoro phenel pale peste." 22 Lesko dad thaj lešči dej gajda phendine, kaj sas lenđe dar katar e židovske vođe save odlučisardine kaj andar e sinagoga isključina svakone savo priznail e Isuse palo Hristo. 23 Andar godova lesko dad thaj lešči dej phendine: "Dosta si purano te phenel korkoro pale peste. Les phučen!" 24 Askal po dujto data akhardine e manuše savo sas koro, thaj phendine lešče: "Obečisar anglo Del kaj pheneja čačipe! Amen džanas kaj si godova manuš bezehalo." 25 A o manuš phendas lenđe: "Me či džanav da li si vo bezehalo. Jek džanav kaj semas koro, a akana dikhav!" 26 Von phučline les: "So čerda tuče? Sar putardas će jakha?" 27 A vo phendas lenđe: "Več phendem tumende, a tumen či čhonas

kan mande. Sostar kamen palem te ašunen? Te či kamen vi tumen te aven lešče učenikurja?" 28 Askal von vredonas les thaj phendine lešče: "Tu san lesko učeniko, a amen sam e Mojsijašče, a pale akava či džanas ni katar si!" 30 O manuš phendas lende: "Baš godova si čudno kaj či džanen katar si, a vo putardas mungre jakha. 31 Džanas kaj o Del či čhol kan ke bezehale, nego čhol kan ke okola save poštuin les thaj čeren okova so si lešči volja. 32 Nikada či ašunda pe kaj vareko putardas e kore manušešče jakha savo sas koro katar o bijandipe. (aiōn g165) 33 Te akava manuš či avilosas katar o Del, našti khanči čerdasas." 34 Von phendine lešče: "Tu amen sikaveja, a sasto san bijando ando bezeh!" Askal čhudine les avri andar e sinagoga. 35 Kana o Isus ašundas kaj tradine e manušes andar e sinagoga, arakhla les thaj phučline les: "Dali pačas ando Čhavo e Manušesko?" 36 A o sastilo manuš phendas lešče: "Phen mande ko si vo, Gospode, te šaj pačav ande leste." 37 A o Isus phendas lešče: "Več dikhlan les. Vo si godova kaj upravo čerel tusa svato." 38 A o manuš phendas: "Pačav, Gospode", thaj dija koča angle leste. 39 A o Isus phendas: "Me avilem pe akava them te e themešče šaj sudilpe. Avilem te putrav e jakha okolende kaj či dičen, a te ačhen kore okola save gndin kaj dičen." 40 Varesave fariseja save sas lesa ašundine godova thaj phučline les: "Te najsam vi amen kore?" 41 O Isus phendas lende: "Kana priznaisardinesas kaj sen kore, či avilinesas došale palo bezah. Ali pošto phenen kaj dičen, e doš si vi majdur pe tumende."

10 O Isus majdur motholas: "Čače, čače phenav tumende:

Ko či del ke bakhre kroz o vudar, nego čordane preko zido, čor si thaj razbojniko. 2 A ko del kroz o vudar, pastiri si e bakhrengo. 3 O stražari, savo ačhel po vudar, putrel lešče, a e bakhre ašunen lesko glaso. Vo pire bakhren akharel po alav thaj inkalel len avri. 4 Kana inkalel pire bakhren, džal angle lende, a e bakhre džan pale leste, kaj pindžaren lesko glaso. 5 E bakhre nikada či džana pale okova saves či pindžaren, nego našen lestar, kaj či pindžaren lesko glaso." 6 O Isus phendas lende akaja paramiči, ali von či hačardine so kamlas te phenel lende. 7 Zato o Isus još phenelas lende: "Čače, čače phenav tumende: me sem o vudar e bakhrende. 8 Savora save aviline majsigo mandar čora si thaj razbojnikurja. Ali e bakhre či čhutine kan lende. 9 Me sem o vudar. Ko del prekal mande spasila pes. Dela andre thaj inkijela avri thaj arachela zeleno čar pe savi čarjola. 10 O čor avel samo te čorel, del čhurjasa thaj mudarel. Me avilem te dav len trajo thaj godova trajo te avel len ando izobilje. 11 Me sam o lačo pastiri, a o lačo pastiri del piro trajo pale

pire bakhre. 12 O najamniko naj pastiri; e bakhre naj lešče. Zato kana dičhel e ruve kaj avel, mučel e bakhren thaj našel. A o ruv askal napadnil len thaj e bakhre raspršin pes. 13 Kaj, vo si samo najamniko thaj les naj briga pale bakhre. 14 Me sem o lačo pastiri. Pindžarav mungre bakhren thaj von pindžaren man. 15 Isto gajda, mungro Dad pindžarel man thaj me pindžarav mungre Dade. Me mungro trajo dav pale bakhre. 16 Si man vi aver bakhre, save naj andar akava stado. Moraš vi len te anav thaj vi von ašunena mungro glaso thaj avena jek stado ječe pastiresa. 17 Zato o Dad volil man, kaj mungro trajo dav te palem lav les palpale. 18 Khonik či lel mungro trajo mandar, nego me korkoro mandar dav les. Si man pravo te dav mungro trajo, thaj si man pravo palem vi te lav les. Gajda zapovedisardas mande o Dad." 19 Kana phendas godova, e Židovurja palem podelisajle ande pire gindimate. 20 But lendar phenenas: "Ande leste si o bilačo duho thaj buncil. Sostar čhon kan leste?" 21 A aver phenenas: "Pa či čerel svato sago kaj si o bilačo duho ande leste. Zar o bilačo duho šaj boldasas e kore manušešče o vido?" 22 Ando Jerusalem askal slavilas pe o Prazniko kana posvetilas pe o Hramo thaj sas o ivend. 23 O Isus phirelas kroz o Hramo, pe Solomonešči terasa. 24 A e židovske vođe okružisardine les thaj phučline les: "Dži kaj incareja amen ando bi džanglipe? Ako san tu o Hristo, askal phen amende godova!" 25 O Isus phendas lende: "Več phendem tumende ali tumen či pačan mande. E dela save čerav ando alav mungre Dadesko von svedočin pale mande. 26 Ali tumen či pačan kaj naj sen katar mungre bakhre. 27 Mungre bakhre ašunen mungro glaso, me pindžarav len thaj von džan pale mande. 28 Me dav len večno trajo thaj von či propadnina nikada, niti vareko otmila len andar mungre vas. (aiōn g165, aiōnios g166) 29 Mungro Dad, savo dija len mande, majbaro si savorendar, thaj khonik našti otmil len andar e Dadešče vas. 30 Me thaj o Dad sam jek." 31 Askal e Židovurja palem line e bara te čhuden pe ande leste te mudaren les. 32 A o Isus phendas lende: "Sikadem tumende but lače dela save aven katar o Dad. Pale save katar godola lače dela kamen te čhuden tumen e barenca ande mande?" 33 E židovske vođe phendine lešče: "Či kamas te čhudas men e barenca ande tute pale lače dela, nego kaj hulis po Del. Obično san manuš, a čeres tut kaj san o Del." 34 O Isus phendas lende: "Či li ande tumaro zakon ramol kaj o Del phendas: 'Tumen sen devla!' 35 Ako akhardas 'devlenca' okolen savende si e Devlesko alav uputime – a o Sveto lil našti menjilpe – 36 sar šaj askal pale okova saves o Dad posvetisardas thaj bičhaldas po them te phenen: 'Hulis po Del' zato kaj phendem kaj sem Čhavo e Devlesko? 37 Ako či čerav e

dela mungre Dadešče, na pačan mande. **38** Ali ako čače čerav len, pačan barem ande godola dela kana več či pačan mande, gajda konačno džanena kaj si o Dad ande mande thaj me ande leste." **39** Askal von palem kamline te astaren les, ali vo izmaknisajlo andar lenđe vas. **40** O Isus askal palem bolda pes pe aver rig ke reka jordanošči, po than kaj o Jovano varekana bolelas, thaj okote ačhilo. **41** A o but o them avilo leste thaj phendine: "O Jovano či čerda ni jek čudesno znako, ali sa so phendas pale akava manuš, si čače." **42** Thaj okote but džene pačajine ande leste.

11 Varesavo manuš po alav Lazar sas nasvalo. Vo sas andar e Vitanija, andar o gav kaj trajilas e Marija thaj lači phen e Marta. **2** E Marija sas okoja manušnji savi čorela mirisno ulje pe Gospodešče pungre thaj khosela len, pire balenca. O Lazar savo sas nasvalo sas lako phral. **3** Gajda e pheja, e Marija thaj e Marta, poručisardine e Isusešče: "Gospode, nasvalo si okova saves tu volis." **4** Kana o Isus godova ašundas, phendas: "Akava nasvalipe či avela po meripe, več pe slava e Devlešče, te kroz late proslavilpe o Čhavo e Devlesko." **5** O Isus volilas e Marta, lače pheja thaj lenđe phrale e Lazare. **6** Ali kana o Isus ašundas kaj si o Lazar nasvalo, ačhilo okote kaj sas još duj đes. **7** Askal phendas pire učenikonende: "Hajde džas palem ande Judeja!" **8** A e učenikurja phendine lešče: "Učiteljina, či nakhlo but sar e židovske vođe kamenas okote te mudaren tut e barenca, a tu palem kames te džas inča?" **9** A o Isus phendas: "Naj li o đes lungo dešuduj saturja? Ko phirel e đeseja, godova či spotaknilpe te perel, kaj si les o svetlo akale themesko. **10** Ali, ko phirel e račava, godova spotaknilpe thaj perel, kaj najles svetlo te osvetlil lešče o drom." **11** Phendas godova thaj lijas te mothol lenđe majdur: "Amaro drugari o Lazar sovljardilo, ali me džava te džungavav les." **12** E učenikurja phendine pe godova: "Gospode, ako sovel, značil kaj sastola." **13** Ali o Isus gindilas pe lesko smrto, a e učenikurja hačardine kaj o Lazar čače sovel. **14** Askal o Isus jasno mothodas lenđe: "O Lazar mulo. **15** Thaj zbog tumende si mande drago kaj naj semas okote kaj akana pačana. Ali hajde akana džas leste!" **16** Pe godova o Toma, saves akharenas Blizanco, phendas aver učenikonende: "Hajde vi amen te meras lesa!" **17** Kana o Isus avilo ande Vitanija, phendine lešče kaj o Lazar pašljol več štar đes mulo ando limori. **18** A e Vitanija sas dur katar o Jerusalm varekaj majcara katar trin kilometra, **19** a e but Židovurja aviline okotar ke Marta thaj ke Marija te utešin len zbog lengo phral. **20** Kana e Marta ašundas kaj o Isus avel, đeli angle leste, a e Marija ačhili čhere. **21** E Marta

phendas e Isusešče: "Gospode, te avilanas akate, mungro phral či mulosas. **22** Ali me akana džanav kaj o Del dela tut sa so mandes lestar." **23** A o Isus phendas lače: "Čiro phral uštela andar e mule." **24** A e Marta phendas lešče: "Džanav kaj uštela andar e mule ando Poslednjo đes kana vi aver uštena." **25** O Isus phendas lače: "Me sem o vaskrsenje thaj o trajo. Ko pačal ande mande, ako vi merela, trajila. **26** Thaj kogod trajil thaj pačal ande mande, nikada či merela. Pačas li ande gadava, Marta?" (aiōn g165) **27** Voj phendas: "Ej Gospode, pačav kaj san tu o Hristo, e Devlesko Čhavo savo trubuja te avel pe phuv." **28** Kana phendas godova, đeli thaj akharda pire pheja e Marija pe rig thaj phendas lače: "O Učitelj si akate thaj akharel tut." **29** Kana e Marija godova ašundas, brzo uštili thaj teljardas leste. **30** A o Isus još či dija ando gav, več ačhilo po than kaj malada les e Marta. **31** A e Židovurja save sas e Marijasa ando čher thaj tešinas lat, kana dikhline e Marija kaj ando sidaripe uštili thaj inkljisti te varekaj džal, teljardine pale late, kaj gndinas kaj džal po limori te okote rovel. **32** Kana e Marija avili dži ko than kaj sas o Isus thaj kana dikhla les, peli pe koč a angle leste thaj phendas: "Gospode, te tu avilanas akate, mungro phral či mulosas!" **33** Kana o Isus dikhla e Marija thaj e Židoven save avile lasa, sar roven, uznemirisajlo thaj sas lešče pharo ando ilo. **34** Askal phučla len: "Kaj čutine e Lazare?" Phendine lešče: "Gospode, av thaj dik." **35** E Isusešče askal teljardine e jasva. **36** A e Židovurja phendine: "Dičhen, kozom volilas les!" **37** A varesave maškar lende phendine: "Zar vo, savo e kore manušesče boldas o vido, našti čerda te o Lazar na merel?" **38** Askal o Isus palem but uznemirisajlo thaj đelo pe Lazaresko limori savo sas čerdo ande pečina, a po ulaz sas čutino o baro bar. **39** O Isus phendas: "Len majdur o bar!" A e Lazarešči phen e Marta phendas: "Gospode, moraš kaj več zurale khandel, kaj več si štar đes ando limori!" **40** O Isus phendas lače: "Či li phendem tuče kaj dičeja e slava e Devlešči ako pačas?" **41** Askal spidine o bar majdur, a o Isus vazda pire jakha ando nebo thaj phendas: "Dade, najs tuče kaj ašundan man ande molitva. **42** Džanav kaj uvek ašunes man kana moliv man tuče, ali akava phendem zbog o them savo ačhel akate, te šaj pačan kaj tu bičhaldan man." **43** Kana o Isus godova phendas, zurale čhuta muj: "Lazare, inklji avri!" **44** O mulo Lazar inkljisto. Lešče pungre thaj lešče vas sas motime ande zavoje, a lesko muj sas učhardo e laneno čaršapeja. O Isus phendas lenđe: "Putren godova lestar thaj mučen les te džal!" **45** Kana e but Židovurja save avile ke Marija, dikhline so o Isus čerda teljardine te pačan ande leste. **46** Ali varesave katar godola manuša đele ke fariseja thaj mothodine lenđe so o Isus čerda. **47** Askal

e šorvale rašaja thaj e fariseja čidine e manušen andar o Baro veče thaj phendine: "So te ćeras? Akava manuš ćerel but ćudesne znakurja. 48 Te muklam les te nastavil agajda, savora ačhena te paćan ande leste. Askal avena e Rimljanurja thaj uniština vi amaro Hramo thaj vi amaro them." 49 A jek lendar, o Kajafa, savo sas godova brš baro rašaj, phendas lenđe: "Khanči tumen či džanen! 50 Zar či haćaren kaj si majlaćhe te jek manuš merel palo them, nego te sa amaro them avel mudardo?" 51 O Kajafa či phendas godova korkoro pestar, nego sar vo sas godova brš baro rašaj, gajda prorokuisarda kaj o Isus merela palo sasto židovsko them. 52 Thaj na samo palo židovsko them, nego vi pale godova te čidel e Devlešće rspime čhavren te aven sago jek. 53 Godova đes e židovske vođe odlučisardine te mudaren e Isuse. 54 Andar godova o Isus majbut či sikadolas maškar e židovske vođe, nego đelotar okotar ando krajo paše ke pustinja, ando gav savo akhardolas Efrem. Okote aćhilo e ućenikonenca. 55 A sas paše o židovsko prazniko Pasha thaj e but Židovurja andar pire krajurja aviline ando Jerusalem, te obredno šilaven pe majsigo nego so avel o prazniko Pasha. 56 Askal rodenas e Isuse thaj dok aćhenas ando Hramo phućenas jek avres: "So gndin? Dali avela pe Pasha?" 57 A e šorvale rašaja thaj e fariseja već dine naredba te svako ko džanel kaj si o Isus, te godova javin, te šaj astaren les.

12 Šov đes majsigo nego o prazniko Pasha, o Isus đelo ande Vitanija, kaj trajilas o Lazar, saves uskrnsisardas andar e mule. 2 Okote pripremiasardine lešće večera. E Marta poslušilas, a o Lazar sas e Isuseja thaj averenca pale sinija. 3 Askal e Marija lijas varekaj katar e opaš litra o kuć miris katar o čisto nard, makhlas leja e Isusešće pungre, thaj khosla len pire balenca. Thaj sasto ćher pherdilo e mirisosa. 4 Ali o Juda andar o gav Kariot, jek katar e Isusešće ućenikurja – savo majposle izdaisarda les, phendas: 5 "Sostar godova miris či bićinda pe pale trin šela rupune lovora thaj e love razdelisajle e čorende?" 6 Či phendas godova zato kaj aćhilo lešće pale čore, nego zato kaj sas čor. Vo sas zadužime pale kutijica ande savi sas e zajedničke love thaj često čorelas andar late. 7 Askal o Isus phendas: "Mućen lat po mirol! Laćhe ćerda kaj araćhelas godova miris sa dži ađes, kaj si akava đes priprema pale mungro prahope. 8 Kaj čore manušen uvek avela tumen tumenca, a me či avava uvek tumenca." 9 But e Židovurja andar o Jerusalem saznaisardine kaj si o Isus ande Vitanija. Teljardine inća te dićhen e Isuse, ali vi e Lazare. O Lazar sas okova manuš saves o Isus vazdas andar e mule. 10 Askal e šorvale rašaja odlučisardine te mudaren vi e Lazare 11 kaj zbog leste but e Židovurja

mućenas len thaj paćanas ando Isus. 12 Thejara o đes o but o them save aviline po prazniko Pasha, ašundine kaj o Isus avel ando Jerusalem, 13 line e palmende krandže, teljardine angle leste thaj čhonas muj: "Hosana! Blagoslovime si okova savo avel ando alav e Gospodesko! Nek avel blagoslovime o Caro e Izraelosko!" 14 A o Isus arakhlas terne magarco thaj uzjašisarda les, sago kaj si ramome ando Sveto lil: 15 "Na daran, manušalen andar o Jerusalem! Ake, avel čiro caro gajda kaj jašil e terne magarco!" 16 Lešće ućenikurja askal či haćardine godova, ali kana o Isus sas vazdino ande piri slava, dine pe godi kaj ando Sveto lil ramol pale leste baš okova so askal ćerdine lešće. 17 A o them savo sas e Isuseja kana akhardas e Lazare te inkjel andar o limori thaj vazda les andar e mule, svedočinas pale godova. 18 Zato o but o them vi inklijsto angle leste, kaj ašundine kaj si vo godova savo ćerda o ćudesno znako. 19 Askal e fariseja phendine jek avrešće: "Dićhen kaj khanči či vredil! Eke sa o them džal pale leste!" 20 Maškar o okola save aviline ando Jerusalem te pokloninpe e Devlešće po prazniko Pasha sas vi Grkurja. 21 Von aviline ko Filip, savo sas andar e Vitsaida ande Galileja, thaj zamolisardine les e alavenca: "Raja, kamlamas te dikhas e Isuse." 22 O Filip đelo thaj phendas godova e Andrijašće, askal o Andrija thaj o Filip đeline thaj phendine godova e Isusešće. 23 A o Isus phendas lenđe: "Avili e vrjama te o Čhavo e manušesko primil piri slava. 24 Čaće, čaće phenav tumende, ako e đivešći kućin či perel pe phuv thaj či merel, aćhel korkoro. A ako merel, anel but plodurja. 25 Ko volil piro trajo pe akava them hasarela les. A ko mrzal piro trajo pe akava them, araćhela les palo večno trajo. (aiōnios g166) 26 Ko kamel te služil mande neka džal pale mande. Kaj sem me, okote avela vi mungro sluga. Okolešće savo služil mande, mungro Dad dela les čast. 27 Mungri duša si akana uznemirime, thaj so te phenav? Dali te phenav: 'Dade, spasi man katar akaja patnja?' Na, kaj baš pale godova vi avilem. 28 Dade, proslavi čiro alav." Askal andar o nebo ašundilo o glaso: "Me već proslavisardem mungro alav thaj palem proslaviva les." 29 A e manuša save okote aćhenas, ašundine o glaso thaj phendine kaj zagrmisardas. A aver phendine: "O anđelo mothol lešće." 30 A o Isus phendas lenđe: "Akava glaso či avilo zbog mande, nego zbog tumende. 31 Akana si e vrjama palo sudo akale themesko. Akana o vladari akale themesko avela čudino avri. 32 A kana me avava vazdino katar e phuv, sa e theme crdava mande." 33 Godova phendas te označil save smrtosa merela. 34 Askal o them phendas lešće: "Amen andar o zakon sićilam kaj o Hristo trajila zauvek. Sar askal phenes kaj o Čhavo e manušesko trubul te avel vazdino te merel? Ko

si godova Čhavo e manuško?" (aiōn g165) 35 Askal o Isus phendas lende: "O svetlo či avela još dugo maškar tumende. Zato phiren dok si tumen još svetlo, te či nadvladil tumen o tunjariko. Kaj, ko phirel ando tunjariko, či džanel kaj džal. 36 Paćan ando svetlo, dok još si tumen svetlo te aven čhave e svetlošće!" Pale godova o Isus đelotar thaj garadilo lendar. 37 Vi ako o Isus čerda sa godola čudesne znakurja angle lende, von ipak či paćanas lešće 38 te pherdol o alav savo phendas o proroko Isaija: "Gospode, ko paćaja ande amari poruka thaj kašće sikadilo o snažno vas e Gospodesko?" 39 Zbog akava našti paćajine, kaj o Isaija isto gajda phendas: 40 "O Del korarda lende jakha thaj zurardas lende ile, te e jakhenca či dičhen, a e ileja či haćaren, thaj či obratin pe, te sastarav len." 41 O Isaija phendas godova, kaj dikhla e Isusešči slava thaj čerelas svato pale leste. 42 Ipak, e but šorvale paćajine ande leste, ali či priznainas godova zbog e fariseja, te či aven isključime andar e sinagoga. 43 Kaj, majbut volisardine e manušendi slava nego e Devlešči. 44 A o Isus čhuta muj e alavenca: "Ko paćal ande mande, či paćal samo ande mande, nego ande okova savo bićhaldal man. 45 Thaj ko man dićhel, dićhel okoles savo bićhaldal man. 46 Me, o svetlo, avilem po them te savora save paćan ande mande či aćhen majbut ando tunjariko. 47 Ako vareko ašunel mungre alava, a či inćarel len, me či sudiv lešće. Kaj, či avilem te sudiv e themešće, nego te spasiv les. 48 Ko man odbacil thaj či prihvatil mungre alava, avela les lesko sudco. E alava save phendem tumende von sudina lešće ando Posledno đes. 49 Kaj me či phenavas korkoro mandar, nego korkoro o Dad, savo bićhaldal man zapovedisardas mande so te phenav. 50 A džanav kaj lešči zapoved anel večno trajo. Dakle, okova so me phenav, phenav gajda sar o Dad phendas mande." (aiōnios g166)

13 Sas akava anglo prazniko Pasha. O Isus džanelas kaj avilo o časno kana mućela akava them thaj džala ke piro Dad. Volilas okolen save sas lešće ande akava them, a volilas len dži ko piro smrti. 2 O Isus thaj lešće ućenikurja hanas zajedno večera. A o beng e Judašće andar o gav Kariot, e Simonešće čhavešće, već čhuta ando ilo te izdail e Isuse. 3 O Isus džanglas kaj o Dad sa e vlast dija ande lešće vas thaj kaj vo katar o Del avilo thaj kaj leste boldel pe. 4 Askal o Isus uštilo katar e večera thaj fuljarda pestar o ogrtači, lijas o peškiri thaj phangla les angle peste. 5 Askal čhuta paj ando lavori thaj aćhilo te thovel e pungere pire ućenikonende thaj te khosel len e peškiresa savo sas angle leste. 6 Askal avilo dži ko Simon Petar, savo phendas lešće: "Gospode, tu mande e pungere te thoves!" 7 A o

Isus phendas lešće: "Tu akana či džanes so me čerav, ali haćareja jek đes." 8 Pe godova o Petar phendas lešće: "Či thoveja tu mungre pungere nikad!" A o Isus phendas lešće: "Ali te či thodem čire pungere, našti aves jek katar mungre." (aiōn g165) 9 Askal o Simon Petar phendas lešće: "Gospode, na thov samo mungre pungere, nego vi mungre vas thaj vi mungro šoro!" 10 A o Isus phendas lešće: "Kolešće savo si najardo trubul samo te thoven pe e pungere, kaj već si sasto čisto. Tumen sen čiste, ali na savora." 11 O Isus džanelas ko izdaila les thaj andar godova phendas: "Naj sen savora čiste." 12 Kana thoda lende pungere, lijas pe peste piro ogrtači thaj bolda pe ke sinija. Askal phućla len: "Dali haćaren so čerdem tumende? 13 Tumen akharen man Ućitelj thaj Gospod. Laćhe phenen kaj godova vi sem! 14 Pa ako me, o Gospod thaj Ućitelj thodem tumende e pungere, vi tumen askal trubun te thoven e pungere jek avrešće. 15 Dijem tumen primer: čeren gajda sago kaj me čerdem tumende. 16 Čaće, čaće phenav tumende: naj o sluga majbaro katar piro gospodari niti si o poslaniko majbaro katar okova savo bićhaldal les. 17 Akana, kana džanen godova, blago tumende te gajda vi čeren!" 18 "Či phenav pale sa tumende. Me džanav saven losardem. Ali o Sveto lil moraš te pherdol kana phenel: 'Okova savo halas manca, vazdel pe protiv mande.' 19 Phenav tumende akana, majsigo nego so godova avela, te kana godova avela šaj paćan kaj Me sem. 20 Čaće, čaće phenav tumende, ko primil okole saves me bićhalav, man primil, a ko primil man, primil Okoles savo bićhaldal man." 21 Kana phendas godova, o Isus zurale uznemirisajlo ando duho thaj phendas lende: "Čaće, čaće phenav tumende: jek tumendar izdaila man!" 22 Lešće ućenikurja dikhline jek pe avreste thaj phućenas pe, pale kaste godova phenel. 23 Jek katar e ućenikurja, saves o Isus but volilas, bešelal odma pašo Isus. 24 Lešće o Simon Petar dijas znako thaj phendas: "Phuć les pale kaste phenel." 25 Akava ućeniko avilo e Isuseste majpaše thaj phućla les: "Ko si godova, Gospode?" 26 O Isus phendas: "Okova si kašće dav kotor mangro boldo ando čaro." Bolda kotor mangro ando čaro thaj dija e Judašće, e Simonešće čhavešće andar o gav Kariot. 27 Čim o Juda halas godova kotor mangro, o Satana dijas ande leste. A o Isus phendas lešće: "Odma čer okova so mandes te čeres!" 28 Khonik katar ućenikurja save sas pale sinija či haćardine sostar o Isus phendas lešće godova. 29 A sar lende zajedničke love sas ko Juda, varesave gndinas kaj o Isus phendas lešće te džal te činel vareso hamasko palo prazniko ili te del vareso love e čore manušende. 30 O Juda, nakon so lijas kotor mangro, odma đelotar. A sas e rjat. 31 Kana o Juda đelotar, o Isus phendas: "Akana si

proslavime o Čhavo e manuško thaj o Del si proslavime ande leste. **32** Ako o Del si proslavime ande leste, vi o Del proslavila les ande peste, thaj proslavila les odma. **33** Čhavralen, još sem samo harni vrjama tumenca. Rodena man, ali sago kaj majsigo phendem e židovske vođenđe, akana phenav vi tumenđe: 'Okote kaj me džav tumen našti aven.' **34** Nevi zapoved dav tumen: te volin jek avres. Sago kaj me volivas tumen, gajda tumen volin jek avres. **35** Te avilo tumen ljubav jek pale avreste, savora džanena kaj sen mungre učenikurja." **36** O Simon Petar phučas e Isuse: "Gospode, kaj džas?" A o Isus phendas lešče: "Akana našti džas pale mande okote kaj me džav, ali aveja majposle." **37** O Petar phuča les: "Gospode, sostar našti džav tusa akana? Spremno sem te merav pale tute!" **38** O Isus phuča les: "Dali san vi čače spremno te meres pale mande? Čače, čače phenav tuče: majsigo so o bašno ašundola, trin drom hohaveja kaj či pindžares man."

14 O Isus majdur motholas: "Neka tumare ile či aven uznemirime. Pačan ando Del thaj pačan ande mande. **2** Ando čer mungre Dadesko si but stanurja. Te či avilosas gajda dali phendemas tumende: 'Džav te lačharav tumende o than?' **3** Kana džavatar thaj lačharava tumende than, palem avava thaj lava tumen mande te vi tumen aven okote kaj sem me. **4** A kaj me džav, tumen već džanen o drom." **5** A o Toma phendas: "Gospode, či džanas kaj tu džas. Sar šaj te džanas o drom?" **6** O Isus phendas lešče: "Me sem o Drom, Čači pe thaj Trajo. Khonikal či avel ko Dad osim preko mande. **7** Ako džangline sas man askal džanena vi mungre Dade. Tumen katar akana pindžaren les thaj dikhline les." **8** O Filip phendas lešče: "Gospode, sikav amende e Dades thaj godova avela amende dosta!" **9** O Isus phendas lešče: "Gadiči vrjama sem tumenca a tu, Filipe, još či pindžares man? Ko dikhla man, dikhla vi e Dades. Sar šaj askal phenes: 'Sikav amende e Dades?' **10** Zar či pačas kaj sem me ando Dad thaj kaj si o Dad ande mande? E alava save me phenav tumende, či phenav korkoro mandar, nego o Dad savo trajil ande mande čerel pire dela kroz mande. **11** Pačan mande kaj sem me ando Dad thaj kaj si o Dad ande mande. Ako či pačan zbog varesoste avreste, pačan bar zbog e dela save dikhline kaj čerav. **12** Čače, čače phenav tumende, ko pačal ande mande, čerela e dela save me čerav, pa čak vi majbare dela čerena, kaj me džav ko Dad. **13** Thaj sogod zamolin ande mungro alav, me godova čerava te proslavilpe o Dad ando Čhavo. **14** Sogod te zamolin man ande mungro alav, me čerava godova." **15** O Isus majdur phendas: "Ako volin man, inčarena mungre zapovedi, **16** a

me moliva e Dade thaj vo bičhalela tumende aver Zastupniko te avel tumenca zauvek. (aion g165) **17** Vo si Duho čačimasko, saves o them našti primil, kaj či dičhel les thaj či pindžarel les. Tumen pindžaren les, kaj si tumenca thaj trajila ande tumende. **18** Či mukava tumen sago čoren. Palem avava tumende. **19** Još cara thaj o them majbut či dičhela man, ali tumen dičhena man. Kaj, me trajiv, thaj vi tumen trajina. **20** Godova des saznaina kaj sem me ande mungro Dad thaj kaj sen tumen ande mande, a me ande tumende. **21** Ko prihvatil mungre zapovedi thaj inčarel len, godova volil man, a ko volil man, les volila mungro Dad. Thaj vi me voliva les thaj objaviva man lešče." **22** O Juda (na okova andar o gav Kariot) phuča les: "Gospode, sar godova kaj sikaveja tu samo amende, a na vi e themešče?" **23** O Isus phendas lešče: "Ako vareko volil man, inčarela mungro sikavi pe thaj mungro Dad volila les. Mungro Dad thaj me avasa leste thaj trajisa lesa. **24** Ko či volil man, či inčarel mungro sikavi pe, vi ako o sikavi pe savo ašunen naj mungro, nego katar o Dad savo bičhaldala man. **25** Akava phendem tumende akana, dok sem još tumenca. **26** A o Zastupniko – o Sveto Duho – saves o Dad bičhalela te zastupil man, sikavela tumen sa thaj dela tumen gođi so phenavas tumende. **27** Mukav tumende mungro miro, mungro miro dav tumen. Ali, či dav les gajda sago kaj o them del les. Neka či uznemirilpe tumaro ilo thaj neka či daral. **28** Ašundine so phendem tumende: 'Džavatar thaj boldava man tumende.' Te volisaren man raduisardinesas tumen kaj džav ko Dad, kaj si o Dad majbaro mandar. **29** Phendem tumende sa akava majsigo nego so avel, te pačan kana godova avela. **30** Či čerava tumenca više but svato, kaj avel o vladari akale themesko. Les naj vlast pe mande, **31** ali o them trubul te džanel kaj me voliv e Dade thaj zbog godova čerav gajda sar o Dad zapovedisarda mande. Ušten, džastar akatar."

15 O Isus phendas: "Me sem o čačutno čokot, a mungro Dad si vinogradari. **2** Vo činel pe mande svako loza savi či bijanel plodo, a svako loza savi bijanel plodo vo obrezil thaj šilavel te anel još majbut plodo. **3** A tumen sen već šlade zbog e alava save phenavas tumende. **4** Ačhen ande mande thaj me ačhava ande tumende. Sago kaj e loza našti anel plodo korkoro pestar te či ačhili po čokot, gajda ni tumen našti anena plodo te či ačhiline ande mande. **5** Me sem o čokot, a tumen sen e loza. Ko ačhel ande mande thaj me ande leste, but plodo anela. Kaj bi mango našti čeren khanči. **6** Ako vareko či ačhel ande mande, čudel pe avri sago e čindi loza thaj šučola. A kasavi loza čidel pe thaj čudel pe ande jag te phabol. **7** Ako ačhen ande mande thaj

mungre alava ačhen ande tumende, roden sogod kamen thaj dela pe tumende. 8 Akaleja proslavilpe mungro Dad: te anen but plodurja thaj te aven mungre učenikurja. 9 Sago kaj o Dad volilas man, gajda vi me volivas tumen. Ačhen ande mungri ljubav. 10 Te inčaredine tumen ke mungre zapovesti, ačhena ande mungri ljubav, sago kaj vi me inčaravas e zapovesti mungre Dadešće thaj ačhav ande lešči ljubav. 11 Akava phendem tumende te mungri bah avel ande tumende thaj te tumari bah avel potpuno. 12 Akaja si mungri zapovest: te volin jek avres sago kaj me volivas tumen. 13 Naj majbari ljubav nego te vareko del pesko trajo pale pešće drugarja. 14 Tumen sen mungre drugarja, ako čeren okova so zapovediv tumende. 15 Majbut či akharav tumen sluge, kaj o sluga či džanel so čerel lesko gospodari. Me akharav tumen mungre drugarenca, kaj phendem tumende sa so ašundem katar mungro Dad. 16 Či losardine tumen man, nego me losardem tumen thaj čhutem tumen te džan thaj te anen plodo thaj tumaro plodo ačhel, gajda te o Dad del tumen sa so roden lestar ande mungro alav. 17 Akava zapovediv tumende: volin jek avres!" 18 "Ako o them mrzal tumen, džanen kaj vi man mrzalas majsigo tumendar. 19 Te avilinesas katar akava them, o them volisardasas tumen sago piren. Ali sar naj sen katar akava them, nego me losardem tumen andar akava them, zato o them mrzal tumen. 20 Den tumen gođi so phendem tumende: 'O sluga naj majbaro katar piro gospodari.' Ako progoninas man, progonina vi tumen. Ako inčardine mungre alava, inčarena vi tumare. 21 Sa akava čerena protiv tumende zbog mungro alav, kaj či pindžaren Okoles savo bičhalda man. 22 Te či avilemas thaj te či mothavas lende, či avilesas došale palo bezeh. Ali akana najlen izgovor palo piro bezeh. 23 Ko man mrzal, mrzal vi mungre Dade. 24 Te či čerdem maškar lende dela, save khonik aver či čerda, či avilesas došale palo bezeh. Ali dikhline e dela save čerdem, a ipak mrzan vi man vi mungre Dade. 25 Ali, trubul te pherdol okova so si ramome ande lengo zakono: 'Mrzanas man, a nas len andar soste.' 26 A kana avela o Zastupniko, saves bičhalava tumende katar o Dad – e Duho čačimasko savo inkjel katar o Dad – vo pale mande svedočila. 27 A svedočina vi tumen, kaj sen katar o početko manca."

16 O Isus još phendas: "Godova phendem tumende te či peren katar o pačipe. 2 Isključina tumen andar e sinagoga. Thaj avela e vrjama kana svako ko mudarel tumen gindila kaj gajda služil e Devlešće. 3 A godova čerena zato kaj či pindžaren ni e Dade ni man. 4 Akava phendem tumende te kana avela godoja vrjama, den tumen gođi

kaj phenavas tumende pale godova. Ando početko akava či phendem tumende, kaj semas tumenca." 5 "Ali akana džavtar ke okova savo bičhalda man, a khonik tumendar či phučel man: 'Kaj džas?' 6 Nego, zato kaj akava phendem tumende, e žalost pherda tumare ile. 7 Ali me phenav tumende čačipe: pale tumende si majlače te me džavtar. Kaj, ako me či džavtar, či avela tumende o Zastupniko. A ako džavtar bičhalava les tumende. 8 A kana vo avela, dokažila e themešće so si čače bezeh, pravednost thaj sudo. 9 Vo dokažila e themešće kaj si bezehale zato kaj či pačan ande mande. 10 Thaj dokažila e themešće so si pravednost zato kaj džav ko Dad thaj okote majbut našti dičhena man. 11 Thaj dokažila e themešće so si o sudo zato kaj o vladari akale themesko si već osudime. 12 Još but godova avilosas man te phenav tumende, ali akana godova našti te inčaren. 13 Ali kana avela vo, o Duho čačimasko, uputila tumen ande sasto čačipe. Vo či čerela svato korkoro pestar, nego phenela tumende okova so ašundas thaj objavila tumende okova so avela. 14 Vo proslavila man, kaj lela mandar so si mungro thaj objavila tumende. 15 Sa so si e Dades, mungro si. Zato phenav tumende: 'Lela mandar so si mungro thaj objavila tumende.' 16 Još samo cara, thaj džavatar thaj majbut či dičhena man. Thaj palem cara načhela, thaj palem dičhena man." 17 Askal varesave katar e Isusešće učenikurja phučline jek avres: "So si godova kaj phenel amende: 'Još samo cara, thaj či dičhena man, a askal još cara thaj palem dičhena man', thaj: 'Zato kaj džav ko Dad?'" 18 Thaj phenenas: "So si godova kaj phenel: 'Još cara'? Či džanas so phenel." 19 A o Isus džanglas kaj kamen te phučen les pale godova thaj phendas lende: "Phučen tumen maškar tumende pale okova kaj phendem: 'Još cara thaj či dičhena man, a askal još cara thaj dičhena man'. 20 Čače, čače phenav tumende: Tumen rovena thaj tugujina, a o them raduilape. Avena žalosne, ali tumari žalost pretvorilape ande bah. 21 E manušnji si ande dukha dok bijanel, kaj avilo lako časo. Ali, kana o čavro bijandol, voj majbut či del pe gođi ke muke. Voj si bahtali kaj andas manušes po them. 22 Gajda sen vi tumen akana žalosne, ali me palem dikhava tumen thaj tumaro ilo raduilape thaj khonik našti lela tumendar godoja bah. 23 Thaj godova đes khanči či phučena man. Čače, čače phenav tumende: sogod zamolin e Dades ande mungro alav, dela pe tumende. 24 Dži akana khanči či molisardine ande mungro alav. Molin, thaj dobina – te tumari bah avel pherdi." 25 "Akava phenavas tumende ande paramiče. Avel e vrjama kana majbut či mothava tumende ande paramiče, nego jasno mothava tumende palo Dad. 26 Godova đes molina e Dade ande mungro alav. Či phenav

tumende kaj me moliva e Dade pale tumende. 27 O Dad vi korkoro vilil tumen kaj tumen volisardine man thaj pačaine kaj avilem katar o Del. 28 Me inklijstem katar o Dad thaj avilem pe akava them. Akana mukav o them thaj džav ke mungro Dad.” 29 Askal lešće učenikurja phendine lešće: “Ake, akana jasno phenes amende, thaj či phenas amende ande paramiče. 30 Akana džanas kaj tu sa džanes, thaj kaj džanes so phučas tut majsigo nego so phučas tut. Zato pačas kaj avilan katar o Del.” 31 A o Isus phendas lende: “Da li akana pačan? 32 Ake, avel o časo – thaj već si akate – kana našena svako pe piri rig, a man mučena korkores. Ali me naj sem korkoro, kaj manca si o Dad. 33 Akava phendem tumende te ande mande avel tumen miro. Ande akava them si tumen nevolje, ali aven hrabre – me pobedisardem o them.”

17 Kana godova phendas, o Isus dikhla ando nebo thaj phendas: “Dade, avilo o časo: proslavisar čire Čhaves, te o Čhavo proslavil tut. 2 Kaj, tu dijan les vlast pe sa e manuša, te savorende saven tu dijan les vo del večno trajo. (aiōnios g166) 3 A akava si večno trajo: te pindžaren tut, e jedino čačutne Devle, thaj okoles saves tu bičaldan – e Isuse Hristos. (aiōnios g166) 4 Me tut proslavisardem pe phuv gajda kaj završisardem sa so phendan mande te čerav. 5 Akana tu, Dade, proslavisar man tute e slavava savi sas man tute majsigo nego so postoilas o them.” 6 “Me objavisardem čiro alav e manušenje save dijan man andar akava them. Sas čire, a tu dijan len mande thaj von inčarenas čire alava. 7 Akana džanen, kaj avel tutar sa so dijan man. 8 Kaj dijem len čire alava save tu dijan mande thaj von prihvatisardine thaj džanen kaj si čače kaj me tutar avilem thaj pačan kaj tu bičaldan man. 9 Pale lende moliv. Či moliv pale manuša andar akava them, nego pale okola save tu dijan man, kaj si čire. 10 Sa so si mungro, čiro si, thaj so si čiro, mungro si, a me ande lende proslavisajlem. 11 Me naj sem majbut ando them, ali von si ando them, a me avav tute. Sveto Dade, arakh len ande čiro alav, okolen save dijan man, te aven jek sago kaj sam amen jek. 12 Dok semas lenca, lavas pe lende sama ande čiro alav savo dijan man. Lavas len sama thaj ni jek lendar či hasajlo, osim o okova savo sas odredime pale propast, te pherdol o Sveto lil. 13 Akana avav tute, ali akava phenav dok sem još ando them, te avel len pherdi bah savi si man. 14 Dijem len čiro alav, a o them zamrzsarda len andar godova kaj von naj andar akava them, sago kaj naj sem ni me. 15 Či moliv tut te les len katar akava them, nego te aračhes len katar o Bilačo. 16 Von či pripadin akale themešće, sago kaj ni me naj sem

katar akava them. 17 Posvetisar len e čačimasa te služin tuće. Čiro Alav si čačipe. 18 Sago kaj tu man bičaldan ando them, gajda vi me bičaldem len ando them. 19 Me korkoro man posvetiv pale lende, te vi von aven posvetime e čačimasa.” 20 “Ali či moliv tut samo pala lende, nego vi pale okola save pe lende alava pačana ande mande, 21 te savora aven jek sago kaj san tu, Dade, ande mande thaj me ande tute. Neka vi von aven ande amende, te o them pačal kaj tu bičaldan man. 22 Dijem len slava savi tu dijan man, te aven jek sago kaj sam amen jek 23 – me ande lende, a tu ande mande – te aven savršeno ujedini me, te o them džanel kaj tu bičaldan man thaj kaj len volisardan sago kaj volisardan man. 24 Dade, kamav te okola save tu dijan man aven manca okote kaj sem me thaj te dičen mungri slava, slava savi tu dijan man, kaj volisardan man majsigo nego so o them postoilas. 25 Pravedno Dade, vi ako o them či pindžarel tut, me pindžarav tut, a vi akala džanen kaj tu bičaldan man. 26 Me objavisardem lende čiro alav, a objaviva les vi majdur, te e ljubav saveja volisardan man avel ande lende, thaj me ande lende.”

18 Kana phendas godova, o Isus delotar pire učenikonenca pe okoja rig e potokošči ando Kedron. Okote sas jek maslinsko vrto, pa vo thaj lešće učenikurja dine ande leste. 2 A o Juda, izdajniko, džanglas pale godova than kaj o Isus okote često aračelas pe pire učenikonenca. 3 Askal o Juda lija pesa četa vojnurja thaj e hramošće stražaren saven dine les e šorvale rašaja thaj e fariseja. Aresline ando maslinsko vrto e svetiljenca, e bakljenca thaj e oružesa. 4 O Isus džanglas sa so avela lesa, inklijsto korako angle lende thaj phučla: “Kas roden?” 5 Von phendine lešće: “E Isuse andar o Nazaret.” A o Isus phendas lende: “Me sem.” Lenca ačelas vi o Juda lesko izdajniko. 6 Kana o Isus phendas lende “Me sem”, von crdine pe palpale thaj peline pe phuv. 7 Askal o Isus palem phučla len: “Kas roden?” Von palem phendine: “E Isuse andar o Nazaret.” 8 O Isus phendas lende: “Phendem tumende: Me sem. Ali, ako man roden, mučen akalen save si manca te džantar.” 9 Gajda phendas te pherdol okova so majsigo phendas: “Či hasardem niječe katar okola saven dijan man.” 10 A e Simone Petre sas mačo, pa inkaldale andar e fotrola thaj lesa peklas e šorvale rašaješće slugo thaj činda lesko kan. O sluga akhardolas Malh. 11 Ali o Isus phendas e Petrešće: “Bolde o mačo ande lešće korice. Dali te či pijav andar o tahtaj e patnje savi o Dad dija man?” 12 Askal e četa vojnurja, zajedno pire zapovednikosa thaj e hramošće stražasa astardine e Isuse thaj phangline les, 13 pa prvo indardine ko Ana, savo sas

e Kajafasko sokro, a o Kajafa sas baro rašaj godova brš. 14 O Kajafa sas okova savo savetuilas e židovske vođen kaj si majlačhe te jek manuš merel pale sasto them. 15 O Simon Petar thaj još jek aver učeniko džanas palo Isus. Godole učeniko o baro rašaj lačhe pindžarelas, pa gajda šaj dijas andre ande avlija zajedno e Isuseja, 16 a o Petar ačhilo avri angle kapija. O aver učeniko saves pindžarelas o baro rašaj askal inklijsto thaj čerda svato e sluškinjasa savi lelas sama ko vudar pa voj mukla e Petre andre ande avlija. 17 Askal e sluškinja savi lelas sama po vudar phučla e Petre: "Naj san li vi tu jek katar okole manušešće učenikurja?" O Petar phendas: "Naj sem." 18 A e sluge thaj e stražarja čhonas angar pe jag thaj ačhenas paše late te taton, kaj sas šil. Pa vi o Petar ačhelas okote lenca thaj tatolas. 19 A ande godoja vrjama o baro rašaj počnisarda te ispituil e Isuse pale lešće učenikurja thaj pale okova so sikavelas len. 20 O Isus phendas lešće: "Me javno mothavas e manušenđe. Uvek sikavavas ande sinagoge thaj ando Hramo kaj čiden pe e Židovurja. Khanči či phendem čordane. 21 Sostar phučes man? Phuč okolen save ašundine so phenavas lenđe. Von sigurno džanen so phenavas!" 22 Kana o Isus godova phendas, jek katar e stražarja, savo ačhelas okote paše, peklale e palmasa prekal o muj thaj phendas: "Dali gajda čerel pe svato e bare rašajesa?" 23 A o Isus phendas lešće: "Ako phendem vareso pogrešno, dokažisar kaj si pogrešno. A ako si godova kaj phendem ispravno sostar askal des man dab?" 24 Askal o Ana bičhald e Isuse phangle ko baro rašaj Kajafa. 25 Dok o Simon Petar ačhelas paše jag thaj tatolas, phučline les: "Te naj san vi tu jek katar lešće učenikurja?" A o Petar hohada: "Naj sem." 26 Jek katar e bare rašajesešće sluge, savo sas familija okole manušeja savešće o Petar čhinda o kan, phendas: "Či li dikhlem tut e Isuseja okote ando Maslinsko vrto?" 27 A o Petar palem hohada kaj nas thaj o bašno odma zakukuričisarda. 28 Detharinako rano e Isuse inđardine andar e Kajafesko čher ande palata ko rimsko upravniko. A e židovske vođe či dine ande palata, te či postanin obredno melale angle pashalno večera. 29 Zato o Pilato inklijsto angle lende thaj phučla: "Pale soste prn akale manuše?" 30 A von phendine lešće: "Te akava manuš či avilosas zločinco, či predaisardamas les tuče." 31 Askal o Pilato phendas lenđe: "Len les tumen thaj sudin lešće pe tumaro zakon." A e Židovurja phendine lešće: "Amen či tromas khonikas te mudaras." 32 Akava dogodisajlo te pherdol okova so o Isus phendas palo meripe saveja trubuja te merel. 33 Pale godova o Pilato bolda pe ande palata, akharda e Isuse, thaj phučla les: "Dali san tu caro e Židovengo?" 34 O Isus phendas: "Dali phenes godova

korkoro tutar ili godova aver phendine tuče pale mande?" 35 O Pilato phendas: "Dali sem me Židovo? Čiro them thaj e šorvale rašaja predaisardine tut mande. Sostar? So čerdan?" 36 O Isus phendas: "Mungro carstvo naj katar akava them. Kana mungro carstvo avilosas katar akava them, mungre sluge borisajlesas te či avav predaime e Židovske vođenđe. Ali mungro carstvo naj akatar!" 37 Askal o Pilato phendas lešće: "Znači tu san o caro!" A o Isus phendas: "Gajda si sago kaj phenes: caro sem. Me pale akava bijandilem thaj pale akava avilem po them: te svedočiv palo čači. Ko god si katar o čači, ašunel mungro glaso." 38 O Pilato phučla les: "A so si čači?" Askal palem inklijsto angle Židovske vođe thaj phendas lenđe: "Me či arakhav nisošči doš pe leste! 39 A tumaro si običaj te mukav tumenđe varekas kana si o prazniko Pasha. Dali kamen te mukav tumenđe e židovske caro?" 40 Ali von pe godova čhutine muj: "Na les, nego e Varava!" A o Varava sas razbojniko.

19 Askal o Pilato dija te izbičuin e Isuse. 2 A e vojniskurja khudine kruna katar e kangre, čhutine e Isusešće po šoro thaj dine pe leste grimizno ogrtači. 3 Askal avenas leste thaj phenenas: "Nek trajil o caro e Židovengo!" Gajda marenas muj lestar thaj denas les dab e palemnca po muj. 4 O Pilato palem inklijsto avri thaj phendas e Židovende: "Ake inkalav les angle tumende, ali te džanen kaj či arakhlem lešće nisošči doš." 5 Askal o Isus inklijsto avri, po šoro inđarelas khuvdi kruna katar e kangre thaj grimizno ogrtači pe dume, a o Pilato phendas: "Ake o manuši!" 6 Kana dikhline les e šorvale rašaja thaj e hramošće stražarja, čhonas muj: "Razapnisar les! Razapnisar les!" A o Pilato phendas lenđe: "Tumen len les thaj razapnin les, kaj me či arakhlem pe leste nisošči doš." 7 A e Židovske vođe phendine lešće: "Amen si amaro zakon, thaj pe amaro zakon vo moraš te merel, kaj tvrdilas kaj si e Devlesko Čhavo." 8 Kana o Pilato ašundas godova, još majbut darajlo. 9 Bolda pe palem ande palata thaj phučla e Isuse: "Katar san?" Ali o Isus pe godova či phendas lešće khanči. 10 O Pilato askal phendas lešće: "Manca či kames te čeres svato? Či džanes kaj si man vlast te mukav tut ili te razapniv tut po trušul?" 11 O Isus phendas lešće: "Či avilosas tut nisošči vlast pe mande te či avilosas tuče dini e Devlestar. Andar godova si majbaro bezeh okolesko savo tuče ande vas dija man." 12 Katar askal o Pilato dičhelas te oslobodil les. Ali e Židovske vođe čhonas muj: "Te muklan godole manušes, naj san drugari e rimsko carošće! Ko god phenel pala peste kaj si caro, protivil pe e rimsko carošće." 13 Kana godova ašundas, o Pilato inkalda e Isuse avri thaj bešlo pe sudačko stolica,

po than savo akhardol Baruno pločnik, pe židovsko čhib: Gavata. 14 A sas o đes kana pripremlas pe pale Pasha, varekaj katar o mismeri. O Pilato phendas e Židovende: "Ake tumaro caro!" 15 A e Židovurja čhonas muj: "Mudar les, mudar les! Razapnisar les po trušul!" O Pilato phučla len "Te tumare caro razapniv po trušul?" A e šorvale rašaja phendine lešće: "Amen naj aver caro. Amaro caro si o rimsko caro!" 16 Askal o Pilato dija e Isuse ke vojnikurja te razapnin les po trušul. Askal e vojnikurja line e Isuse. 17 O Isus korkoro indarelas pesko trušul dži ko than savo akhardolas Lobanja, a pe židovsko čhib akhardo Golgota. 18 Okote razapnisardine e Isuse po trušul. A lesa sas razapnime po trušul još duj džene, jek katar lešči jek rig, aver katar lešči aver rig, a o Isus sas maškare. 19 O Pilato dija te ramol pe natpis thaj te čhol pe po trušul. Po natpis sas ramome: "Isus Nazarećanin, caro e Židovengo." 20 Akava natpis čitosardine e but Židovurja, kaj o than kaj o Isus sas razapnime po trušul sas paše ko gav. O natpis sas ramome pe židovsko, latinsko thaj grčko čhib. 21 E Židovske šorvale rašaja phendine e Pilatošće: "Na te ramos: 'caro e Židovengo', nego phen: kaj vo korkoro pale peste phenelas kaj si caro e Židovengo." 22 A o Pilato phendas lende: "So ramosardem – ramosardem!" 23 Kana razapnisardine e Isus po trušul, e vojnikurja line lešće drže thaj podelisardine pe štar delurja – pale svako vojniko po kotor. Line vi lesko gad, ali pe leste nas šavurja, kaj sas ćerdo katar opral dži tele ande jek kotor. 24 Askal phendine jek avrešće: "Ajde te na pharavas o gad, nego te čhudas kocka pale leste te dikhas kasko avela." Akava sas te pherdol so sas ramome ando Sveto lil: "Mungre drže podelisardine maškar pende thaj čhudine e kocka pale mungre patave." Thaj e vojnikurja gajda ćerdine. 25 A paše Isusesko trušul ačhenas lešči dej, lači phen, e Marija e Klopešči romnji thaj e Marija andar e Magdala. 26 Kana o Isus dikhla pire deja thaj e učeniko saves but volilas sar ačhel paše late, phendas pire dejaće: "Manušnjije, ake tuće čhavo." 27 Askal phendas e učenikošće: "Ake tuće dej." Thaj katar godova čas o učeniko lija lat ande piro čher. 28 Posle godova, o Isus džanelas kaj si sa gata. Ali te potpuno pherdol so sas ramome ando Sveto lil, phendas: "Trušalo sem." 29 A okote, ačhelas o čaro pherdo šut. Line o sunđer savo ćindardine ande godova šut, pusadine pe stabiljka katar o isop thaj čhutine ke Isusesko muj. 30 Kana o Isus okosisarda o šut, phendas: "Gata si." Askal haradilo lesko šoro thaj mukla pesko đī. 31 A sar sas Đes pale priprema, e židovske vođe zamolisardine e Pilato, te okolende kaj sas vazdine po trušul te phađen pe lende pungre te majsigo meren thaj fuljaren pe katar o trušul, sar lende tela či ačhilesas po trušul

prekal o savato. Godova savato sas Baro prazniko. 32 Thaj e vojnikurja aviline thaj phagline e pungre e prvo thaj vi e dujto manušešće save sas razapnime e Isuseja. 33 Kana aviline dži ko Isus, dikhline kaj već mulo, thaj či phagline lešće pungre, 34 nego jek katar e vojnikurja e kopljesa pusadas lešće pašvare. Thaj andar e rana odma teljardas o rat thaj o paj. 35 Godova svedočil okova savo godova dikhla thaj lesko svedočanstvo si čačutno. Vo džanel kaj mothol čačipe, thaj svedočil te vi tumen paćan. 36 Akava sas te pherdol o Sveto lil: "Nijek kokalo či avela lešće phago." 37 A pe jek aver than o Sveto lil phenel: "Dičhena okoles saves pusadine." 38 Posle godova o Josif andar e Arimateja manglas katar o Pilato te indarel e Isusesko telo. O Josif sas e Isusesko učeniko, ali na javno kaj daralas katar e židovske vođe. O Pilato dija les thaj gajda o Josif avilo thaj indardas e Isusesko telo. 39 A avilo vi o Nikodem, okova savo majsigo avilo e Isuseste račava, thaj andas varekaj katar trijanda literja hamime smirna thaj aloja. 40 Askal line e Isusesko telo thaj paćardine les ando mirisno pohtan sago kaj sas o židovsko običaj kana prahonas e mulen. 41 A ko than kaj sas o Isus razapnime sas o vrto, thaj ando vrto nevo limori ande savo još khonik nas prahome. 42 Zbog godova kaj sas o židovsko Đes pale priprema, trubujine te sidaren a zato kaj sas o limori paše, čhutine e Isusesko telo ande leste.

20 Detharinako rano prvo đes ando kurko, dok sas još tunjariko e Marija andar e Magdala avili po limori thaj dikhla kaj si o bar katar o ulazo po limori lino majdur. 2 Askal prastaja dži ko Simon Petar thaj ko aver učeniko saves o Isus but volilas thaj phendas lende: "Indardine e Gospodesko telo andar o limori thaj či džanav kaj čhutine les!" 3 Askal o Petar thaj okova aver učeniko inklijstine thaj teljardine karingal o limori. 4 Liduj džene prastenas zajedno, ali okova aver učeniko sas majbrzo katar o Petar thaj prvo areslo dži ko limori. 5 Bandilo thaj dikhla andre o pohtan katar o lano sar pašljon ando limori, ali či dijas andre. 6 Askal pale leste areslo vi o Simon Petar, pa dija ando limori thaj vi vo dikhla o pohtan savo pašljolas okote, 7 thaj o dikhloro savo sas pe Isusesko šoro či pašljolas zajedno e pohtanesa, nego sas odvojime thaj paćardo pe jek rig. 8 Askal dija andre vi okova aver učeniko, savo prvo areslo po limori, dikhla thaj paćajas. 9 Kaj von još či haćardine andar o Sveto lil kaj o Isus trubul te uštel andar e mule. 10 Pale godova e učenikurja boldine pe ke pire manuša. 11 A e Marija ačhelas avri anglo limori thaj rovelas. Sa ande jasva, zavirisarda ando limori 12 thaj dikhla e duj anđelurja sa ando parno sar bešen po than kaj sas e Isusesko telo, jek po than kaj sas e

Isusesko šoro a aver po than kaj sas lešće pungre. **13** E anđelurja phučline lat: "Manušnjije, sostar roves?" A e Marija phendas lende: "Indardine mungre Gospode thaj či džanav kaj čhutine les!" **14** Kana phendas godova, bolda pe thaj dikhla e Isuse sar ačhel, ali či pindžarda kaj si godova vo. **15** O Isus phučla lat: "Manušnjije, sostar roves? Kas rodes?" Voj gndisarda kaj si godova o baštovano, thaj phendas: "Raja, ako tu indardan les, phen mande kaj čutan les, me džava pale leste thaj lava les." **16** Askal o Isus phendas laće: "Marijo!" Voj bolda pe thaj phendas lešće pe židovsko čhib: "Raboni!", so značil: "Učiteljina!" **17** O Isus phendas laće: "Na inčar man akate, kaj još či đelem opre, ko Dad. Nego dža ke mungre phral thaj phen lende: 'Džav opre, ke mungro Dad thaj ke tumaro Dad, ke mungro Del thaj ke tumaro Del.'" **18** Thaj e Marija andar e Magdala đeli thaj javisardas e učenikonende: "Dikhlem e Gospode." Thaj phendas lende okova so o Isus phendas laće. **19** Talerjat, godova prvo đes ando kurko, ando čher ande savo sas e učenikurja zajedno, sa e vudara sas phandade e daratar katar e Židovske vođe. O Isus pojavisajlo, ačhilo maškar lende thaj phendas lende: "Miro tumende!" **20** Kana godova phendas lende, sikada lende e ožiljurja pe pire vas thaj pe pire pašvare. E učenikurja raduisajle kana dikhline e Gospode. **21** Askal o Isus palem phendas lende: "Miro tumende! Sago kaj o Dad bičhaldas man, gajda vi me bičhalav tumen." **22** Kana phendas godova, phurdas pe lende thaj phendas: "Primin e Sveto Duho! **23** Thaj kašće jarton e bezeha, jartome si lende, a kašće či jarton e bezeha, naj lende jartome." **24** A o Toma, jek katar e Dešuduj učenikurja, saves akharenas Blizanco, nas lenca kana avilo o Isus. **25** Aver učenikurja phendine lešće: "Dikhlam e Gospode!" A o Toma phendas lende: "Či pačava sa dok či dikhav e ožiljurja katar e krafina ande lešće vas, thaj ande lende čhav mungro naj, thaj dok či čhav mungro naj ande lešće pašvare." **26** Ohto đes majposle, lešće učenikurja sas palem zajedno ando čher thaj vi o Toma sas lenca. Vi ako sas o vudar zaključime, o Isus avilo, ačhilo maškar lende thaj phendas lende: "Miro tumende!" **27** Askal phendas e Tomašće: "Čho čiro naj akaring thaj dik mungre vas! Inzar čiro vas thaj čho čiro naj ande mungre pašvare! Thaj na av majbut bi pačivalo, nego pača!" **28** A o Toma phendas lešće: "Mungro Gospod thaj mungro Del!" **29** Askal o Isus phendas lešće: "Tu pačas zato kaj dikhlan man. Ali blago okolende save pačan a či dikhline man." **30** A o Isus angle pire učenikurja čerda još but aver čudesne znakurja save naj ramome ande akava lil. **31** Ali akava si ramome te pačan kaj o Isus si o Hristo, Čhavo e Devlesko thaj te gajda

kaj pačan ande leste, avel tumen večno trajo ande lesko alav.

21 O Isus posle godova palem sikada pe pire učenikonende po Tiverijadsko jezero. A sikadilo lende agajda: **2** O Simon Petar, o Toma akhardo Blizanco, o Natanail andar o gav Kana Galilejači, e Zevedejevešće čhave thaj još aver duj e Isusešće učenikurja sas zajedno. **3** O Simon Petar phendas lende: "Džav te astarav mače." A von phendine: "Džas vi amen tusa." Inklijstine avri, dine ando čamco, ali godoja rjat khanči či astardine. **4** A rano ande detharin, o Isus ačhelas pe obala, ali e učenikurja či pindžardine kaj si godova vo. **5** Askal o Isus phučla len: "Čhavoralen, dali astardine vareso?" A von phendine: "Či astardam khanči." **6** A o Isus phendas lende: "Čhuden e mreža pe desno rig katar o čamco thaj astarena." Von čerdine gajda thaj astardine gači mače kaj našti crdenas e mreža katar e but mače save astardine. **7** Askal okova učeniko saves o Isus but volilas phendas e Petrešće: "Godova si o Gospod." Kana o Simon Petar ašundas kaj si godova o Gospod, učarda pe kaj sas gata nango, thaj huklas ando jezero. **8** A okola aver učenikurja avile e čamcosa. Crdenas e mreža e mačhenca pe obala, kaj e obala nas lendar dur, varekaj katar šel meterja. **9** Kana inklijstine pe obala, dikhline već čerdi jag katar o angar thaj pe late čutino mačo thaj mangro. **10** O Isus phendas lende: "Anen varekozom e mače katar akala save akana astardine." **11** Askal o Simon Petar dija ando čamco thaj inkalda pe obala e mreža savi sas pherdi bare mače, šel thaj pandžvardeš thaj trin kotora. Ali vi ako sas gači but, e mreža či pharadili. **12** A o Isus phendas lende: "Aven doručkujin", a ni jek učeniko či usudisajlo te phučel les: "Ko san tu?" kaj džanenas kaj si vo o Gospod. **13** Askal o Isus avilo majpaše, lijas o mangro thaj dija len, a gajda vi o mačo. **14** Sas godova trito data sar o Isus sikadilo pire učenikonende sar uštilo andar mule. **15** Kana haline, o Isus phučlas e Simone Petre: "Simone, čhaveja e Jovanesko, dali volis man majbut katar akala?" A o Petar phendas "Ej, Gospode, tu džanes kaj voliv tut." A o Isus phendas lešće: "Pravar mungre bakhroren." **16** Askal o Isus phučla les po dujto drom: "Simone, čhaveja e Jovanesko, dali volis man?" A o Petar phendas lešće: "Ej, Gospode, tu džanes kaj voliv tut." A o Isus phendas lešće: "Le sama pe mungre bakhre." **17** Askal o Isus phučla les po trito drom: "Simone, čhaveja e Jovanesko, dali volis man?" O Petar sas žalosno kaj po trito drom phučel les: "Volis man?" thaj phendas lešće: "Gospode, tu sa džanes thaj džanes kaj voliv tut." A o Isus phendas lešće: "Pravar mungre bakhren. **18** Čače, čače phenav tuće:

kana sanas majterno korkoro šaj phandavejas čiri haravlji
thaj džajas kaj kamejas. Ali, kana aveja phuro, buljareja čire
vas thaj aver phandavena tut thaj inđarena tut okoring kaj tu
či kameja." 19 O Isus akava phendas te sikavel save smrtosa
o Petar proslavila e Devles. Askal phendas lešće: "Av pale
mande!" 20 A o Petar bolda pe thaj dikhla e učeniko saves o
Isus but volilas sar džalas pale lende, okoles savo pe večera
avilo e Isuseste majpaše thaj phučla les: "Gospode, ko si
čiro izdajniko?" 21 Sar o Petar dikhla les, phučlas e Isuse:
"Gospode, a so avela lesa?" 22 O Isus phendas lešće: "Ako
me kamav te vo ačhel džudo dok me či boldav man, so
godova tut hal briga? Tu samo av pale mande." 23 Gajda
maškar e phral buljarda pe o svato kaj godova učeniko či
merela. Ali o Isus či phendas kaj vo či merela, nego: "Ako
me kamav te vo ačhel džudo dok me či boldav man, so
godova tut hal briga?" 24 Akava si o učeniko savo svedočil
pale akava, vo akava ramosarda thaj amen džanas kaj lesko
svedočanstvo si čačutno. 25 A si još but godova so o Isus
čerda, a kana sa po redo avilosas ramome, gndiv kaj ando
sasto them či ačhile sas e knjige save avile sas ramome.

Dela

1 Poštuime Teofile, ande mungri prvo knjiga ramosardem sa so o Isus počnisarda te čerel thaj te sikavel, 2 sa dži ko đes kana sas vazdino ando nebo, pošto kroz o Sveto Duho dijas upute pire apostolende save izaberisardas. 3 Nakon piro smrto o Isus dijas but dokazurja kaj si džudo. Sikavelas pe e apostolende štarvardeš đesa thaj motholas lende pale Devlesko carstvo. 4 Jekhar, dok sas još lenca, o Isus zapovedisardas lende: "Na durjon andar o Jerusalem, nego ažučaren te pherdol e Dadesko obečanje pale savo majsigo mothavas tumende. 5 Kaj o Jovano bolelas e pajesa, a tumen pale varekazom đesa avena bolde e Sveto Duhosa." 6 Askal okola kaj sas čidine oko leste phučline les: "Gospode, dali tu akana ande akaja vřjama obnovija o Izraelsko carstvo?" 7 A o Isus phendas lende: "Naj tumaro te džanen e vřjame ili e datume save o Dad odredisardas ande piri vlast. 8 Ali kana fuljela pe tumende o Sveto Duho, primina sila te svedočin pale mande ando Jerusalem, thaj pe sasti Judeja thaj ande Samarija thaj sa dži ko krajo e phuvjako." 9 Thaj kana phendas godova, sas vazdino po nebo angle lende jakha, a o oblako garadale lende jakhendar. 10 Thaj dok još sas lende jakha vazdine ando nebo kaj o Isus džalas, andar jekhar ačhile paše lende duj manuša ande blistavo parne drze. 11 Phendine lende: "Manušalen andar e Galileja, sostar ačhen akate thaj dičhen ando nebo? Akava Isus, savo si tumendar vazdino ando nebo, boldela pe isto gajda sago kaj dikhline kaj delotar po nebo!" 12 Askal boldine pe ando Jerusalem katar e gora, savi akhardolas Maslinsko, a sas dur katar o Jerusalem varekaj katar jek kilometar. 13 Kana aresline ando čher kaj bešenas, line pe opre ande soba, a sas okote o Petar, o Jovan, o Jakov, o Andrija, o Filip, o Toma, o Vartolomej, o Matej, o Jakov (e Alfejevsko čhavo), o Simon (saves akharenas pobunjeniko) thaj o Juda (e Jakovesko čhavo). 14 Savora von istrajno thaj jek dušava molinas pe zajedno još varesave manušnjenca. Maškar lende sas vi e Isusešće dej thaj lešće phral. 15 Godola đesa uštilo o Petar maškar e učenikurja, a sas čidino o them varekaj katar šel thaj biš manuša thaj phendas: 16 "Phralalen, trubuja te pherdol okova so si ramome ando Sveto lil palo Juda, savo andas okolen kaj astardine e Isuse. Kaj godova dumut phendas o Sveto Duho kroz e carosko Davidesko muj. 17 Kaj o Juda sas jek amendar thaj sas les talo ande apostolsko služba." 18 (O Juda e lovenca save dobisardas pale pesko bilačo delo steknisardas njiva, ali pelo tele po šoro thaj lesko telo pharlo pe opaš thaj lešće pora čhordile. 19 Akava si pindžardo sa e manušenje save

trajin ando Jerusalem, gajda kaj godoja njiva sas akhardi pe lendi čhib Akeldamah so značil: "Ratvali njiva.") 20 "Kaj ramome si ande knjiga e psalmendi: 'O čher lesko neka avel pusto, neka khonik či trajil ande leste!' thaj: 'Neka lešći služba dobil aver manuš.'" 21 Trubul, dakle, te izabirisaras ječe katar okola manuša kaj sas amenca sa e vřjama, katar o đes kana o Gospod Isus avilo maškar amende thaj dži ko o đes kana delotar amendar, 22 katar e vřjama kana o Jovano teljardas te bolel, pa dži ko đes kana o Isus sas vazdino amendar po nebo. Kasavo manuš nek avel amenca svedoko kaj o Isus uštilo andar e mule." 23 Askal line duje manušen: e Josife saves akharenas Varsava, a savo sas pindžardo vi po alav Just, thaj e Matija. 24 Askal molisajle e Devlešće akale alavenca: "Gospode, tu pindaresh savorende ile. Sikav amende saves izaberisardan katar akala duj 25 te lel akaja apostolsko služba savi o Juda mukla – thaj delo okote kaj pripadil." 26 Askal čhudine kocka pale lende thaj e kocka peli po Matija, savo sas đinado sago dešudujto apostol.

2 Kana avilo o prazniko Pedesetnica, o pandžvardešto đes palo prazniko Pasha, sa e apostolurja sas čidine pe jek than. 2 Katar jekhar andar o nebo ašundili varesavi huka, sago kana phurdel e bari balval, thaj pherdas sasto čher ande savo bešenas. 3 Thaj dikhline vareso slično sago jagače čhibja, save podelisajle thaj fuljistine pe svakoneste lendar. 4 Thaj savora pherdile e Sveto Duhosa thaj počnisardine te čeren svato aver čhibjenca, sar o Duho delas len te čeren svato. 5 A ande godoja vřjama ando Jerusalem sas e pobožne Židovurja save aviline andar svako krajo e themesko talo nebo. 6 Kana ašundine godova zvuko, o but o them čida pes okote zbunime. Kaj svako lendar ašundas sar čeren svato lešće čhibjava. 7 Savora sas zadivime, thaj začudime phučenas: "Dik, naj li akala kaj čeren svato sa Galilejurja?" 8 Pa sar askal svako amendar ašunas len kaj čeren svato pe amari čhib. 9 A akate maškar amende si amen Parćanurja, Međanurja, Elamcurja, manuša andar e Mesapotamija, Judeja, Kapadokija, Ponta, Cikni Azija, 10 Frigija, Pamfilija, Egipto thaj andar e libijske krajurja oko e Kirina, thaj okola andar o Rimo 11 – e Židovurja thaj okola save obratisajle pe židovsko pačipe – e Krićanurja thaj e Arapurja. Savora amen ašunas akale manušen sar pe amare čhibja čeren amende svato pale Devlešće bare dela!" 12 Savora sas zadivime, thaj zbunime phučenas jek avres: "So akava značil?" 13 A aver palem marenas muj e alavenca: "Ma, matile von katar e gugli mol!" 14 Askal o Petar inkljisto anglal, zajedno e dešujeće apostolenca thaj glasno phendas lende: "Židovurja thaj vi tumen savora

save sen ando Jerusalem, čhon kan ke mungre alava. Thaj akava te džanen: **15** Akala manuša naj mate, sago kaj tumen gndin, kaj tek si inja saturja detharinako rano. **16** Nego akava so dičhen si okova pale soste phenelas o proroko Joil: **17** Phenel o Del: 'Ande poslednje đesa, izliva mungro Duho pe sa e manuša. Tumare čhave thaj tumare čheja prorokuina, thaj tumare terne čhaven avela vizije, a tumare phure dičhena sune. **18** Ande godola đesa izliva mungro Duho vi pe mungre sluge thaj pe mungre sluškinje thaj vi von prorokuina. **19** Čerava čudurja opre po nebo thaj e znakurja tele pe phuv: o rat, e jag thaj e oblakurja katar o thuv. **20** O kham pretvorila pe ando tunjariko, a o čhon avela lolo sago o rat majsigo nego so avela o baro thaj o pindžardo đes e Gospodesko. **21** Thaj svako ko akharel ando pomoć o alav e Gospodesko avela spasime.' **22** Manušalen andar o Izrael, ašunen akala alava: O Isus andar o Nazaret sas manuš saves o Del bičhaldas, thaj godova jasno potvrdisarda e bare delenca, e čudenca thaj e znakonenca, save sar vi korkoro džanen, o Del kroz leste čerda maškar tumende. **23** Godova manuš, o Isus, sas predaime ande tumare vas e Devlešće odlukava thaj prema e Devlesko plano saves majanglal zamislisardas. A tumen, zajedno e bidevlešće manušenca, prikuisardine les po trušul thaj mudardine les. **24** Ali o Del vazda les andar e mule thaj oslobodisarda les katar e bare smrtne muke. Kaj o smрто našti inčarda les ande piri vlast. **25** O caro David palo Isus phendas: 'O Gospod si uvek angle mungre jakha. Pošto si vo pe mungri desno rig, khañči či uznemirila man. **26** Zato mungro ilo raduil pe, thaj mungri čhib e bahtatar čhol muj. Čak vi mungro telo trajila ande nada. **27** Kaj či mućeja mungri duša maškar e mule, niti deja te čiro sveco černjol. (Hadēs g86) **28** Sikadan mande e droma e traošće. Pherdo bah angle tute avava.' **29** Phralalen mungralen, pouzdano šaj phenav tumende pale amaro prasad o David: vo mulo thaj prahome si. Lesko limori si akate maškar amende sa dži ađes. **30** Ali sar o David sas proroko, džanglas kaj o obećanje savo o Del dija les kroz e solah, kaj jek đes čhola pe lesko prestolje ječe katar lešće potomkurja. **31** Vo godova majanglal dikhla thaj phendas pale Hristosko vaskrsenje: 'Vo naj muklino maškar e mule niti lesko telo černjilo ando limori.' (Hadēs g86) **32** O Del godole Isuse vazdas andar e mule, a savora sam svedokurja pale godova. **33** Thaj akana si vazdino pe počasno desno rig e Devlešće, vo e Dadestar primisardas o obećanje e Sveto Duhos te izlil les pe amende. Thaj akana godova dičhen thaj ašunen. **34** Kaj o David nas vazdino ando nebo, nego korkoro phenel: 'Phenel o Gospod mungre Gospodešće: "Beš pe mungri počasno desno rig **35** dok

či čhav čire dušmajen tale čire pungere.'" **36** Zato neka sa o them andar o Izrael pouzdano džanel kaj godova Isus, saves tumen razapnisardine, o Del čerda te avel Gospod thaj Hristo!" **37** Kana e manuša godova ašundine, zurale čhinda len ando ilo thaj phučline e Petre thaj e aver apostolen: "Phralalen, so te čeras?" **38** O Petar phendas lende: "Pokajin tumen katar o bezeh thaj neka svako tumendar bolel pe ando alav e Isuse Hristosko te aven jartome tumare bezeha, thaj te primina o daro e Sveto Duhos. **39** Kaj o Del akava obećisarda tumende thaj tumare čhavrende thaj pale sa okola save si dur, saven amaro Gospod o Del akharel peste." **40** O Petar još vi aver alavenca strogo opominjilas len thaj molilas len e alavenca: "Spasin tumen katar o sudo savo avel pe akava rumome naraštaj!" **41** Askal okola save prihvatisardine lešči poruka boldine pe, a godova đes pridružisajlo e vernikonende varekaj katar trin milje manuša. **42** Thaj sa e učenikurja ačhiline paćivale ande apostolsko sikavipe, družinas pe, phađen as o mangro thaj molinas pe. **43** Thaj e dar lija svakone manuše, zato kaj o Gospod kroz e apostolurja čerelas but čudurja thaj znakurja. **44** A savora okola save paćajine sas zajedno thaj delinas sa so sas len. **45** Bićinenas sa so sas len thaj e love delinas svakonešće kozom kas trubulas. **46** Thaj svako đes zajedno jek dušava čidenas pe ando Hramo. A pe čera čidenas pe te phađen as o mangro thaj zajedno hanas iskreno thaj e bahtale ileja. **47** Hvalinas e Devles thaj poštuilas len sa o them. A o Gospod svako đes anelas lende okolen save spasisajle.

3 Kana jekhar o Petar thaj o Jovano džanas ando Hramo pe molitva, ande trin saturja palo mismeri, **2** varesave manuša inđarenas ječe manušes savo sas bango katar piro bijandipe. Svako đes čhonas les anglo Hramosko vudar savo akhardolas Divna, te prosil katar okola manuša kaj avenas ando Hramo. **3** Kana dikhla e Petre thaj e Jovane kaj kamen te den ando Hramo, manglas lendar love. **4** A o Petar e Jovanova lače dikhla pe leste thaj phendas lešće: "Dik pe amende." **5** O bango manuš lače dikhla pe lende, kaj ažučarelas te vareso dobil lendar. **6** A o Petar phendas lešće: "Naj man ni rup ni sunakaj, ali okova so si man godova dav tut: ando alav e Isuse Hristosko andar o Nazaret, ušti thaj phiri!" **7** O Petar askal astardas e manušes palo desno vas thaj vazda les. Ande godova čas o manušešće stopala thaj lešće zgloburja pe pungere odma zurajle, **8** a o manuš huklo pe pešće pungere thaj ačhilo te phirel. Askal dija lenca ando Hramo, phirelas, hutelas thaj slavilas e Devles. **9** Sa e manuša dikhline les sar phirel thaj ašunenas sar slavil e Devles. **10** Kana pindžardine kaj si vo okova isto manušes

savo bešelasi pašo Hramsko vudar savo akhardolas Divna
 taj thaj prosilas, sas but začudime thaj zadivime zbog godova
 so sas lešće. **11** Sar o manuš či durjolas katar o Petar
 thaj katar o Jovano, sa o them začudime prastajine lende
 ando Solomonosko tremo. **12** Kana o Petar godova dikhla
 phendas e themešće: "Izraelcurja, sostar akava čudil tumen?
 Sostar dičen ande amende sago kaj amen amare snagava
 ili godoleja kaj sam pobožne čerdam te akava manuš phirel?
13 O Del e Avraamesko, e Isakosko thaj e Jakovesko, o
 Del amare pradađengo, proslavisarda pire slugas e Isuse,
 saves tumen dine te avel mudardo thaj odreknisardine tumen
 lestar anglo Pilato kana vo već odlučišarda te mučel les.
14 Odreknisardine tumen katar o Isus savo sas Sveco thaj
 Pravedniko, a mangline te mučel pe tumende o ubica. **15**
 Tumen mudardine e Isuse kastar avel o trajo, ali o Del vazda
 les andar e mule, pale soste sam amen svedokurja. **16** Zbog
 o pačipe ande Isusesko alav zurajlo akava manuš saves
 tumen pindžaren thaj kas akana dičen. O pačipe ando Isus
 čerda akale manušes te avel potpuno sasto, sago kaj vi
 korkoro šaj dičen. **17** Phralalen, džanav kaj tumen sago vi
 tumare poglavarja čerdine akava e Isuseja ando biđžanglipe.
18 O Del gajda pherdas okova so majsigo phendas kroz o
 muj sa e prorokonengo – kaj lesko Hristos patila. **19** Zato
 pokajin tumen thaj obratin tumen e Devlešće te jartol pe
 tumende tumare e bezeha, **20** askal avela tumende katar o
 Gospod e vrjama palo duhovno odmor thaj o Gospod palem
 bičhalela tumende e Isuse, saves već odredisardas te avel
 Hristo. **21** Vo moraš te ačhel ando nebo sa dok či avel e
 vrjama kana o Del sa obnovila. Pale godova o Del još dumut
 mothodas kroz pire svete prorokurja. (aiōn g165) **22** Kaj o
 Mojsije phendas: 'O Gospod, tumaro Del, vazdela tumende
 prorokos katar tumaro them sago kaj sem me. Leste čhon
 kan ande sa so phenel tumende! **23** A ko god či čhola kan
 ke godova proroko, neka avel iskorenime andar o them!' **24**
 Thaj sa e prorokurja save mothonas, katar o Samuilo thaj
 katar okola posle leste, najavinas akala đesa. **25** Tumen
 sen naslednikurja palo obećanje saves o Del dijas prekal e
 prorokurja thaj tumen sen učesnikurja ando savez saves o
 Del sklopisardas tumare pradadenca, kaj o Del phendas e
 Avraamešće: 'Čiro potomko avela blagoslov sa e themende
 pe phuv.' **26** O Del vazdas pire slugas e Isuse thaj prvo
 bičhaldala les tumende te blagoslovil tumen thaj te odvratil
 tumen katar tumaro bilačipe."

4 Dok o Petar thaj o Jovano još čerenas svato e themešće,
 aviline dži lende e rašaja, o zapovedniko e hramošće
 stražako thaj e sadukeja. **2** Holjajle pe lende kaj o Petar

thaj o Jovano sikavenas thaj objavinas kaj kroz o Isus si o
 vaskrsenje andar e mule. **3** Astardine len thaj čhudine len
 ande tamnica dži thejara o đesa, kaj sas već e rjat. **4** A
 but katar okola save ašundine e Petrešči poruka paćajine
 thaj gajda o broj o okolengo save paćanas barilo varekaj
 dži ke pandž milje samo muškarcurja. **5** Thejara o đes
 ando Jerusalem sastaisajle e židovske šorvale, e starešine
 thaj e učitelja e zakonestar. **6** Okote sas vi o prvo rašaj o
 Ana, o Kajafa, o Jovano, o Aleksandar thaj vi aver andar e
 prvo rašajendi familija. **7** Von inkaldine e apostolen angle
 peste thaj phučline len: "Save snagava thaj ande kasko
 alav akava čerdine?" **8** Askal o Petar pherdo e Sveto
 Duhosa phendas lende: "E themešće starešinende thaj e
 šorvalende! **9** Ako sam amen ađes inkalde angle tumende
 te ispituin amen pale godova kaj čerdam lačno delo e
 nasvale manušešće thaj phučen men sar vo sastilo, **10** askal
 džanen tumen, thaj sasto Izraelsko them kaj akava manuš
 ačhel angle tumende zato kaj sastilo prekal o alav e Isuse
 Hristosko andar o Nazaret, saves tumen razapnisardine,
 a saves o Del vazdas andar e mule. **11** O Isus si: 'bar
 saves tumen e zidarja odbacisardine, a savo postanisardas
 e temeljesko bar.' **12** Thaj naj spasenje ni ande jek aver
 alav, kaj e manušende naj dino ni jek aver alav pe sasti
 phuv prekal savo šaj spasi men." **13** Kana dikhline kaj o
 Petar thaj o Jovano či daran thaj kana haćardine kaj si
 von obične manuša save nas posebno sikade kroz o sveto
 Lil, začudisajle. Džangline kaj von sas e Isuseja, **14** ali
 sar dikhline kaj o manuš savo sastilo ačhelas okote lenca,
 ačhiline bi alavesko. **15** Askal naredisardine e Petrešće thaj
 e Jovanošće te inkljen avri andar o Veće thaj počnisardine
 te dogovorin pe maškar pende. **16** Phendine: "So te čeras
 akale manušenca? Kaj, savora save trajin ando Jerusalem
 džanen kaj kroz lende dogodisajlo baro čudo thaj amen našti
 phenas kaj nas godova. **17** Ali, te akava sikavipe či buljol još
 majbut maškar o them, zapretisa lende te khonikašće majbut
 či čeren svato ande godova alav." **18** Askal akhardine len,
 thaj naredisardine lende te nipošto majbut ni o muj či putren
 thaj sikaven ande Isusesko alav. **19** Ali o Petar thaj o Jovano
 phendine lende: "Zar smatrin kaj si pravo anglo Del te čhas
 kan tumende, a na ko Del? **20** A amen našti te či čeras
 svato pale okova so dikhlam thaj so ašundam." **21** E manuša
 andar e večnica palem zapretisardine lende, thaj mukline
 len. Pošto našti odlučišardine sar te kaznin len kaj sa o
 them slavilas e Devle pale okova so dogodisajlo. **22** Kaj, o
 manuš savo čudesno sastilo sas les majbut katar štarvardeš
 brš. **23** Čim mukline e Petre thaj e Jovane von boldine
 pe ke aver vernikurja thaj phendine lende sa so phendine

lende e prve rašaja thaj e starešine. 24 Kana e vernikurja godova ašundine, savora zajedno ande jek glaso molisajle e Devlešće: "Gospode, tu stvorisardan o nebo, e phuv, o more thaj sa so si ande lende. 25 Tu e Sveto Duhosa, prekal amaro prasad o David, čiro sluga phendan: 'Sostar bunin pe e manuša save či pindžaren e Devles, a o them ivja zavere čerel? 26 Ušten e carurja e phuvjače thaj e vladarja udružisajle protiv o Gospod thaj protiv lesko Pomazaniko.' 27 Ej, čače o caro Irod thaj o vladari Pontije Pilato ande akava gav udružisajle okolenca save či pindžaren e Devle thaj e Izraelošće themesa protiv čiro sveto sluga o Isus, čiro pomazaniko. 28 Von čerdine okova so tu čire voljava thaj čire silava majanglal odredisardan te avel. 29 A akana, Gospode, ašun lende pretnje thaj de amende čire slugende hrabrost te bi darako mothos averende pale čiro alav. 30 Inzar čiro močno vas, te avel o sastipe, znakurja thaj čudurja – ando alav čire sveto slugasko e Isusesko." 31 Kana završisardine e molitva, činosajlo o than pe savo sas čidine thaj savora pherdile e Sveto Duhosa pa počnisardine hrabro te mothon pale Devlesko alav. 32 Savora okola save pačanas sas sago jek ileja thaj jek dušava. Thaj khonikal či phenelas kaj si vareso so si les samo lesko, nego delinas maškar peste sa so sas len. 33 A e apostolurja e bare silava svedočinas palo vaskrsenje e Gospode Isusesko, thaj e bari milost sas pe lende savorende. 34 Khonikašće lendar khanči či failas. Kaj okolen saven sas phuv ili čher, bičinenas len thaj e dobime love, 35 denas e apostolende, a katar godova delas pe svakonešće kozom kas trubulas. 36 Gajda vi varesavo Levito savo akhardolas Josif, bijando ando Kipar, saves e apostolurja akharenas Varnava (so značil kaj sas manuš savo ohrabrilas), 37 les sas njiva savi bičinda thaj e love dijas e apostolende.

5 A varesavo manuš po alav Ananija zajedno pešće romnjava e Safirava bičinda piri phuv. 2 Thaj ando džanglipe pire romnjako ačhada pale peste jek deo e lovendar, a okova so ačhilo dija ke apostolurja. 3 Askal o Petar phendas lešće: "Ananija, sostar muklan te o Satana pherel čiro ilo, te hohaves e Sveto Duhošće thaj te ačhaves pale tute jek deo e lovendar save lijan pale phuv. 4 Či li e phuv ačhilisas čiri te či bičindanas lat? A kana već bičindan lat, zar godole lovenca našti čerdan so kamlan? Sostar ande čiro ilo odličisardan te čeres gajda vareso? E Devlešće hohadan, a na e manušende." 5 Kana o Ananija ašundas sa akala alava, pelo tele mulo. A e bari dar dijas ande sa okola save ašundine pale akava. 6 Askal varesave terne čhave užtile, pačardine lesko telo ando pohtan, inkaldine

les thaj prahosardine les. 7 A kana nakhlo varekaj katar trin saturja, dijas andre vi lešči romnji, savi či džanglas so sas. 8 O Petar phučla lat: "Phen mande, dali pale gači love bičindine e phuv?" A e manušnji phendas: "Ej baš pale gači love." 9 Askal o Petar phendas lače: "Sostar dogovorisaile te iskušin e Gospodešće Duhos? Ake, anglo vudar si okola kaj prahosardine čire romes. Vi tut inkalena!" 10 Thaj vi voj odma peli tele muli dži ke lešće pungre. Askal dine andre okola terne čhave thaj arakhline lat muli, thaj vi lat inkaldine thaj prahosardine paše lako rom. 11 E saste khandirja thaj sa okolen save ašundine pale akava lijas e bari dar. 12 Prekal e apostolurja dogodinas pe e but znakurja thaj čudurja maškar o them. Sa e vernikurja ječe dušava čidenas pe ande Solomonosko tremo. 13 Khonik avrendar či tromaja te pridružil pe lende, ali o them šukar motholas pala lende. 14 A ipak sa majbut thaj majbut manuša thaj manušnja pačanas ando Gospod thaj priključinas pe e vernikonende. 15 Kana o Petar načhelas, e manuša inkalenas pire nasvalen pe sokača. Čhonas len pe ležaljke thaj pe nosilje gajda te lešči senka barem perel pe lende. 16 Avenas vi but manuša andar e okolne gava oko o Jerusalem thaj anenas pire nasvalen thaj okolen saven mučinas e bilače duhurja. Thaj savora sastile. 17 Askal o baro rašaj thaj sa okola save sas lesa andar e sadukejendi stranka sas but ljubomorne 18 thaj astardine e apostolen thaj čhudine len ando glavno phanglipe. 19 Ali e Gospodesko andelo račava putardas o vudar katar e tamnica, inkalda len avri thaj phendas lende: 20 "Džan ando Hramo thaj mothon e themešće sa pale akava nevo Trajo." 21 Kana e apostolurja godova ašunde, đeale ando Hramo detharinako ande zora thaj sikavenas e themes. Kana avilo o baro rašaj thaj okola save sas lesa, čidine sa okolen andar o Baro veče thaj sa e starešinen andar o Izraelsko them thaj dine naredba te anen pe e apostolurja andar o phanglipe. 22 Ali, kana e stražarja arese ando phanglipe, či arakhline len okote, gajda kaj boldine pe palpale thaj phendine: 23 "O vudar katar e tamnica sas pe čija lače phandado, a e stražarja ačhenas anglo vudar. Ali kana putardam o vudar či arakhlam andre khonikas!" 24 A kana o zapovedniko pe hramošće stražarja thaj e šorvale rašaja ašundine akava so mothodine, sas zbunime thaj phučenat pe so šaj avel akava. 25 Pe godova vareko avilo thaj phendas lende: "Eke okola manuša saven arači čhudine ando phanglipe ando Hramo si thaj sikaven e themes!" 26 Askal o zapovedniko pale hramsko straža delo e stražarenca thaj andine e apostolen, ali na pe sila kaj daranas te o them či čudel bara pe lende. 27 Kana andine len, čhutine len anglo Baro veče thaj o baro rašaj phučelas len: 28 "Či li strogo mothodam tumende te na

sikaven ando alav godole manuško? A tumen pherdine o sasto Jerusalem tumare sikavipeja thaj kamen te čhon e doš pe amende palo smrto godole manuško!" 29 A o Petar thaj e apostolurja phendine lende: "E Devlešće trubul te avas paćivale majsigo nego e manuškende! 30 O Del amare pradadengo vazdas e Isuse andar e mule, saves tumen mudardine gajda kaj čhutine les po trušul. 31 Ali o Del uzvisisarda les thaj čhuta les pe piri desno rig sago Princos thaj Spasitelj, te e manuškende andar o Izrael del prilika te obratin pes thaj te jarton pe lende e bezeha. 32 Amen sam svedokurja pale sa godova thaj o Sveto Duho saves o Del dijas okolende save pokorin pe lešće." 33 Kana e manuša andar o Baro veće ašundine akava, gači holjajle kaj kamenas te mudaren len. 34 Askal ando Baro veće uštulo jek učitelj palo Mojsijesko zakon, savo akhardolas Gamalilo, fariseji saves sa o them poštuilas. Vo phendas te inkalen e apostolen cara avri. 35 Askal phendas: "Manušalen andar o Izrael, lačhe gndin tumare šoresa so kamen te čeren akale manušenca. 36 Kaj majsigo varesavi vrjama pojavisajlo o Tevda savo motholas pale peste kaj si vo vareko thaj vareso. Lešće pridružisajle štar šela manuša, ali vo sas mudardo, a sa lešće manuša našline thaj katar godova nas khanči. 37 Pale leste, ande vrjama kana sas o popis stanovništva, pojavisajlo o Juda Galilejco thaj vazdas e theme pe buna. Ali vi vo sas mudardo, a sa lešće manuša našline. 38 Zato pale akava phenav tumende: mučen tumen akale manuškendar thaj den len te džantar. Kaj, te si lengo naum ili lengo delo katar e manuša, vi godova propadnila. 39 A te si e Devlestar, našti uniština len, kaj gajda avena sago okola kaj borin pe protiv o Del." Thaj von složisajle lesa. 40 Askal akhardine e apostolen andre, izbičuisardine len, thaj zabranisardine lende te sikaven ande Isusesko alav, askal mukline len. 41 A e apostolurja đeletar andar o Baro veće bahtale, kaj sas dostojne te han ladžavo zbog e Isusesko alav. 42 Thaj či prestainas svako đes ando Hramo thaj pe čhera te sikaven thaj navestin kaj si o Isus o Mesija.

6 Godola đesa, sar o broj o učenikonengo sa majbut barjolas, e Židovurja save čerenas svato grčki počnisardine te žalin pes pe aver Židovurja. Phenenas kaj lende udovice si zanemarime kana delil pe svako đes o habe. 2 Askal e dešuduj apostolurja akhardine peste sa e učenikonen thaj phendine lende: "Naj lačhe te amen zanemaris te propovedisaras e Devlesko alav thaj te delis o habe. 3 Zato, phralalen, aračhen maškar tumende ehta manušen save si po lačo glasno, thaj pherde e Sveto Duhosa thaj mudrost. Len čhasa pale godova, 4 a

amen posvetisa men e molitvaće thaj te propovedisaras andar o alav e Devlesko." 5 Godova predlog sviđosajlo savorende. Thaj losardine e Stefane, manuše savo sas pherdo paćipe thaj Sveto Duhosa, e Filipe, e Prohore, e Nikanore, e Timone, e Parmene thaj e Nikola andar e Antiohija savo majsigo obratisajlo po židovsko paćipe. 6 Askal andine len angle apostolurja, von čhutine pire vas pe lende thaj pomolisajle pale lende. 7 Gajda e Devlesko alav buljolas. A o broj o učenikonengo ando Jerusalem but barjolas, a vi e but židovende rašaja počnisardine te paćan. 8 O Stefan sas manuš pherdo milosti thaj sila thaj čerelas e bare čudurja thaj znakurja maškar o them. 9 Ali, pobunisajle protiv leste varesave andar e Sinagoga okolendi save sas oslobodime roburja, e Židovurja andar e Kirina, Aleksandrija, thaj varesave anda e Kilikija thaj e Cikni Azija, thaj počnisardine te raspravin pe e Stefanesa. 10 Ali khonik lendar našti protivisajlo protiv e mudrost thaj e Duhošće saveja čerelas svato. 11 Askal nagovorisardine varesave manušen te phenen: "Ašundam les sar vredol e Mojsija thaj e Devle." 12 Gajda pobunisardine e theme, e starešinen thaj e učiteljen e zakonestar, pa navalisardine pe leste, astardine les thaj indardine les anglo Baro veće. 13 Andine vi e hohavne svedokonon save phendine: "Akava manuš neprestalno mothol protiv o Hramo thaj protiv e Mojsijesko zakon. 14 Ašundam les kaj phenel sar godova Isus andar o Nazaret haravela o Hramo thaj promenila e običaja save dija men o Mojsija." 15 A savora save bešenas ando Baro veće lačhe dikhline po Stefano thaj dikhline o muj lesko sas sago e andelosko.

7 Askal o baro rašaj phučlas e Stefane: "Dali si gajda akava so mothon?" 2 A o Stefano phendas: "Phralalen thaj dadalen, ašunen man! O slavno Del sikadilo amare pradadešće e Avraamešće kana sas ande Mesopotamija, majsigo nego so doselisajlo ando Haran 3 thaj phendas lešće: 'Muk akaja phuv thaj čire familija maškar savi trajis thaj dža ande phuv savi sikavava tuće.' 4 Thaj o Avraam gajda mukla e phuv e Haldejendi thaj doselisajlo ando Haran. Nakon so mulo lesko dad, o Del anda les ande akaja phuv kaj tumen akana trajin. 5 Ali či dija les ande late ni jek majcikno kotor phuv ando nasledstvo, nego obećisarda kaj dela e phuv lešće thaj lešće potomkonende posle leste, vi ako e Avraame još nas čhavra. 6 O Del gajda phendas lešće: 'Čire potomkurja avena strancurja ande averendi phuv. Okote avena roburja thaj avena mučime štar šela brš.' 7 Ali o Del phendas: 'Me sudiva e themes kašće von robuina, a posle godova inkljena andar godoja phuv thaj avena te služin

man pe akava than.' 8 Askal o Del čerda savez e Avraameja thaj dija les obrezanje sago znako godole savezosko. E Avraamešče askal bijandilo o Isak saves obrežisarda ohtoto đes katar lesko bijandipe. O Isako gajda čerda pire čhaveja e Jakoveja, a o Jakov pire dešduje čhavenca save sas patrijahurja katar save postanisardas amaro them. 9 A e Jakovešče čhave, e patrijarhurja, sas ljubomorne pe pesko phral po Josif, thaj zbog godova bičindine les sago robo ando Egipto. Ali o Del sas lesa, 10 thaj inkhalelas les andar svako lešči nevolja. O Del dija les mudrost, thaj naklonost e faraonešči, e egipatsko carošči, savo čhuta les te avel upravniko po sasto Egipto thaj pe sasto lesko dvoro. 11 Askal ande sasti egipatsko phuv thaj ando Hanaan avili e bok thaj bari nevolja, gajda kaj amare pradada naši aračhenas hamasko. 12 Kana o Jakov ašundas kaj ando Egipto si div, bičhaldas okote amare pradaden po prvo data. 13 Kana đeline po dujto drom, o Josif phendas pire phralenđe ko si vo. Gajda o faraon ašundas pale Josifešči familija. 14 O Josif askal bičhaldas pale pesko dad palo Jakov thaj pale sasti piri familija save sas eftavardeš thaj pandž džene. 15 Gajda o Jakov delo tele ando Egiptat kaj mulo vo thaj amare pradada. 16 Lende telurja sas inđarde ando Sihem thaj okote sas prahome ando limori savo o Avraam čindas pale odredime svota love katar Emorošče čhave. 17 Sar avelas paše e vrjama te perdol so o Del obečisarda e Avraamešče, amaro them ando Egipto barjolas thaj množilas pe, 18 sa dok či zavladisardas ando Egipto o nevo caro, savo či pinđarelas e Josife. 19 Vo lukavo postupilas amare themeja: mučilas amare pradaden thaj tradelas len te mučen pire tek bijande čhavren avri te meren. 20 Ande godoja vrjama bijandilo o Mojsije, savo sas zurale šukar čavro ande Devlešče jakha. Trin čhon sas barjardo ande pe dadesko čher. 21 Kana mukline les avri, e faraonešči čhej lija les thaj barjarda les sago pire čhave. 22 O Mojsije sas sikado ande sasti e Egipatsko mudrost thaj sas silno ande alava thaj pe dela. 23 Kana sas lešče štarvardeš brš, crdelas les o ilo te džal te dičhel pire phralen e Izraelsko themes. 24 Kana dikhla kaj varesavo Egipcáno mučil e Izraelco, ačhilo ande lešči obrana thaj osvetisarda les gajda kaj mudardas e Egipcános. 25 Gindilas kaj lešče phral hačarena kaj o Del preko leste bičhalel lende oslobođenje, ali von godova či hačardine. 26 Thejara đes palem dija pe duj Izraelcurja sar marens pe. Probisarda te pomiril len gajda kaj phendas lende: 'Manušalen, phrala sen! Sostar čeren zlo jek avrešče?' 27 Ali okova kaj marelas pire pašutnes, spida e Mojsija thaj phendas lešče: 'Ko čhuta tut te aves amaro vladari thaj amaro sudija?' 28 Kames vi man te mudares sago kaj arači

mudardan okole Egipcános?' 29 Kana o Mojsije godova ašundas našlo ande midjansko phuv thaj okote trajilas sago stranco, kaj bijandile lešče duj čhave. 30 Posle štarvardeš brš sikadilo lešče o anđelo ande pustinja paše ke Sinajsko gora ando grmo savo phabolas. 31 Kana o Mojsije dikhla godova, zadivisajlo godolešče so dičhel. Ali kana avilo majpaše te majlače dičhel, ašunda e Gospodesko glaso: 32 'Me sem o Del čire pradadengo, o Del e Avraamesko, e Isakosko, thaj e Jakovesko.' O Mojsije izralas e daratar thaj či tromaja e jakha te vazdel te dičhel. 33 O Gospod phendas lešče: 'Fuljar e sandale katar čire pungre! Kaj o than pe savo aches, si sveto. 34 Dikhlem e muka mungre themešči ando Egiptat thaj ašundem lengo jauk. Andar godova fuljistem te inkalav len okotar. A akana, ajde dža, me bičhalav tut ando Egiptat!' 35 Akale Mojsija saves e Židovurja odbacisardine kana phendine: 'Ko čhuta tut te aves amaro vladari thaj amaro sudija?', o Del baš akana les bičhaldas prekal o anđelo savo sikadilo lešče ando grmo te avel vladari thaj izbavitelj. 36 Vo inkalda len okotar gajda kaj čerelas čudurja thaj znakurja ande egipatsko phuv, po Lolo more thaj štarvardeš brš ande pustinja. 37 Isto godova Mojsije phendas e Izraelošče themešče: 'O Del vazdela tumende prorokos sago kaj sem me andar tumaro them.' 38 Isto godova Mojsije si okova savo sas posredniko maškar amare pradada ande pustinja thaj maškar o anđelo savo dija les o alav e trajosko pe Sinajsko gora te predail godola alava amende. 39 Amare pradada či kamline te pokorin pe lešče, nego odbacisardine les thaj e ileja palem boldine pe ando Egiptat. 40 Phendine e Aronešče: 'Čer amende devlen save džana angle amende! Kaj či džanas so si okole Mojsijava savo inkalda men andar o Egiptat.' 41 Godola đesa čerdine kipo ando oblik terne guruvesko, dine lešče žrtva thaj slavinas godova so čerdine pire vastenca. 42 Askal o Del bolda pes lendar thaj mukla len te klanjin pe e khamešče thaj e čerejende, sago vi kaj ačhel ramome ando lil e prorokonengo: 'Zar mande dijan žrtve thaj darurja ande pustinja štarvardeš brš, manušalen andar o Izrael?' 43 Na, nego inđarenas o šator e Molohosko e hohamne devlesko thaj e čerain katar tumaro del o Refan; kipurja save čerdine te klanjin tumen lende. Zato inđarava tumen ando progonstvo', majdur katar o Vavilon! 44 Amare predaden sas Šator svedočanstva ande pustinja. O Del phendas e Mojsijašče sar te čerel o šator thaj o Mojsija čerda o šator gajda sar sas lešče sikado. 45 Kana amare pradada primisardine o Šator, inđardine les pesa ande phuv, savi line katar o them saven o Del angle lende trada, a o Isus Navin sas lengo vođa. O Šator ačhilo okote sa dži e vrjama e carošči Davidešči. 46 O David arakhlas milost ko

Del thaj zamolisarda e Devle te šaj sagradil Hramo palo Del e Jakovesko, 47 ali tek o Solomon vazdas lešće o Hramo. 48 Ipak o majbaro Del či trajil ande Hramurja save si čerde e manušenđe vastenca, sago kaj phenel o proroko: 49 'O nebo si mungro prestolje, a e phuv si tale mungre pungre: Sosko čher vazdena mande? Phenel o Gospod, thaj kaj si o than kaj me odmoriva? 50 Či li sa akava mungro vas stvorisarda?' 51 O tumen tvrdoglave manušalen save či pindžaren e Devle thaj či čhon kan leste! Tumen uvek protivin tumen e Sveto Duhošće, sago kaj godova čerenas vi tumare pradada! 52 Kas katar e prorokurja tumare pradada či progonisardine? Mudardine čak vi okolen save majsigo phendine kaj avela o Pravedniko, saves tumen izdaisardine thaj mudardine. 53 Prekal o anđelo dobisardine o zakon, ali či inčardine les!" 54 Kana godova ašundine e židovske vođe, gajda holjajle po Stefan kaj počnisardine te škripin e dandanca pe leste. 55 A o Stefano pherdo e Sveto Duhosa, vazda pire jakha po nebo thaj dikhla e slava e Devlešči thaj e Isuse sar ačhel pe desno rig e Devlešči. 56 Askal phendas: "Ake dikhav o nebo putardo thaj e Čhave e Manušešće sar ačhel pe desno rig e Devlešči." 57 Pe godova von učardine pire kan e vastenca thaj počnisardine te čhon muj andar sasto glaso, thaj savora sar jek navalisardine pe leste. 58 Inkaldine les andar o gav thaj čhudenas bara pe leste. A e svedokurja protiv o Stefano mukline pire ogrtačurja jeće terne manušešće savo akhardolas Savle te lel sama pe lende. 59 Dok čhudenas bara pe leste te mudaren les, o Stefano zavapisardas: "Gospode Isuse, primisar o mungro duho!" 60 Askal pelo pe pire kočā thaj čhuta muj andar sasto glaso: "Gospode, na le lende kava palo bezeh!" Sar godova phendas, mukla pesko đī.

8 A o Savle odobrisardas e Stefanesko mudaripe. Godova đes počnisarda o baro progonstvo pe Khandiri ando Jerusalem. Pa sa e vernikurja, osim e apostolurja, raspršisajle pe judejske thaj pe samarijanske krajurja. 2 A varesave pobožne manuša prahosardine e Stefane thaj zurale rovenas pale leste. 3 A o Savle saste silava trudilas pe te uništil e Khandiri. Džalas andar o čher dži ko čher thaj inkalelas avri e manušen thaj e manušnjen thaj čhuelas len ando phanglipe. 4 A okola vernikurja save raspršisajle, buljarenas e Bahtali nevimata kaj god džanas. 5 Gajda o Filip avilo ande jek samarijansko gav, thaj okote propovedilas e themešće palo Hristo. 6 Kana o them ašundas thaj dikhla e čdurja save čerelas, savora pažljivo čhonas kan so phenelas. 7 E bilačhe duhurja zurale rkjinās kana inkljenas andar e but manuša ande save sas, a sastonas vi but okola save sas line

thaj bande. 8 Thaj ande godova gav gajda zavladisardas e bari bah. 9 A ande godova gav sas vi varesavo manuš, savo akhardolas Simon, vo već varesavi vrjama okote drabarelas. E manuša save trajinas ande Samarija divinas pe lešće, a vo phenelas pale peste kaj si vo baro manuš. 10 Thaj savora pažljivo čhonas kan leste katar o majcikno dži ko majbaro thaj phenenas: "Akava manuš si čače sila e Devlešči, savi akhardol bari sila." 11 A čhonas kan leste zato kaj već lungo vrjama zadivilas len pire čirimatencia. 12 Ali kana pačaine e Filipešće, savo propovedilas e Bahtali nevimata pale Devlesko carstvo thaj palo alav e Isuse Hristosko, bolenas pe e manuša thaj e manušnja. 13 Čak vi o Simon korkoro pačaja, bola pe thaj ačhilo e Filipeja. Zadivime dičhelas e znakurja thaj e bare čdurja save dogodinas pe. 14 Kana e apostolurja ando Jerusalem ašundine kaj ande Samarija prihvatisardine e Devlesko alav, bičhaldine lende e Petre thaj e Jovano. 15 Kana von duj džene aresline pomolisajle pale lende te vi von primin e Sveto Duho. 16 Kaj o Sveto Duho još či fuljisto pe niječeste lendar pošto sas bolde samo ando alav e Gospodesko Isusesko. 17 Askal e apostolurja čhutine pire vas pe lende, thaj von primisardine e Sveto Duhos. 18 Kana o Simon dikhla kaj e manuša primin e Sveto Duhos, čim e apostolurja čhutine pire vas pe lende, ponudisarda e apostolende love 19 thaj phendas lende: "Den vi man godoja moć te svako pe kaste čhav mungre vas primil e Sveto Duhos!" 20 A o Petar phendas lešće: "Neka propadnin čire love zajedno tusa, kaj gndis kaj e lovenca šaj čines e Devlesko daro! 21 Tu našti sudeluis ande akaja služba, kaj čiro ilo naj ispravno anglo Del. 22 Zato pokaji tut thaj muk tut katar čiro bilačhipe. Moli tut e Gospodešće te jartol tuće kaj sas tu kasavi gindimata. 23 Kaj dikhav kaj san pherdo gorčine thaj robo e bezehešće." 24 A o Simon phendas: "Tumen molin tumen pale mande e Gospodešće te či aresel man khanči katar godova so phendine." 25 Nakon so svedočisardine lende palo Isus thaj objavisardine lende e Gospodesko alav, von boldine pe ando Jerusalem. E dromesa načenas kroz e but e samarijanske gava thaj navestinas e Bahtali nevimata. 26 O anđelo e Gospodesko phendas e Filipešće: "Ušti thaj teljar po jugo e dromesa savo inđarel kroz e pustinja thaj mučel pe tele andar o Jerusalem ande Gaza." 27 O Filip spremisajlo thaj teljardas. Dromesa maladas varesave evnuho, manuše andar e Etiopija – savo sas dvoraniko e Kandako, e etiopske caricako thaj upravniko e riznicako. Sas ando Jerusalem te poklonil pe e Devlešće, 28 thaj kana boldelas pe čhere. Bešelās ande piri kočija thaj po glaso čitolas andar o lil e proroko Isaijasko. 29 Askal o Sveto Duho phendas e Filipešće: "Dža paše dži ke godoja

kočija thaj ačh uz late!" 30 O Filip prastaja dži ke kočija thaj ašundas sar o manuš čitol andar o proroko Isajja thaj phučla les: "Dali hačares so čitos?" 31 A o manuš phendas: "Sar šaj te hačarav ako khonik či objasnil mande?" Thaj akhardas e Filipe te lel pe opre ande kočija thaj te bešel paše leste. 32 A o odlomko andar o Sveto lil savo čitosardas sas akava: "Indardine les sago e bakhre tale čhuri. Thaj sago o bakhro nemo angle okola save randen les, gajda ni vo či putrelas piro muj. 33 Sas ponizime thaj uskratime katar e pravda. Ko čerela svato pale lešče potomkurja kaj lesko trajo lija pe katar e phuv." 34 O dvoraniko askal phučla e Filipe: "Moliv tut, phen mande ko si godova pale kaste phenel o proroko? Dali godova o proroko phenel pale peste ili pale varekaste avreste?" 35 Askal o Filip teljardas te sikavel les katar godova than andar o Lil thaj te objasnil lešče e Bahtali nevimata palo Isus. 36 Thaj dok gajda džanas e dromesa, aresline dži ke varesavo paj, pa o dvoraniko phendas: "Dik, ake o paj! So sprečil man te bolav man?" 37 [A o Filip phendas lešče: "Šaj ako pačas čire saste ileja." A o dvoraniko phendas: "Pačav kaj si o Isuso Hristo Čavo e Devlesko."] 38 Askal o dvoraniko zapovedisarda te ačhel e kočija thaj liduj džene fuljistine dži ko paj, thaj o Filip bolda les. 39 A kana inklijstine andar o paj, e Gospodesko Duho otmisarda e Filipe thaj o dvoraniko majbut či dikhla les thaj bahtalo nastavisarda pire dromesa. 40 A o Filip arakhadilo ando gav Azot, thaj e dromesa dok putuilas propovedilas e Bahtali nevimata pe sa e gava sa dok či areslo ande Kesarija.

9 A o Savle, vi majdur e holjasa pretilas kaj mudarela e Gospodešče učenikonen. Andar godova delo ko Baro rašaj 2 thaj manglas lestar lila pale sinagoge ando Damask te šaj astarel inča svakones savo sledil e Gospodesko drom, bilo te si manuš ili manušnji thaj te phangle šaj anel len ando Jerusalem. 3 Kana avilo paše dži ko Damask, katar jekhar o baro svetlo andar o nebo zasvetlisarda les. 4 Askal pelo pe phuv thaj ašunda o glaso savo motholas lešče: "Savle! Savle! Sostar progonis man?" 5 O Savle phučla les: "Ko san tu, Gospode?" A o glaso phendas: "Me sem o Isus saves tu progonis. 6 Nego, ušti akana thaj dža ando gav! Okote phenela pe tuče so trubul te čeres." 7 A okola manuša kaj džanas e Savleja ačhile bi alavesko, kaj ašundine o glaso, ali či dikhline khonikas. 8 Kana o Savle uštilo katar e phuv, putardas pešče jakha, ali khanči našti dičhelas. Zato astardine les palo vas thaj andine les ando Damask. 9 Trin desa našti dičhelas, a pale godoja vrijeme či halas ni pijelas. 10 Ando Damask trajilas varesavo učeniko savo akhardolas Ananija. Lešče o Gospod phendas ando viđenje:

"Ananija!" A o Ananija phendas: "Akate sem, Gospode." 11 A o Gospod phendas lešče: "Ušti, thaj dža ando sokako savo akhardol Pravo, ande Judasko čer, thaj okote rode e manušes savo akhardol Savle andar o Taršiš! Eke vo akana molil pe." 12 O Savle ando viđenje dikhla ječhe manušes savo akhardolas Ananija sar del andre thaj čhol pire vas pe leste te šaj dičhel. 13 O Ananija phendas: "Gospode, ašundem e bute manušendar kaj akava manuš čerda but bilačhipe čire svete manušende ando Jerusalem! 14 Čak vi pale akate si les vlast katar e bare rašaja te phandel ande okurja sa okolen save pačan ande čiro alav." 15 O Gospod phendas lešče: "Dža kaj godole manušes lijem te preko leste ašunen pale mande e aver thema, e carurja, thaj o izraelsko them. 16 Me sikavava lešče kozom trubul te trpil pale mungro alav." 17 O Ananija delo, dijas ande godova čer thaj čhuta pire vas po Savle thaj phendas lešče: "Phrale Savle! O Gospod Isus, savo sikadilo tuče po drom akaring, bičhaldan man te šaj dičhes thaj te pheres tut e Sveto Duhosa." 18 Isto treno katar lešče jakha pelo vareso sago ljuske, thaj šaj dičhelas. Askal uštilo thaj sas boldo. 19 Askal hala vareso thaj bolda pe lešči snaga. O Savle ačhilo varekazom đesa e učenikonenca ando Damask. 20 Thaj odma ačhilo te propovedil pe sinagoge kaj o Isus si Čavo e Devlesko. 21 Thaj savora save ašunenas les, sas začudime thaj phučenass pe: "Pa naj li akava okova isto manuš savo ando Jerusalem kamlas te uništil okolen save pačan ande godova alav? Zar či avilo akate te astarel len thaj te phangle indarel len angle šorvale rašaja?" 22 A e Savlesko propovedanje sas sa majsilno, gajda kaj mučelas e Židoven andar o Damask bi alavengo. Dokažilas kaj o Isus si o Hristo. 23 Nakon so nakhline but đesa, e židovske vođe odlučisardine te mudaren e Savle. 24 Ali o Savle saznajisardas pale lengo gindo. A e Židovurja lenas sama đesenca thaj e račenca pe gavesko vudar te šaj mudaren les. 25 Ali e učenikurja e račava mukline les ande bari korpa prekal e gavesko zido. 26 Kana o Savle avilo ando Jerusalem, kamla te pridružil pes e učenikonenđe, ali savora daranas lestar, kaj či pačanas lešče kaj si vi vo učeniko. 27 Askal o Varnava prihvatisarda les thaj indarda les ke apostolurja. O Varnava čerda svato e apostolende sar o Savle po drom dikhla e Gospode savo motholas lešče thaj sar ando Damask hlabro propovedilas ande Isusesko alav. 28 Gajda o Savle ačhilo lenca, phirelas po Jerusalem thaj hlabro propovedilas ande Gospodesko alav. 29 Čerelas svato thaj raspravilas pe e Židovenca save čerenas svato grčki, ali von dičhenas te mudaren les. 30 Kana ašundine pale godova e vernikurja, indardine les ande Kesarija thaj bičhaldine les čere ando

Tars. 31 Gajda e khandiri ande sasti Judeja, Galileja thaj ande Samarija sas ando miro. E khandiri zuravolas ande dar e Gospodešči thaj brojčano barjolas ande uteha e Sveto Duhošči. 32 Kana o Petar načelas maškar akala regije, avilo vi ke Devlešče manuša ando gav savo akhardolas Lida. 33 Okote arakhlas ječe manuše savo akhardolas Enej, savo pašjolas ohto brš bango ando kreveto. 34 O Petar phendas lešče: "Enej, o Isus Hrist sastarel tut. Ušti thaj lačhar čiro kreveto!" Thaj o Enej odma uštilo! 35 Kana dikhline e Enej, sa e manuša save trajinas ande Lida thaj ando Saron, obratisajle e Gospodešče. 36 Ande Jopa, trajilas jek učenica savi akhardolas Tavita (so značil: "Košuta"). Voj uvek čerelas lačhipe thaj pomožilas e čore manušen. 37 Baš ande godoja vrjama voj nasvajli thaj muli. Najardine lat thaj čutine lat ande soba po sprato. 38 Ali kana ašundine kaj si o Petar paše ando gav Lida, bičhaldine leste duj manušen thaj zamolisardine les: "Av odma amende!" 39 Zato o Petar odma teljarda lenca. Thaj čim areslo inčardine les ande soba savi sas opre po sprato. Okote okružisardine les e udovice save rovenas thaj sikavenas lešče e ogrtača thaj e aver drze save čerda lende e Tavita dok sas lenca. 40 Ali o Petar trada len sa avri andar e soba. Dija koča thaj pomolisajlo e Devlešče. Askal bolda pe ko mulo telo thaj phendas: "Tavita, ušti!" Voj putardas pire jakha, dikhla e Petre thaj bešli. 41 Vo astarda lat palo vas thaj vazda lat. Askal akharda e vernikonen thaj e udovicen thaj sikada lende kaj si džudi. 42 Pale akava ašundine sa e stanovnikurja andar e Jopa, thaj but lendar pačajine ando Gospod. 43 O Petar ačhilo ande Jopa još varesavi vrjama, ando čer ječe manušesko savo sas kožari, a akhardolas Simon.

10 Ande Kesarija trajilas varesavo manuš savo akhardolas Kornelije. Vo sas rimsko kapetano e četako savi akhardolas Italijansko. 2 Vo sas pobožno manuš thaj daralas e Devlestar, sago vi savora save trajinas lesa ando čer, delas milostinja e čore Židovende thaj stalno molilas pe e Devlešče. 3 Jek des varekaj katar e trin saturja mismere, sas les vizija ande savi jasno dikhla sar avel leste e Devlesko anđelo thaj phenel lešče: "Kornelije!" 4 O Kornelije dikhla pe leste e darasa thaj phučlas: "So kames Gospode?" A o anđelo phendas lešče: "Čire molitve thaj e milostinje aviline anglo Del sago žrtva thaj vo dija pe gođi tute. 5 Akana bičhal e manušen ande Jopa te anen e Simone saves akharen Petar. 6 Vo si gosto ko Simon savo si kožari, kasko čer si pašo more." 7 Kana o anđelo savo motholas lešče delotar, o Kornelije akhardas e duje slugen thaj ječe pobožno vojniko savo sas jek katar lešče pomoćnikurja, 8 thaj phendas lende

sa so sas thaj bičhalda len ande Jopa. 9 Thejara o des, varekaj katar o mismeri, dok von sas još po drom thaj sas več paše ke Jopa, o Petar lija pe opre po krovo te molil pe. 10 Bokhajlo thaj kamlas vareso te hal. Ali dok andre pripreminas lešče o habe, les sas vizija. 11 Dikhla sar o nebo putavol, a vareso sago baro čašapo phanglo pe štar čoškurja mučel pes pe phuv. 12 Ande leste sas svakojake vrste životinje pe štar pungere, gmizavcurja thaj e čiriklja. 13 Askal varesavo glaso phendas lešče: "Ušti Petre, de čhurjasa thaj ha!" 14 A o Petar phendas: "Nisar, Gospode! Me nikada či halem khanči nečisto so zabranil amaro Zakon!" 15 A o glaso palem phendas lešče. "Na phen kaj si zabranime okova so o Del phenas kaj si čisto!" 16 Akava sas trin drom thaj katar jekhvar o čašapo vazda pe palpale po nebo. 17 Dok o Petar sas još zbnunime so godoja vizija šaj te značil, e manuša saven o Kornelije bičhaldas phučenass kaj si e Simonesko čer, thaj več aresline angle kapija. 18 Akhardine thaj phučline dali si akate ande goste o Simon saves akharen Petar. 19 Dok o Petar još gindilas pale okova so dikhla ando viđenje, o Sveto Duho phendas lešče: "Ake roden tut trin manuša. 20 Ušti, fulji tele thaj dža lenca. Na oklevisar kaj me bičhaldem len." 21 O Petar fuljisto thaj phendas lende: "Me sem okova saves roden. Sostar aviline?" 22 A von phendine: "Bičhalda men o rimsko kapetano o Kornelije. Vo si pravedno thaj daral e Devlestar, manuš saves poštuin sa e Židovurja. O sveto anđelo phendas lešče te akharel tut ande piro čer thaj te čhol kan so si tut te phenes lešče." 23 Askal o Petar akharda len te den andre ando čer thaj ugostisarda len. Thejara o des spremisajlo thaj teljarda lenca, a lesa teljardine vi varesave phral andar e Jopa. 24 Aver des aresline ande Kesarija. A o Kornelije ažučarelas len zajedno pire familijava thaj e majpaše drugarenca. 25 A kana o Petar dijas ando čer, o Kornelije inklijisto angle leste, pelo dži ke lešče pungere thaj poklonisajlo lešče. 26 Ali o Petar vazda les thaj phendas lešče: "Ušti, kaj vi me sem samo manuš. 27 Sar čerelas svato leja, gajda dija andre thaj dikhla e bute manušen save čidine pe." 28 O Petar phendas lende: "Tumen lače džanen kaj e Židovende o Zakon či mučel te družin pe tumenca save naj sen Židovurja ili te den ande tumare čera. Ali mande o Del sikada te khonikas či smatriv kaj si nečisto thaj pogano. 29 Zato avilem bi alavesko čim akhardine man. A akana phenen mande sostar akhardine man." 30 Pe godova o Kornelije phendas: "Majsigo štar đesa, ande isto akaja vrjama, ande trin saturja mismere, semas ande mungro čer thaj molisajlem. Andar jekhvar angle mande pojavisajlo o manuš ande sjajne drze 31 thaj phendas mande: 'Kornelije, o Del ašundas čiri molitva

thaj dija pe godi ke čiri milostinje e čorende. **32** Zato bičhal varekas ande Jopa te akharel e Simone saves akharen Petar. Vo si gosto ando čer e Simonesko savo si kožari pašo more.' **33** Gajda odma bičhaldem pale tute, thaj lače si kaj avilan. Akana savora ačas akate anglo Del te ašunas sa so o Gospod zapovedisarda tuće te phenes amende!" **34** Askal o Petar počnisarda te mothol: "Akana čače hačarav kaj o Del či čerel razlika maškar o them. **35** Dikhav kaj andar o svako them prihvati okolen save daran lestar thaj čeren so si pravedno. **36** O Del bičhaldas o alav e izraelošće themešće thaj objavisarda lende e Bahtali nevimata palo miro kroz o Isuso Hristo, savo si Gospod sa e manušenje. **37** Tumen džanen so sas pe sasti Judeja, a sa započnisardas ande Galileja nakon so o Jovano savo bolelas propovedilas palo bolipe. **38** Ašundine palo Isus andar o Nazaret saves o Del izabirisarda thaj pherdas e Svete Duhosa thaj e silava. Vo džalas okolo, čerelas lačhipe thaj sastarelas savoren saven o beng inčarelas ande piri vlast, kaj o Del sas lesa. **39** Amen sam svedokurja pale sa so vo čerda ando Jerusalem thaj pe sasti phuv e židovendi, a von mudardine les gajda kaj čhutine les po trušul, **40** ali o Del o trito des vazda les andar e mule thaj dija les te sikavel pe e manušenje. **41** Ali či dikhla les sa o them, nego samo e svedokurja saven o Del majanglal izabirisarda. Godova sam amen save halam thaj pilam lesa nakon so uštilo andar e mule. **42** A vo zapovedisarda amende te propovedisaras e themešće thaj svedočisaras kaj si vo godova saves o Del odredisarda te sudil e džudende thaj mulende. **43** Sa e prorokurja svedočin pale leste, te svako ko pačal ande leste, kroz lesko alav primil jartipe katar e bezeha." **44** Dok o Petar još čerelas svato, o Sveto Duho fuljisto pe savorende save ašunenas e poruka. **45** A e židovske vernikurja, save aviline e Petresa, sas zaprepastime kana dikhline kaj o Del izlisarda o daro e Sveto Duhos vi pe okola save nas Židovurja, **46** kaj ašundine len sar čeren svato ande aver čhibja thaj barjaren e Devle. Askal o Petar phendas: **47** "Akala manuša primisardine e Sveto Duho isto sago vi amen. Dali šaj vareko te zabranil lende te bolen pe e pajesa?" **48** Thaj zapovedisarda lende te bolen pe ando alav e Isuse Hristosko. Askal von zamolisardine e Petre te ačhel lenca još varesavi vrijeme.

11 E apostolurja thaj e phral ande sasti Judeja ašundine kaj čak vi okola save naj Židovurja prihvatisardine e Devlesko alav. **2** Kana o Petar bolda pe ando Jerusalem, varesave katar e obrezime vernikurja kritikujinas les. **3** Mothonas: "Dijan ando čer e neobrezime manušengo thaj vi halan lenca!" **4** Askal o Petar ačhilo te objasnil lende sa so

sas: **5** "Semas ando gav Jopa thaj molivas ma. Dok molivas ma, sas man vizija: dikhlem vareso sago baro čašapo savo pe pire štare čoškurja mučel pe katar o nebo thaj avel dži mande. **6** Kana majlače lijem sama, dikhlem andre razne životinje pe štar pungre, divlje zveri, gmizavcurja thaj čirikljen. **7** Askal ašundem o glaso savo phendas mande: 'Ušti, Petre, de čurjasa thaj ha!' **8** Ali me phendem: 'Nisar, Gospode! Nikada vareso nečisto so zabranil amaro Zakon či čhutem ande mungro muj te hav.' **9** O glaso andar o nebo po duito data phendas mande: 'Na phen kaj si zabranime okova so o Del phendas kaj si čisto!' **10** Akava sas trin drom, thaj askal sas sa godova crdino po nebo. **11** Baš ande godova časo avile trin manuša thaj ačhile anglo čer ande savo me samas. Von sas bičhalde andar e Kesarija te aven pale mande. **12** O Sveto Duho phendas mande te džav lenca thaj te na gndiv man khanči. Manca teljardine vi akala šov phrala, thaj gajda dijam ando čer godole manušesko. **13** Vo mothodas amende kaj dikhla e andele ande piro čer savo phendas: 'Bičhal e manušen ande Jopa palo Simon saves akharen Petar. **14** Vo phenela tuće alava kroz save aveja spasime tu thaj savora save trajin tusa ando čer.' **15** Kana ačhilem te čerav svato, o Sveto Duho fuljisto pe lende isto sago kaj fuljisto ando početko pe amende. **16** Askal dijem man godi so phendas o Gospod: 'O Jovano bolelas e pajesa, a tumen avena bolde e Sveto Duhosa.' **17** Pa, ako o Del dija len isto daro sago vi amende kana pačajam ando Gospod Isuso Hristo, ko sem me te šaj ačhav e Devlešće po drom?" **18** Kana ašundine godova, smirosajle thaj počnisardine te slavin e Devle. Phenenas: "O Del dakle, vi okole manušenje save naj Židovurja dija pokajanje savo inđarel ando večno trajo!" **19** Ande godoja vrijeme okola vernikurja save dine pe ando našipe zbog e nevolja savi avili kana sas o Stefan mudardo, aresle sa dži ke Fenikija, dži ko Kipar thaj dži ke Antiohija. O alav e Devlesko či propovedinas khonikašće osim e Židovende. **20** Ali varesave katar godola vernikurja sas andar o Kipar thaj andar e Kirinija. Kana von aresle ande Antiohija počnisardine te propovedin vi okole manušenje save naj Židovurja palo Gospod Isus. **21** O vas e Gospodesko sas lenca, thaj but manuša pačajine thaj obratisajle e Gospodešće. **22** Kana e khandiri ando Jerusalem ašundas so akala čeren ande Antiohija line thaj bičhaldine e Varnava ande Antiohija. **23** Kana areslo thaj kana dikhla savi milost sikada lende o Del, raduisajlo thaj ohrabrilas e vernikonon te ačhen pačivale e Gospodešće pire saste ileja, **24** kaj o Varnava sas čestito manuš, pherdo e Sveto Duhosa thaj e pačimava. Thaj but e manuša avile e Gospodešće. **25** Pale akava o Varnava đelo ando Tars

te rodel e Savle. **26** Kana arakhla les inđarda les ande Antiohija. Okote sasto brš aračenas pe e manušenca andar e khandiri thaj sikavenas e bute themes. A e učenikurja prvo data sas ande Antiohija akharde Hriščanurja. **27** Ande godola đesa avile andar o Jerusalem ande Antiohija varesave prorokurja. **28** Jek lendar savo akhardolas Agav, uštilo, thaj nadahnime e Sveto Duhostar prorokuisardas, kaj ando sasto Rimsko carstvo avela bari bok. Godova vi dogodisajlo kana vladilas o caro Klaudije. **29** Andar godova e učenikurja andar e Antiohija odlučisardine te svako lendar kozom ko šaj, bičhalen pomoć e phralende ande Judeja. **30** Gajda vi ćerdine thaj po Varnava thaj po Savle bičhaldine pomoć e starešinende ande Judeja.

12 Ande godoja vrjama o caro Irod počnisarda te mučil varesave vernikonen andar e khandiri. **2** Naredisarda te e mačesa mudaren e Jakove, e Jovanešće phrale, **3** pa kana dikhla kaj si godova drago e židovske vođenđe, naredisarda te astaren vi e Petre. Godova sas ande vrjama kana sas o prazniko e bikvascošće mangrengo. **4** A kana o Irod astarda e Petre, čhuda les ande tamnica thaj naredisarda te len pe leste sama štar straže po štar vojnurja. Kamlas te inkalel les posle o prazniko Pasha anglo them te sudin lešće. **5** Dok o Petar sas ando phanglipe, e khandiri zurale molilas pe e Devlešće pale leste. **6** Godoja rjat majsigo nego so o Irod kamlas te inkalel les anglo them te sudin lešće, o Petar phanglo duple lanconenca, sovelas maškar e duj vojnurja, a e stražarja anglo vudar aračenas e tamnica. **7** Katar jekhvar pojavisajlo o anđelo e Gospodesko thaj o baro svetlo obasjaisarda e ćelija ande savi sas o Petar. A o anđelo poloćore dija dab e Petre pe pašvare, džungada les thaj phendas lešće: "Brzo ušti!" Thaj e lancurja odma peline katar e Petrešće vas. **8** Askal o anđelo phendas lešće: "Le pe tute thaj le e sandale pe ćire pungere!" Thaj o Petar ćerda godova. Askal o anđelo phendas lešće: "Akana le pe tute o ogrtači thaj teljar pale mande!" **9** O Petar teljarda palo anđelo avri, ali či džanglas kaj si godova čače, nego gndisardas kaj si les vizija. **10** Kana nakhline paše prvo thaj paše dujto straža, aresline dži ke sastruni kapija savi inđarel ando gav. Voj korkoro putajli angle lende thaj von inklijstine avri, a kana nakhline kroz jek sokako askal o anđelo katar jekhvar nestanisardas lestar. **11** Askal o Petar avilo peste thaj phendas: "Akana džanav kaj o Gospod čače bičhaldas pire anđele thaj izbavisarda man andar e Irodešće vas thaj katar sa okova so o židovsko them ažućarelas te avel mande!" **12** Kana godova haćardas, đelo dži ko ćher e Marijako, savi sas dej e Jovanešći saves akharenas

Marko, kaj but džene ćidine pe thaj molinas pe. **13** A kana o Petar mardas pe avlijako vudar, e sluškinja savi akhardolas Roda avili te putrel o vudar. **14** Kana pindžardas e Petresko glaso, e bahtatar či putardas lešće o vudar, nego prastajas ando ćher thaj javisardas kaj o Petar ačhel anglo vudar. **15** A von phendine laće: "Tu san dili!" Ali sar voj vi maj dur tvrdilas kaj si gajda, von phendine: "Godova si lesko anđelo." **16** A o Petar vi majdur marelas pe kapija. Kana putardine e kapija thaj dikhline e Petre, sas avrijal peste katar o čudo. **17** Vo e vastesa dija len znako te ačhen thaj phendas lende sar o Gospod inkalda les andar o phanglipe thaj phendas lende: "Akava javin e Jakovešće thaj e aver phralende." Askal inklijsto thaj đelotar pe aver than. **18** A kana svanosardas o đes e vojnurja zurale uznemirisajle. Phučenjas pe so sas e Petresa. **19** O Irod naredisarda te roden les, pa kana či arakhla les, akhardas e stražaren te ispituil len, thaj zapovedisarda te mudaren len. Pale godova o Irod đelotar andar e Judeja ande Kesarija thaj okote ačhilo varesavi vrjama. **20** O caro Irod sas zurale holjariko pe okola save trajinas ando Tiro thaj o Sidon, pa von udružisajle thaj zajedno aviline angle leste. Pošto zadobisardine e carošće pomoćniko savo akhardolas Vlasta, molisardine e caro Irode palo miro, kaj lendi phuv uvozilas o hamasko andar e carošći phuv. **21** Ando dogovorime đes, o Irod lija pe peste e carske drže, bešlo pe piro prestolje thaj počnisarda angle savorende te mothol lende. **22** A o them čholas muj: "Akava si e devlesko glaso, a na e manuško!" **23** Isto čas o Gospodesko anđelo pekla e Irode e nasvalimasa, kaj či dijas slava e Devlešće. Mulo gajda kaj haline les e ćerme. **24** A e Devlesko alav sa majbut buljolas thaj o broj o vernikonengo sas sa majbaro. **25** Kana o Varnava thaj o Savle završisardine piro zadatko ando Jerusalem thaj boldine pe ande Antiohija, andine pesa e Jovane saves akharenas Marko.

13 Maškar e prorokurja thaj maškar e učitelja ande Antiohisko khandiri sas o Varnava, o Simeon saves akharenas Niger, o Lukije andar e Kirina, o Manain savo barilo e Irodesa savo sas vladari, thaj o Savle. **2** Dok jekhvar slavinjas e Gospode thaj postinas, o Sveto Duho phendas lende: "Odvojin mande akana e Varnava thaj e Savle palo delo savo si man pale lende." **3** Von askal, nakon so postisardine thaj molisardine, čhutine e vas po Varnava thaj po Savle thaj askal bičhaldine len po drom. **4** O Savle thaj o Varnava sas bičhalde e Sveto Duhostar ande Seleukija, a okotar đeline e lađicava ando Kipar. **5** Kana aresle ando gav savo akhardolas Salamina, navestinas e

Devlesko alav ande židovske sinagoge. O Jovano saves akharenas Marko sas lengo pomoćniko. **6** Kana nakhline o sasto ostrvo areline dži ko gav savo akhardolas Paf. Okote maladine varesaves vračares thaj hohavne prorokos, savo sas Židovo e alaveja Varisus. **7** Vo sas ando društvo e upravnikosko e godaver manušesa savo akhardolas Sergije Pavlo. Vo akhardas peste e Varnava thaj e Savle thaj zamolisarda len te phenen lende e Devlesko alav. **8** Ali lende usprotivisajilo o Elima o vračari (gajda prevodil pe lesko alav) thaj ačhilo te nagovoril e upravniko te na pačal ando alav e Devlesko. **9** Askal o Savle, saves akharenas vi Pavle, ispunime e Sveto Duhosa, dikhla vorta ando Varisus Elim. **10** thaj phendas lešče: "Tu san čavo e bendesko thaj dušmano pe sa so si pravedno! Pherdo san svako prevara thaj bilačhipe. Zar či ačheja te bandares e ispravne droma e Gospodešče? **11** Ake, akana o vas e Gospodesko vazdel pes pe tute: koravoja thaj varesavi vrjama našti dičheja o svetlo e desesko." Thaj odma o baro tunjariko dijas pe lešče jakha thaj vo pipolas naokolo, thaj rodelas varekas te vodila les. **12** Kana o upravniko dikhla so sas, pačajas thaj sas zadivime e Gospodešče sikavipeja. **13** Nakon godova o Pavle thaj okola kaj džanas lesa otplovisardine e ladicava andar o Paf thaj areline ando Pergu ande Pamfilija. Okote o Jovan saves akharenas Marko mukla len thaj bolda pes ando Jerusalem. **14** O Pavle thaj o Varnava đeletar andar o Pergu ande Pisidijsko Antiohija. A ando savato đeline ande sinagoga thaj bešline. **15** Posle kana čitosardine andar o Zakon thaj andar e knjige e prorokonende, e vođe e sinagogače bičhaldine varekas te phenel lende: "Phralalen, te si tumen vareso te mothon palo ohrabrenje e themešče, phenen!" **16** Pe godova o Pavle uštilo, vazdas piro vas thaj phendas: "Manušalen andar o Izrael thaj vi tumen savora aver save daran e Devlestar, ašunen: **17** O Del akale Izraelsko themesko, izabirisardas amare pradaden thaj umnožisardas amare themes pale vrjama dok trajinas sago strancurja ando Egipt. Thaj pire zurale vastesa inkalda len andar godoja phuv. **18** Štarvardeš brš strpljivo podnosilas len ande pustinja. **19** Kana uništisarda ande Hanaansko phuv eŧta themen, dija lendi phuv e Izraelconende ando nasledstvo. Sa akava sas kroz štar šela thaj pandžvardeš brš. **20** Posle godova, o Del dija len sudijen, sa dži ko proroko Samuilo. **21** Askal e manuša rodine te avel len caro, thaj o Del dija len e Saule, e Kisosče čhaves, andar o Venijaminesko pleme, savo vladilas štarvardeš brš. **22** A kana harada e Saules katar o prestolje, vazda lende e Davides palo caro, pale savo korkoro posvedočasardas: 'Arakhlem e Davides e čhaves e Jeseješče, manušes savo

si pe mungro ilo. Vo čerela sa so me kamav.' **23** Andar o Davidesko potomstvo o Del sago kaj obečasarda, vazdas e Izraelošče Spasiteljes – e Isuse. **24** Majsigo nego so avilo o Isus, o Jovano savo bolelas propovedilas sa izraelošče themešče kaj moraš te obratin pe e Devlešče thaj te bolen pe. **25** Kana o Jovano završisarda piri služba phendas: 'Pale kaste tumen inčaren man? Me naj sem okova pale savo gndin kaj sem. Ali ake, pale mande avel okova kašče me naj sem dostojno te putrav e sandale pe pungere.' **26** Phralalen, čavra e Avraamešče thaj vi savora tumen aver save daran e Devlestar, amende si bičhaldi akaja poruka palo spasenje! **27** E manuša save bešen ando Jerusalem thaj lende šorvale vođe či pindžardine e Isuse, nego osudisardine les. Gajda pherdine e alava e prorokošče save čiton pe svako savato, a či hačaren len. **28** Vi ako či arakhline nisošči doš zbog savi zaslužilas te avel mudardo, von mangline katar o Pilato te mudarel les. **29** A kana pherdine sa so si pale leste ramome, fuljardine les katar o trušaj thaj čutine les ando limori. **30** Ali o Del vazda les andar e mule, **31** thaj vo but đesa sikavelas pe okolende save avile lesa andar e Galileja ando Jerusalem, thaj akana von si lešče svedokurja anglo Izraelosko them. **32** Amen akana mothas tumende e Bahtali nevimata: o obečanje savo o Del dijas amare pradaden **33** akana pherdas godova amare čhavrende godoleja kaj vazdas e Isuse andar e mule. Sago kaj si ramome ando duto psalmo: 'Tu san mungro Čhavo, ades postanisardem čiro Dad.' **34** A pale godova kaj o Del vazda les andar e mule, te nikad či černjol, agajda phendas: 'Dava tumen svete thaj pouzdane blagoslovurja, save obečasardem e Davidešče.' **35** Gajda vi pe aver than phenel: 'Tu či deja te černjol čiro sveco.' **36** Kaj o David poslužisardas ande Devlešči namera ande piri vrjama. Kana mulo, sas prahome paše pire pradada, thaj lesko telo černjilo. **37** Ali o Isus saves o Del vazdas andar e mule, či černjilo ando limori. **38** Gajda džanen, phralalen, kaj kroz o Isus mothol pe tumende o jartipe katar tumare bezeha, thaj katar sa aver katar soste našti opravdin tumen ande Mojsijesko zakono. **39** E Isuseja opravdila pes svako savo pačal. **40** Zato len sama te či avel tumende okova so o Del ramomosardas kroz e Prorokurja: **41** 'Dičhen, tumen save maren muj, čudin tumen thaj propadnin, kaj čerava vareso ande tumare đesa, ande soste či pačainesas, te vareko phendasas tumende.'" **42** Kana o Pavle thaj o Varnava inkljenas andar e sinagoga, e manuša zamolisardine len te vi aver savato čeren lende svato pale akava. **43** Kana o sastanko sas gata e but Židovurja thaj e pobožne manuša save obratisajle po židovsko pačipe, teljardine palo Pavle thaj palo Varnava, save čerenas lenca svato thaj poticinas len te

ustrajno pačan ande Devlešči milost. **44** Ande aver savato gata o sasto gav čida pe te ašunel o alav e Gospodesko. **45** Kana e Židovske vođe dikhline o but o them, sas ljubomorne, thaj vředonas e Pavle gajda kaj mothonas protiv okova so vo motholas. **46** A o Pavle thaj o Varnava hlabro phendine lende: "Trubuja majsigo te o alav e Devlesko avel tumende e Židovende mothodo. Ali sar tumen odbacisardine o alav thaj smatrin kaj sen nedostojne e večno trajošće, akana džastar okolende save naj Židovurja. (aiōnios g166) **47** Kaj, agajda o Gospod korkoro zapovedisardas amende: 'Čerdem tut te aves svetlo okolende kaj naj Židovurja, te anes spasipe dži ko krajo e phuvjako.'" **48** Kana ašundine godova, okola save nas Židovurja raduinias pe thaj slavinas e Gospodesko alav. Thaj okola kaj sas odredime palo večno trajo pačaine. (aiōnios g166) **49** A o alav e Gospodesko buljilo pe sasto godova krajo. **50** A e židovske vođe vazdine pe buna varesave ugliedne thaj pobožne manušnjen thaj e gavešće poglavaren te progonin e Pavle thaj e Varnava thaj te traden len andar pire krajurja. **51** A von duj džene činosarde o praho katar pire pungere protiv lende sago znako kaj o Del sudila lende, thaj deline ande Ikonija. **52** A e učenikurja pherdile bahtasa thaj e Svete Duhosa.

14 Sago vi ande aver thana, gajda vi ande Ikonija o Pavle thaj o Varnava dine ande židovsko sinagoga thaj propovedinas, gajda kaj o but o them počnisarda te pačal, e Židovurja thaj okola save nas Židovurja. **2** Ali varesave Židovurja či pačajine, pobunisardine thaj ogorčisardine okolen save nas Židovurja protiv e phral. **3** Askal o Pavle thaj o Varnava ačihline okote još dosta dugo thaj hlabro čerenas svato palo Gospod, savo potvrdilas o alav pale piri milost thaj dija len te čeren znakurja thaj čudurja. **4** Askal sa o them savo trajilas ande godova gav podelisajle, jek sas pale Židovurja a aver pale apostolurja. **5** Varesave save nas Židovurja thaj vi e Židovurja, zajedno pire vođenca, udružisajle protiv o Pavle thaj protiv o Varnava. Kamline te maltretirin len thaj te čuden e bara pe lende te mudaren len. **6** Kana o Pavle thaj o Varnava ašundine pale godova, našline ande likaonske gava ande Listra thaj e ande Derva thaj lendi okolina. **7** Thaj okote nastavisardine te propovedin e Bahtali nevimata. **8** Ande Listra bešelas varesavo manuš savešće pungere sas line. Vo sas nepokretno katar piro bijandipe thaj nikada či phirelas. **9** Dok ašunelas e Pavle sar propovedil, o Pavle pažljivo dikhla pe leste thaj dikhla kaj si les pači pe kaj šaj te avel sasto, **10** thaj e bare glasosa phendas lešće: "Ušti pe pungere uspravno!" Thaj o manuš odma huklo pe pire pungere thaj počnisarda te phirel. **11** Kana e manuša

dikhline so čerda o Pavle, andar o sasto glaso čutine muj pe likaonsko čhib: "E devla line e manušengo liko thaj fuljistine maškar amende!" **12** Palo Varnava phendine kaj si grčko del o Zevs, a o Pavle Hermesija kaj o Pavle vodilas o glavno alav. **13** A o rašaj andar e Zevsesko hramo, savo sas odma pašo gav, anda e guruven thaj vencurja pe kapija thaj kamlas zajedno e themesa te prinesil e Pavlešće thaj e Varnavašće žrtve. **14** Kana e apostolurja o Varnava thaj o Pavle ašundine pale godova, čhindine pe peste pire drže, pa prastajine maškar o them thaj čhonas muj: **15** "Manušalen, so čeren godova? Vi amen sam samo manuša sago vi tumen. Amen avilam te phenas tumende e Bahtali nevimata, te bolden tumen katar godola bezvredne buča ko džudo Del savo stvorisarda o nebo, e phuv, o more thaj sa so si ande lende! **16** O Del ande okoja vrjama mukla sa e theme te džan pire dromesa, **17** ali nikada či mukla tumen te či džanen okova so si čači pe pale leste: vo čerel tumende lačhipe, del tumen o bršnd andar o nebo, thaj plodne brša, čaljarel tumen e habeja thaj pherel tumaro ilo e bahtasa." **18** Ali vi ako phenenas godova jedva nagovorisardine e themes te na prinesin lende žrtve. **19** Askal aresline varesave Židovurja andar e Antiohija thaj andar e Ikonija thaj pobunisardine e theme te čuden pe e barenca ando Pavle thaj crdine les avrjal o gav, kaj gndisardine kaj si mulo. **20** A kana e učenikurja čidine pe oko leste, vo uštilo thaj bolda pe palpale ando gav, a thejara o đes zajedno e Varnavasa delo ando gav Derva. **21** Kana navestisardine e Bahtali nevimata ande Derva thaj steknisardine but e učenikon, boldine pe ande Listra, Ikonijum thaj ande Antiohija. **22** Okote zurardine e učenikonen thaj ohrabrisardine len te ačhen ando pači pe thaj phenelas lende kaj ande Devlesko carstvo trubun te den kroz e but nevolje. **23** Ande svako khandiri o Pavle thaj o Varnava čutine starešin. Molinas pe thaj postinas, a askal dine len pe briga e Gospodešće, ande savo pačanas. **24** Pale godova nakhline kroz e Pisidija thaj aresline ande Pamfilija. **25** Nakon so propovedinas o Alav e Devlesko ande Perga, askal deline ande Atalija. **26** Okotar otplovisardine ande Antiohija, kaj sas majsigo poverime ande milost e Devlešči pale služba savi čerdine. **27** Kana aresline ande Antiohija, čidine e khandiri thaj phendine sa so o Del čerda prekal lende, thaj sar vi e manuša andar e aver thema putren o vudar te pačan. **28** Thaj dugo ačihline okote e učenikonenca.

15 A varesave manuša avile andar e Judeja ande Antiohija thaj ačhile te sikaven e phralen save nas Židovurja: "Ako či obrežin tumen prema e Mojsijesko običaj, naši

spasina tumen." 2 Sar o Pavle thaj o Varnava zurale suprotivisajle lende avilo dži ke bari rasprava maškar lende. Zbog godova o Pavle, o Varnava thaj još varesave phral sas bičhalde te džan ando Jerusalem thaj te okote inkalen akava problemo angle apostolurja thaj angle starešine. 3 E khandiri gajda bičhaldala len po drom, a von sar načenas kroz e Fenikija thaj kroz e Samarija, čerenas svato sa po redo sar obratisajle okola save nas Židovurja, a sa e phral sas bahtale zbog godova. 4 Kana aresle ando Jerusalem, primisarda len e khandiri, e apostolurja thaj e starešine. Askal o Pavle thaj o Varnava mothonas lende okova so o Del čerda preko lende. 5 Askal uštile varesave vernikurja andar e farisejendi stranka thaj phendine: "Okola kaj naj Židovurja, trubun te obrežin pe thaj trubul te naredil pe lende te inčaren o Mojsijesko zakono." 6 Askal e apostolurja thaj e starešine arakhline pe zajedno te čeren svato pale akava. 7 Kana nakhlo o lungo svato maškar lende, uštilo o Petar thaj phendas: "Phralalen, džanen katar prve đesa kaj o Del man akhardas maškar tumende te okolende save naj Židovurja, mothav e Bahtali nevimata thaj te vi von pačan. 8 O Del, savo pindžarel e manušenje ile, potvrdisarda kaj prihvatil len gajda kaj vi len dijas Sveto Duho, baš sago kaj dijas vi amen. 9 Vo či čerda nisošči razlika maškar lende thaj maškar amende, kaj vi lende ile šilada e pačimava. 10 Sostar dakle, akana iskušin e Devle gajda kaj čhon e učenikonende o pharipe pe kor save našti inčarenas ni amare pradada niti amen? 11 Amen pačas kaj sam spasime prekal e milost amare Gospodešči e Isusešči sago vi von." 12 Pe godova savora smirosajle thaj ašunenase e Varnava thaj e Pavle, save mothonas pale znakurja thaj čudurja save o Del čerda preko lende maškar okola save naj Židovurja. 13 Kana o Pavle thaj o Varnava phendine so sas len, o Jakov askal phendas: "Phralalen, čhon kan mande. 14 O Simon Petar čerda amende svato sar o Del prvo data sikadas piri ljubav okole themende kaj naj Židovurja thaj varesave lendar izabirisarda sago them pale peste. 15 Akaleja složin pe vi e alava e prorokošće, sago kaj si ramome: 16 'Posle godova boldava man thaj vazdava e Davidesko harado šator; andar e ruševine vazdava les thaj obnoviva les, 17 te vi aver manuša roden e Gospode, okola saven akhardem te aven mungre andar sa e thema. Gajda phenel o Gospod, savo čerel akava', 18 'a pindžardo si katar e dumutni vrjama.' (aiŋon g165) 19 Zato me inčarav kaj či trubul te uznemirisaras okolen kaj naj Židovurja thaj save obratin pe e Devlešće. 20 Umesto godova, neka ramol pe lende te na han habe savo si žrtvuime e idolende, te len pe majdur katar o bludo, te na han mas katar e mule životinje niti o rat. 21 Kaj, ande svako gav si okola save još katar e dumutuni

vrjama sikaven godola Mojsiješće zakonurja, save čiton pe svako savato ande sinagoge." 22 Askal e apostolurja thaj e starešine e saste khandirava odlučisardine te maškar pende odvojin varesave manušen saven bičhalena e Pavlesa thaj e Varnavasa ande Antiohija. Gajda sas izabrano o Juda saves akharen Varsava thaj o Sila. Von sas vodeće manuša maškar e phrala. 23 Preko lende bičhaldine akava lil ande savo ramolas: "Amen e apostolurja thaj e starešine, tumare phral, pozdravisaras sa amare phralen andar aver nacija ande Antiohija, ande Sirija, thaj ande Kilikija! 24 Ašundam kaj avile tumende varesave amendar, saven nas amari dozvola thaj zbunisardine tumen pire alavenca thaj uznemirisardine tumen, 25 gajda amen savora složisajlam te las varesave manušen thaj te bičhalas len tumende zajedno e volime phralenca e Varnavasa thaj e Pavlesa, 26 save pire trajurja čhutine pe kocka palo alav amare Gospodesko e Isuse Hristosko. 27 Gajda bičhalas tumende e Juda thaj e Sila thaj von phenena tumende vi e alavenca isto akava so amen ramosardam. 28 Odlučisardam, o Sveto Duho thaj amen, te na čas pe tumende aver pharipe sem akava so trubul: 29 na han katar o mas savo si žrtvuime e idolende, na han o rat thaj o mas e mule životinjengo, thaj na čeren bludo. Te line tumen sama katar akava, lačhe čerena. Ačhen saste!" 30 Gajda dakle ispratisardine len po drom thaj von đeline ande Antiohija. Okote čidine e themes thaj predaisardine lende o lil. 31 Kana čitosardine o lil, sas bahtale zbog e poruka savi ohrabrisarda len. 32 A o Juda thaj o Sila, save vi korkoro sas prorokurja, ohrabrinase thaj učvrstinas e phralen e bute alavenca. 33 Sar ačhiline okote varesavi vrjama, e phrala ando miro ispratisardine len palpale ke okola save bičhaldine len. 34 [Ali o Sila dikhla kaj si majlačhe te ačhel okote, a o Juda bolda pes ando Jerusalem.] 35 O Pavle thaj o Varnava ačhiline ande Antiohija, sikavenase e themes thaj e bute aver manušenca propovedinas o alav e Gospodesko. 36 Posle varesavi vrjama o Pavle phendas e Varnavešće: "Hajde te boldas amen thaj te obidisaras e phralen ande sa e gava kaj propovedisardam o alav e Gospodesko thaj te dikhas sar si!" 37 O Varnava kamlas pesa te inčarel vi e Jovane saves akharenas Marko, 38 ali o Pavle gindilas kaj si majlačhe te na inčaren pesa okoles savo mukla len ande Pamfilija thaj či nastavisarda lenca o delo. 39 Gajda avilo dži ke bari čingar andar savi razdvojisajle jek arrestar: O Varnava iljas pesa e Marko thaj otplovisarda palo Kipar, 40 a o Pavle iljas pesa e Silas thaj delotar, pošto e phral poverisardine les ande milost e Gospodešće. 41 O Pavle načelas kroz e Sirija thaj kroz e Kilikija thaj zuravelase e khandirja.

16 Gajda o Pavle areslo ando gav savo akhardol Derva, a askal ande Listra, kaj trajilas o učeniko savo akhardolas Timotej. Vo sas čhavo e Židovkako savi sas vernica, a lesko dad nas Židovo. **2** O Timotej sas po lačo glaso maškar e phral ande Listra thaj ande Ikonija. **3** Pa o Pavle kamla te o Timotej džal lesa po drom, pa zato obrezisarda les sar prihvatisardinesas les e Židovurja save trajinas ande godola thana, kaj savora džanenas kaj lesko dad nas Židovo. **4** Džanas andar o gav ando gav thaj phenenas e manušende e odluke save andine e apostolurja thaj e starešine ando Jerusalem thaj rodenas lendar te poštuin godola odluke. **5** Gajda e khandirja zuravonas ando pačiće thaj lengo broj barjolas svako đes sa majbut. **6** A von nakhline kroz e regija Frigija thaj Galatija, kaj o Sveto Duho zabranisarda lende te propovedin e Devlesko Alav ande Cikni Azija. **7** Kana aresline dži ke Mizisko granica, kamline te den ande Vitinija, ali e Isusesko Duho či mukla len. **8** A kana nakhline e Mizija, đeline ande Troada. **9** Godoja rjat e Pavle sas viđenje: dikhla jek manuše andar e Makedonija savo ačhelas angle leste thaj molilas les e alavencia: "Av akaring ande Makedonija thaj pomožisar amende!" **10** Pale godova viđenje dikhlam so majsigo te teljaras ande Makedonija, zato kaj samas uverime kaj o Del akharel men okote te mothas lende e Bahtali nevimata. **11** Andar e Troada otplovisardam pravo po otoko savo akhardolas Samotrak, a thejara o đes đelam ando Neapolj, **12** pa okotar ande Filipe, savo si rimsko kolonija thaj važno gav ande godova deo e Makedonijako. Ande godova gav ačhilam varekozom đesa. **13** Ando savato inklijstam avrijal o gav thaj đelam dži ke reka, kaj gndisardam kaj okote čidel pe o them te molin pe. Okote bešlam thaj počnisardam te čeras svato e čidine manušnjenca. **14** A čholas kan amende vi jek pobožno manušnji savi akhardolas Lidija, savi bićinelas kuč lole pohtana andar o gav Tijatira. O Gospod putardas lako ilo te lače čhol kan ke okova so o Pavle phenelas. **15** A kana bolda pe voj thaj savora save trajinas ande lako čer, zamolisarda men: "Ako gndin kaj čače pačav ando Gospod, aven thaj ačhen ande mungro čer." Thaj nagovorisarda men te ačas late. **16** Jekhvar dok džasas po than kaj molilas pe, maladam men varesave ropkinja. Voj sas opsednutime e bilače duhosa savo majanglal phenelas lače so avela. Pe godova način voj anelas bari zarada pire gospodarende. **17** Voj teljarda palo Pavle thaj pale amende thaj čholas muj: "Akala manuša si sluge e majbare Devlešće! Avilene te navestin tumende o drom sar te spasin tumen!" **18** Gajda čerelas đesenca, pa kana e Pavlešće godova dojadisarda, bolda pe late thaj phendas e duhošće savo sas ande late: "Zapovediv tuće ando alav e Isuse Hristosko:

inkliji andar late!" Thaj o duho odma inklijsto. **19** A kana lače gospodarja dikhline kaj propadnisarda lendi nada ande zarada, astardine e Pavle thaj e Sila thaj crdine len po trgo, angle šorvale. **20** Thaj kana andine len angle upravnikurja, phendine: "Akala manuša save si Židovurja uznemirin amaro gav, **21** thaj propovedin e običaja save amen, e Rimljanurja, či tromas te prihvatis niti te inčaras." **22** Askal o them navalisarda po Pavle thaj po Sila, a e upravnikurja godole gavešće pharadine pe lende e drze thaj naredisardine te išibin len. **23** Nakon so zurale išibisardine len, čudine len ando phanglipe, thaj naredisardine e stražarešće te lače lel sama pe lende. **24** Nakon so dobisarda kasavi naredba, vo čuda len andre ande majzabacime deo e tamnicako, a lende pungere čhuta ande kaštune okurja. **25** Kana varekaj katar e opaš e rjat o Pavle thaj o Sila molinas pe, đilabenas thaj slavinas e Devle, a aver okola save sas ando phanglipe ašunenenas len. **26** A katar jekhvar nastanisarda gajda zuralo zemljotres kaj e phanglipešće temeljurja činosajle. Odma sa e vudara pe tamnica putajle, thaj savorende peline e okurja! **27** O stražari džungadilo andar o suno, pa kana dikhla kaj si o vudar e tamnicako putardo, inkalda o mačo thaj kamlas te mudarel pe kaj gndisarda kaj e phangle našline. **28** Ali o Pavle andar sasto glaso čhuta lešće muj: "Na čer tuće nisosko bilačipe! Savora sam akate!" **29** Askal o tamničari naredisarda te anen e lampe thaj prastaja andre. Činolas pe e daratar thaj pelo pe kočja anglo Pavle thaj anglo Sila. **30** Askal inkalda len avri thaj phučla len: "Rajalen, so trubul te čerav te spasi man?" **31** A von phendine lešće: "Pača ando Gospod Isus, thaj spasija tut, tu thaj vi savora andar čiro čer!" **32** Askal navestisardine o Alav e Gospodesko lešće thaj savorende ande lesko čer. **33** Još isto čas ande godoja rjat o stražari lijas e Pavle thaj e Sila thaj thoda lende rane. Thaj odma pale godova vo thaj savora andar lesko čer boldine pe. **34** Askal anda len ande piro čer, dija len te han thaj raduisajlo zajedno savorenca save trajinas lesa ando čer zato kaj pačaine ando Del. **35** Kana svanosardas, e upravnikurja bičaldine e službenikonon ko stražari e porukasa: "Oslobodisar godole duj manušen!" **36** Askal o stražari phendas e Pavlešće: "E upravnikurja phendine te mukas tumen. Akana inklen thaj džan ando mirol!" **37** A o Pavle phendas: "Javno mardine men, a či dokažisardine amende e doš. Čudine men ande tamnica vi ako sam rimske građanurja, a akana kamline sas čordane te mućen amen te džastar! Nipošto! Neka korkoro aven thaj inkalen amen!" **38** Kana e službenikurja phendine e upravikonende so phendas o Pavle thaj kana akala saznaisardine kaj si o Pavle thaj o Sila rimske građanurja, darajle, **39** pa avilene

lende te jarton pe, inkaldine len avri thaj zamolisardine len te džantar andar o gav. 40 Kana o Pavle thaj o Sila inklijstine andar e tamnica deline ande Lidijako čher, te dičhen pe e phralenca thaj te ohrabrin len, pa deletar andar o gav.

17 Kana o Pavle thaj o Sila nakhline kroz e gava Amfipolj thaj kroz e Apolonija, avile ando Soluno, kaj sas e židovsko sinagoga. 2 O Pavle, pe piro običaj, dijas lende ande sinagoga, pa gajda trin savaturja raspravilas lenca pale Svete lila. 3 Vo objasnilas thaj dokažilas lende: "E Hristo trubuja te mudaren thaj te vo uštela andar e mule. A godova Hristos si o Isus saves me objavisarav tumende." 4 Varesave katar e Židovurja paćajine thaj pridružisajle e Pavlešće thaj e Silašće, a gajda vi e but pobožne Grkurja thaj but ugledne manušnja. 5 Ali e Židoven astarda e ljubomora thaj andar godova line varesaven bilače manušen katar o trgo, čidine e bute themes thaj čerdine pobuna ando gav. Askal dine po Jasonesko čher thaj rodenas e Pavle thaj e Sila te inkalen len te sudil pe lende. 6 A kana či arakhline e Pavle thaj e Sila, astardine e Jasone thaj još varesave phralen, crdine len angle gavešće šorvale manuša thaj čhonas muj: "Vi akate avile okola kaj uzburnisardine o sasto carstvo, 7 a o Jason primisarda len ande piro čher! Savora von čeren protiv e carošće uredbe, gajda kaj mothon kaj postojil aver caro – o Isus!" 8 Kana o them thaj e gavešće šorvale ašundine akava, uznemirisajle, 9 ali mukline len pe sloboda tek kana line katar o Jason thaj katar aver phrala zalog. 10 Čim peli e rjat, e phrala bičaldine e Pavle thaj e Sila ande Verija. Kana aresline okote, počnisardine te džan ande židovsko sinagoga. 11 Okote e Židovurja sas majplemenite katar okola andar o Soluno thaj spremno prihvatisardine o alav e Devlesko. Svako đes istražinas e Svete lila te dičhen dali si godova čače gajda sar phenen o Pavle thaj o Sila. 12 Askal e but Židovurja paćajine, a gajda vi but ugledne Grkinje thaj baro broj o Grkurja. 13 Kana e Židovurja andar o Soluno ašundine kaj o Pavle vi ande Verija propovedil o alav e Devlesko, avile thaj vi okote uznemirisardine thaj pobunisarde e themes. 14 Askal e phral odma bičaldine e Pavle ando primorje, a o Sila thaj o Timotej ačhiline ande Verija. 15 A okola kaj pratinas e Pavle, đe leja dži ke Atina thaj askal boldine pe ande Verija. Preko lende o Pavle bičhaldas poruka e Silašće thaj e Timoteješće te so majsigo aven leste. 16 Dok o Pavle ažučarelas len ande Atina, sas zurale uznemirime kaj dičhelas o gav kaj si pherdo idolurja. 17 E Židovenca thaj e pobožno Grkonenca raspravilas ande sinagoga thaj svako đes po glavno trgo okolenca save okote maladinesas pe. 18 Gajda astardine te raspravin pe e Pavlesa varesave

epikurejcurja thaj e stoičke filozofurja. Jek phenenas: "So akava brbljivco kamel te phenel?" A aver phenenas: "Izgledil kaj propovedil e averende devlen" – kaj propovedilas e Bahtali nevimata palo Isuso thaj palo uštipe andar e mule. 19 Askal line les thaj indardine les po sastanko anglo veće po Areopag thaj phendine lešće: "Šaj li phenes amende te džanas, sosko si godova nevo sikavipe savo sikaves? 20 Čhos ande amare kan čudne stvarja. Pa kamlamas te džanas so godova trubujasas te značil." 21 A sa e manuša andar e Atina thaj e strancurja save trajinas maškar lende či provodinas e vrjama ni ande soste aver osim te čeren svato thaj te ašunen o nevipe. 22 O Pavle ačhilo maškare ando Areopag thaj phendas: "Manušalen andar e Atina! Dikhav kaj sen ande svako vas zurale religiozne. 23 Dok phiravas po gav pažljivo dikhavas tumare svetinje, a arakhlem vi jek žrtveniko pe savo sas ramome: 'E bipindžarde Devlešće.' Okova so dakle tumen či pindžaren, a poštujin – godole Devle me objavisarav tumende. 24 O Del savo stvorisarda o them thaj sa ande leste, Gospodari si e nebesko thaj e phuvjako thaj zato či trajil ande hramurja save si čerde e manušende vastenca. 25 Niti trubun te poslužin les e manušende vas, sago kaj si lešće vareso potrebno. Kaj vo si godova savo savorende del o trajo, o daho thaj sa aver. 26 O Del katar o jek manuš stvorisarda sa e manušen te pheren e sasti phuv thaj majanglal odredisardas lende e vrjama thaj o than kaj bešena. 27 O Del čerda godova te e manuša roden les, či li varesar inzardinesas pire vas prema leste thaj te aračhen les, vi ako vo naj dur ni katar jek amendar. 28 'Kaj, ande leste trajisaras, phiras thaj postojisaras', sago kaj phendine vi varesave katar tumare pesnikurja: 'Vi amen sam lešće potomkurja.' 29 Sar sam amen, dakle, e Devlesko potomstvo, či tromas te gndisaras kaj si o Del sago o kipo čerdo katar o sunakaj ili rup ili katar o bar save čerdine e manušende vas thaj lendi mašta. 30 O Del či lel ando obzir e vrjama kana senas ando bidžanglipe, ali o Del akana zapovedil sa e manušende pe svako than te pokajin pe, 31 kaj odredisarda o đes kana pravedno sudila sa e themende prekal o Manuš saves odredisardas. Godova potvrdisarda angle sa e manuša kana vazda les andar e mule." 32 Kana ašundine kaj spomenil o uštipe andar e mule, varesave marenas muj, a aver phendine: "Pale akava čhasa tute kan aver data!" 33 Gajda o Pavle đelotar lendar. 34 Ipak, varesave manuša pridružisajle lešće thaj paćajine, a maškar lende sas vi o Dionisije savo sas člano ande baro veće po Areopag, thaj e manušnji alaveja Damara thaj aver manuša.

18 Pale godova o Pavle đelo andar e Atina ando Korint.

2 Okote arakhljas varesave Židovo savo akhardolas Akila, savo sas bijando ando Ponto, thaj nas but vrjama sar avilo andar e Italija zajedno pire romnjasa savi akhardolas Priskila, kaj o caro Klaudije zapovedisarda te sa e Židovurja džantar andar o Rimo. O Pavle đelo lende, 3 sar čerenas isto bući sago vi vo – čerenas šatorja, o Pavle ačhilo lende thaj čerelas bući zajedno lenca. 4 A svako savato o Pavle raspravilas ande sinagoga thaj kamlas te uveril e Židoven thaj e Grkonen. 5 Kana o Sila thaj o Timotej aresline andar e Makedonija, o Pavle posvetisajlo te propovedil thaj svedočil e Židovende kaj o Isus si o Hristo. 6 Ali, kana e Židovurja počnisardine te protivin pe lešće thaj te vredon les, o Pavle činosarda o praho katar pire drze sago znako kaj o Del sudila lende, thaj phendas lende: “Tumaro rat perela pe tumare šore. Me naj sem došalo. Katar akana džav te propovediv okolende save naj Židovurja.” 7 Thaj đelotar okotar, pa dija ando čer ke jek manuš savo daralas e Devlestar thaj akhardolas Titije Just, kasko čer sas odma paše sinagoga. 8 A o Krisp o vođa e sinagogako, pačaja ando Gospod saste pire čheresa. A pačaine thaj bolajle vi but manuša andar o Korint save ašundine les. 9 Jek rjat o Gospod phendas e Pavlešće ande vizija: “Na dara, nego čer svato thaj na ačh! 10 Kaj, me sem tusa thaj khonik či napadnila tut niti naudila tuće, kaj ande akava gav si but okola save pripadin mande.” 11 Gajda o Pavle ačhilo okote jek brš thaj šov čhon thaj sikavelas e manušen e Devlesko alav. 12 A kana sas o Galion upravniko ande pokrajina Ahaje, e Židovurja složno navalisardine po Pavle thaj indardine les po sudo. 13 Thaj phendine: “Akava manuš nagovoril e manušen te protiv o zakono poštuin e Devle.” 14 A kana o Pavle kamlas vareso te phenel, o Galion phendas e Židovende: “Židovurja, čutemas kan tumende, te avilosas o svato pale varesavi nepravda ili bilačhipe. 15 Ali, sar si akaja rasprava zbog tumaro sikavipe, alava thaj tumaro zakon, rešin godova korkoro. Me ande godova či kamav te avav sudco.” 16 Thaj trada len andar e sudnica. 17 Askal von astardine e Sostene, e sinagogače vođa, thaj počnisardine te maren les anglo sudo. A o Galion či marisarda pale godova ni cara. 18 O Pavle ačhilo ando Korinto još but đesa, a pale godova jartosajlo katar e phral, pa e Priskilava thaj laće romeja e Akilava otplovisarda prema e Sirija. Ande Kenhreja čhinda pešće bal, zato kaj čerda zavet. 19 Kana aresline ando gav Efes, vo mukla len thaj korkoro dija ande sinagoga thaj počnisarda te raspravil pe e Židovenca. 20 Von zamolisardine les te ačhel još varesavi vrjama, ali vo či pristanisarda, 21 nego jartosajlo lendar thaj

phendas lende: “Te dija o Del boldava man tumende.” Thaj otplovisardas andar o Efes. 22 Kana areslo ande Kesarija, đelo opre ando Jerusalem te pozdravil e khandirja, a pale godova đelo ande Antiohija. 23 Pošto sas ande Antiohija varesavi vrjama, đelotar okotar, thaj džalas katar o than dži ko than kroz e regija Galatija thaj Frigija thaj zuravelas e učenikonen ando pačipe. 24 A ando Efes areslo varesavo Židovo savo akhardolas Apolos. Vo sas lačno govorniko andar e Aleksandrija thaj lačhe pindžarelas e Svete lila. 25 Vo sas sikado pale Gospodesko drom, thaj e bare žarosa čerelas svato thaj tačno sikavelas palo Isus vi ako džanelas samo pale Jovanesko bolipe. 26 Vo počnisarda hrabro te čerel svato ande sinagoga, pa kana ašundine les o Priskila thaj e Akila, akhardine les peste thaj majlačhe objasnisardine lešće o Drom e Devlesko. 27 Kana o Apolos odlučisarda te džal ande Ahaja, e phral ohrabrisardine les thaj ramosardine e vernikonende te šukar primin les. Kana areslo okote, but pomognisardas okolende save prekal e milost e Devlešći postanisardine vernikurja, 28 kaj ande javne rasprave snažno dokažilas e Židovende prekal o Sveto lil kaj o Isus si Hristo.

19 Dok sas o Apolos ando Korint, o Pavle putuilas kroz e unutarnje thana godole phuvjače thaj avilo ando Efes. Okote arakhlja varesave učenikonen, 2 thaj phučla len: “Dali primisardine e Sveto Duho kana pačaine?” A von phendine lešće: “Či ni ašundam kaj si Sveto Duho.” 3 A o Pavle phučla len: “Savo bolipe askal primisardine?” A von phendine: “E Jovanesko bolipe.” 4 O Pavle phendas: “O Jovano bolelas e bolipeja palo pokajipe. Motholas e Izraelconende te paćan ande okova savo avela pala leste – ando Isus.” 5 Kana godova ašundine bolajle ando alav e Gospodesko e Isusesko. 6 A kana o Pavle čhuta pire vas pe lende, o Sveto Duho fuljisto pe lende thaj von ačhile te čeren svato ande aver čhibja thaj te prorokujin. 7 A sas sa zajedno varekaj katar dešuduj manuša. 8 Askal o Pavle džalas ande sinagoga thaj trin čhon hrabro propovedilas, raspravilas thaj uverilas e themes palo Devlesko carstvo. 9 Ali, sar sas varesave lendar tvrđoglave thaj nepokorne thaj angle savorende kaljarenas e Gospodesko drom, o Pavle mukhla len, lijas pesa e učenikonen thaj svako đes vodilas rasprava ande učionica jeće manušešći savo akhardolas Tiranin. 10 Godova sas duj brš, gajda kaj sa e stanovnikurja andar e Cikni Azija, e Židovurja thaj okola kaj nas Židovurja, ašundine o Alav e Gospodesko. 11 O Del preko e Pavlešće vas čerelas but bare čudurja. 12 Gajda kaj vi e dikhlorja thaj e haravlje save o Pavle dirdas sas indarde ke nasvale thaj von sastonas katar piro nasvalipe, a e bilačhe duhurja

inkljenas andar lende. 13 A varesave Židovurja save džanas katar o than dži ko than thaj tradenas e bilače duhonen andar e manuša, probisarde pe okola ande save sas e bilače duhurja te akharen o alav e Gospodesko Isusesko. Phenenas: "Ando alav e Isusesko saves o Pavle propovedil, zapovediv tumende inkljen avri!" 14 Godova čerenas e eŧa čhave katar varesavo šerutno židovsko rašaj savo akhardolas Skeva. 15 Ali o bilačo duho phendas lende: "E Isuse pindžarav, a vi e Pavle džanav, ali ko sen tumen?" 16 Thaj o manuš ande savo sas o bilačo duho, huklo pe lende, svladisarda len thaj gajda zurale marda len kaj našline andar godova čer nande thaj ratvale. 17 Akava ašundine sa e Židovurja thaj okola save nas Židovurja save trajinas ando Efes. Sa len astarda e dar thaj barjarenas o alav e Gospodesko Isusesko. 18 But okolendar save pačaine avenas thaj priznainas pire bilače buča. 19 A but lendar savendi buči sas te drabaren, andine pire čarobne knjige thaj angle savorede dine len jag. A kana đinadine kozom molas e čarobne knjige, arakhline kaj monas pandžvardeš milje rupune lovora. 20 Gajda e Gospodešće snagava o Alav buljolas thaj zuravolas. 21 Posle sa akava so sas, o Pavle ando Duho odlučisardas te načel kroz e Makedonija thaj kroz e Ahija, a okotar te džal ando Jerusalem. O Pavle phendas: "Posle godova moraš te džav vi ando Rimo." 22 Askal bičhaldas ande Makedonija pire dujen pomoćnikon, e Timoteje thaj e Eraste, a vo još varesošći vřjama ačhilo ande Cikni Azija. 23 Ande godoja vřjama avilo dži ke bari buna protiv o Drom e Gospodesko. 24 Kaj varesavo kovači alaveja Dimitrije, savo čerelas cikne Artemidaće hramurja katar o rup thaj gajda e zanatlijende anelas bari zarada. 25 Vo čida sa e zanatlijen thaj aver bučarne manušen e slično bučava thaj phendas: "Manušalen, tumen džanen kaj amaro barvalipe avel katar akaja buči. 26 Vi korkoro dičhen thaj ašunen kaj akava Pavle uverisardas thaj diljardas e but e themes na samo ando Efes nego gata vi ande sasti Cikni Azija gajda kaj mothol kaj e devla save si čerde e manušenđe vastenca naj devla. 27 Si opasnost na te samo o ugled amare bučako avel po bilačo glaso, već vi godova te o hramo e bare boginjako e Artemidako hasarel piro značaj thaj te piro veličanstvo hasarel e boginja savja slavil e sasti Cikni Azija, thaj sa o them!" 28 Kana akala ašundine akava, lija len e bari holji, thaj čhonas muj: "Bari si e efeško Artemida!" 29 Askal o sasto gav uzbunisajlo thaj sa zajedno prastajine ando pozorište, thaj crdine pesa e dujen manušen save putuinas e Pavlesa, e Gaje thaj e Aristarhes andar e Makedonija. 30 O Pavle lijas te inkjel anglo them, ali e učenikurja či dine les. 31 Čak vi varesave ugledne

manuša andar e Cikni Azija save sas e Pavlešće drugarja, poručisardine lešće thaj zamolisardine les te na avel ando pozorište. 32 Andre ando pozorište jek čhonas muj jek, a aver čhonas muj aver, kaj o čidino them sas zbunime thaj či ni džanenas sostar čidine pe. 33 E Židovurja spidine e Aleksandre te inkjel anglal o them, a varesave phendine lešće so te phenel. O Aleksandar e vastesa zamolisarda te čhon kan leste kaj kamlas te obranil pe anglo them. 34 Ali kana hačardine kaj si Židovo, savora duj saturja čhonas glasno muj: "Bari si e efeško Artemida!" 35 Askal e gavesko pisari smirosarda e themes thaj phendas: "Manušalen andar o Efes! Dali si manuš savo či džanel kaj o gav Efes lel sama po hramo e bare Artemidako thaj pe lako kipo savo pelo katar o nebo? 36 Sar godova naj sporno, tumen trubun te smiron tumen thaj te khanči či brzopleto čeren. 37 Kaj andine akale manušen akaring vi ako či čordine andar o hramo thaj či vređosardine amare boginja. 38 Ako dakle o Dimitrije thaj e zanatlije save si lesa kamen varekas te prn, e sudurja si putarde, a akate si vi e upravnikurja – pa nek prn pes. 39 A te roden vareso majbut, godova rešila pe ande zakonito skupština. 40 Kaj pretil amende opasnost te avas optužime pale pobuna savi sas ades, a naj nijek razlogo sar šaj te opravdisaras akava nered." 41 Thaj kana godova phendas mukla e themes te džaltar.

20 Kana e pobuna smirisajli, o Pavle bičhaldas pale učenikurja, thaj ohrabrisarda len, pozdravisajlo lenca thaj delotar ande Makedonija. 2 Načelas kroz godola krajurja thaj ohrabilas e učenikonen e bute alavenca. Gajda areslo ande Grčka, 3 thaj ačhilo okote trin čhon. A baš kana trubuja te otplovil palpale ande Sirija, ašunda kaj e Židovurja čhutine lešće zamka, pa odlučisarda te boldel pe kroz e Makedonija. 4 A pale leste teljardine o Sopater, e Piroško čhavo andar e Verija, o Aristarh thaj o Sekund andar o Soluno, o Gaj andar e Derva, o Tihik thaj o Trofim andar e Cikni Azija, thaj o Timotej. 5 Von teljardine majsigo amendar thaj ažučardine men ande Troada. 6 A amen isplovisardam andar e Filipe palo o Prazniko e bikvascošće mangrengo. Pandž đes majposle pridružisajlem lende ande Troada thaj okote ačhilam eŧa đes. 7 A o prvo đes ando kurko, kana čidam men pe Gospodnjo večera, o Pavle motholas lende. Sar kanisarda thejara o đes te otplovil, propovedilas sa dži ke opaš e rjat. 8 A opre ande soba kaj samas čidine sas but svetiljke. 9 A varesavo termo čhavo savo akhardolas Evtih bešelas pe pendžera. Sar o Pavle čerelas dugo svato, les lija e lindri. Kana o suno skroz svladisarda les, vo pelo katar o trito sprato pe phuv, a kana vazdine les vo sas već

mulo. **10** O Pavle fuljisto tele, dija koča pašo čhavo, dijale mrtiko thaj phendas: "Na uznemirin tumen, džudo si!" **11** Pale godova lija pe opre, te podelil e Gospodnjo večera thaj halas lenca. Dugo ande rjat još čerelas lenđe svato sa dok či svanosardas, a askal delotar. **12** A e terne čhave andine čhere džude, thaj savora sas utešime. **13** Amen teljardam anglal e lađicava thaj otplovisardam ando Asos, okotar trubuja te indaras e Pavle. Vo gajda odredisardas, kaj kamlas te džal korkoro, phujatar. **14** A kana maladilam lesa ando Asos, lijam les ande lađica thaj areslam ande Mitilina. **15** Thejara o des isplovisardam andar o Mitilina thaj areslam paše pašo otoko Hios. Aver des areslam dži ko otoko Samosa, a des pale godova areslam vi ando Milit. **16** Kaj o Pavle odlučisarda te či načel kroz o Efes, a či kamlas te zadržil pe ande Cikni Azija kaj siđarelas, te aresel ako si moguće ando Jerusalem dži ko prazniko Pedesetnica. **17** Andar o Milit bičhaldas ando Efes pale khandirjače starešine. **18** Kana aviline, phendas lenđe: "Tumen džanen sar trajivas sasti vřjama dok semas tumenca, katar o prvo des kana areslem ande Cikni Azija. **19** Služisardem e Gospodešće ponizno, ande jasva thaj ande kušnje save aresline man zbog e židovende zamke. **20** Nikada či ačhilem te phenav tumende sa so si korisno pale tumende thaj te sikavav tumen javno thaj pe tumare čhera. **21** Upozorivas e Židoven thaj okolen save nas Židovurja te mućen pe katar piro bezeh te obratin pe e Devlešće thaj te paćan ande amaro Gospod o Isus. **22** A akana, ake, zato kaj o Sveto Duho tradel man, džav ando Jerusalem, a so okote ažućarel man či džanav. **23** Samo džanav kaj ande svako gav o Sveto Duho upozorilas thaj phenelas kaj ažućarel man o phanglipe thaj nevolje. **24** Ali mande ni cara či ačhilo dži ko trajo, samo te završiv mungri trka thaj e služba savi primisardem katar o Gospod Isus – te svedočiv e Bahtali nevimata pale Devlešći milost. **25** Akana, ake, džanav kaj khonik tumendar, maškar save putuisardem thaj phenavas pale Devlesko carstvo, majbut či dičhena man. **26** Zato ađes jasno phenav tumende: naj sem došalo ako vareko tumendar propadnil. **27** Kaj či ačhilem te navestiv tumende e sasti Devlešći volja. **28** Len sama pe tumende thaj pe sa okola saven o Sveto Duho poverisarda tumende pe briga. Tumen sen pastirja, a von si tumaro stado – e Devlešći khandiri, savja o Del otkupisarda pire rateja. **29** Džanav kaj, pale mande kana me džavatar, maškar tumende avena e opasne ruva save či štedina o stado. **30** Čak vi maškar tumende avena varesave save bandarena o sikavipe te crden e učenikonen pale peste. **31** Zato len tumen sama! Thaj den tumen gođi kaj semas tumenca trin brš thaj neprestalno, desenca thaj e raćenca, opominjivas tumen

ande jasva. **32** A akana dav tumen e Devlešće pe briga, thaj e porukaće pale lešće milosti savi šaj te bajrarel tumen thaj te del tumen nasledstvo maškar sa okola save si posvetime. **33** Nikada či kamlem ande mungro ilo khonikasko rup, sunakaj ili e drze. **34** Vi korkoro džanen, kaj akale mungre vastenca čeravas bući pale okova so trubul man thaj okolen save sas manca. **35** Ande sa so čeravas semas tumende primer, sar trubun te trudin tumen, thaj te aven ando pomoć okolende save si ande nevolje. Sikadem tumen te pamtin so korkoro o Gospod Isus phendas: 'Maj blagoslovime si te del pe nego te lel pe.'" **36** Kana godova phendas, o Pavle dija koča thaj zajedno savorenca pomolisajlo. **37** Askal savora line te roven, te den mrtiko e Pavle thaj čumiden les, **38** majbut sas žalosne zbog godova kaj phendas lenđe kaj majbut či dičhena les. A pale godova otrpatisardine les pe lađica.

21 Pale godova oprostisajlam lendar, isplovisardam thaj plovisardam vorta dži ko otok Kos, a thejara des otplovisardam po otok Rodos, a okotar ando gav Patar. **2** Inča arakhlam lađa savi džalas pale Fenikija, dijam ande lađa thaj otplovisardam. **3** Kana dikhlam o Kipar, nakhlam katar amari levo rig thaj teljardam majdur prema e Sirija. Areslam ando than Tiro, kaj okote trubuja katar e lađa te fuljarel pe tele o tereto. **4** Okote arakhlam e učenikonen, thaj ačhilam lenca eđa desa. A von, kroz o Duho phenenas e Pavlešće te na džal ando Jerusalem. **5** Ali kana nakhline e des save samas okote, ipak đelamtar majdur po drom, a von savora e romnjeca thaj e čhavrenca ispratisardine men dži avri andar o gav. Okote pe obala dijam koča thaj molisajlam. **6** Kana pozdravisajlam jek avrenca, dijam ande lađica, a von boldine pe čhere. **7** Andar o Tiro nastavisardam e plovdba thaj areslam ande Ptolemaida. Okote pozdravisardam e phralen thaj ačhilam lenca jek des. **8** Thejara des đelamtar okotar thaj areslam ande Kesarija. Okote ačhilam ando čher e Filipesko, savo sas propovedniko e Bahtale nevimatako – jek katar eđa manuša saven e vernikurja ando Jerusalem odabirisardine te vodil e briga pale udovice. **9** Les sas štar čheja save nas udajime thaj save prorokuinas. **10** Sar samas okote but đesa, andar e Judeja areslo varesosko proroko savo akhardolas Agav. **11** Vo avilo amende, lija e Pavlesko pojas, thaj phanglas pire vas thaj pire pungere thaj phendas: "Akava phenel o Sveto Duho: 'Gajda e Židovurja ando Jerusalem phandena e manušes savesko si akava pojas thaj predaina les okolende save naj Židovurja ande vas.'" **12** Kana ašundam godova počnisardam vi amen thaj vi e manuša kaj trajinas okote te molisaras e Pavle te na džal ando Jerusalem. **13** Askal o Pavle phendas: "Sostar roven

thaj phaden mungro ilo? Palo alav e Gospodesko Isusesko me sem spremno na samo te avav phanglo, nego vi te merav ando Jerusalem." 14 Ali sar či dijas te nagovorisasar les, vazdam e vas thaj phendam: "Nek avel sar o Gospod kamel." 15 Pale godova spremisajlam thaj đelam ando Jerusalem. 16 Amenca teljardine vi varesave učenikurja andar e Kesarija thaj andine men ando čer e Mnasonesko andar o Kipar. Vo sas jek katar e prve učenikurja, te avas lešče gosturja. 17 Kana areslam ando Jerusalem, e phrala šukar primisardine men. 18 Thejara o đes o Pavle teljarda amenca ko Jakov, kaj sas prisutne vi sa e starešine andar e Jerusalimsko khandiri. 19 O Pavle pozdravisarda len thaj sa po redo mothodas lende sa so o Del čerda maškar okola save naj Židovurja kroz lešči služba. 20 Kana von godova ašundine, dine slava e Devlešče thaj phendine e Pavlešče: "Diches phrala, dešenca milje Židovurja si save pačaine thaj sa revno sledin e Mojsijesko zakono? 21 A pale tute ašundine kaj sa e Židoven save trajin maškar okola kaj naj Židovurja, sikaves te či poštuin e Mojsijesko zakono thaj te na obrezin pire čavren thaj te na inčaren amare običaja. 22 So akana te čeras? Von sigurno ašunena kaj avilan, 23 pa zato čer gajda sar phenas tuče. Amende si štar manuša save zavetuisajle e Devlešče. 24 Le len thaj obredno šlav tut zajedno lenca thaj počin pale lende o obred te šaj randen pesko šoro. Gajda savora džanena kaj naj čače okova so ašundine pale tute, nego kaj vi tu korkoro inčares e Mojsijesko Zakon thaj trajis prema leste. 25 A pale okola manuša save naj Židovurja, a save postanisardine vernikurja, amen lende bičhaldam akaja amari odluka: te na han habe savo si žrtvujime e idolende, te na han rat thaj mas e mule životinjengo thaj te na čeren bludo." 26 Thejara o đes o Pavle lijas okole manušen, pa zajedno lenca izvršisarda o obredno šilaipе. Askal dijas ando Hramo te mothol kana inkljena e obredne đesa palo šilaipе thaj kana avena prinesime e žrtve pale savorende lendar. 27 Kana akala eŧta đesa skoro nakhline, varesave Židovurja andar e Cikni Azija dikhline e Pavle ando Hramo, vazdine e themes pe leste thaj astardine les. 28 Čhonas muj: "Manušalen andar o Izrael, pomogni! Akava si okova kaj posvuda sikavel sa e manušen protiv amaro them, protiv amaro zakon thaj protiv akava than! Čak vi okolen save nas Židovurja anda andre ando Hramo thaj gajda poganil akava than!" 29 Akava phendine kaj majsigo, dikhline e Trofime andar o Efes e Pavlesa ando gav thaj gndinas kaj o Pavle anda les andre ando Hramo. 30 O sasto gav vazda pe thaj o them prastaja katar sa e riga. Astardine e Pavle thaj crdine les avri andar o Hramo. A o vudar odma phandadilo. 31 Dok von kamenas te mudaren e Pavle, aresli

e poruka e šerutne zapovednikošče pe rimsko četa kaj o sasto Jerusalem si ande buna. 32 O zapovedniko odma lijas e vojniconen thaj e kapetanen thaj prastaja dži lende. Kana e Židovurja dikhline e zapovedniko thaj e vojniconen, či marenas majbut e Pavle. 33 O zapovedniko avilo ko Pavle, astarda les thaj zapovedisardas te phanden les ande duj lancurja. Askal phučla ko si vo thaj so čerda. 34 A varesave manuša andar e gomila čhonas muj jek, a aver vareso duijo. Sar o zapovedniko našti khandi katar e bari buka te saznajil, naredisarda te inčaren e Pavle ande kasarna. 35 Kana o Pavle areslo dži ke stepenice, o them sas gajda nasilno kaj e vojniskurja moraš te inčarenas e Pavle. 36 O silno them džalas pale lende thaj čhonas muj: "Mudar les!" 37 Kana trubuja te inčaren e Pavle ande kasarna, vo phučla e zapovedniko: "Tromav vareso te phenav tuče?" O zapovedniko phučla les: "Zar tu džanes grčki? 38 Te naj san tu askal okova Egipcano savo majsigo varesavi vrjama vazda pobuna thaj inčarda pesa ande pustinja štar milje manušen save inčarenas čurja?" 39 O Pavle phendas lešče. "Me sem Židovo andar o Tarso, građanino sem e pindžarde gavesko ande Kilikija. Moliv tut, muk man te phenav vareso e themešče." 40 Kana o zapovedniko mukla les te čerel svato, o Pavle askal ačhilo pe stepenice, dijas znako e vastesa kaj kamel te čerel svato thaj nastanisarda tišina. Vo askal lija te mothol lende pe židovsko čhib:

22 "Phralalen thaj dadalen, ašunen akana so si man te phenav tumende ande mungri odbrana." 2 Kana ašundine kaj čerel lende svato pe židovsko čhib, sas još majbari tišina. Askal o Pavle phendas: 3 "Me sem Židovo. Bijando sem ando Tarso ande Kilikija, ali barjilem akate ande akava gav. Semas e Gamalilesko učeniko thaj vo tačno sikada man o zakon amare pradadengo. Saste ileja služisardem e Devlešče sago vi tumen ađes. 4 Progonivas thaj mudaravas okolen save sledinas akava Drom, astaravas e manušen thaj e manušnjen thaj čhavas len ande tamnica. 5 Pale godova šaj te posvedočin vi e šorvale rašaja thaj sa e starešine. Lendar dobisardem o lil pale phral ando Damask, thaj teljardem te okolen save sas okote anav phanglen ande lancurja ando Jerusalem te aven kaznime. 6 Dok putuivas thaj semas već paše te dav ando Damask, varekaj katar o mismeri katar jekhvar obasjaisarda man o zuralo svetlost andar o nebo. 7 Pelem pe phuv thaj ašundem o glaso savo phenelas mande: 'Savle, Savle, sostar progonis man?' 8 A me phučlem: 'Ko san tu Gospode?', a o glaso phendas mande: 'Me sem o Isus andar o Nazaret saves tu progonis.' 9 E manuša save sas manca dikhline o svetlo, ali či hačardine

o glaso okolesko savo motholas. **10** A me phučlem: 'So trubul te čerav, Gospode?' A o Gospod phendas mande: 'Ušti thaj teljar ando Damask. Okote phenela pe tuće so si tuće odredime te čeres.' **11** Katar o baro svetlo korajlem thaj okola save sas manca inđarenas man palo vas, pa gajda dijam ando Damask. **12** Okote sas varesavo pobožno manuš savo akhardolas Ananija. Vo verno inčarelas o Zakon thaj sas po lačo glaso maškar e Židovurja save trajinas okote. **13** Vo avilo dži mande, ačhilo thaj phendas: 'Phrala Savle, dik!' A me isto časo dikhlem pe leste thaj šaj dikhlem les. **14** O Ananija phendas mande: 'O Del amare pradadengo majanglal losarda tut te pindžares lešči volja, te dičhes e Pravedniko thaj te ašunes o glaso andar lesko muj. **15** Kaj, tu angle savorende svedočija pale leste thaj pale okova so dikhlan thaj ašundan. **16** A akana, so ažučares? Ušti thaj bol tut, thaj thov čire bezeha gajda kaj akhareja lesko alav.' **17** Kana bolde man ando Jerusalem thaj molisajlem ando Hramo, sas man vizija. **18** Dikhlem e Isuse sar phenel mande: 'Sidar, odma thaj džatar andar o Jerusalem, kaj o them akate či prihvatala okova so kames te phenes lende pale mande.' **19** A me phendem: 'Gospode, von džanen kaj čhudavas ande tamnica thaj kaj maravas pe sinagoge okolen save pačanas ande tute. **20** A kana čhordolas o rat čire svedokosko e Stefanosko, vi me ačhavas okote, odobrisardem godova thaj lavas sama pe drze okolende save mudarenas les.' **21** A vo phendas mande: 'Dža, kaj bičhalava tut dur maškar okola save naj Židovurja.'" **22** E Židovurja čhonas kan ko Pavle sa dži ke akala alava, a askal čhutine muj: "Istrebi kasaves katar e phuv! Godova či zaslužil te trajil!" **23** Gajda dok čhonas muj, čhudenas pestar e ograča thaj čhudenas o praho ando vazduh. **24** A o zapovedniko naredisarda te e Pavle inđaren ande kasarna te bičuin les, sar saznaisardasas sostar e Židovurja gači čhonas muj pe leste. **25** A kana pašljardine les thaj phangline les e haravljenca te bičuin les, o Pavle phučlas e kapetano savo sas okote: "Dali troman te bičuin okole savo si rimsko državljanin, a či ni sudisardine lešče?" **26** Kana o kapetano godova ašundas, avilo dži ko zapovedniko thaj phendas lešče: "So čeres godova? Pa akava manuš si rimsko državljanin!" **27** O zapovedniko nakhlo dži ko Pavle thaj phučila les: "Phen mande, dali san tu čače rimsko državljanin?" A o Pavle phendas: "Sem." **28** Askal o zapovedniko phendas: "Me but love dijem te dobiv rimsko državljanstvo." A o Pavle pe godova phendas: "A me lesa bijandilem." **29** A e vojnukurja, save spremisajle te bičuin e Pavle odma crdine pe lestar. A o zapovedniko zato kaj phangla e Pavle zurale darajlo kana ašundas kaj si o Pavle rimsko državljanin. **30** Thejara o đes o zapovedniko

oslobodisarda e Pavle, a pošto kamlas pouzdano te ašunel sostar e Židovurja optužin e Pavle, naredisarda e šorvale rašajende thaj savorende andar o Baro veće te sastanin pe. Askal inkalda e Pavle angle lende.

23 O Pavle dikhla pe manuša andar o Baro veće thaj phendas: "Phralalen, me sa dži ađes trajivas anglo Del ande čisto savest." **2** Pe godova o Baro rašaj o Ananija naredisarda okolende save ačhenas paše leste te den les dab prekal o muj. **3** A o Pavle phendas lešče: "Tut o Del dela dab, kaj san dvolično, okrečime zidona! Tu bešes akate te sudis mande po Zakono, a protivno e zakonešče des naredba te den man dab!" **4** A okola kaj sas prisutne okote phendine: "Sar tromas te kudis e Devlešče bare rašajes!" **5** A o Pavle phendas. "Či džanglem, phralalen, kaj si vo o baro rašaj. Kaj ando Sveto lil ačhel ramome: 'Na motho bilačipe palo poglavari čire themesko.'" **6** Sar o Pavle džanelas kaj si varesave manuša andar o Baro veće sadukeja, a aver fariseja, vo čhuta muj: "Phralalen! Me sem fariseji thaj potomko sem e farisejengo! Akate sudil pe mande andar godova kaj si man nada ando uštipe andar e mule." **7** Thaj kana godova phendas, avilo dži ke čingara maškar e fariseja thaj maškar e sadukeja, gajda kaj o čidino them podelisajlo. **8** E sadukeja inčaren kaj naj uštipe andar e mule, niti anđelurja niti duho, a e fariseja pačan ande sa godova. **9** Gajda avilo dži ko baro rknipe, a varesave učitelja e Mojsiješče zakonestar save sas andar e farisejendi stranka uštile thaj zurale usprotivisajle gajda kaj, mothonas: "Či arakhas kaj akava manuš čerda nisosko bilačipe. Kaj so te motholas lešče o duho ili o andelo?" **10** E čingar maškar lende sas gajda zurali kaj o zapovedniko daralas te na pharaven e Pavle pe kotora. Andar godova naredisarda e vojnikonende te pe sila len e Pavle katar o them thaj te inđaren les ande kasarna. **11** Aver rjat o Gospod ačhilo anglo Pavle thaj phendas lešče: "Av zuralo. Kaj sar pale mande svedočisardan ando Jerusalem, gajda trubul te svedočis vi ando Rimol!" **12** Kana đesajlo, e Židovurja čerdine zavera thaj dine pe solah kaj či hana ni pijena dok či mudaren e Pavle. **13** A sas majbut katar štarvardeš džene okola save čerdine e zavera. **14** Von đele ke šorvale rašaja thaj ke starešine thaj phendine: "Zurale halam solah kaj khanči či čhasa ando muj dok či mudaras e Pavle. **15** Zato tumen akana e manušenca andar o Baro veće, manden katar o zapovedniko te palem anen e Pavle tumende. Phenen kaj kamen majlače te phučen les pale godova so čerel. A amen mudarasa les po drom dži akaring." **16** Ali e Pavlešče phejako čhavo ašundas pale akaja zavera thaj delo ande

kasarna te godova mothol e Pavlešče. 17 O Pavle akhardas ječe kapetano thaj phendas lešče: "Inđar akale terne ko zapovedniko, kaj sile vareso te mothol lešče." 18 O kapetano lija thaj inđarda les ko zapovedniko thaj phendas: "O Pavle kaj si phanglo akhardas man thaj phendas te akale terne manušen anav tute, kaj si les vareso te phenel tuče." 19 O zapovedniko lija les palo vas, inđarda les pe rig thaj phučla les: "So si tut te mothos mande?" 20 Vo phendas: "E Židovurja dogovorisaile te zamolin tut pale thejara te palem anes e Pavle ando Baro veče, sago izgovor kaj kamen majlače te ašunen pale lesko slučaj. 21 Na de te hohaven tut, kaj si majbut katar štarvardeš manuša save garade ažučaren les. Dine pes solah kaj či hana niti pijena dok či mudaren les. Več si spremne, samo ažučaren te tu pristanis." 22 O zapovedniko askal mukla e terne te džaltar thaj zapovedisardas lešče: "Khonikašče na phen kaj akava phendan mande." 23 Askal akhardas duj kapetanen thaj phendas: "Pripremin duj šela vojniconen, thaj eftavardeš manušen pe grasta thaj duj šela manušen e kopljenca, te ariat ande inja saturja teljaren ande Kesarija. 24 Palo Pavle pripremin e životinjen pe save jašila thaj inđaren les ko upravniko Feliks džude thaj saste." 25 Askal ramosarda lil palo upravniko ande savo ramolas: 26 "Katar o Kladije Lisija, e poštuime upravnikošče e Feliksošče, pozdrav. 27 Akale manušen astardine e Židovurja thaj kamline te mudaren les, ali kana ašundem kaj si vo rimsko državljano avilem mungre vojniconenca thaj spasisardem les. 28 Andem les askal anglo Baro veče te ašunav pale soste si došalo. 29 Arakhlem kaj došaren les pale vareso so naj muklo ande lengo zakono thaj kaj naj došalo pale khanči andar soste trubujasas te avel mudardo ili čutino ando phanglipe. 30 A kana ašundem kaj si protiv leste čerdine zavera, odma bičhaldem les tute. A okolende kaj prnas les phendem te angle tute inkalen pale soste prn les." 31 Askal e vojnikirja čerdine sago kaj sas lende zapovedime. Line e Pavle thaj račava inđardine les ando gav Antipatrida. 32 A thejara đes mukline e manušen pe grasta te džan lesa majdur, a von boldine pe ande kasarna. 33 Kana aresline ande Kesarija, dine e upravnikošče o lil thaj andine e Pavle angle leste. 34 O upravniko čitosarda o lil thaj phučlas e Pavle andar savi si pokrajina. Kana ašunda kaj si andar e Kilikija, 35 phendas: "Čhava kan tut thaj odlučiva kana aresena okola save prn tut." Askal dijala naredba te o Pavle avel tale straža ande Irodešči palata.

24 Pandž đes pale godova, ande Kesarija areslo o šorvalo rašaj Ananija varesave starešinenca thaj e

advokatosa savo akhardolas Tertul. Von inkaldine anglo upravniko pire optužbe protiv o Pavle. 2 Kana akhardine e Pavle te del andre, o Tertul počnisarda te optužil les, e alavenca: "Poštuime Feliks, zahvalne sam tuče, kaj amen uživis ando miro, a čiri briga palo them andas lačhipe e themešče. 3 Amen godova, pe svako način thaj pe svako than priznaisaras ande bari zahvalnost. 4 Ali te či majbut dosadisarav tuče, moliv tut te ande čiro lačhipe čhos cara kan amende. 5 Utvrdisardam, kaj akava manuš čerel amende bare nevolje. Vazdel e pobuna maškar e Židovurja ando sasto carstvo thaj vođa si ande nazaretsko sektako. 6 Kamlas te oskrnavil čak vi amaro Hramo, ali astardam les. 7 [Ali avilo o zapovedniko Lisija e bare vojskasa thaj e silava otmisarda les amendar.] 8 Ako phučes les, vi korkoro šaj saznais lestar sa pale soste amen optužisaras les." 9 A vi e Židovurja složisajle lešče alavenca. Tvrđinas kaj si čače sa so phendas o Tertul. 10 Kana o upravniko dija znako e Pavle te čerel svato, o Pavle phendas: "Džanav kaj san več but brš sudco akale themesko, zato e mirmo dušava inkalav mungri odbrana. 11 Šaj proveris kaj naj majbut katar dešuduj đes sar areslem ando Jerusalem te pokloniman e Devlešče. 12 Či arakhline man nikada kaj prepriřv man ando Hramo, niti kaj buniv e theme ande sinagoge ili ando gav. 13 Akala manuša našti dokaziřn godova pale soste akana prn man. 14 Ali, akava priznajiv tuče: me služiv e Devlešče savešče služiřnas amare pradada thaj slediv o Drom, saves okola save prn man akharen sekta. Pačav ande sa so ramol ando Mojsijsesko Zakon thaj ande proročke knjige. 15 Vi man si nada ando Del, isto sago vi len – kaj avela uštipe andar e mule pale okola savi si pravedne thaj vi pale nepravedne. 16 Zato uvek truřiv man te avel man čisto savest anglo Del thaj anglo them. 17 Več bršenca naj semas ando Jerusalem, a akana avilem te mungre themešče anav pomoć pale čore thaj te prinesiv žrtve e Devlešče. 18 Dok godova čeravas arakhline man ando Hramo, thaj askal semas obredno čisto, ali okote nas čidino o them niti sas buka. 19 Godova sas varesave Židovurja andar e Cikni Azija, pa vi von trubujine te aven akate te svedočin angle tute thaj optužin man, ako si len vareso protiv mande. 20 Ili, neka akala akate korkoro phenen savi doš arakhline pe mande kana ačhavas anglo Baro veče, 21 osim ako godova naj zbog godova kaj čhutem muj dok ačhavas maškar lende: 'Tumen ađes sudin mande zato kaj pačav ando uštipe andar e mule!'" 22 Pe godova o Feliks, savo sas lače obavestime palo Drom, odgodisarda o saslušanje thaj phendas lende: "Kana avela o zapovedniko Lisija, rešiva tumaro slučaj." 23 Askal naredisarda e kapetanošče te len sama po Pavle

ando phanglipe, ali te den les varesavi sloboda thaj te či branin khonikašče katar lešče te vodin e briga pale leste. **24** A pale varesave đesa majposle avilo o Feliks pire romnjava e Drusilava, savi sas Židovka. Naredisarda e vojnikonende te anen lešče e Pavle thaj čuta leste kan sar čerelas svato palo pači pe ando Isus Hristo. **25** A askal o Pavle počnisarda te čerel svato pale pravednost, uzdržljivost, thaj palo sudo savo avel. O Feliks darajlo thaj phendas: "Akana šaj džastar, a kana avela man majbut vřjama, bičhalava pale tute." **26** A uz godova nadisajlo kaj o Pavle dela les love pa zato često akharelas les thaj čerelas lesa svato. **27** Nakhline duj brš, a e Felikse po than e upravnikosko nasledisardas o Porkije Fest. A pošto kamlas te ugodil e Židovende, o Feliks mukla e Pavle ando phanglipe.

25 Trin đesa nakon so o Fest avilo ande pokrajina, delotar andar e Kesarija ando Jerusalem. **2** Okote e šorvale rašaja thaj e židovske starešine inkaldine lešče pire optužbe protiv o Pavle thaj zamolisardine les **3** te čerel lende usluga thaj te e Pavle premestil ando Jerusalem – pošto čerdine zaseda po drom te mudaren les. **4** Ali o Fest phendas kaj e Pavle inčaren phandade ande Kesarija thaj kaj vi vo uskoro džala inča. **5** Askal phendas: "Neka varesave katar tumare vođe teljaren manca thaj neka prn godole manušes te si pale varesoste došalo." **6** Nakon so o Fest ačhilo lende varekaj katar ohto ili deš đesa, delo ande Kesarija. Već thejara đes bešo pe sudačko stolica thaj zapovedisarda te anen e Pavle. **7** Kana o Pavle dija andre, e židovske vođe andar o Jerusalem ačhile oko leste thaj inkalenas protiv leste but phare optužbe save našti dokažinas. **8** A o Pavle agajda branilas pe: "Či čerdem khanči so si protiv o židovsko Zakono, niti protiv o Hramo, niti protiv o caro." **9** Pe godova o Fest, pošto kamlas te ugodil e Židovende, phučlas e Pavle: "Dali kames te džas ando Jerusalem, te okote sudil pe tuće angle mande?" **10** A o Pavle phendas: "Me ačhav anglo Cezaresko sudo thaj akate trubul te sudil pe mande. E Židovende či čerdem nisosko bilačipe, sago kaj vi korkoro lačhe džanes. **11** Te sem vareso došalo ili te čerdem vareso so zaslužil te avav mudardo, či našav katar godova. Ali te akava so čhon pe mande naj čači pe, khonik našti del man lende po sudo. Mangav te sudil pe mande anglo Cezar!" **12** Pošto čerda svato pire savetnikonenca, o Fest phendas lešče: "Manglan te sudil pe tuće anglo Cezar, ko Cezar vi džaja." **13** Varekazom đesa majkasnije avilo ande Kesarija o caro Agripa thaj e Vernika te posetin e Feste. **14** Sar ačhile okote majbut đesa, o Fest phučla e caro te del les savet palo Pavle: "Akate si jek manuš saves o Feliks ačhada ando phanglipe. **15** Kana semas ando

Jerusalim, e šorvale rašaja thaj e židovske starešine čhutine optužbe protiv leste thaj mandenas te avel osudime. **16** Me phendem lende kaj e Rimljanen naj običaj te izručin varekas majsigo nego so sudin lešče. O prme manuš majsigo trubul te suočil pe okolenca save prnas les thaj te dobil prilika te branil pe katar e optužbe. **17** Zato či gndivas man kana avile akaringal manca, nego odma thejara đes bešlem pe sudačko stolica thaj naredisardem te anen godole manušes. **18** Kana e manuša kaj prnas les uštile te čeren svato, či prnas les pale nisosko bilačipe, sago kaj me ažučaravas. **19** Nego tradenas pe lesa pale lendi vlastito religija thaj pale varesosko Isus savo mulo, ali pale savo o Pavle tvrdil kaj si džudo. **20** Sar me semas hasardo ande kasavi rasprava, phučlem les, dali kamel te džal ando Jerusalem te okote sudil pe lešče pale godova. **21** Ali sar o Pavle kamla te ačhel ando phanglipe dok či odlučil amaro veličanstveno Cezar, naredisardem te inčaren les ando phanglipe dok či bičhalav les ko Cezar." **22** Askal o Agripa phendas e Festošče: "Kamlemas vi me te ašunav godole manušes." A akava phendas: "Thejara ašuneja les." **23** Thejara đes o Agripa thaj e Vernika avile ando baro raskoš zajedno e zapovednikonenca thaj e gavešče ugledne manušenca, dine ande sala, a o Fest naredisarda te anen e Pavle. **24** Askal o Fest phendas: "Caro Agripa, thaj savora tumen save sen akate, dičhen akale manušes! Zbog leste aviline mande sa e Židovurja ando Jerusalem thaj vi akatar thaj rknjimava mothonas kaj vo či trubul majbut te trajil. **25** Ali me či arakhlem kaj vo čerda vareso so zaslužil smřto. Ali sar vo korkoro manglas te sudil pe lešče anglo Cezar, odlučisardem te bičhalav les ando Rimo. **26** Ali naj man khanči odredime te ramov pale leste e Cezarošče, zato andem les angle tumende, a posebno angle tute carona Agripa, te avel man posle akaja istraga so te ramov. **27** Gndiv, kaj naj razumno te bičhalel pe o phanglo manuš ko Cezar, a te či ramol pe so si lešči doš."

26 Askal o Agripa phendas e Pavlešče: "Muklino si tuće te čeres svato ande čiri odbrana." O Pavle vazda piro vas thaj phendas: **2** "Carona Agripa, inčarav man kaj sem bahtalo kaj ađes angle tute braniva man katar sa okova pale soste e Židovurja prn man, **3** a majbut pale godova kaj tu pindžares sa e židovske običaja thaj okova ande soste naj složne. Zato moliv tut te strpljivo čhos kan mande! **4** Sa e Židovurja lačhe džanen mungro trajo, sar trajivas katar mungro majrano ternipe maškar mungro them thaj ando Jerusalem. **5** Katar dumut pindžaren man thaj ako kamen, šaj te svedočin kaj sago farisejo trajivas pe majstrože

pravilurja ande amaro pačipe. 6 A akana sudin mande zato kaj nadv man kaj o Del pherela piro obečanje savo dija amare pradadende. 7 Amare dešuduj plemenurja, nadin pe kaj o Del pherela o obečanje thaj pale godova predano služin e Devlešče o des thaj e rjat. Pale godoja isto nada, carona, e Židovurja prn man! 8 Sostar smatrin nemoguće kaj o Del vazdel e manušen andar e mule? 9 Vi me gndisardem kaj sa e silenca trubul te boriv man protiv okola save sledin e Isuse andar o Nazaret. 10 Ake so čeravas ando Jerusalem kana dobisardem vlast katar e šorvale rašaja: but e Devlešče svete manušen čhudavas ande tamnica. A kana mudarenas len, me godova odobrivas. 11 Thaj pe sa e sinagoge često mučivas len thaj gajda tradavas len te hulin po Isus. Gači semas holjariko pe lende kaj progonivas len čak vi pe aver gava." 12 "Gajda me kana dobisardem vlast thaj odobrenje katar e šorvale rašaja đelem ando Damask. 13 Kana varekaj katar o mismeri, carona, dok putuivas, dikhlem svetlo andar o nebo, savo sas majzuralo katar o kham, pa obasjaisarda man thaj okolen save džanas manca. 14 Savora pelam pe phuv, a me ašundem o glaso savo pe židovsko čhib phendas: 'Savle, Savle, sostar progonis man? Samo korkoro tuće anes šteta dok boris tut protiv mande.' 15 Me phučlem: 'Ko san tu, Gospode?' A o Gospod phendas mande: 'Me sem o Isus saves tu progonis. 16 Ali ušti, vazde tu pe pungre! Sikadilem tuće te aves mungro sluga thaj mungro svedoko. Čereja svato pale okova so dikhlan thaj pale okova so sikavava tuće. 17 Me izbaviva tut katar čiro židovsko them thaj vi katar okola save naj Židovurja, savende bičhalav tut. 18 Tu putreja lende jakha, thaj boldeja len katar e tama karingal o svetlo, katar e sotonsko vlast karingal o Del thaj po pačipe ande mande primin jartipe pale pire bezeha thaj o nasledstvo maškar e svete.' 19 Zato, carona Agripa, naj semas bi pačivalo okolešče so dikhlem andar o nebo. 20 Nego prvo propovedivas okolende ando Damask, askal ando Jerusalem, thaj pe sasti Judeja, a vi okolende save naj Židovurja, kaj trubun te pokajin pe thaj te bolden pe ko o Del thaj te čeren e dela save dokažina kaj pokajisajle. 21 Zbog godova e Židovurja astardine man ando Hramo thaj line te mudaren man. 22 Ali o Del pomognisarda mande thaj pomožil mande sa dži ađes ađeste. Gajda ake akana, ačhav akate thaj svedočiv savorende pale okova so dikhlem. Či phenav khanči nevo, nego okova so e Prorokurja thaj o Mojsije phendine kaj avela: 23 kaj o Hristo patila thaj kaj avela prvo savo uštela andar e mule, thaj navestila o svetlo e Židovende thaj vi okolende save naj Židovurja." 24 Dok o Pavle gajda phenelas ande piri odbrana, o Fest čutas muj: "Pavle, tu san dilo! Dilajlan katar o baro džanglipe."

25 O Pavle phendas: "Naj sem dilo, poštuime Feste, nego phenav okova so si čače thaj razumno. 26 O caro Agripa si lače uputime ande gadava thaj lešče šaj phenav slobodno. Či pačav kaj si lešče bilo so katar akava bi džanglo, kaj godova či dogodisajlo varekaj ande varesavo garado čoško e phuvjako. 27 Carona Agripa, dali pačas ande okova so phendine e prorokurja? Me džanav kaj pačas." 28 Askal o Agripa phendas e Pavlešče: "Još cara thaj ubedija man te avav hrščano!" 29 A o Pavle phendas lešče: "Još cara ili but, me molima e Devlešče te na samo tu nego vi savora akala save ađes ašunen man aven sago vi me, samo bi akala okurja!" 30 Pe godova o caro uštilo, a lesa vi o upravniko, Vernika thaj okola save bešenas lesa. 31 Dok inkljenas avri, počnisardine te phenen jek avrešče: "Akava manuš či čerda khanči so zaslužil smrto ili phanglipe." 32 A o Agripa phendas e Festešče: "Akava manuš već šaj avilosas oslobodime te či manglasas te sudil pe lešče anglo Cezar."

27 Kana sas odlučime te otplovisaras ande Italija, e Pavle thaj aver manušen andar o phanglipe predaisardine ko kapetano pe Cezarošči četa, savo akhardolas Julije. 2 Dijam ande jek lađa andar o gav Adramiteja, savi džalas dži ke cikne azijske thana ando primorje thaj otplovisardam. Amenca sas vi o Aristarh, o Makedonco andar o Soluno. 3 Thejara des avilam ando Sidon, a o kapetano Julije, sago manuš postupilas e Pavlesa, mukla les te džal dži ke pire drugarja te pobrininpe pale okova so trubulas les. 4 Kana đelam okotar, plovisardam severno uz o Kipar maškar o ostrvo thaj o kopno kaj phurdelas e protivno balval te avas zaštitime. 5 Preplovisardam o more uz e obala Kilikija thaj Pamfilija thaj areslam ando gav Mira Likijsko. 6 Okote o kapetano arakhlas jek lađa andar e Aleksandrija savi džalas ande Italija, gajda kaj dijam ande godoja lađa. 7 But đesa plovisardam zurale sporo thaj jedva areslam paše dži ko than Knid. Pošto e balval či delas amen te plovisaras majdur, zato plovisardam e južno Kritače rigava te štitil men katar e balval dži ko than Salmona. 8 Phares plovisardam uz e obala, areslam dži ke varesavo than savo akhardolas "Lače pristaništa", paše ko than Laseja. 9 But vrjama sas hasardi, a e ploidba postanisardas opasno, a vi o židovsko posto sas već gata, pa o Pavle upozorisarda len: 10 "Manušalen, dikhav kaj e ploidba avela opasno thaj pe bari šteta – na samo palo tereto thaj pale lađa, nego vi pale amare trajurja." 11 Ali o kapetano majbut pačalas e manušešče savo tradelas e lađa thaj kolešče kašči sas e lađa, nego e Pavlešče. 12 Pošto e luka nas lači te ačhel pe okote prekal o ivend, majbut džene odlučisardine te otplovisaras okotar dži ko

Feniks te avilo moguće thaj te okote ačhel pe prekal o ivend. O Feniks si luka pe Krita, savi dičhel karing o jugozapad thaj karing o severozapad. 13 Kana phurdas e cikni južno balval, pelo lende pe godi kaj avela lende gajda sago kaj kamenas, vazdine o sidro thaj plovinas uz e obala Krita. 14 Ali či nakhlo but katar godova, kana ačhili te phurdel katar o ostrvo e olujno balval akhardi severoistočnjak. 15 Astartas e lađa, savi našti oduprisajli gajda kaj muklam te indarel men e balval. 16 Dok plovisardam uz varesavo cikno ostrvo savo akhardolas Klauda te avas zaštitime katar e balval, e phare mukava astartam o čamco savo crdam pale amende. 17 Kana vazdine o čamco, e šolenca učvrstisardine e lađa te na rspil pe. Daranas te na zaglavin pes ando plitko paj pe Sirta zato mukline o cikno sidro thaj e balval indarelas len majdur. 18 Sar astarta men e bari oluja, thejara đes ačhile te čhuden o tereto katar e lađa te avel e lađa majloči, 19 a o trito đes čhudine čak vi e oprema. 20 Sar o kham thaj e čerenja či sikadonas but đesa, a e oluja marelas e lađa, hasardam svako nada kaj spasisarasa men. 21 A sar već dugo khonik khanči či hala, o Pavle ačhilo angle lende thaj phendas: "Manušalen, trubujine te čhon kan mande thaj te na isplovin katar e Krita. Askal či avilosas tumen akaja nevolja thaj šteta. 22 Ali vi akana phenav tumende te na daran, kaj khonik tumendar či hasarela pesko trajo, samo e lađa avela uništite. 23 Arači pe rjat sikadilo mande o anđelo e Devlesko kašće pripativ thaj kašće služiv, 24 thaj phendas mande: 'Na dara, Pavle. Tu trubus te ačhes anglo Cezar. Thaj ake, o Del obečisarda tuće kaj zbog tute spasila savoren save plovin tusa.' 25 Andar godova, na te daran, manušalen, kaj pačav e Devlešće kaj avela sago kaj sas mande mothodo. 26 Samo trubul te zaglavi men ando plitko paj pe varesavo ostrvo." 27 Mukhla pes e dešu štarto rjat, a e balval indarelas men još e Sredozemno moreja, a varekaj katar e opaš e rjat e mornarja gndinas kaj si o kopno paše. 28 Izmerisardine kozom sas o paj handuk e šoleja pe savo sas phanglo o tego. Izmerisardine kaj sas o paj handuk trijanda thaj ehta meterja. Cara majposle palem izmerisardine e handuk thaj o paj sas handuk biš thaj ohto meterja. 29 Sar daranas te na pekas ande podvodne stene, čhudine štar sidrurja ando paj katar e paluni rig e lađači thaj molisajlam te đesavol. 30 E mornarja kamenas te našen, gajda kaj mukline o čamco ando paj thaj čerenas pešće muj kaj moraš te mučen e sidrurja vi katar e angluni rig e lađači. 31 Ali o Pavle phendas e kapetanošće thaj e vojnikonende: "Ako akala manuša či ačhen pe lađica, tumen či spasina tumen!" 32 Pe godova e vojnukurja čhindine o šolo thaj mukline te o čamco perel ando paj. 33 Kana

počnisarda te đesavol, o Pavle motholas savorende te len te han vareso. Phenelas: "Ađes si dešuštarto đes sar ažučaren ande neizvesnost bi habesko, thaj khanči či čhutine ando muj. 34 Akana moliv tumen te han vareso kaj si godova pale tumaro lačhipe. A niječešće tumendar či perela ni bal katar o šoro." 35 Sar akava phendas, lijas o mangro thaj angle lende zahvalisarda e Devlešće, phagla thaj lijas te hal. 36 Savora sas ohrabrime thaj line te han. 37 A pe lađa sas ukupno duj šela thaj eftavardeš thaj šov manuša. 38 Kana čaljile ačhile te ločaren e lađa, gajda kaj čhudenas o điv ando more. 39 Kana đesajlo, či pindžardine o kopno, ali dikhline varesavo zaliv e pristupačno obalava thaj kamenas te avilo moguće, okote te uplovin e lađava. 40 Putardine e šole katar e sidrurja te peren ando more thaj ande isto vrjama mukline e kormilurja ando paj te šaj upravin e lađasa. Askal vazdine o angluno jedro karingal e balval thaj teljardine karingal e obala. 41 Ali e lađa dija dab ando pesko kaj sas o cikno paj thaj ačhili. O angluno deo e lađako zaglavisajlo thaj našti pomaknilaspe, dok o paluno deo e lađako phadolas e zurale talasendar. 42 Askal e vojnukurja kamenas te mudaren e phangle manušen, te na varesavo lijasas te plivil thaj našel. 43 Ali o kapetano kamlas te spasil e Pavle thaj či mukla te čeren godova. Naredisarda te prvo okola manuša save džanenas te plivin huten ando paj thaj inklien pe obala, 44 a aver manuša neka plutin pe phalja ili pe vareso aver so ačhilo katar e lađa. Gajda savora džude aresline pe phuv.

28 Kana gajda spasisajlam, saznaisardam, kaj godova ostrvo akhardol Malta. 2 E manuša save trajinas okote sas neobično ljubazne prema amende. Astartine e jag thaj primisardine men oko late, kaj delas o bršnd thaj sas šil. 3 O Pavle čida naramko šuće krاندže thaj čhuta len pe jag, ali katar jekhvar zbog o tatiše andar e krاندže inklijisto o sap thaj astarta pe pale lešće vas. 4 Kana okola save trajinas okote dikhline sar o sap visil pe Pavlesko vas, phendine: "Akava manuši si sigurno ubica. Spasisajlo katar o more, ali e božica savi akhardolas Pravda či del les te trajil." 5 A o Pavle čhinosarda e sape katar piro vas ande jag, thaj nas lešće khanči. 6 A e manuša ažučarenas te šuljola ili te katar jekhvar perel tele mulo. Kana pale lungo vrjama sar ažučarenas, dikhline kaj khanči neobično či dogodisajlo lešće, predomislisajle thaj počnisardine te phenen kaj si vo del. 7 A paše godova than sas o imanje savo sas katar o poglavari godole ostrvosko savo akhardolas Publije. Vo primisarda men ande piro čer thaj trin đes ljubazno ugostisarda men. 8 A e Publijesko dad pašljolas, kaj mučilas les e groznica thaj e dizenterija. O Pavle dijas andre, čhuta

pire vas pe leste thaj pomolisajlo, thaj o manuš sastilo. 9 Pale godova avenas vi e aver nasvale manuša save trajinas pe godova ostrvo thaj sastonas. 10 Zato sikadine amende bari čast, a kana teljardam te džastar, čhutine amende ande lađa sa so trubulamen palo drom. 11 Kana nakhlo trin čhon, dijam ande varesavi aleksandrisko lađa savi sas sasto ivend po ostrvo, thaj pe savi sas zaštitno znako e blizancengo e Kastrosko thaj e Poluksosko. 12 Areslam ando Sirakuza, okote ačhilam trin đes. 13 Okotar otplovisardam thaj areslam ande Regijum. A thejara o đes počnisarda te phurdel e balval katar o jugo thaj pale duj đesa areslam ando Puteole. 14 Okote arakhlam e phralen, save zamolisardine men te ačas lende efta đes. Agajda areslam vi ando Rimo: 15 Kana e phral ando Rimo ašundine kaj amen avas, aviline angle amende sa dži ke Apijevesko trgo thaj dži ke Trin birturja. Kana dikhla len o Pavle zahvalisarda e Devlešće thaj ohrabrisajlo. 16 A kana dijam ando Rimo, e Pavle dine te trajil posebno, zajedno e vojnika savo lelas les sama. 17 Trin đes majposle, o Pavle akharda e židovske vođen, pa, kana savora čidine pe phendas lende: "Phralalen, vi ako či čerdem khanči protiv amaro them niti protiv e običaja amare pradađende, ipak phangline man ando Jerusalem thaj predaisardine man e Rimljanende. 18 E Rimljanurja ispituisardine man thaj kamline te oslobodin man kaj khančaja či zaslužisardem smrtno kazna. 19 Ali kana e Židovurja godolešće usprotivisajle, semas prisilime te mangav te sudil pe manđe anglo Cezar. Ali ni pale khančeste či optuživ mungre theme. 20 Zato vi kamlem te dikhav tumen thaj te čerav svato tumenca: ande akala lancurja sem upravo pale godova kaj pačav ande nada e Izraelošči." 21 E židovske vođe phendine e Pavlešće: "Či primisardam andar e Judeja nisosko lil pale tute, thaj khonik katar e phral save aresline okotar či pale tute javisardine ili phendine vareso bilače. 22 Ali, volisardamas te tutar ašunas so tu gndis, kaj džanas kaj protiv gadaja sekta svugde čerel pe svato." 23 Gajda odredisardine jek đes, pa još majbut džene aviline ando čer kaj sas o Pavle. A vo phenelas lende thaj svedočilas pale Devlesko carstvo thaj katar e detharin dži ke rjat andar knjige e Mojsiješće zakonestar thaj andar e Prorokurja uverilas len ande sa so značilas palo Isus. 24 Varesave pačaine ande okova so phenelas, dok aver či kamline te pačan. 25 Thaj sar našti složisajle maškar peste line te džantar, a o Pavle phendas lende još kava: "Lače phendas o Sveto Duho tumare pradađende prekal o proroko Isaija: 26 'Dža ke akava them thaj phen lende: Ašunena mungre alava, a či hačarena; pire jakhenca dičhena mungre dela, a našti dičhena len. 27 Kaj barosajle e

ile akale themešće, pire kanenca jedva ašunen, pire jakha phandadine; te e jakhenca či dičen, te e kanenca či ašunen, te e ileja či hačaren thaj obratin pe, te sastarav len.' 28 Zato, trubun te džanen: o Del bičhalel akava spasenje okolenđe save naj Židovurja. Von čhona kan leste." 29 [A kana akava phendas, e Židovurja đeletar gajda kaj tradenasa pe maškar pende.] 30 O Pavle duj pherde brš ačhilo okote ande piro unajmime čer. Okote primilas savoren save avenas leste. 31 Propovedilas pale Devlesko carstvo thaj hlabro sikavelas palo Gospod Isus Hrist thaj khonik či sprečilas les.

Rimljanende

1 Akava lil ramov tumende me, o Pavle, o sluga e Isuse Hristosko, savo sem odvoime te avav apostoli thaj savo sem bičhaldo te propovediv e Devlešči Bahtali nevimata, 2 savja o Del majanglal obečisarda prekal pire prorokurja ande Svete lila. 3 Akaja Bahtali nevimata mothol pale lesko Čhavo, savo postanisardas manuš gajda kaj bijandilo sago potomko e carsko Davidesko, 4 a kroz o Duho savo posvetil thaj pire uštimava andar e mule, sikadilo kaj si Čhavo e Devlesko ande sila. Vo si o Isuso Hristo, amaro Gospod. 5 Kroz leste dobisardam milost te avas apostolurja, te ande lesko alav anas e manušen andar svako them dži ke poslušnost thaj dži ko pačiće. 6 Maškar akala sen vi tumen saven akhardas o Isuso Hristo. 7 Ramov savorende ando Rimo save sen drage e Devlešće thaj save sen akharde te aven svete: Milost thaj miro tumende katar o Del, amaro Dad, thaj katar o Gospod Isus Hrist. 8 Majsigo katar sa, dav najs mungre Devlešće kroz o Isuso Hristo pale savorende tumende, kaj palo tumaro pačiće čerel pe svato po sasto them. 9 O Del, kašće mungre duhosa služiv gajda kaj propovediv e Bahtali nevimata lešće Čhavešči, svedoko si mande kaj či ačhav te moliv man pale tumende. 10 Uvek ande mungre molitve moliv man te avili gajda e Devlešči volja te napokon šaj avav tumende. 11 Kaj čezniv te dikhav tumen thaj te dav tumen varesavo duhovno daro te zuravon, 12 godova si, te amare zajedničko pačimava ohrabrisaras jek avres kana sem tumenca. 13 A či kamlemas te na džanen, phralalen, kaj but data sas man gindo te avav tumende, te vi maškar tumende kušav varesosko duhovno plodo baš sago kaj čerdem vi maškar aver manuša save naj Židovurja, ali semas sa dži akana sprečime. 14 Udžile sem te propovediv okolende save si civilizovane thaj okolende save naj civilizovane, e mudre manušenđe thaj kolende save naj mudre. 15 Gajda kaj but kamav te vi tumende ando Rimo propovediv e Bahtali nevimata. 16 Me či ladžav katar e Bahtali nevimata, kaj voj si e sila e Devlešči palo spasenje savorende save pačan – majsigo e Židovešće, a askal vi okolešće savo naj Židovo. 17 Kaj ande late sikadolpe e pravednost e Devlešči, savi primilpe e pačimava, thaj samo e pačimava, sago kaj si ramome ande Sveto lil: "O pravedniko trajila katar o pačiće." 18 Kaj, e Devlešči bari holji sikadolpe andar o nebo pe svako bezbožno trajo thaj pe svako nepravda e manušendi, save pire nepravedne trajosa garaven o čačiće. 19 Kaj okova so palo Del šaj džanel pe, pindžardo si lende, kaj o Del čerda te avel godova lende očigledno. 20 A e Devlešće nevidljive osobine – lešči večno sila thaj lesko božanstvo,

šaj jasno dičhel pe katar o postanko e themesko pe okova so stvorisarda. Zato khonikas naj izgovor pale piro bezah. (aidios g126) 21 Kaj, vi ako džanenas kaj o Del postoil, či sikavenas lešće sago e Devlešće čast thaj zahvalnost, nego dilajle ande pire gindurja thaj lengo nerazumno ilo kajlilo. 22 Mothonas kaj si mudre, a postanisardine dile, 23 pa e slava e besmrtno Devlešči zamenisardine e slikava thaj e oblikosa katar o smrtno manuš thaj katar e čiriklja, katar e životinje pe štar pungere thaj katar e gmizavcurja. 24 Zato o Del ande požude lende ilende predaisarda len e nemoralno melalipešće, te čeren ladžavne buća jek avresa. 25 Von e hohaimasa zamenisardine e Devlesko čačiće, pa slavinas thaj služinas okolešće so si stvorime, a na e Stvoritelješće savešće pripadil e slava pale uvek. Amin. (aiōn g165) 26 Zbog godova o Del mukla len lende ladžavne požudende. Gajda lende romnja o prirodno polno odnos zamenisardine okoleja savo naj prirodno. 27 Isto gajda vi e muškarcurja mukline o prirodno polno odnos e romnjenja thaj ande požuda phabonas jek pe avreste. E muškarcurja e muškarconenca čerenas ladžavne buća thaj gajda primisardine pe peste e zasluženno kazna pale pire perverzne buća. 28 Thaj zato kaj či incārenas vredno te pindžaren e Devle, o Del predaisarda len lende bezvredne godaće, te čeren okova so si nedolično. 29 Von si pherde svako vrsta nepravda, zloba, pohlepa, bilačiće, zavist, mudaripe, čingara, lukavstvo thaj zlo namera. Von si okola kaj čeren spletke, 30 klevetin avren, mrzan e Devle, bezobrazne si, ohole, barikane, izmislin sar te čeren bilačiće, nepokorne pire dadešće thaj pire dejaće, 31 nerazumne, nepouz dane, bezosečajne, nemilosrdne. 32 Vi ako džanen pale Devlesko upozorenje kaj smrto zaslužin okola save gajda čeren, von na samo kaj godova čeren nego ohrabrin vi avren gajda te čeren.

2 Zato naj tut izgovor, manušeja savo sudis, ma ko god te san. Kaj, korkoro godoleja kaj sudis varekašće avrešće, korkoro tut osudis, kaj vi tu savo sudis čeres godova isto. 2 A amen džanas kaj si e Devlesko sudo pravedno prema okola save čeren gajda. 3 Dali gndis, manušeja savo sudis okolende save čeren godova, a vi tu čeres godova isto, kaj našeja katar e Devlesko sudo? 4 Ili či maris palo barvalipe lešće lačhimasko, trpljivost thaj strpljenje? Či hačares kaj lesko lačiće kamel te vodil tut dži ko pokajanje? 5 Ali, zbog čiri tvrdoglavost thaj kaj čiro ilo naj promenime sa majbut crdes pe tute e Devlešči holji, po Ďes kana o Del objavila piri pravedno presuda, 6 pa svakonešće boldela prema lende dela. 7 Dela večno trajo okolende save roden e slava, čast thaj trajo bi smrtnosko, thaj trudin pe uvek te čeren

lačhipe, (aiñios g166) 8 a e bare holjasa kaznila okolen save si handžvale thaj či pokorin pe e čačipešće, a pokorin pe e nepravdaće. 9 E nevolja thaj e muka aresela svakone ko čerel bilačhipe, majsigo e Židove, a askal vi okole savo naj Židovo. 10 A e slava, čast thaj miro avela svakone ko čerel lačhipe, majsigo e Židovende, a askal okolende save naj Židovurja, 11 kaj o Del či dičhel ko si ko. 12 Okola save si e Mojsijesko Zakon, čeren bezah isto sago vi okola save nikada či ašundine palo Zakon. Ako okola save naj Zakon čeren bezah, isto gajda vi bi e Zakonesko avena hasarde. A ako okola save silen o Zakon čeren bezah, lende avela sudime po Zakon. 13 Kaj anglo Del naj pravedne okola save ašunen o Zakon, nego avena opravdime okola save izvršin o Zakon. 14 Kaj varesave, save naj Židovurja thaj či pindžaren e Mojsijesko Zakon prirodno čeren okova so mothol o Zakon. Zato, vi ako najlen Zakon, ande lende ile silen o Zakon. 15 Von sikaven kaj si lende ande ile ramome okova so o Zakon rodel lendar, a pale godova svedočil lendi savest thaj lendi godi savi jekhar prl len a jekhvar čak vi branil len. 16 Sa godova avela okova Ďes kana o Del prekal o Hristo Isus sudila e manušenje tajne, prema e Bahtali nevimata savi me objaviv. 17 A tu, savo phenes pale tute kaj san Židovo oslonistu po Zakon thaj hvalis tut e Devlesa. 18 Džanes e Devlešči volja thaj prosudis so si majlače, kaj godova sikavel tut o Zakono. 19 Uverime san kaj san vođa e korende, svetlo okolende save si ando tunjariko, 20 kaj sikaves okolen save či džanen, thaj te aves učitelj e čhavrende, kaj si tut o Zakon, saves si potpuno džanglipe thaj čačipe. 21 Sostar, askal tu savo sikaves averen, korkoro tut či sikaves? Tu savo propovedis kaj či trubul te čorel pe, korkoro čores. 22 Tu savo phenes te či čerel pe preljub, korkoro čeres preljub. Tu savešće si odvratne e idolurja, koristis e čordane predmeturja andar lende hramurja. 23 Tu savo hvalis tut kaj pindžares e Devlesko Zakon, sostar vredoš e Devle gajda kaj phađes o Zakon? 24 Sago kaj ramol ando Sveto lil: "Zbog tumende maškar okola save naj Židovurja vredoš pe e Devlesko alav." 25 O obrezanje koristil tuće samo ako poštuš o Zakon, ali ako phađes o Zakon askal sago kaj ni naj san obrezime: kaj o Zakon či čerel tut te aves khanči majlačo katar okola save naj obrezime. 26 Ali ako o manuš savo naj obrezime inčarel okova so phenel o Zakon, godova đinavelpe lešće sago kaj si obrezime. 27 Zato tuće, savo pindžares okova so ramol ando Zakon thaj san obrezime, a phađes o Zakon, sudila o manuš savo naj obrezime telesno, a inčarel e zapovedi e Zakonešće. 28 Kaj naj Židovo okova savo si godova samo avrjal, niti si pravo obrezanje avrjal po telo. 29 Nego, Židovo si okova savo si

godova andral, a pravo obrezanje si o obrezanje e ilesko, a godova čerel o Duho, a na o slovo e Zakonesko. Kasave manuše či hvalin e manuša, nego o Del.

3 Savi, askal, prednost si e Židoven? Ili savi korist si katar o obrezanje? 2 Bari ande svako pogled. Majsigo, e Židovende si poverime e Devlešće alava. 3 A so ako varesave lendar či paćanas? Zar lengo bipačipe ačhavela e Devlešči vernost? 4 Nisar! Nego o Del ačhela verno, vi ako si sa e manuša hohamne, sago kaj ando Sveto lil ramol: "Te aves ando pravo kana čeres svato thaj te pobedis kana došaren tut." 5 A ako amari nepravda sikavel e Devlešči pravednost, so te phenas pe godova? Kaj o Del si nepravedno – kana sikavel piri bari holji? Mothav gajda sago kaj e manuša gndin. 6 Nisar! Sar askal o Del šaj pravedno sudil e themešće? 7 Ali, ako si e Devlesko čačipe zbog mungro hohaipе još majočigledno pe lešči slava, sostar vi majdur sudilpe mande sago e bezehalešće? 8 Thaj sostar te na "čeras bilačhipe te avel lačhipe", sago kaj varesave hohaven pe amende thaj tvrdin kaj amen gajda phenas. Lendi osuda avela pravedno! 9 So askal? Dali sam amen Židovurja majlače avrendar? Nisar! Kaj, već optužisardam vi e Židoven thaj vi okolen save naj Židovurja kaj si o talo bezeh. 10 Sago kaj si ramome ando Sveto lil: "Naj pravedno – nijek; 11 naj khonik ko haćarel, naj khonik ko e Devle rodel. 12 Savora bandardine e Devlešće dromestar, sa zajedno postanisardine beskorisne. Naj khonik ko čerel lačhipe, naj ni jek." 13 "O muj lengo putardo limori si, e čhibja lendi hohaipе mothol." "E sapengo otrovo si pe lende vuš." 14 "O muj lengo pherdo si romaja thaj gorčina." 15 "E pungere lende sidaren te čhoren o rat, 16 kaj god džan, indaren propast thaj e beda, 17 a o drom e mirosko von či pindžaren." 18 "Dar e Devlestar naj angle lende jakha." 19 Ali džanas sa so o Zakon phenel, phenel okolende save si talo Zakono, te svako muj phandadol thaj te o sasto them avel angle Devlesko sudo. 20 Kaj khonik anglo Del našti opravdila pe gajda kaj inčarel e Mojsijesko Zakon, kaj o Zakon anel e manuše dži ko džanglipe kaj si bezehalo. 21 A akana, odvojime katar o Zakon, sikadili e Devlešči pravednost – pale savi svedočin o Zakon thaj ande knjige e Prorokonende. 22 Anglo Del sam opravdime kroz o pačipe ando Isuso Hristo. Godova odnosil pes pe sa save paćan kaj naj razlika maškar e manuša: 23 savora sagrašisardine thaj hasardine e slava e Devlešči, 24 ali ivja si opravdime, lešće milava, kroz o Hristo Isus, savo otkupisarda men gajda kaj lijas pe peste amare bezeha. 25 Les o Del čhuta te pire ratesa avel žrtva pomirno savi prihvatilpe e paćimava. Gajda o Del kamlas te sikavel piri

pravednost. Kaj, vo ande piri strpljivost či kaznilas e majsigo čerde bezeha, 26 a ande akaja vrjama sikavel piri pravednost te korkoro avel pravedno thaj te opravił okoles savo pačal ando Isus. 27 Prema godova, si li varekas razlog te hvalil pe korkoro pesa? Godova si isključime. Sošče zakoneja? E zakoneja savo rodel e dela? Na, nego e zakoneja savo rodel o pačipe. 28 Amen, dakle, inčaras kaj o manuš opravił pe zato kaj pačal, a na zato kaj vršil e dela e Zakonešče. 29 Ili si o Del samo o Del e Židovengo? Naj li vi okolengo save naj Židovurja? Ej, vi okolengo save naj Židovurja. 30 Kaj, samo jek Del si thaj opravił e pačimava okolen save si obrezime, a okolen save naj obrezime kroz o pačipe. 31 Da li amen e pačimava činas o Zakono? Nisar! Nego, e pačimava inčares e rig e Zakonešči.

4 So šaj phenas kaj arakhlas o Avraam, amaro prasad ando telo? 2 Kaj, ako si o Avraam opravił prekal pire dela, si les sova te hvalil pe, ali na anglo Del. 3 Kaj ramol ando Sveto lil: "O Avraam pačaja e Devlešče thaj godova đinada pe lešče ande pravednost." 4 Okolešče savo čerel buči, e počin či đinavelpe sago daro, nego sago okova so si lešče udžile. 5 A okolešče savo či čerel buči, a pačal ando Del savo opravił e bezehales, o pačipe đinavelpe sago pravednost. 6 Gajda vi o David phenel kaj si bahtalo o manuš savešče o Del đinavel e pravednost bi lešče pravedne dela: 7 "Blago okolende savende si bilače dela jartome thaj e bezeha učarde. 8 Blago e manušešče savešče o Gospod či đinavel o bezah." 9 Dali si akaja bah samo pale okola save si obrezime ili vi pale okola save naj obrezime? Phendam kaj o pačipe e Avraamešče đinada pe sago pravednost. 10 A kana godova đinada pe lešče? Dok sas obrezime ili dok još nas obrezime? Na dok sas obrezime, nego dok nas obrezime! 11 A o obrezanje primisarda sago znako, thaj pečato pale pravednost savi steknisarda e pačimava dok još nas obrezime. Zbog godova si vo duhovno dad savorende save pačan, a naj obrezime, te vi von aven đinade ande pravednost. 12 A o Avraam si dad vi okolende save naj samo obrezime nego save sledin lesko pačipe savo sikada dok još nas obrezime. 13 Kaj, o obećanje savo si dino e Avraamešče ili lešče potomkošče kaj nasledila o them či avilo po Zakon, nego pe pravednost savi si rezultato e pačipasko. 14 Ako si e naslednikurja okola save trajin po Zakon, askal o pačipe naj vredno, a o obećanje či mol khanči. 15 Kaj, o Zakon anel e Devlešči holji, a kaj naj o Zakon, či ni phadelpo o Zakon. 16 Gajda vi e Devlesko obećanje temeljil pe po pačipe sar avilosas pe Devlešči milost thaj te vredil pale sa e Avraamešče potomkurja, na samo pale okola save inčaren o Zakono, nego vi pale okola saven si pačipe sago e Avraame.

Vo si dad savorende amende, 17 sago kaj ramol ando Sveto lil: "Čerdem tut te aves dad e bute themengo" – anglo Del, ande savo pačajas, savo džudarel e mulen thaj pire alavenca čerel te postanil okova so či postojil. 18 Kana e Avraame nas nada kaj avela les čavra, o Avraam ande nada pačaja. Thaj postanisarda dad e bute themengo prema okova so si phendo: "Gači baro avela čiro potomstvo." 19 O Avraam lače džanelas kaj nakhli e vrjama kaj šaj avel les čavra, kaj sas les skoro šel brš, isto gajda džanelas kaj e Sara našti bijanel, ali lesko pačipe či oslabisardas. 20 Ažučarelas te o Del pherel piro obećanje thaj či sumnjilas, nego zuravolas ando pačipe thaj hvalilas e Devle. 21 Potpuno sas uverime kaj o Del šaj čerel so obećisarda. 22 Zato vi "đinada pe lešče ande pravednost." 23 A e alava: "si lešče uračunime", naj ramome samo pale leste, 24 nego vi pale amende. Amaro pačipe avela prihvatił te opravił men anglo Del. Godova avela vi amende save pačas ando Del savo vazdas andar e mule amare Gospode e Isus 25 savo si dino te avel mudardo pale amare bezeha thaj vazdino andar e mule te avas opravił.

5 Pošto sam, dakle, akana opravił e pačimava, si amen miro e Devlesa kroz amaro Gospod Isus Hrist. 2 Kroz leste, e pačimava, si amen pristup ke akaja milost ande savi ačas thaj raduji men, kaj si amen nada ande Devlešči slava. 3 Thaj na samo godova, nego raduji men vi ande nevolja, kaj džanas kaj e nevolja anel strpljenje. 4 O strpljenje zuravel amaro karakter, a o zuralo karakter anel nada. 5 A e nada či ladžarela men kaj e ljubav e Devlešči čordili ande amare ile e Sveto Duhosa savo si dino amende. 6 Kaj, ande pravo vrjama, dok samas još bespomočne, o Hristo mulo pale amende save samas bidevlešče manuša. 7 Phare kaj vareko kamlasas te merel palo pravedno manuš, vi ako pale zurale lačno manuš šaj te vareko vi kamlasas te merel. 8 Ali o Del sikada piri ljubav prema amende gajda kaj o Hristo mulo pale amende dok samas još bezehale manuša. 9 Kozom majbut akana, kana sam opravił lešče ratesa, avasa spasime katar e Devlešči bari holji? 10 Pa, kana izmirisajlam e Devlesa kroz o smrto lešče Čavesko dok samas još e Devlešče dušmaja, kozom majbut avasa spasime lešče trajosa akana kana sam izmirime lesa. 11 Thaj na samo godova, nego vi raduji men ando Del kroz amaro Gospod Isus Hrist, kroz savo akana primisardam pomirenje. 12 Prema godova, sago kaj o bezeh dija ando them kroz o jek manuš, a kroz o bezeh o smrto, gajda vi o smrto avilo pe sa e manuša, kaj savora čerdine bezeh. 13 O bezeh sas ando them majsigo katar o Zakono, ali o bezeh

khonikašće či đinavelpe kana naj zakon. **14** Ipak, katar o Adam dži ko Mojsije, o smrto vladilas vi pe okola save či prekršisardine e jasno Devlešči zapoved sago o Adam, savo si slika Okolešči savo avela. **15** Ali o milosno daro naj sago o prestup e Adamesko. Kaj ako but muline zbog o prestup ječe manuško, kozom majbut izisajli e Devlešči milost thaj o daro savo avilo kroz e milost ječe manušešči, e Isuse Hristošči pe butende. **16** Thaj godova daro naj sago okova so avilo prekal okova manuš savo sagrašisardas. Kaj, posle jek prestup avilo o sudo savo andas osuda, a o milosno daro avilo posle but prestupurja thaj andas opravdanje. **17** Kaj, ako zbog o prestup ječe manuško vladilas o smrto kroz o bezeh godole ječe manuško, kozom majsigo okola save primin ando butipe e milost e Devlešči thaj o daro e Devlesko te aven pravedne, vladina ando trajo kroz o jek manuš, Isus Hrist. **18** Prema godova, sago kaj, o prestup ječe manuško andas dži ke osuda sa e manušen, gajda o pravedno delo ječe manuško andas dži ke pravednost savi del trajo sa e manušen. **19** Sago kaj zbog o neposluh ječe manuško but postanisardine bezehale, gajda vi zbog e poslušnost ječe manušešči but postanina pravedne. **20** A o Zakon si dodaime te umnožil pe o prestup. Ali, kaj umnožisajlo o bezeh, e milost umnožisajli još majbut, **21** te, sago kaj o bezeh vladilas kroz o smrto, gajda vi e milost vladil kroz e pravednost savi vodil ando večno trajo kroz o Isuso Hristo, amaro Gospod. (aiōnios g166)

6 So te phenas? Te ačas ando bezah te umnožil pe e milost? **2** Nisar! Sar šaj amen save mulam e bezehešće vi majdur te trajis ande leste? **3** Ili, či džanen kaj savora amen save sam bolde ando Hristo Isus, ande lesko smrto sam bolde? **4** E boldimasa sam zajedno lesa prahome ande lesko smrto, te šaj trajis neve trajosa, sago kaj o Hristo uštilo andar e mule lešće Dadešće slavno snagasa. **5** Kaj, ako sam gajda lesa ujediniame ando smrto sago kaj vo mulo, avasa ujediniame vi ande o uštipe andar e mule sago kaj vo uštilo. **6** Akava džanas: amari purani narav si razapnime zajedno e Hristosa sar o bezeh hasardasas e vlast pe amaro trajo te majbut či robuis e bezehešće **7** kaj ko mulo, oslobodime si katar o bezeh. **8** Pa ako mulam e Hristosa, pačas kaj lesa vi trajisa. **9** Džanas kaj o Hristos nakon so uštilo andar e mule, či majbut merela. E smrto majbut naj nisošči moć pe leste. **10** O smrto saveja o Hristo mulo, mulo te phadel e sila e bezehešči jekhvar thaj pale sa e vrjama, a o trajo saveja trajil, trajil palo Del. **11** Gajda vi tumen smatrin korkoro tumen mulen palo bezeh, a džude e Devlešće ando Hristo Isus. **12** Pale godova o bezeh majbut

či tromal te vladil tumare smrtno telosa, pa te pokorin tumen tumare bezehale željenje. **13** Na den tumare telošće delurja palo oružje saveja čerena bezeh thaj bilačhipe. Umesto godova, predain korkoro tumen e Devlešće sago okola save muline thaj palem džudile andar e mule thaj tumare delurja e telošće den e Devlešće pale pravednost. **14** Kaj, o bezeh majbut či vladila tumenca kaj majbut či trajin talo Zakon, nego tale Devlešči milost. **15** Dali godova značil kaj trubul te grešis zato kaj najsam talo Zakono, nego tale milost? Nisar! **16** Ili, zar či džanen kaj sen sluge okolešće kašće pokorin tumen, okolešće kašće sago sluge predain tumen te aven lešće pokorne – bilo te si bezehešće, savo inđarel ando smrto, ili šaj aven roburja ande poslušnost e Devlešće, so inđarel ande pravednost. **17** Ali najs e Devlešće kaj vi ako senas majsigo sluge e bezehešće, ipak katar o ilo čhutine kan ko sikavipe savo dija pe tumende. **18** Oslobodime sen katar o bezah thaj postanisardine sluge pale pravednost. **19** Sago obično manuš phenav tumende, pale slabosti tumare telošće. Kaj sago kaj varekana dine tumare delurja e telošće te robuin e duhovno melalipešće thaj e bezakonešće, so inđarel ande još majbaro bezakone, gajda akana predain tumare delurja e telošće te služin ande pravednost, savi inđarel ando posvećenje. **20** Kaj dok senas sluge e bezehešće, senas slobodne katar e pravednost. **21** Thaj save plodurja kasave trajošće sas tumen? Čerenas okova pale soste akana ladžan, a posledica pale godova si o smrto. **22** A akana, kana sen oslobodime katar o bezah thaj kana postanisardine e Devlešće sluge, o plodo savo anen inđarel karingal o posvećenje, a po krajo o rezultato pale godova si o večno trajo. (aiōnios g166) **23** Kaj e počin palo bezeh si o smrto, a o daro e Devlesko si o večno trajo ande amaro Gospod Hrist Isus. (aiōnios g166)

7 Ili či džanen, phralalen – phenav okolende save pindžaren o Zakon – kaj e Zakone si vlast po manuš samo dok si džudo. **2** Gajda si vi e udajime romnji phangli e Zakoneja pale piro rom dok si vo džudo. Ali, te mulo lako rom, naj majbut podložno e Zakonešće savo phangla lat pale lako rom. **3** Gajda, te e romnji lija aver romes dok si lako rom još džudo, avela akhardi preljubnica. Ali, te lako rom mulo, slobodno si katar o Zakono thaj naj preljubnica te lijas aver romes. **4** Gajda vi tumen phralalen, muline e Zakonešće, godoleja kaj o Hristo dija piro trajo pale amende te pripadin averešće, Okolešće savo uštilo andar e mule, te anas plodurja e Devlešće. **5** Majsigo, dok trajisarasas e purane trajosa, amenca vladinas amare bezehale želje ande amare delurja e telošće save avenas prekal o Zakono. Von ande

amende anenas duhovno smrto. 6 Ali, akana sam slobodne katar godova Zakono pošto mulam okolešće so inćarelas amen ando robstvo. Akana služis e Devlešće po nevo način e Duhosa, a na po purano način savo si e ramome pravilurja e Zakonešće. 7 So te phenas? Dali si o Zakono bezeh? Nisar! Ipak, me či džangle mas so si bezeh te či avilosas o Zakono. Kaj či džangle mas so si požuda te o Zakono či phendas: "Na poželisar." 8 A o bezeh lija prilika thaj kroz godoja zapovest ande mande andas svako vrsno požuda. Kaj bi e zakonesko o bezeh si mulo. 9 Varekana trajivas bi o Zakono, a kana avili e zapovest, o bezeh džudilo, 10 a me mulem. Gajda e zapovest savi trubuja te vodil man ando trajo, anda man dži ko smrto. 11 Kaj o bezeh lija prilika prekal e zapovest, hohada man thaj mudarda man. 12 O Zakono si sveto thaj e zapovest si sveto, pravedno thaj lačno. 13 Značil li, askal, godova kaj o lačhipe andas mande smrto? Nisar! O bezeh iskoristisardas godova so si lačno te pe mande crdel e smrtno osuda. O bezeh si dakle majbaro bilačipe: koristil e Devlešće lačne zapovesti ande bilačne svrhe. 14 Džanas, naime, kaj o Zakon si duhovno, a me sem telesno thaj sago kasavo ando robstvo e bezehešće. 15 Či hačarav so ćerav, kaj či ćerav okova so kamav, nego ćerav okova so mrzav. 16 Pa, ako ćerav okova so či kamav, složiv man kaj o Zakon si lačno. 17 A godova či ćerav majbut me, nego o bezeh savo trajil ande mande. 18 Džanav kaj ande mande, godova si ande mungro telo, či trajil o lačhipe. Si man želja te ćerav lačhipe, ali naj sem ando stanje godova te ćerav. 19 Kaj či ćerav lačhipe savo kamav, nego bilačipe savo či kamav. 20 Ali ako ćerav okova so či kamav, askal godova či ćerav me, nego o bezeh savo trajil ande mande. 21 Gajda hačarav akava zakon: kana kamav te ćerav lačhipe, nametnilpe mande o bilačipe. 22 Ande mungro biće andral oduševime sem e Devlešće Zakoneja, 23 ali ande mungre delurja e telošće dikhav jek aver zakon, savo vodil o rato protiv o zakon mungre godako thaj zarobil man e zakoneja te avav talo bezeh, savo si ande mungre delurja e telošće. 24 Jadno sem me manuš! Ko man šaj izbavila katar akava smrtno telo? 25 Najs e Devlešće kaj izbavil man prekal o Isuso Hristo amaro Gospod! Gajda, dakle, me mungre godasa služiv e Devlešće Zakonešće, a mungre telosa e zakonešće savo čhol man talo bezeh.

8 Zato akana naj majbut osuda pale okola save si ando Hristo Isus, 2 kaj o zakon e Duhosko savo anel trajo ando Hristo Isus, oslobodisarda man katar o zakon e bezehesko thaj katar o smrto. 3 Kaj o Zakon našti pomognisardas amende zbog e slabost amare telošći. Ali, o Del ćerda okova

so o Zakon našti ćerda: pire Čaves dija telo isto sago kaj si vi amaro, saveja ćeras bezeh thaj bičhaldal les pe Phuv te pire smrtosa počinel o bezeh. Gajda o Del upotrebisardas e manušesko telo te ande leste uništil o bezeh, 4 te okova pravedno so rodel o Zakono pherdol ande amende save majbut či trajisaras po telo, nego po Duho. 5 Kaj, okola save trajin palo telo, gndin pe okova so si telesno, a okola save trajin po Duho, gndin pe okova so si duhovno. 6 Ako o telo upravitl tumare godasa, indarel tumen ando smrto. Ali ako tumare godasa upravitl o Sveto Duho, avela tumen trajo thaj miro. 7 Kaj kana e gindimata upravitl e telosa, o manuš protivil pe e Devlešće, kaj či pokoril pe e Devlešće Zakonešće, a ni našti pokoril pe lešće. 8 Okola savenca još vladil lengo telo, našti udovoljin e Devlešće. 9 Ali tumenca majbut či vladil o telo, nego o Duho, ako čače e Devlesko Duho trajil ande tumende. Okova ande savo naj e Hristosko Duho, či pripadil e Hristošće. 10 A ako si o Hristo ande tumende, askal si tumaro telo mulo zbog o bezeh, ali si tumaro duho džudo zato kaj sen opravdime anglo Del. 11 Thaj vi ako ande tumende trajil e Devlesko Duho, savo vazda e Isuse andar e mule, o Del savo e Hristo vazda andar e mule, džudarella vi tumare smrtne telurja pire Duhosa, savo si ande tumende. 12 Zato, phralalen, naj sam udžile te ćeras okova pe soste tradel amen o telo. 13 Kaj ako trajin gajda te čhon kan ko telo, propadnina, ali ako e Duhosa usmrtin e telesne dela, trajina. 14 Kaj, okola saven vodil e Devlesko Duho, e Devlešće si čhavra. 15 O Duho saves primisardine či indarda tumen ando robstvo te moraš palem te daran, nego ćerda tumen te aven e Devlešće čhavra save vapi "Abba, Dade!" 16 O Duho zajedno amare duhosa svedočil kaj sam e Devlešće čhavra. 17 Pa ako sam e Devlešće čhavra askal sam vi e Devlešće naslednikurja zajedno e Hristosa, ako čače e Hristosa trpisaras sago kaj vo trpisarda, askal zajedno lesa primisaras slava. 18 Smatriv kaj amare patnje save si amen akana naj khanči naspram e slava savi trubul te objavilape pe amende. 19 Kaj, sa o stvorenje željno ažućarel te objavilpe e slava e Devlešće čhavendi. 20 A sa so si stvorime postanisardas bezvredno, ali na amare voljava, nego e Devlešće voljava, ande nada. 21 kaj ande slavno sloboda e Devlešće čhavendi thaj sa o stvorenje avela oslobodime katar o robstvo savo indarel ande raspadljivost. 22 Džanas, kaj sa so si stvorime dži akana jecil thaj mučilpe ande dukha sago kana e manušnji bijanel. 23 Ali na samo vo nego vi amen saven već si o Duho sago prvo deo katar e Devlešće darurja, isto jecis thaj ažućaras te o Del usvojil men, odnosno te oslobodil amare telurja. 24 Kaj, ande godoja nada sam spasime. A e nada

savi dičhel pe naj nada, kaj ko nadil pe okolešće so dičhel? 25 Ali ako nadi men okolešće so či dikhas, askal godova strpljivo ažučaras. 26 Isto gajda o Sveto Duho pomožil amende ande amare slabosti. Amen či džanas sar trubul te moli men, ali o korkoro Sveto Duho molil pe pale amende e uzdisajenca save alavenca našti phenenpe. 27 A o Del savo džanel e manušenđe ile, džanel vi e namera e Duhošći, kaj o Duho pe Devlešći volja molil pe pale Devlešće manuša. 28 Džanas kaj o Del ande sa čerel palo lačhipe okolengo save volin les, okolende saven vo akharda pire planova. 29 O Del savo pindžarda len anglal thaj majanglal odabirisarda len te aven sago lesko Čhavo, te lesko Čhavo avel prvo bijando maškar e but phral. 30 A okolen saven majanglal odabirisarda, godolen vi akharda, a saven akharda godolen vi čerda te aven pravedne angle leste, a saven čerda te aven pravedne godolen vi dijas piri slava. 31 So askal šaj te phenas pe godova? Ako si o Del pale amende, ko šaj protiv amende? 32 O Del, savo či poštedisardas ni pire rođeno Čhaves, nego predaisarda les te merel pale amende savorende, zar či lesa dela vi sa aver? 33 Ko šaj optužil okolen saven o Del izabirisarda? Khonik! Kaj o Del si godova savo opravdil len. 34 Ko osudila len? Khonik! Kaj o Hristo Isus mulo, ali još majvažno si godova kaj uštilo andar e mule thaj kaj akana bešel pe Devlešći počasno desno rig thaj molil pe pale amende. 35 Ko rastavil men katar e Hristošći ljubav? O pharipe, e nevolje, o progonstvo, e bok, o čoripe, o opasnost ili o meripe? 36 Sago kaj ramol ande Svete lila: "Zbog tute mudaren men đes palo đes, smatrin men sago e bakhren pale čhuri." 37 Ali, ande sa godova amen nadmočno pobedisaras kroz Okova savo zavolisarda men. 38 Čvrsto pačav kaj ni o smрто ni o trajo, ni e anđelurja ni e demonurja, ni okova so si akana ni okova so avela, ni e sile, 39 ni visine, ni e dubine, ni bilo so aver so si stvorime, našti odvojil amen katar e Devlešći ljubav savi si ando Hristo Isus, amaro Gospod.

9 Čačipe phenav ando Hristo, či hohavav – svedoko si mande mungri savest ando Sveto Duho: 2 mungri žalost si bari thaj si man duk ando ilo savi či ačhel. 3 Kaj kamlemas te avav prokledo thaj odvojime katar o Hristo pale mungre phral thaj mungro them, kana godova šaj pomognisardas lende. 4 Von si Izraelcurja: O Del usvoisarda len te aven lešće čhave thaj objavisarda lende piri slava, e savezurja, o Zakon, služba e Devlešći thaj e obećanja. 5 Lende pradada sas bare Devlešće manuša, thaj lendar avel o Hristo sago Židovo po telesno poreklo, savo si Del pe savorende. Lešće slava pale uvek. Amin. (aiǵn g165) 6 Ali, godova či značil

kaj o Del či inčarda piro obećanje. Kaj naj savora save si potomkurja e Izraelcošće, čače Izraelcurja. 7 Thaj naj savora e Avraamešće čače čhavra samo zato kaj si lešće potomkurja. O Del phendas e Avraamešće: "Čiro potomstvo đinavela pe e Isaakostar." 8 Godova značil kaj naj sa e Avraamešće potomkurja save si bijande e telostar e Devlešće čhavra, nego sago lesko potomstvo đinaven pe samo e čhavra save o Del obećisarda e Avraamešće. 9 A akala si e alava savenca si dino o obećanje: "Boldava man tute ande akaja vřjama po brš, thaj e Sara avela čhavo." 10 A na samo godova: vi e Reveka ačhili khamni amare pradadestar e Isaakostar thaj inđarelas blizancurja. 11 Ali majsigo nego so e čhave bijandile thaj čerdine vareso lačhe ili bilačhe, voj primisardas poruka katar o Del. Godoja poruka si dokaz kaj o Del losarel prema piro vlastito plano, a na prema amare lačhe ili bilačhe dela. 12 Nego zavisil katar okova savo akharel. O Del phendas lače: "O purano čhavo služila e terne čhavešće." 13 Sago kaj si ramome ando Sveto lil: "E Jakove zavolisardem, a e Isave zamřzisardem." 14 So te phenas? Kaj o Del si nepravedno? 15 Nisar! Kaj, o Del phendas e Mojsiješće: "Smiluiva man kašće me kamav te smiluv man thaj sažaliva man pe kaste me kamav te sažaliv man." 16 Gajda, dakle, či zavisil katar okova savo kamel, niti katar okova savo trudilpe, nego katar o milostivo Del. 17 Kaj, ando Sveto lil o Del phenel e Faraonešće: "Andar godova vazdem tut te pe tute sikavav mungri sila thaj te mungro alav džanel pes pe sasti phuv." 18 Prema godova, o Del smiluilpe kašće kamel, thaj čerel tvrdoglavo kas kamel. 19 Akana tu phučeja man: "Sostar askal vi majdur došarel men? Ko te odupril pe lešće voljačće?" 20 Ali, ko san tu, manušeja, te trades tut e Devlesa? Zar okova so si stvorime phenela pire stvoritelješće: "Sostar gajda čerdan man?" 21 Pa naj li e manuše savo čerel bući e glinava vlast te katar e isto smesa čerel jek čaro pale čast, a jek palo ladžavo? 22 A so ako o Del kamlu te sikavel piri bari holji thaj te objavil piri sila? Ande bari strpljivost podnosilas okolen pe save sas holjariko thaj save sas pripremimo palo uništenje, 23 te sikavel o barvalipe pire slavako pe okola save primin o milosrđe, saven majanglal pripremisarda pale slava. 24 Amen sam godola saven akharda na samo maškar e Židovurja, nego vi maškar okola save naj Židovurja? 25 Sago kaj o Del phenel ando Sveto lil ando Osije: "Okolen save naj mungro them akharava mungre themesa thaj voliva okolen save majsigo či volivas" 26 thaj: "Po okova than kaj sas lende mothodo: 'Naj sen mungro them', avena akharde 'čhave e džude Devlešće.'" 27 A o proroko Isaija phenel palo Izrael: "Vi ako si o Izraelsko them brojno sago morsko

pesko, ipak o cikno brojo spasila pe. **28** Kaj o Gospod uskoro thaj potpuno pherela piro alav pe phuv." **29** Isto sago kaj o Isaija prorokuisardas: "Te o Gospod pe vojske či mukla amende potomstvo, avilamas uništine sago e Sodoma thaj ličisardamas pe Gomora." **30** So te phenas? Kaj okola save naj Židovurja thaj save či rodenas pravednost, steknisardine pravednost – pravednost savi avel katar o pačipe. **31** A o Izrael, savo mandelas pravednost katar o Zakono, či dostiginsardas godova Zakono. **32** Sostar? Zbog godova kaj či trudilaspe te dostignil les e pačimava, nego kroz e dela. Gajda peline po bar pe savo e manuša spotakninpe. **33** Sago kaj si ramome ando Sveto lil: "Dičhen, po Sion čhav bar pe save e manuša spotakninpe, stena zbog savi perena, ali okova savo pačal ande leste, či ladžavola."

10 Phrala len, e želja mungre ilešči thaj mungri molitva e Devlešće pale Izraelcurja si te aven spasime. **2** Me šaj te svedočiv pale lende kaj si len revnost palo Del, ali najlen ispravno hačaripe. **3** Ali sar či pindžarenas e pravednost savi avel katar o Del, kamline te steknin piri pravednost thaj či pokorisajle ande pravednost savi avel katar o Del. **4** Kaj, o Hristo pherdas thaj završisarda o Zakon, te avel opravdime svako ko pačal. **5** Kaj, pale pravednost savi avel katar o Zakon, o Mojsije ramol: "Okova savo inčarel e zapovedi e Zakonešće, avela les trajo ande lende." **6** A pale pravednost savi avel katar o pačipe phenel akava: "Na phen ande čiro ilo: 'Ko lela pes po nebo?'" (godova si, te fuljarel e Hristo katar o nebo pe phuv). **7** Ili: "Ko fuljela ando than e mulengo?" (godova si, te inkalel e Hristo andar e mule). (**Abyssos g12**) **8** Nego so phenel? "O alav si tuće paše, ande čiro muj thaj ande čiro ilo" – godova si, o alav pačimasko savo propovedisaras. **9** Kaj, ako čire mujesa priznais kaj si o Isus Gospod, thaj e ileja pačas kaj o Del vazda les andar e mule, aveja spasime. **10** Kaj e ileja pačalpe palo opravdanje, a e mujesa priznajipe palo spasenje. **11** Sago kaj ramol ando Sveto lil: "Ko god pačal ande leste, či ladžavola." **12** Zato kaj naj razlike maškar e Židovurja thaj okola save naj Židovurja andar godova kaj o Gospod si jek thaj isto pale sa e manuša. Vo barvale blagoslovil okolen save akharen les. **13** Kaj, "ko god akharel o alav e Gospodesko, avela spasime." **14** Ali sar te akharen Okoles ande savo či pačan? A sar te pačan ande Okova pale savo či ašundine? Thaj sar te ašunen ako khonik či propovedil lende pale leste? **15** Thaj sar te propovedin ako naj bičhalde katar o Del? Sago kaj si ramome ando Sveto lil: "Sar si šukar te dičhel pe e glasniko savo inčarel e Bahtali nevimata." **16** Ali či sa e Izraelcurja čhutine kan ke Bahtali nevimata, kaj o proroko Isaija phenel: "Gospode, ko pačaja ande amari poruka?" **17** O pačipe avel kana čhos kan e

Bahtali nevimata a godoja Bahtali nevimata si e poruka palo Hristo. **18** A me phučav: zar e manuša či ašundine? Naravno kaj ašundine! "Pe sasti phuv odjeknisardas o glaso thaj lende alava ašundile sa dži ko krajo e themesko." **19** A me palem phučav: zar e Izraelcurja či hačardine? Ej, hačardine, kaj još ande Mojsiješči vrjama o Del phendas: "Čerava tumen te aven ljubomorne e themeja savo naj them, holjarava tumen e themeja save naj razumne." **20** A o Isaija hlabro phenel ande Devlesko alav: "Arakhlina man okola save či rodenas man, objavisajlem okolende save pale mande či phučline." **21** A pale manuša andar o Izrael phenel: "Uvek inzaravas mungre vas prema okola save si neposlušne thaj tvrdoglave."

11 Phučav dakle: zar o Del odbacisardas pire theme? Nisar! Pa vi me sem Izraelco, e Avraamesko potomko andar e Venijaminesko pleme. **2** O Del či odbacisardas pestar pire themes, save majanglal losardas. Ili zar či džanen so o prorok Ilija phenel ando Sveto lil, kana žalilaspe e Devlešće po Izrael? **3** "Gospode, čire prorokonon mudardine thaj čire žrtvenikurja haradine. Samo me ačhilem, a vi man kamen te mudaren." **4** Thaj savo sas e Devlesko odgovor? "Muklem mande efa milje manuša save či bandardine e kočja anglo hohavno del o Vaal." **5** Gajda, o Del vi ande akaja vrjama losardas nekolicina manušen pe piri milost. **6** Pa ako si pe milost, askal naj pe dela, inače e milost či avilisas milost. **7** So, askal? O Izrael rodel okova so či dobisarda, ali e Devlestar losarde Židovurja dobisardine, a averende zurardas e ile, **8** sago kaj si ramome ando Sveto lil: "O Del čerda te aven zbnime, e jakhenca te či dičhen, thaj e kanenca te na ašunen sa dži adesko des." **9** A o David phenel: "Nek lendi gozba postanil zamka thaj klopka, neka peren thaj nek aven kaznime, **10** neka o tunjariko perel pe lende jakha te na dičhen, a tu e pharipeja bandar lende zeja zauvek." **11** Phučav, dakle: zar spotaknisajle te potpuno džan ande propast? Nisar! Nego, zbog lengo bezah o spasenje avilo vi okolende save naj Židovurja te o Izrael avel ljubomorno. **12** Pa ako lengo bezeh značil barvalipe palo them thaj lendi šteta barvalipe pale okola save naj Židovurja, kozom majbarvalo blagoslov primina kana e Židovurja postanina gajda sar o Del kamel lendar te aven. **13** A tumende, save naj sen Židovurja, phenav: pošto sem apostol pale okola save naj Židovurja, hvaliv mungri služba, **14** či li varesar čerdemas mungre themes te avel ljubomorno thaj varesave lendar gajda spasin pe. **15** Kaj, ako o Del, kana e Židovurja odbacisardine o spasenje, ponudisardas pomirenje sa e themešće, sar šukar avela godova spasenje kana e Židovurja prihvatina e Devle? E mule uštena! **16** Ako

si o prvo kotor e humeresko posvetime e Devlešće, askal si o sasto humer sveto; ako si o koreno sveto, askal si vi e krandže svete. 17 Pa vi ako si varesave krandže phađe, a tu savo naj san Židovo sago divljo maslinači krandža prispojisajlan pe lende thaj akana si tut udeo ando koren thaj ande sočnost e maslinači, 18 či tromas te hvalis tut pe phađe krandže. A te ipak hvalisajlan, de tu gođi kaj či indares tu o koreno, nego o koreno tut. 19 Pheneja: "E krandže phadile te me avav prispojime pe lengo than." 20 Lačhe, von si phađe, zbog o bipačipe, a tu ačhes kaj si tut pačipe. Zato na vazde tut, nego dara. 21 Kaj kana o Del či poštedisardas e prirodne krandže, či poštedila ni tut. 22 Dik, dakle, e Devlesko lačhipe thaj lešči strogoća: strogoća pale okola kaj peren ando bipačipe, a o lačhipe e Devlesko prema tute, ako istrajis ande godova lačhipe – inače vi tu aveja čhindo. 23 A vi von, ako či istrajin ando bipačipe, avena prispojime, kaj o Del palem šaj te prispojil len. 24 Kaj, te tu savo naj san Židovo sago prirodno krandža katar e divljo maslina san čhindo thaj neprirodno prispojime pe pitomno maslina, kozom majloće pe piri maslina prispoinape e Židovurja save si pe priroda laće krandže. 25 Či kamav, phralalen, te akaja tajna avel tumende bidžangli thaj te aven pherde barikanipe: jek deo katar o izraelosko them okorisarda dok okola kaj naj Židovurja či aven ko Del ando pherdo broj. 26 Thaj gajda spasila pe o sasto Izrael, sago kaj si ramome ando Sveto lil: "Katar o Sion avela o spasitelj thaj katar e Jakovesko potomstvo o Del lela svako bezbožnost. 27 Thaj akava si mungro savezo lenca kana ukloniv lende bezeha." 28 Zbog godova kaj odbin e Bahtale nevimata, von si e Devlešće dušmaja pale tumari korist, ali zato kaj izabirisardas lende pradađen, o Del volil len. 29 Kaj o Del či menjil piro gindo kana del darurja thaj akharel e manušen. 30 Sago kaj tumen, varekana či pokorinas tumen e Devlešće, a akana tumende smiluisajlo zbog e Židovendi nepokornost, 31 gajda vi von akana postanisardine nepokorne e Devlešće, a tumen save naj sen Židovurja primisardine e Devlesko milosrđe, te vi von šaj primin e Devlesko milosrđe. 32 O Del, naime, sa phandadas ande nepokornost te savorende smilujilpe. (elešē g1653) 33 Sosko divno Del si amen! Sar si baro lesko barvalipe, mudrost thaj džanglipe! Lešće odluke khonik našti te objasnili thaj lešće droma khonik našti te haćare! 34 "Kaj, ko pindžarda e Gospodešće gndurja? ili ko sas lesko savetniko?" 35 "Ili, ko vareso dija les, te o Del trubul te boldel lešće?" 36 Kaj, sa si lestar thaj kroz leste thaj pale leste. Lešće slava pale uvek. Amin. (aiōn g165)

12 Zato moliv tumen, phralalen, zbog e Devlesko milosrđe, te den tumare tela e Devlešće sago džudi žrtva, sveto thaj ugodno e Devlešće. Godova si pravo način sar služin e Devlešće. 2 Thaj na vladin tumen sago akava them, nego mučen te o Del promenil tumen ande nevi osoba gajda te menjil tumaro način sar gndin, te šaj prosudin so si e Devlešči volja, so si lačhe e Devlešće ugodno thaj savršeno. (aiōn g165) 3 Zbog e milost savi o Del dija man, svakonešće tumendar phenav: na gndin pale tumende majlačhe nego so trubul te gndin, nego gndin pale tumende razumno, prema o pačipe savo o Del dija tumen. 4 Kaj, sago kaj ande jek telo si amen but e telošće delurja, a svakone lendar si aver uloga, 5 gajda sam vi amen, but džene, jek telo ando Hristo, a jek avrešće sam delurja e telošće. 6 Gajda, si amen različite darurja prekal e milost savi primisardam katar o Del. Okova saves si daro te prorokuil, nek koristil godova daro gači kozom paćal. 7 Kas si daro te služil, neka služil. Kas si daro te sikavel, neka sikavel. 8 Kas si daro te tešil, neka tešil. Kas si daro te del, neka del katar o ilo. Kas si daro te avel upraviteljo, neka avel vredno. Kas si daro te čerel lačhipe averende, nek godova čerel e bahtasa. 9 Tumari ljubav moraš te avel iskreno. Mrzan o bilačhipe thaj inćaren okova so si lačhe. 10 Volin jek avren sago tumare rođeno familija, thaj poštuin jek avren majbut nego korkoro tumen. 11 Na aven lene, već e žarosa ando duho služin e Gospodešće. 12 Zbog e nada savi si tumen aven bahtale, ande nevolja strpljive, a ande molitva istrajne. 13 Pomožin e Devlešće manušenje, savende trubul pomoć, thaj uvek aven gostoljubive. 14 Blagoslovin okolen save progonin tumen – blagoslovin len thaj na den len romaja. 15 Raduin tumen okolenca save si bahtale thaj roven okolenca save roven. 16 Aven složne maškar tumende. Na vazden tumen, nego družin tumen okolenca saven aver smatrin kaj si majcara vredne. Na aven barikane. 17 Khonikašće na bolden o bilačhipe palo bilačhipe. Len sama te čeren okova so si lačhe ande jakha sa e manušenje. 18 Ako si moguće, čeren sa so si dži tumende te trajin ando miro sa e manušenca. 19 Drage mungralen, na osvetin tumen korkoro, već godova mučen e Devlešće. Kaj si ramome ando Sveto lil: "Mungri si e osveta, me boldava", phenel o Gospod. 20 Nego, "ako si čiro dušmano bokhalo, pravat les, ako si trušalo, de les te pijel. Kaj, ako godova čeres, godova si sago kaj čhos o žaro pe lesko šoro." 21 Na de te pobedil tut o bilačhipe, nego tu pobedi o bilačhipe e lačhipeja.

13 Neka svako manuš avel pokorno okolende save si pe vlast, kaj naj vlast savi naj e Devlestar – okola save si

pe vlast, o Del čhuta. 2 Prema godova, ko suprostavilpe okolenđe save si pe vlast, protivil pe okolešće so o Del naredisarda, a godola kaj protivin pe, korkoro pe peste crdena osuda. 3 Okola save čeren so si lačhipe, naj moraš te daran katar e vlast. Katar e vlast trubun te daran okola save čeren bilačhipe. Ako kames te na daras katar e vlast, čer lačhipe thaj hvalina tut okola save vladin. 4 Kaj, e vlast služil e Devlešće palo čiro lačhipe. Ali, ako čeres bilačhipe, dara, kaj e vlast či indarel o mačo ivja. Von si e Devlešće sluge thaj kaznin okolen save čeren bilačhipe. 5 Zato trubul te avel pe pokorno okolenđe kaj si pe vlast, na samo te na avas kaznime nego vi zbog e savest. 6 Zbog godova vi počinen o porez, kaj e Devlešće sluge si okola save dine piri vrjama te čeren godoja buči. 7 Svakonešće den okova so sen udžile: kašće porez – porez; kašće carina – carina; kašće poštupe – poštupe; kašće čast – čast. 8 Khonikašće khanči na aven udžile – osim te volin jek avres. Kaj, ko volil avres, pherdas e Mojsijesko Zakon. 9 Kaj akava mothon e zapovesti: “Na čer preljub, na mudar, na čor, na poželisar” – thaj bilo savi aver zapovest – odnosil pes pe akaja: “Voli čire pašutne sago kaj volis korkoro tut.” 10 Okova savo volil averen, či čerela lende khanči bilače. Dakle e ljubav pherel o Zakon. 11 A džanav vi akaja vrjama – kaj avilo o časo te džungadon andar o suno, kaj o spasenje si akana majpaše nego kana pačajam. 12 E rjat gata nakhli, a o đes avilo majpaše. Zato trubul te čhudas amendar e dela save aven katar e tama thaj te las pe amende o oklop e svetlosko. 13 Trubul te trajisaras pristojne, sago manuša save trajin po svetlo e đesesko, na ando bilačo veselje thaj ando matipe, na ando preljub thaj ando bludo, na ande čingara thaj ande zavist. 14 Nego amare Gospode e Isuse Hristo len pe tumende thaj na gndin sar te ugodin tumare bezehale željende ando telo.

14 Prihvatil okolen save si slabe ando pačipe, ali na pale godova te osudin len kaj gndin averčhandede. 2 Vareko pačal kaj tromal te hal sa, a okola save si slabe ando pačipe gndin kaj troman te han samo povrće. 3 Okova savo hal sa, neka či omalovažil okoles savo či hal, a okova savo či hal sa, neka či osudil okoles savo hal, kaj o Del prihvatissarda les. 4 Ko san tu te osudis averešće slugos? Vo si odgovorno pire gospodarešće, savo jedino šaj te phenel lešće so tromal, a so či tromal thaj o gospodari pomožila lešće te čerel sar si lače. 5 Vareko šaj te gindil kaj si jek đes majvažno katar aver đes, dok aver šaj gindil kaj si sa e đesa jednake. Ali liduj moraš te aven uverime ande okova so gndin. 6 Kaj, okova savo gindil kaj si jek đes majlačho nego aver, čerel godova zbog o Gospod. Ko hal sa, hal zbog o Gospod kaj si

zahvalno e Devlešće, a ko či hal sa, či hal zbog o Gospod thaj zahvalil e Devlešće. 7 Kaj khonikal amendar či trajil samo pale peste thaj khonikal amendar či merel korkoro pešće. 8 Ako trajisaras, palo Gospod trajisaras, thaj ako meras, palo Gospod meras. Trajisaras, dakle, ili meras e Gospodešće pripadisaras. 9 Kaj o Hristo zato mulo thaj džudilo te avel e mulende thaj e džudende Gospod. 10 Sostar tu osudis čire phrales? Ili, sostar tu omalovažil čire phrales? Savora ačhasa angle Devlesko sudo. 11 Kaj ando Sveto lil ačhel ramome: “Dav man solah mungre trajosa, phenel o Gospod, sa e manuša mande pokloninape thaj savora priznajina kaj sem me o Del.” 12 Kaj, svako amendar dela o računo e Devlešće. 13 Zato, na majbut te osudisaras jek avres, nego majlačhe odlučin te či čeren khanči zbog soste tumaro phral spotaknilpe ando pačipe. 14 Džanav thaj uverime sem ando Gospod Isus kaj nisosko habe naj duhovno nečisto korkoro pestar. A naj bezah te hal pe osim pale okova savo smatril kaj si godova bezah. 15 Ako si čiro phral žalosno zbog varesoste so tu has, godova značil kaj či postupis ande ljubav. Na čire habeja te uništis lesko pačipe kaj o Hristo mulo pale leste. 16 Na te okova so si tuče dozvolime avel po bilačo glaslo. 17 Kaj okova so si važno ande Devlesko carstvo naj okova so han thaj pijen, već te trajin ande pravednost ando miro thaj ande bah ando Sveto Duho. 18 Ko gajda služil e Hristošće, drago si e Devlešće, a vi e manuša cenin les. 19 Zato trudi men te okova so čeras vodil po miro, te pomognisaras te izgradil pe o zajedničko trajo. 20 Na uništisar e Devlesko delo zbog o habe. Sa o habe si dozvolime, ali si bilače ako o manuš hal vareso zbog soste avres crdel po bezah. 21 Majlačhe si te na has mas te na pijes mol thaj te či čeres khanči so crda sas čire phrale te perel ando bezah. 22 Ako san uverime kaj ande okova so čeres naj khanči bilače, neka godova ačhel maškar tute thaj o Del. Blago okolešće savo či osudil korkoro pes pale okova so smatril kaj si lače. 23 Ali te hal vareko, a naj sigurno dali čerel bezah, korkoro pes osudil. Došalo si pale godova kaj či čerel okova ande soste pačal. Te čerda vareko okova pale soste naj sigurno kaj si bezech, grešil.

15 Amen save sam zurale ando pačipe, udžile sam te pomognisaras okolenđe save si slabe ando pačipe, a na te korkoro pešće ugodisaras. 2 Svako amendar trubul te ugodil pire pašutnešće palo lesko lačhipe thaj te šaj barjol ando pačipe. 3 Kaj ni o Hristo či ugodilas pešće, nego sago kaj si ramome ando Sveto lil: “Pe mande peline e uvrede okolenđe save vředonas tut.” 4 A so sas majsigo ande nakhli vrjama ramome ando Sveto lil, ramome si pale

amari pouka, te kroz o strpljenje thaj kroz e uteha savo del o Sveto lil avel men nada. 5 A o Del savo del strpljenje thaj uteha, neka del tumen te aven složne maškar tumende, dok sledin e Hriste Isuse. 6 Gajda jeće dušava ando jek glaso šaj slavisaras e Devles thaj e Dade amare Gospodesko e Isuse Hristosko. 7 Zato prihvatin jek avres sago kaj o Hristo prihvatisarda tumen, pe Devlešči slava. 8 Kaj, phenav tumende: O Hristos postanisardas sluga e Židovende te sikavel kaj si o Del verno thaj te potvrdil o obećanja dino e pradadende 9 thaj te okola save naj Židovurja slavin e Devle zbog lesko milosrđe, sago kaj si ramome ando Sveto lil: "Zato hvaliva tut maškar okola save naj Židovurja thaj đilabava hvalospeve čire alavešće." 10 Thaj još phenel: "Veselin tumen, manušalen save naj sen Židovurja, lešće themeja." 11 Thaj još: "Hvalin e Gospode, sa tumen save naj sen Židovurja; neka sa e thema slavin les." 12 Thaj još o prorok Isaija phenel: "Pojavila pe o potomko e Jesejesko, okova savo uštela te vladil pe okola save naj Židovurja; ande leste okola save naj Židovurja uzdinape." 13 A o Del kastar avel e nada neka pherel tumare ile svako bahtasa thaj e mirosa ando pačipe, te e Sveto Duhošće silava avel tumen nada ando izobilje. 14 Phralalen mungralen, me sem uverime, kaj vi korkoro sen pherde lačhipe, kaj si tumen sa o džanglipe savo si tumende potrebno te šaj sikaven jek avres. 15 Ipak, pale varesave stvarja – te dav tumen pe lende godi – majodlučno ramosardem zbog e milost savi o Del dija man 16 te avav sluga e Hristosko Isusesko maškar okola save naj Židovurja. Me služiv sago rašaj gajda kaj propovediv e Devlešči Bahtali nevimata, te okola save naj Židovurja aven e Devlešće prihvatljivo žrtva, posvetime e Sveto Duhosa. 17 Zato sem ponosno ando Hristo Isus pe okova so odnosil pe po Del. 18 Khančesa aver či usudiv man te hvaliv man osim okolesa so o Hristo kroz mungro propovedanje thaj kroz mungre dela čerda te aven poslušne e Devlešće okola save naj Židovurja. 19 Vo godova čerda kroz e sila e zakononca thaj e čudenca, e Devlešće Duhošće silava. Gajda kaj katar o Jerusalem, pa sa dži ke Ilirika propovedivas pe sa e thana e Bahtali nevimata palo Hristo. 20 Ali uvek trudivas man te na propovediv e Bahtali nevimata okote kaj si o Hristo već pindžardo, te na zidov pe avresko temelj, 21 nego, sago kaj si ramome ando Sveto lil: "Dičhena les okola savende pale leste nas mothodo thaj hačarena okola save či ašundine." 22 Zbog godova but data semas sprečime te avav tumende. 23 Ali akana, završisardem mungri bući ande akala thana, a već but brša zurale kamav te avav tumende. 24 Zato avava tumende kana džava ande Španija. Nadiv man, naime, kaj kana džava po drom kaj avava tumende thaj okote pomožina

mande pe mungro drom, pošto majsigo dži varekaj uživisarav ando tumaro društvo. 25 A akana džav ando Jerusalem te okote posluživ e Devlešće manušende. 26 Kaj e khandirja ande Makedonija thaj ande Ahaja saste ileja odlučisardine te čiden pomoć pale okola kaj si čore maškar e Devlešće manuša ando Jerusalem. 27 Ej, odlučisardine, a vi udžile si lende. Kaj ako okola save naj Židovurja postanisardine učesnikurja ande lengo duhovno lačhipe, udžile si te služin lende ande lende telesne potrebe. 28 Čim predaiv lende godola love thaj gajda dovršiv lengo lačo delo, teljarava ande Španija thaj usput avava tumende. 29 Džanav kaj anava pherdo Hristosko blagoslov kana avava tumende. 30 Dav tumen solah, phralalen, amare Gospodeja e Isuse Hristosa thaj ande ljubav savi dija tumen o Sveto Duho te borin tumen manca gajda te molin e Devle pale mande. 31 Molin tumen te o Del lel man sama katar e nepokorne ande Judeja thaj te e Devlešće manuša ando Jerusalem lačhe prihvatin e pomoć savi anav lende. 32 Gajda, ako si e Devlešči volja, šaj te avav tumende e bahtasa thaj te odmoriv man tumenca. 33 Neka o Del e mirosko avel savorenca tumenca. Amin.

16 Preporučiv tumende amare pheja e Fiva, savi služil ande khandiri ande Kenhreja, 2 te primin lat ando alav e Gospodesko gajda sago kaj prililil e Devlešće manušende. Pomognin laće ande sa so trubul lat tumendar, kaj voj sas pomoćnica e butende, pa vi mande. 3 Pozdravin e Priska thaj e Akila, mungre saradnikon ando Hristo Isus. 4 Von čutine piro trajo ando opasnost te spasin mungro. Či zahvaliv lende samo me, nego vi sa aver khandirja save naj e Židovende. 5 Pozdravin vi e khandiri savi sastailpe ande lengo čer. Pozdravin vi mungre drago drugare e Epenete, savo si prvo ande Cikni Azija palo Hristo. 6 Pozdravin e Marija, savi but trudisajli pale tumende. 7 Pozdravin e Andronika thaj e Junija, save si katar mungro them thaj save sas manca ando phanglipe. Von si ugledne maškar e apostolurja thaj majsigo mandar počnisardine te paćan ando Hristo. 8 Pozdravin e Amplijata, mungre drago drugare ando Gospod. 9 Pozdravin e Urbane, amare saradniko ando Hristo, thaj mungre drago drugare e Stahije. 10 Pozdravin e Apele, savo si iskušime thaj dokažime ando Hristo. Pozdravin vi sa e Aristovulovešće familija. 11 Pozdravin e Irodione, savo si katar mungro them. Pozdravin sa e vernikonon save trajin ande Narkisesko čer. 12 Pozdravin e Trifena thaj e Trifosa, save trudin pe palo Gospod. Pozdravin mungre drago drugarica e Persida, savi but trudisajli palo Gospod. 13 Pozdravin e Rufo, saves o Gospod losarda te avel lesko, thaj lešće deja savi si vi

mande sago dej. **14** Pozdravin e Asinkrite, Flegonte, Ermije, Patrove, Erme, thaj e phralen save si lenca. **15** Pozdravin e Filologo thaj e Julija, e Nireje thaj lešće pheja, thaj e Olimpe, thaj sa e Devlešće manušen save si lenca. **16** Pozdravin jek avren e ilesatar. Pozdravin tumen sa e Hristošće khandirja. **17** Moliv tumen, phralalen, len tumen sama katar okola save čeren podela thaj den povod palo bezah, so si suprotno katar o sikavipe savo tumen sićiline. Zato len tumen majdur katar kasave, **18** kaj kasave či služin amare Gospodešće e Hristošće, nego pire telošće željende, pa e šukar thaj laskave alavenca zavodin e ile e nedužne manušende. **19** A savora ašundine pale tumari poslušnost. Zato raduiv man pale tumende, ali kamav te aven mudre palo lačhipe, a bezazlene palo bilačhipe. **20** A o Del, savo si izvor e mirosko, još cara thaj smrvila e Sotone tale tumare pungre. E milost amare Gospodešći e Isusešći neka avel tumenca! **21** Pozdravil tumen o Timotej, mungro saradniko, sago vi o Lukije, Jason thaj o Sosipatar, save si katar mungro them. **22** Pozdraviv tumen ando Gospod me, Tertije, savo ramosardem akava lil umesto o Pavle. **23** Pozdravil tumen o Gaj, ke savo bešav thaj ke savo sastailpe e sasti khandiri. Pozdravil tumen o Erast, e gavesko blagajniko, thaj amaro phral o Kvart. **24** [Milost e Gospodešći e Isuse Hristošći neka avel tumenca savorenca. Amin.] **25** Neka avel hvalime okova savo šaj te zurjarel tumen kroz e Bahtali nevimata e Isuse Hristošći savi propovediv. Godoja tajna sas dugo garadi, (aiōnios g166) **26** a akana si godoja tajna prekal e proročke lila objavime e themende prema e zapoved e večno Devlešći, te anas e manušen andar svako them dži ke poslušnost thaj dži ko pačiipe. (aiōnios g166) **27** Jedino mudro Devlešće, prekal o Isus Hristo neka avel slava pale uvek! Amin. (aiōn g165)

1 Korinćanende

1 Akava lil ramov me, o Pavle, savo sem e Devlešće voljava akhardo palo apostoli e Hriste Isusesko thaj lesa o phral o Sosten, 2 e Devlešće khandirjaće ando Korint, tumende saven o Del akharda te aven lesko sveto them. Posvetisarda tumen ando Hristo Isus, sago vi savoren averen save pe bilo savo than akharen o alav amare Gospodesko e Isuse Hristosko savo si lengo thaj vi amaro Gospod: 3 Milost thaj miro tumende katar o Del, amaro Dad, thaj katar o Gospod Isus Hrist! 4 Uvek dav najs mungre Devlešće pale tumende, pale lešči milost savi si tumende dini ando Hristo Isus, 5 kaj ande leste ande sa barvaje – ando svako svato thaj svako džanglipe. 6 Gajda o svedočanstvo palo Hristo učvrstisajlo maškar tumende, 7 thaj či falil tumende ni jek milosno daro, dok ažučaren e objava amare Gospodešči e Isuse Hristošči. 8 Vo dži ko krajo učvrstila tumen, te aven besprekorne ando des kana boldela pe amaro Gospod o Isus Hrist. 9 Verno si o Del savo akharda tumen ando zajedništvo pire Čhavesko, e Isuse Hristosko, amare Gospodesko. 10 Dav tumen solah, phralalen, ando alav amare Gospodesko e Isuse Hristosko te savora jek mothon thaj te na avel razdor maškar tumende, nego te aven ando savršeno ječipe, ande jek gindo thaj jek namera. 11 Kaj varesave katar e Hlojinendi familija javisardine mande, phralalen, kaj maškar tumende si čingara. 12 Gndiv pe okova kana svako tumendar phenel: “Me sem e Pavlesko” ili “Me sem e Apolosesko” ili “Me sem e Petresko” ili “Me sem e Hristosko.” 13 Zar si o Hristo razdelime? Zar si o Pavle pale tumende razapnime? Zar sen ande Pavlesko alav bolde? 14 Nais e Devlešće kaj khonikas tumendar, osim e Krispa thaj e Gaja, či boldem, 15 gajda khonik našti te phenel kaj si boldo ande mungro alav. 16 Ej, boldem vi e manušen andar e Stefanosko čher. Či dav man gođi te osim len boldem još varekas. 17 Kaj o Hristo či bičhalda man te bolav e manušen, nego te propovediv e Bahtali nevimata – ali na e alavenca save aven katar e manušendi mudrost, te e Hristosko smrto po trušul či hasarel piri sila. 18 Kaj, o svato palo trušul dilipe si pale okola save propadin, a pale amende save spasi men si e Devlešči sila. 19 Kaj, ando Sveto lil si ramome: “Uništiva e mudrost e mudraconendi thaj odbaciva e gođi e godaverendi.” 20 Kaj si o mudraco? Kaj si o učitelj e Mojsiješće zakonestar? Kaj si okova savo raspravil ande akava them? Zar o Del či sikadas kaj e mudrost akale themešči si dilipe? (aiōn g165) 21 O Del ande piri mudrost džanglas kaj o them nikada či pindžarda les ande piri mudrost, pa o Del odlučisarda te spasil okolen save paćan kroz okova so propovedil pe, a so

o them inčarelas palo dilipe. 22 Gajda e Židovurja roden čudesne znakurja, a e Grkurja roden mudrost. 23 A amen propovedisaras e razapnime Hristo savo si pale Židovurja sablaz, a pale okola save naj Židovurja dilipe, 24 a pale okola saven o Del akhardas palo spasenje, e Židoven thaj e Grkonen, o Hristo si e Devlešči sila thaj e Devlešči mudrost. 25 Kaj e Devlesko dilipe majmudro si e manušendar thaj e Devleši slabost majzurali si e manušendar. 26 Dičhen pe tumende, phralalen, sošće senas kana o Del akharda tumen. Phenav sago kaj e manuša dičhen: naj senas ni mudre, ni močne, ni katar o plemenito rodo. 27 Nego, o Del izabirisarda okolen saven ando them inčaren kaj si dile, te ladžaren okolen saven inčaren kaj si mudre, thaj okolen saven si slabe ando them te ladžaren okolen save si zurale. 28 Vo izabirisarda okolen save ando theme naj andar o plemenito rodo, save si prezrene thaj ništavne, te obezvređil okolen save si e themešće vredne. 29 Gajda te ni jek manuš našti hvalil pe anglo Del. 30 O Del si izvor tumare trajosko ando Hristo Isus. O Hristo postanisardas amari mudrost katar o Del. Preko leste postanisardam pravedne, posvetime thaj oslobodime katar e bezeha. 31 Baš gajda sago kaj si ramome ando Sveto lil: “Ko kamel te hvalil pe, neka hvalil pe e Gospodeja.”

2 Kana avilem tumende, phralalen, či avilem te e bare alavenca ili ande bari mudrost objaviv tumende e Devlesko svedočanstvo. 2 Kaj odlučisardem, dok semas tumenca, te či čerav svato pale khanči avre osim palo Isuso Hristo savo si razapnime. 3 Avilem tumende ande slabosti thaj izdravas e bare daratar. 4 Či čeravas tumende svato thaj či propovedivas e ubedljive alavenca save si katar e manušendi mudrost, nego katar e sila e Sveto Duhošči maškar tumende, 5 te tumaro paćipe či temeljil pes pe manušendi mudrost, nego pe Devlešči sila. 6 Ali e mudrost mothas maškar okola save si duhovno paće, ali na e mudrost akale themešči, niti katar e vladarja akale themešće, save propadin. (aiōn g165) 7 Nego, amen mothas e Devlešči tajno mudrost, savi sas garadi thaj savja o Del majsigo nego so postanisardas o them preodredisardas pale amari slava. (aiōn g165) 8 Godoja mudrost ni jek vladari akale themesko či pindžardas. Kaj te pindžardinesas, či razapnisardinesas e slavne Gospode. (aiōn g165) 9 Nego, sar si ramome ando Sveto lil: “Okova so e jak či dičhel thaj so o kan či ašunel niti e manušešči gođi šaj haćarel, godova o Del pripremiasardas okolenđe save volin les.” 10 A amende o Del godova objavisarda prekal o Sveto Duho, savo preispituil thaj džanel sa, čak vi e Devlešće majhanduk tajne. 11 Kaj, ko katar e manuša pindžarel e manušešči gindimata, osim o duho savo si ande

leste? Isto gajda, khonik či džanel e Devlešće gindimata osim o Duho e Devlesko. 12 A amen, či primisardam e duho akale themesko, nego e Duho savo si katar o Del, te džanas so o Del dija men sago daro. 13 Thaj godova vi phenas, ali na e alavenca save si sikade katar e manušenđi mudrost, nego gajda sago kaj sikada men o Duho, tumačisaras o duhovno čačipe okolenđe save si duhovne. 14 O manuš savo naj duhovno či prihvatil okova so avel katar e Devlesko Duho, kaj godova si pale leste dilipe thaj našti hačarel kaj pale godova čačipe trubul te prosudil pe e Devlešće Duhosa. 15 O duhovno manuš šaj sa te prosudil, ali les khonik našti prosudil. 16 Kaj: "Ko pindžarda e Gospodešće gndurja, ko šaj te proučil les?" No amen gndis sago o Hristo.

3 A me, phralalen, našti čeravas svato tumenđe sago e duhovne manušenđe, nego sago e telesne manušenđe, sago cikne čhavrenđe ando Hristo. 2 E thudeja pravaravas tumen, a na e zurale habeja, kaj našti podnosinas o zuralo habe. A našti ni akana, 3 kaj još uvek sen telesne. Vi čače, dok si zavist maškar tumende thaj čingara, zar naj sen telesne thaj zar či ponašin tumen sago e manuša ando them. 4 Kana jek mothol: "Me sem e Pavlesko", a aver: "Me sem e Apolosesko", zar čiri ponašin tumen sago e manuša ando them? 5 A ko si o Apolos? Thaj ko si o Pavle? Amen sam samo sluge prekal save pačaine, a svako amendar čerel okova so namenisarda lešće o Gospod. 6 Me posadisardem, o Apolos čhorda paj, ali o Del dija te barjol. 7 Gajda naj važno okova savo sadil, niti okova savo čhorel paj, nego o Del savo del te barjol. 8 A okova savo sadil thaj okova savo čhorel paj jednake si thaj svako dobila nagrada pale piro trudo. 9 Amen zajedno čeras bući palo Del, a tumen sen e Devlešći njiva, e Devlešći građevina. 10 Pe Devleši milost savi si mande dini, me sago mudro graditelj čutem temelj, a aver zidol. Samo neka svako lel sama sar zidol. 11 Kaj khonik našti čhol aver temelj, osim okova savo si već čhutino, a godova si o Isus Hristo. 12 Thaj ko god pe godova temelj zidol e sunakajesa, e rupesa, e drago barenca, e kaštenca, e šuće čarjava ili e sulumava, 13 lesko delo inkijela po videlo. E Sudosko đes godova sikavela, kaj ande jag sikavela pe sosko si svakonesko delo. 14 A te o delo savo vareko nazidosarda ačhilo, godova primila nagrada. 15 A te varekasko delo phabilo, godova trpila šteta. Vo korkoro spasila pe, ali sago kroz e jag. 16 Zar či džanen kaj sen e Devlesko hramo thaj kaj e Devlesko Duho trajil ande tumende? 17 Ako vareko haravel e Devlesko hramo, vi les o Del haravela. Kaj e Devlesko hramo si sveto, a godova hramo sen tumen. 18 Neka khonik na hohadol. Ako vareko

maškar tumende gindil kaj si mudro sago kaj gindil akava them, neka avel dilo te avel čače mudro. (aiōn 9165) 19 Kaj e mudrost akale themešći si dilipe anglo Del. Ramome si ando Sveto lil: "Vo e mudre manušen astarel ande zamka ande lengo lukavstvo" 20 thaj palem: "O Gospod džanel e gindurja e mudre manušenđe kaj si bezvredne." 21 Zato neka khonik či hvalil pe e manušenđe vođenca, kaj si sa tumaro, 22 bilo te si godova o Pavle, ili o Apolos, ili o Petar, ili o them, ili o trajo, ili smrto, ili akaja vřjama ili okoja savi avela – sa si tumaro, 23 a tumen sen e Hristošće, a o Hristo e Devlesko.

4 Gajda, neka svako smatril men e Hristošće slugenca thaj okolenca savende o Del poverisarda piro tajno čačipe. 2 A okola savende si vareso poverime moraš te sikaven kaj si dostojne pale godova poverenje. 3 A dali me gajda čerdem? Ni cara či mariv kaj sudin mande tumen ili bilo savo manušesko sudo. Ni me korkoro man či osudiv, 4 kaj mungri savest si čisto. Ali, godoleja naj sam opravdime – o Gospod si okova savo sudil mande. 5 Zato na sudin majsigo nego so avel pale godova e vřjama – kana avela o Gospod. Vo rasvetlila okova so si garado ande tama thaj inkalela po videlo e ilešće namere, thaj askal svako primila pohvala katar o Del. 6 Phralalen, zbog tumende lijem man thaj e Apolose sago primer, te pe amende sičon so značil: "Na džan majdur katar okova so ramol ando Sveto lil," te khonik či hvalil pe ječe manušeja protiv aver manuš. 7 Kaj ko phenel kaj san tu majlačho katar aver? Sa so si tut, dobisardan. Pa pošto sa so si tut dobisardan, sostar godoleja hvalis tut sago kaj steknisardan čire trudosa? 8 Gndin kaj već steknisardine sa? Gndin kaj sen akana barvale thaj kaj postanisardine carurja bi amengo? Sar naj bah te postanisardine carurja, pa te vi amen caruis tumenca. 9 Gndiv kaj o Del amen e apostolen čhuta po poslednjo than ande povorka, sago okolen save si osudime te meren ande arena anglo sasto them, vi angle andelurja thaj vi angle manuša. 10 Zbog amari odanost e Hristošće činil pe kaj sam dile, a tumen gndin kaj sen mudre ando Hristo! Amen sam slabe, a tumen gndin kaj sen zurale! Pale tumende e manuša šukar čeren svato, a amendar asan. 11 Sa dži ke akava časo amen sam bokhale, trušale, thaj bi e drzengo, maren men thaj bi čheresko sam. 12 Muči men te čeras bući amare vastenca. Kana vredon men – amen blagoslovisaras, kana progonin men – amen trpisaras; 13 kana ponizin men – amen boldas šukaripeja. Postanisardam sago gunoj e themesko thaj pale lende najsam khanči aver, nego samo o praho sa dži akana. 14 Či ramov tumenđe akava te ladžarav tumen, nego te opomeniv tumen sago mungre voljene čhavren. 15 Kaj čak vi te avel tumen deše

miljenca čuvarja ando Hristo, naj tumen but dada, kaj me bijandem tumen e Bahtale nevimatasa ando Hristo Isus. 16 Zato moliv tumen: dičhen pe mande sago primer. 17 Zato vi bičhaldem tumende e Timoteje, savo si mungro drago thaj verno čhavo ando Gospod. Vo dela tumen godi pe godova sar me trajiv ando Hristo Isus, a trajiv gajda sago vi kaj sikavav svugde ande svako khandiri. 18 Varesave tumendar čeren pe barikane, kaj gndin kaj me či avava tumende. 19 Ali, ako del o Gospod, uskoro avav tumende, a askal kamav te dikhav na sošče si pe alava godola barikane, nego da li si len sila. 20 Kaj e Devlesko carstvo sikadol pe godova sar trajin, a na pe okova so mothon. 21 So majsigo kamen? Te avav tumende e rovljasa ili ande ljubav thaj ando duho blagosti?

5 E manuša čeren svato kaj maškar tumende si kasavo bludo sosko naj čak ni maškar e manuša save či pindžaren e Devle. Phenen mande kaj varesavo manuš andar tumari khandiri trajil ando bezeh pire dadešče romnjava. 2 A tumen još čeren tumen barikane! Majlače avilosas te aven žalosne, pa te andar tumari zajednica durjaren okoles savo čerda kasavo bilačipe. 3 Vi ako naj sem okote prisutno e telosa, ali sem prisutno e duhosa, več sago kaj sem tumenca – osudisardem okoles savo godova bilačo delo čerda. 4 Kana čiden tumen ando alav e Gospodesko Isusesko, me avava tumenca ando duho sago vi e sila e Gospodešči Isusešči, 5 askal predain godole manušes e Sotonešče te lešči telesno narav propadnil, a te o duho spasil pe ando đes kana o Gospod boldela pe. 6 Naj lačhe tumende kaj hvalin tumen. Zar či džanen kaj o bezah buljol sago cikno kvasco savo šukljarel o sasto humer? 7 Šlaven tumen katar o bezeh savo si sago purano kvasco, te aven nevo humer, bi kvascosko, sošče vi sen. Amaro prazniko e Pasha si spremno kaj več si žrtvujime amaro pashalno bakhro – o Hristo. 8 Zato trubul te proslavisaras o prazniko na e purane kvascosa, niti kvasco katar e zloba thaj katar o bilačipe, nego e bikvascošče mangresa – so si iskrenost thaj čačipe. 9 Ramosardem tumende ando lil te na hamin tumen okolenca save si bludnikurja. 10 Ali či gndiv pe sa e bludnikurja ande akava them, ili pe pohlepne manuša thaj pe razbojnikurja, ili pe idolopoklonikurja. Kaj ande godova slučaj moraš te delenastar andar akava them. 11 Okova so ramosardem tumende si te na družin tumen okolesa savo vi ako akharel pe phralesa, a bludniko si ili pohlepno, ili idolopokloniko, ili klevetniko, ili matarno, ili razbojniko. Kasave phralesa na ni te han! 12 Naj dži mande te sudiv okolende save si ando them? Ali, okolende ande khandiri save gajda grešin trubun

te sudin. 13 A okolende avrjal andar e khandiri sudila o Del. “Durjaren e opako manušes andar tumari zajednica.”

6 Kana varekas tumendar si sudo aver manušesa, sostar džan po sudo angle okola sudije save si nepravedne? Sostar godova či raspravin maškar e Devlešče manuša? 2 Zar či džanen kaj e Devlešče manuša sudina e themešče? Pa, ako tumen sudina e themešče, zar naj sen dostojne te sudin vi ande majcikne sudske sporurja? 3 Zar či džanen kaj amen sudisa e andelende? Zato trubun te aven kadre te rešin e sporurja save si pale akava them. 4 A tumen kana sudin tumen pale akale themešče stvarja, sostar čhon tumende pale sudije okole manušen saven naj nisavo značene ande khandiri? 5 Akava phenav tumende te ladžarav tumen. Zar maškar tumende naj ni jek mudro manuš savo šaj te presudil maškar pire phral? 6 Nego o phral sudil pe e phralesa – thaj godova angle okola save či pačan! 7 Ustvari, godova si tumende več mana, kaj sudin tumen maškar tumende. Sostar majrado či pretrpin e nepravda? Sostar majrado či pretrpin e šteta? 8 Nego tumen korkoro čeren nepravda thaj šteta, thaj godova e phralende. 9 Ili zar či džanen kaj e nepravedne či nasledina e Devlesko carstvo? Na hohaven tumen! Kaj ni e bludnikurja, ni e idolopoklonikurja, ni e preljubnikurja, ni e muškarcurja save soven aver muškarconenca, 10 ni okola save čoren, ni e pohlepne ni e matarne, ni e klevetnikurja ni e razbojnikurja, či nasledina e Devlesko carstvo. 11 A kasave sas varekana vi varesave tumendar. Ali, akana sen thode, posvetime thaj opravdime ando alav e Gospodesko Isuse Hristosko thaj ando Duho amare Devlesko. 12 Phenel pe: “Sa si mande dozvolime”, ali naj sa korisno. “Sa si mande dozvolime”, ali či kamav khančešče te robuiv. 13 Phenel pe: “O habe si palo đí, thaj o đí si palo habe, ali o Del uništila vi jek vi aver.” Ali, o telo naj palo bludo, nego palo Gospod, a o Gospod palo telo. 14 A o Del savo vazdas e Gospode andar e mule, vazdela vi amen andar e mule pire silava. 15 Zar či džanen kaj tumare telurja si e Hristošče udurja? Zar dena tumare udurja, save pripadin e Hristošče, te aven bludničave udurja? Nisar! 16 Ili zar či džanen kaj okova savo sjedinil pe e bludnicava, lasa si jek telo? Kaj, ando Sveto lil ramol: “Duj džene avena jek telo.” 17 A ko sjedinil pe e Gospodeja, lesa postanil jek duho. 18 Našen katar o bludo. Tumen phenen: “Svako bezeh savo o manuš čerel, najles khanči e telosa.” Ali ko čerel bludo, grešil protiv piro telo. 19 Ili zar či džanen kaj si tumaro telo hramo e Sveto Duhosko, savo si ande tumende thaj saves o Del dija tumen, thaj kaj či pripadin korkoro tumende. 20 Kaj, o Del počindas pale tumende bari cena; zato proslavin e Devle tumare telosa.

7 A akana te phenav tumende pale okova so ramosardine mande. Tumen phenen: "Lače si palo manuš te na avel les odnos e manušnjava." **2** Ali, te na peren ando bludo, neka svakone manuše avel lešči romnji thaj svakone manušnja neka avel lako rom. **3** Neka o rom izvršil piri bračno dužnost prema piri romnji, a gajda vi e romnji prema piro rom. **4** E romnji naj gospodari pire telošće, nego lako rom, a gajda ni o rom naj gospodari pire telosko, nego lešči romnji. **5** Na uskratin tumen jek avrešće, osim ako si tumen dogovor, pale varesavi vrjama te posvetin tumen e molitvaće. A pale godova palem na uskratin tumen jek avrešće te o Sotona našti crdel tumen po bezeh zato kaj našti te suzdržin tumen. **6** Akava phenav tumende sago dopuštenje, a na sago zapovest. **7** Kamlemas te sa e manuša aven sago me kaj naj sem oženime, ali svakones si lesko milosno daro katar o Del: varekas kasavo daro, a avres aver daro. **8** A okolende save naj ženime thaj e udovicende phenav: lače avela te ačhiline gajda, sago kaj sem vi me. **9** Ali, te našti suzdržin pe neka ženin pe thaj udajin pe. Majlače si te ženin pe ili udajin pe, nego te phabon katar e požuda. **10** A okolende save trajin sago rom thaj romnji dav zapovest – savi či avel mandar, nego katar o Gospod: neka e romnji na rastavil pe katar piro rom. **11** A te ipak rastavil pe, neka majbut či udajil pe ili neka pomiril pe pire romeja. Isto gajda o rom neka na rastavil pe katar pire romnji. **12** A averende ipak phenav me, vi ako o Gospod godova či direktno zapovedisarda: ako varesave phrales si romnji savi či pačal ando Del, ali kamel te trajil lesa, neka na rastavil pe katar piri romnji. **13** Thaj vi ako e romnja si rom savo či pačal ando Del, ali kamel te trajil lasa, neka na rastavil pe katar piro rom. **14** Kaj o rom savo či pačal posvetime si preko piri romnji savi pačal, a gajda si vi e romnji savi či pačal posvetime si preko piro rom savo pačal. E čhavra inače avilesas sago čhavra e nevernikonende, a gajda si svete. **15** A te okova savo či pačal kamel te rastavil pe, neka rastavil pe. Ande godova slučaj e rome savo pačal ili e romnja savi pačal naj obaveza, nego si slobodne, kaj o Del kamel te trajisaras ando miro. **16** Kaj, so džanes, romnjije, dali spasija e romes? Ili so džanes, romeja, dali spasija e romnja? **17** Inače, neka svako trajil sar o Gospod odredisardas lešće, gajda sar o Del akharda les. Gajda zapovediv sa e khandirende. **18** Ako sas vareko obrezime majsigo nego so o Del akharda les, neka na učharel e tragurja kaj si obrezime. Gajda vi o manuš savo nas obrezime majsigo nego so o Del akharda les, neka na obrezil pe. **19** Naj važno dali si o manuš obrezime ili naj obrezime. Važno si samo te inčaren pe ke Devlešće zapovesti. **20** Neka svako ačhel gajda sar o Del akharda

les. **21** Dali san akhardo sago robo? Na vodi briga pale godova! Ali te šaj aves slobodno manuš, astar godoja priika. **22** Kaj, kas o Gospod akhardas kana sas robo, godole o Gospod ćerda te avel slobodno manuš. Isto gajda, okoles kas o Gospod akhardas sago slobodno manušes, robo si e Hristosko. **23** O Del počindas pale tumende bari cena. Na aven roburja e manušende. **24** Phralalen, neka svako ačhel anglo Del sar si akhardo. **25** A pale okova kaj phučline pale čheja, naj man nisošči zapovest direktno katar o Gospod. Ali dav tumen savet, sago vareko savo si vredno te pačalpe lešće, kaj o Del sikada mande milost. **26** Gndiv, kaj zbog akale ađesće muke majlače si palo manuš te ačhel gajda sago kaj si. **27** Ako si tut romnji, na rastavisar tut latar. Ako naj tut romnji, na rode lat. **28** Ali ako vi oženis tut, či ćeres bezeh, a či ćerel bezeh ni e čhej ako udajil pe. Ipak okolen save ženin pe thaj udajin pe avela telesne nevolje, a me kamlemas te arakhav tumen katar godova. **29** Kamav te phenav, phralalen: e vrjama si harni. Zato vi okola saven si romnja – neka aven sago kaj najlen; **30** thaj save roven – sago kaj či roven; thaj save radujin pe – sago kaj či radujin pe; thaj save činen – sago kaj khanči najlen; **31** thaj save koristin e stvarja akale themešće – sago kaj naj lende briga, kaj načel o obliče akale themesko. **32** Kamlemas te na avel tumen brige. O manuš savo naj oženime vodil briga pale okova so si e Gospodesko, sar te ugodil e Gospodešće, **33** a o ženime manuš vodil briga pale akale themešće stvarja, sar te ugodil pire romnjaće, **34** thaj zato si razdelime. E romnji savi naj udajime ili e čhej vodil briga pale okova so si e Gospodesko, te avel sveto vi e telosa vi e duhosa, a e udajime romnji vodil briga pale akale themešće stvarja, sar te ugodil pire romešće. **35** Akava phenav pale tumaro lačhipe, na te čhav šolo pe tumari kor, nego te trajin čestito thaj te na avel tumen smetnje dok služin e Gospodešće. **36** Ako vareko gindil kaj nepravedno postupil prema piri verenica savi si čhej, thaj kaj načel laći vrjama te trudil pe, a vo gindil kaj trubul te, neka ćerel godova so kamel. Či ćerel bezeh – neka ženil pe. **37** Ali, ako vareko čvrsto odlučisardas te na ženil pe, khonik či tradel les thaj šaj vladil pesa, lače ćerel kaj či ženil pe pire verenicava. **38** Gajda ko oženil pe pire verenicava, lače ćerel, a ko či oženil pe, ćerel još majlače. **39** E romnji si phangli pale piro rom sa dok si vo džudo. A te vo mulo, slobodno si te udajil pe pale kaste voj kamel, ali samo pale okova savo pripadil e Gospodešće. **40** Ali sar me gndiv – a gndiv kaj vi man si e Devlesko Duho – avela majbahtalo, ako ačhel gajda sago kaj si.

8 A so phučline palo mas savo si žrtvuime e idolende, phenava tumende. Džanas kaj "savoren amen si džanglipe." Ali o džanglipe čerel e manuše te čerel pe barikano, a e ljubav izgradil e manuše. **2** Ako vareko gindil kaj vareso džanel, godova još či džanel gači kozom trubujasas te džanel. **3** Ali ako vareko volil e Devles, o Del pindžarel les. **4** A palo habe savo si žrtvuime e idolende, džanas kaj "o idol naj džudo" thaj kaj "naj aver del osim o jedino Del." **5** Kaj, čak vi te si devla, save gajda akhardon bilo po nebo ili pe phuv, a si but "devla" thaj but "gospodarja" – **6** pale amende postoil samo jek Del o Dad, katar savo sa avel, thaj pale savo trajisaras, thaj postojil samo jek Gospod, o Isus Hristos, prekal savo si sa stvorime thaj prekal savo trajisaras. **7** Ali či džanen savora godova. Varesave manuša gači sičile te služin e idolende, kaj kana han kasavo habe, han sago kaj si žrtvuime e idolende, pa gajda meljaren piri savest, savi si slabo. **8** "A o habe či anela men paše dži ko Del. Niti so hasaras ako či has, niti so dobis ako has." **9** Samo len sama te tumari sloboda či crdel po bezah okole slaben ande savest. **10** Kaj, ako vareko dičhel tut, saves si "džanglipe", kaj has ande idolsko hramo, zar godoleja – pošto si lešči savest slabo – či li ohrabrija les te hal o habe savo si žrtvuime e idolende? **11** Thaj gajda zbog čiro džanglipe, propadnil čiro slabo phral pale savo o Hristo mulo. **12** Kaj gajda kana grešin protiv tumare phrala thaj povredin lendi slabo savest, grešin protiv o Hristo. **13** Zato ako o habe crdel po bezah mungre phrale, nikada majbut či hava mas, te či crdav les po bezah. (aiōn g165)

9 Zar me naj sem slobodno? Zar naj sem apostol? Zar či dikhlem e Isuse, amare Gospode? Zar naj sen tumen plodo mungre trudosko ando Gospod? **2** Ako averende naj sem apostol, tumende sem, kaj tumen sen dokaz mungre apostolsko službaće ando Gospod. **3** Akava si mungri odbrana protiv okola save prn man: **4** Zar amen naj pravo te has thaj te pijas pale godova kaj služisaras tumende? **5** Zar naj vi amen pravo te oženi men pačivale romnjenca thaj te indaras len amenca sago kaj čeren e aver apostolurja, e Gospodešće phral thaj o Petar? **6** Ili, zar samo me thaj o Varnava moraš te čeras buči te avel men palo trajo? **7** Ko godova služil ande vojska pe piro troško? Ili, ko sadil o vinograd, a te či hal drak andar o vinograd? Ili ko čajlarel o stado bakhrenca, a te či pel thud e bakhrengo? **8** Da li me akava phenav katar e manušeči mudrost, ili gajda phenel vi o Zakon? **9** Kaj ande Mojsijesko zakon si ramome: "Na phande o muj e guruvesko te na hal kana vršil o div." Zar e Devlešće ačhilo samo dži ke guruva? **10** Zar či čače phenel godova zbog amende? Ej, zbog amende si godova

ramome. Kaj, o okova savo oril trubul te oril ande nada thaj okova savo vršil o div trubul te vršil ande nada kaj dobila piro deo katar o rodo. **11** Ako amen sijosardam tumende duhovno lačhipe, zar si but ako amen žanjisaras tumaro materijalno lačhipe? **12** Ako avren si pravo pe tumaro materijalno lačhipe, sostar amen či avilosas još majbut pravo pe godova? Ali, amen či iskoristisardam godova pe so si amen pravo, nego sa podnosisaras te khančesa či zaprečisardamas e Hristošči Bahtali nevimata. **13** Zar či džanen kaj okola save čeren služba ando Hramo, katar o Hramo dobin te han, thaj okola save služin po žrtveniko, dobin deo katar okova so si prinesime po žrtveniko. **14** Gajda vi o Gospod odredisarda okolende save propovedin e Bahtali nevimata te katar e Bahtali nevimata vi trajin. **15** Me khanči katar godova či koristisardem. A ni akava či ramov tumende te katar akana avel gajda, kaj majrado mulemas nego te odrekniv man katar akava sova ponosiv man te propovediv ivja. **16** Kana propovediv e Bahtali nevimata, našti hvaliv man, kaj godova si mungri dužnost. Teško mande ako či propovediv e Bahtali nevimata. **17** Ako godova čerav korkoro mandar, zasluživ nagrada, ali godoja dužnost si mande dini, kaj me či izabirisardem lat. **18** So si dakle, mungri nagrada? Mungri nagrada si te propovediv ivja e Bahtali nevimata thaj te na koristiv o pravo pe počin pe savi si man pravo sago propovedniko. **19** Vi ako sem slobodno thaj či pripadiv khonikašće, ipak savorende postanisardem robo, samo te pridobiv len so majbut palo Hristo. **20** Kana semas e Židovenca, semas Židovo te šaj anav len dži ko Hristo. Kana semas okolenca save inčaren e Mojsijesko Zakon, vi me godova čeravas, vi ako naj sem phanglo e Zakoneja, te šaj anav len dži ko Hristo. **21** Pale okola saven naj Zakon semas sago okova saves naj Zakon – vi ako me naj sem bi e Devlesko zakon, nego sem poslušno e Hristostošće zakonešće – te pridobiv okolen saven naj Zakon. **22** E slabe manušenca semas slabo, te pridobiv e slabe manušen. Savorende postanisardem sa, či li varesar von spasisajle sas pe bilo savo način. **23** A sa godova čerav zbog e Bahtali nevimata, te ande late avel man udeo ande laće blagoslovurja. **24** Zar či džanen kaj po trkalište sa e trkača prasten, ali samo jek dobil nagrada? Gajda vi tumen prasten, te osvojin e nagrada. **25** Svako takmičari suzdržilpe katar sa. Von dobin raspadljivo venco, a amen okova savo naj raspadljivo. **26** Zato me či prastav, a te naj man ciljo, niti e dumukhava pekav ande balval, **27** nego krotiv mungro telo thaj podloživ les, te na me savo avrende propovedivas e Bahtali nevimata, korkoro avav isključime andar e utrka.

10 Či kamav phralalen, te či džanen kaj sa amare pradada sas zaštitite e oblakosa ande pustinja, thaj kaj savora nakhline kroz o more. 2 Thaj savora sas bolde ando oblako thaj ando more sago e Mojsiješće sledbenikurja. 3 Thaj savora haline isto duhovno habe 4 thaj savora piline isto duhovno pipe. Kaj piline andar e duhovno stena savi pratilas len, a godoja stena sas o Hristo. 5 Ali, but lendar či ugodinas e Devlešće, pa sas mudarde pe sa e riga ande pustinja. 6 A sa godova dogodisajlo amende palo primer, te na čeznisaras palo bilačipe sago kaj von čezninas. 7 Na aven idolopoklonikurja sago kaj sas varesave lendar – sago kaj si ramome ando Sveto lil: “Bešlo o them te hal thaj te pijel pa užile te čhlen e idolešće ando čast.” 8 Thaj na te damen ando bludo, sago kaj varesave lendar čerenas, pa ande jek đes muline biš thaj trin milje. 9 Thaj te na iskušisaras e Gospode sago kaj varesave lendar iskušisardine les, thaj sas mudarde katar e sapa. 10 Thaj na mrmiljin sago kaj varesave lendar mrmiljinas, pa mudarda len o anđelo Unišivači. 11 Sa godova dogodisajlo lende palo primer, a ramome si sago upozorenje amende, save trajisaras ande poslednjo vrjama. (aiōn g165) 12 Zato, ko gindil kaj čvrsto ačhel, neka lel sama te na perel. 13 Džanen kaj či aven pe tumende e kušnje save naj vi aver manušen. O Del si verno thaj či mučela te aven iskušime majbut katar okova so šaj podnosin. Vo pomognila tumende te šaj inkljen andar godova iskušenje, gajda te šaj izdržin. 14 Zato, drage mungralen, našen katar o idolopoklonstvo. 15 Sago e razumne manušenđe phenav: korkoro prosudin dali si čače so phenav tumende. 16 Naj li o tahtaj blagoslova, pale savo das najs e Devlešće, zajedništvo e Hristošće rateja? Zar o mangro savo phagas či značil kaj sam deo e Hristošće telosa? 17 Pošto si o mangro jek, askal sam amen save sam but, jek telo, kaj savora delisaras jek mangro. 18 Dičen pe okola save si Izraelcurja po telo: naj li von okola save han katar e hramske žrtve iste okola save zajedno prinesin e žrtva e Devlešće po žrtveniko? 19 So godoleja kamav te phenav? Kaj si o habe savo si žrtvuime e idolende vareso? Ili kaj si o idol vareso? 20 Na. Nego, okova so von žrtvuin, e demonende žrtvuin, a na e Devlešće. A me či kamav te avel tumen khanči e demonenca. 21 Našti pijen andar o tahtaj e Gospodesko thaj andar o tahtaj e demonengo! Našti han pale sinija e Gospodešči thaj pale sinija e demonendi. 22 Ili kamas te čeras e Gospode te avel ljubomorno? Zar sam amen majzurale lestar? 23 Phenel pe: “Sa si dozvolime”, ali naj sa korisno. “Sa si dozvolime”, ali sa či izgradil men. 24 Neka khonik či rodel piri korist, već e korist averešči. 25 Han sa o mas savo bičinel pe po pijaco, thaj khanči na phučen zbog tumari savest. 26 Kaj, ando

Sveto lil si ramome: “E Gospodešči si e phuv thaj sa so si pe late.” 27 Ako vareko ko či pačal akharel tumen te han thaj tumen kamen te džan, han sa so čhol angle tumende thaj khanči na phučen zbog e savest. 28 Ali, ako vareko phenel tumende: “Akava habe sas žrtvuime e devlende”, askal na han zbog okova savo upozorisarda tumen pe godova thaj zbog e savest 29 – či phenav te na han zbog tumari savest, nego zbog okova savo godova phendas tumende. Kaj, sostar te avrenđi savest osudil mungri sloboda? 30 Ako me dav najs e Devlešće palo habe savo hav, sostar te osudin man pale okova so hav? 31 Zato, ako han, pijen, ili čeren vareso aver, sa čeren e Devlešće pe slava. 32 Na aven po sablaz ni e Židovende, ni okolende save naj Židovurja, ni e Devlešće khandirjače, 33 sago kaj vi me savorende ugodiv ande sa, thaj či rodav mungri korist, nego e korist e butende pale lengo spasenje.

11 Dičen tumen pe mande sago kaj me dikhav man po Hristo. 2 Hvaliv tumen kaj ande sa den tumen gođi mande thaj kaj inčaren o sikavipe gajda sar mandar primisardine. 3 Ali kamav te džanen kaj o Hristo si šoro svakone romešće, a o rom si šoro e romnjače, a o Del si šoro e Hristošće. 4 Svako muškarco savo molil ili prorokuil učarde šoresa, ladžarel piro šoro. 5 Thaj svako manušnji savi molil ili prorokuil nande šoresa ladžarel piro šoro, kaj isto si godova sago kaj ranglas piro šoro. 6 Ako e manušnji či učarel piro šoro, neka činel pire bal. A ako naj šukar pale manušnji te činel pire bal ili te randel pe, neka učarel o šoro. 7 O muškarco naj moraš te učarel piro šoro kaj si vo e Devlešči slika thaj slava, a e manušnji si e manušešči slava. 8 Kaj nas stvorime o prvo muškarco katar e manušnji, nego e manušnji katar o prvo muškarco. 9 Thaj naj o muškarco stvorime zbog e manušnji, nego e manušnji zbog o muškarco. 10 Zbog godova, a vi zbog e anđelurja e manušnja moraš te avel znako po šoro kaj si tale vlast. 11 Ali, ando Gospod, niti si e manušnji nezavisno katar o muškarco, niti si o muškarco nezavisno katar e manušnji. 12 Kaj sago kaj e manušnji postanisardas katar o muškarco, gajda vi o muškarco bijandol katar e manušnji, a sa godova avel katar o Del. 13 Prosudin korkoro: dali prilil e manušnjače te nande šoresa molil pe e Devlešće? 14 Zar vi e manušešči priroda či sikavel tumen kaj si palo muškarco ladžavo te avel les lunde bal. 15 A pale manušnji čast si ako si lat lunde bal kaj si laće e lunde bal dine sago dikhlo palo šoro. 16 A te vareko kamel te prepiril pe oko godova, šaj samo phenav kaj amen thaj e Devlešće khandirjen naj kasavo običaj te e manušnja molin pe e nande šoresa. 17 Dok dav

tumen akala upute, naši hvaliv tumen, kaj tumare zajedničke sastankurja anen majbut šteta, nego korist. 18 Prvo, ašunav kaj maškar tumende si podele kana čiden tumen sago e khandiri, a so dži verekaj vi pačav, 19 zato kaj gndin kaj maškar tumende trubul te avel podele, te dičhol ko si maškar tumende poštujime. 20 Kana, dakle, čiden tumen, tumen či han vi čače e Gospodešči večera. 21 Svako tumendar hal piri večera, a či ažučarel avren, thaj gajda jek džaltar bokhalo dok aver čak vi matol. 22 Zar naj tumen chere, te okote han thaj te pijen? Ili prezirin e Devlešči khandiri thaj ladžaren okolen saven naj? So te phenav tumende? Te hvaliv tumen? Ande akava či hvaliv tumen! 23 Kaj me primisardem katar o Gospod o sikavipe savo predaisardem tumende: O Gospod Isus ande okoja rjat kana sas izdajime lijas o mangro, 24 zahvalisarda e Devlešče pale leste, phaglas les thaj phendas: "Akava si mungro telo dino pale tumende. Čeren godova mande po spomen." 25 Isto gajda lijas vi o tahtaj posle večera thaj phendas: "Akava tahtaj si Nevo savez ande mungro rat. Kana god pijen, čeren godova mande po spomen." 26 Kaj, kana god han akava mangro thaj pijen andar akava tahtaj, navestin e Gospodesko smrto dok vo či avel. 27 Zato ko nedostojno hal akava mangro ili pijel andar e Gospodesko tahtaj, čerel bezeh protiv o telo thaj protiv o rat e Gospodesko. 28 Neka svako ispitul korkoro pes majsigo, nego so hal o mangro thaj pijel andar o tahtaj. 29 Kaj, ko hal thaj pijel, a či poštuil o telo e Gospodesko, crdel pe peste e osuda kana hal thaj pijel. 30 Zbog godova si maškar tumende but slabe thaj nasvale, a but vi muline. 31 Ali kana korkoro pes ispituisardamas, či avilosas amende sudime. 32 Kana o Gospod sudil amende, vo vaspitil men thaj barjarel men te na avas osudime e themeja. 33 Zato, phralalen mungralen, kana čiden tumen te han e Gospodnjo večera, ažučaren jek avres. 34 Ako si vareko bokhalo neka hal chere, te na aven tale osuda kana čiden tumen. Aver stvarja objasniva tumende kana avava.

12 A pale duhovne darurja, phralen, či kamlemas te ačhen ando bidžanglipe. 2 Džanen kaj dok či pindžarenas e Devles, kaj senas varesar hohade thaj crdine ke neme idolurja. 3 Zato phenav tumende te džanen kaj khonik ko si vodime e Devlešče Duhosa, naši phenel: "Proketo si o Isus", sago kaj khonik naši phenel: "O Isus si Gospod", ako naj vodime e Sveto Duhosa. 4 E darurja si različite, ali si o Duho isto. 5 Si vi različito službe, ali si o Gospod isto, 6 si vi različite načinurja prekal save o Del delujil ando manuša, ali isto si o Del savo čerel sa ande savorende. 7 A ko dobil e objava e Sveto Duhošči, dobisarda lat palo

lačhipe svakonešče. 8 Kaj, ječešče o Duho del daro te čerel svato ande mudrost, a avrešče godova isto Duho del daro te čerel svato ando džanglipe, 9 ječešče, o isto Duho, del pačipe, a avrešče godova isto Duho, del daro te sastol, 10 ječešče o Duho del sila te čerel čudurja, a avrešče te prorokuil, ječešče te razlikuil e duhonen, a avrešče te čerel svato ande aver čhibja, a avrešče te tumačil e čhibja. 11 Sa godova čerel godova isto Duho, savo del svakone dženešče sar kamel. 12 Sago kaj si o telo jek, a si les but udurja, thaj sa e udurja e telošče vi ako si but, čeren jek telo, gajda si vi e Hristosa. 13 Kaj, savora sam ječe Duhosa ande jek telo bolde, bilo te sam Židovurja ili okola save naj, roburja ili okola savi si slobodne. Savora sam napoime ječe Duhosa. 14 Kaj ni e manuško telo naj sastavime katar jek deo, nego si les but dela. 15 Ako o pungro phenel: "Či pripadiv e telošče zato kaj naj sem o vas", zar zbog godova či pripadil e telošče? 16 Thaj ako o kan phenel: "Či pripadiv e telošče kaj naj sem e jak", zar zbog godova či pripadil e telošče? 17 Kana o sasto telo avilosas jak, kaj avilosas o sluho? Kana o sasto telo avilosas sluho, kaj avilosas o njih? 18 Ali, o Del svako deo e telosko čhuta baš gajda sago kaj kamlas. 19 Kana sa o telo avilosas jek udo, kaj avilosas o telo? 20 Gajda, si but udurja e telošče, ali si samo jek telo. 21 Našti e jak te phenel e vastešče: "Či trubus man", ni o šoro e pungrende: "Či trubun man." 22 Naprotiv, okola udurja e telošče saven smatris kaj si slabe – si potrebne. 23 Pale okola udurja e telošče saven smatris kaj si nečasne – das majbari čast thaj e nepristojne e telošče udonenca postupisaras majpristojno. 24 dok okola udurja e telošče save sikadon či trubun kasavi briga. Ali, o Del sastavisardas o telo gajda kaj dijas majbari čast okole udonende saven naj čast, 25 te na avel podela ando telo, nego te e udurja e telošče vodin jednako briga jek pale avreste. 26 Ako jek udo e telosko patil, sa e udurja e telošče patin zajedno lesa thaj ako jek udo e telosko si počastime, lesa raduin pe sa e udurja e telošče. 27 A tumen sen e Hristosko telo thaj posebno svako tumendar si udo e telosko. 28 O Del ande Khandiri prvo postavisardas e apostolen, dujte e prorokonen, trite e učiteljen, pa okolen save čeren čudesne dela, pa okolen saven si daro te sastaren, te pomognin, te upravljin thaj te čeren svato ande aver čhibja. 29 Dali si savora apostolurja? Dali si savora prorokurja? Dali si savora učitelja? Dali si savora okola save čeren čudurja? 30 Dali si savoren daro te sastaren? Dali savora čeren svato ande aver čhibja? Dali savora tumačin? 31 Čeznin pale majbare darurja, a me sikavava tumende još majlačno drom.

13 Ako džangle mas te ćerav svato pe sa e manušenje thaj andelende čhibja, a ljubav te naj man, askal avilemas sago o zvono ili e činele save maren ande kan. 2 Thaj ako si man vi daro te prorokuiv, ako džanav sa e tajne thaj sa o džanglipe, thaj te avel man sa o paćipe te e gore premestiv, a ljubav te naj man, avilemas khanči. 3 Ako e čore manušenje dav sa so si man thaj vi mungro telo predaiv te žrtvuji pe, a ljubav naj man, khanči godova či koristil mande. 4 E ljubav si strpljivo, e ljubav si lači, e ljubav naj zavidno, e ljubav či hvalil pe, či ćerel pe barikani, 5 naj nepristojno, či rodel piro, naj razdražljivo, či pamtil o bilačipe savo ćerda pe lešće, 6 či raduil pe e nepravdaće, a raduil pe e čaćimašće, 7 sa podnosil, nikada či hasarel o paćipe, uvek nadil pe, sa trpil. 8 E ljubav nikada či prestanil. O daro palo proroštvo načela! O daro te ćeren svato ande aver čhibja umuknila! O daro palo džanglipe načela! 9 Kaj, amaro džanglipe si nepotpuno thaj amaro proroštvo si nepotpuno, 10 a kana avela okova so si savršeno, nestanila okova so si nepotpuno. 11 Kana semas čhavro, ćeravas svato sago čhavro, gndivas sago čhavro, sudivas sago čhavro, a kana postanisardem odraslo manuš, odbacisardem okova so sas čhavrkano. 12 Kaj, akana dikhas nejasno sago ande mutno gledala, a askal dikhasa jasno – jakhenca ande jakha. Akana džanav nepotpuno, a askal džanava potpuno, sago kaj sem vi korkoro mande pindardo. 13 Akana ačhen akala trin: o paćipe, e nada thaj e ljubav, a majbari maškar lende si e ljubav.

14 Iskreno roden e ljubav, čeznin pale duhovne darurja, a posebno čeznin palo daro te prorokuin. 2 Kaj, ko ćerel svato aver čhibjenca, či mothol e manušenje, nego e Devlešće. Khonik či haćarel les, kaj e Duhosa mothol e tajne. 3 A ko prorokuil, mothol e manušenje pe izgradnja, ohrabrenje thaj pe uteha. 4 Ko ćerel svato aver čhibjava, izgradil samo korkoro pes, a ko prorokuil izgradil e khandiri. 5 Kamlemas te savora ćeren svato ande aver čhibja, a još majbut te prorokuin, kaj okova savo prorokuil majbaro si katar okova savo ćerel svato ande aver čhibja, osim ako tumačil so phendas te e khandiri šaj izgradil pe. 6 Ako akana me, phralalen, avav tumende thaj ćerav svato ande aver čhibja, sošči korist avela tumen katar godova ako či mothav tumende varesavo otkrivenje, ili spoznaja, ili proroštvo, ili poruka? 7 Isto si vi e instrumentenca save proizvodin zvuko, sago e flauta ili e harfa. Ako či proizvodin jasne tonurja, sar o manuš pindžarela e melodija savi dilaben pe flauta ili pe harfa. 8 Ili ako e truba del nejasno zvuko, ko spremila pe pale bitka? 9 Gajda vi tumen, ako e čhibjava či ćeren jasno

svato, sar džanela pe so mothol pe? Ćerena svato ande balval. 10 Vi čaće, po them si gaći but čhibja, thaj svakone lendar si značenje. 11 Ako či haćarav e čhib okolešči savo mothol mande, askal si godova manuš mande stranco, a vi me sem lešće stranco. 12 Gajda vi tumen, pošto čeznin pale duhovne darurja, čeznin pale godola darurja te obilujin ande okola darurja save izgradin e khandiri. 13 Zato ko ćerel svato ande aver čhib, neka molil pe te šaj tumačil. 14 Kaj, ako moliv man ande aver čhib, mungro duho molil pe, a mungri godi ačhel bi plodosko. 15 So, dakle, te ćerav? Moliva mungre duhosa, ali moliva vi mungre godasa. Dilabava mungre duhosa, ali dilabava vi mungre godasa. 16 Kaj ako zahvalis e Devlešće ćire duhosa, sar vareko ko či haćarel phenela “amin” pe ċiri zahvala kana či džanel so mothos? 17 Tu, doduše, šukar zahvalis, ali okova savo ašunel duhovno či izgradil pe. 18 Zahvaliv e Devlešće kaj ćerav svato ande aver čhibja majbut nego savora tumen. 19 Ali ande khandiri majrado phenav pandž alava mungre godasa, te vi averen sikavav, nego deš milje alava ande aver čhib. 20 Phralalen, na gndin sago čavra, ali aven sago cikne čavra save či džanen palo bilačipe, ali ando način pe savo gndin aven sago već zrele manuša. 21 Ando Zakon ramol: “Akale themešće mothava ande nepoznate čhibja thaj kroz o muj e stranconengo ali ni askal či čhona kan mande”, phenel o Gospod. 22 Gajda, e aver čhibja naj znako pale okola save paćan, nego pale okola save či paćan, a o prorokovanje naj pale okola save či paćan, nego pale okola save paćan. 23 Ako ċidel pe sasti khandiri zajedno thaj savora ćeren svato ande aver čhibja, a del andre vareko savo či haćarel ili okova savo či paćal, či li phenela kaj sen dile? 24 Ali, ako savora prorokuin, pa del andre varesavo manuš savo či paćal ili či haćarel, sa koril les, thaj sa osudil les, 25 e tajne lešće ilešće inklijen po videlo, pa perela pe koča thaj poklonilape e Devlešće thaj phenela: “Čaće si o Del maškar tumende.” 26 So askal trubul te ćeras, phralalen? Kana ċiden tumen, varekas tumendar si hvalospev, varekas si poruka, varekas objava, vareko ćerel svato ande aver čhib, a aver tumačil godova so vareko phendas. Neka sa godova avel pe izgradnja e khandirjaće te duhovno zuravol. 27 Ako vareko ćerel svato ande aver čhibja, neka ćeren svato duj džene majbut trin, jek po jek, thaj neka vareko tumačil so phendine. 28 A ako naj vareko ko tumačil, askal neka či ćerel svato po glaso ande khandiri thaj neka ćerel svato korkoro pešće thaj e Devlešće. 29 A katar e prorokurja, neka mothon duj ili trin džene, a aver neka prosudin okova so phendine. 30 Ali, ako varekašće avrešće ko akate bešel avel o otkrivenje, okova prvo neka ačhel. 31 A savora šaj te prorokuin jek po

jek, te savora aven sikade thaj ohrabrime. **32** E proročke duhurja pokorin pe e prorokonende, **33** kaj o Del naj Del e neredosko, nego e mirosko. Sago kaj si ande sa e khandirja e Devlešće manušenje, **34** e manušnja ande khandirja neka ačhen kaj naj lende muklino te čeren svato. Umesto godova, neka aven podložne, sago vi kaj phenel o Zakono. **35** A ako kamen vareso te sičon, neka čhere phučen pire romen. Kaj džungale si te e manušnji čerel svato ande khandiri. **36** Ili te či tumendar inklijsto o alav e Devlesko? Ili sen tumen jedine dži ke save avilo? **37** Ako vareko gindil kaj si proroko ili kaj si les duhovno daro, trubul te džanel kaj si akava so ramov tumende e Gospodešči zapovest. **38** A ako vareko akava či priznail, ni tumen les na priznajin. **39** Zato, phralalen mungralen, čeznin pale godova te prorokuin thaj na branin te čerel pe svato ande aver čhibja. **40** Samo neka sa avel pristojno thaj uredno.

15 Dav tumen gođi, phralalen, pe Bahtali nevimata, savi tumende propovedisardem, thaj savi prihvatisardine thaj ande savi ačhen ando pačipe, **2** savjava spasina tumen, ako inčaren e Alava save objavisardem tumende, osim ako uzalud pačajine. **3** Kaj po prvo than, predaisardem tumende okova so vi primisardem: kaj o Hristo mulo pale amare bezeha sago kaj ramol ande Svete lila, **4** kaj sas prahome thaj kaj vaskrnisardas po trito đes sago kaj ramol ande Svete lila. **5** Pale godova o Hristo sikadilo e Petrešće, a askal sa e dešduje apostolende. **6** Pale godova katar jekhar sikadilo e phralende, save sas majbut katar pandž šela džene, katar save si majbut lendar još džude, a varesave muline. **7** Askal sikadilo e Jakovešće, a pale godova sa e apostolende. **8** Thaj po krajo sikadilo vi mande, sago majbedno manušešće. **9** Kaj, me sem majcikno maškar e apostolurja thaj naj sem dostojno te akharav man apostol, zato kaj progonivas e Devlešči khandiri. **10** Ali e Devlešće milava sem okova so sem thaj lešči milost prema mande nas uzaludno. Naprotiv, me trudivas man majbut katar savorende lendar – ali na me, nego e Devleši milost manca. **11** Dakle, sa jek si, me ili von, gajda propovedisaras thaj gajda pačajine. **12** Ali ako propovedil pe kaj o Hristo vaskrnisardas andar e mule, sar varesave maškar tumende phenen kaj naj vaskrsenje andar e mule? **13** Ako naj vaskrsenje andar e mule, ni o Hristo či vaskrnisardas. **14** A ako o Hristo či vaskrnisardas, uzalud si amaro propovedanje, uzalud si vi tumaro pačipe. **15** Kaj, ako si čače kaj e mule či vaskrsnin, askal vi amen sikadilam sago hohavne Devlešće svedokurja, zato kaj svedočisardam kaj o Del vaskrnisardas e Hristos, saves či vaskrnisardas. **16** Kaj ako e mule či vaskrsnin,

askal ni o Hristo či vaskrnisardas. **17** A ako o Hristo či vaskrnisardas, uzalud si tumaro pačipe, kaj još uvek sen ande tumare bezeha. **18** Askal si hasarde vi okola save muline ando Hristo. **19** Ako samo pale akava trajo si men nada ando Hristo, majbedne sam katar sa e manuša. **20** Ali, o Hristo čače vaskrnisardas andar e mule, sago prvo katar sa okola save muline thaj savo uštela ando trajo. **21** Kaj pošto o smrto avilo prekal o manuš, vi o vaskrsenje avilo prekal o manuš. **22** Sago kaj ando Adamo savora meren, gajda savora save si ando Hristo džudona andar e mule. **23** Ali, svako prema piro redo: o Hristo vaskrnisardas prvo, a kana vo avela, vaskrsnina vi okola save lešće pripadin. **24** Askal avela o krajo. O Hristo uništila sa e vladaren, sa e vlast thaj svako sila, a askal predaila o Carstvo e Devlešće e Dadešće. **25** Kaj o Hristo moraš te vladil sa dok o Del či čhol sa lešće dušmajen tale lešće pungre. **26** A o poslednjo dušmano savo avela uništite si o smrto. **27** O Sveto lil phenel: “O Del sa čhuta tale lešće pungre.” Kana phenel sa si čhutino tale lešće pungre, jasno si kaj si čhutino sa osim o Del savo sa čhuta tale lešće pungre. **28** A kana sa avela podložime lešće, askal vi o Čhavo korkoro podložila pe Okolešće savo sa podložisardas lešće, te o Del avel sa ande sa. **29** Inače so čeren okola save bolen pe pale mule? Ako e mule čače či vaskrsnin, sostar bolen pe pale lende? **30** Sostar vi amen neprekidno čhos amare trajurja ande opasnost? **31** Phralalen, hav solah pe tumende save sen mungro ponos ando Hristo Isus amaro Gospod, kaj svako đes sem ande smrtno opasnost. **32** Ako samo andar e manuškane razlogurja borisajlem e zverenca ando Efes, so koristil godova mande? Ako e mule či vaskrsnin, “ajde askal te has thaj te pijas, kaj thejara merasa.” **33** Na den te aven hohade: “O bilačo društvo rumol e lačhe navike.” **34** Aven gođate sago kaj trubul thaj na grešin majbut, kaj varesave či džanen palo Del. Akava phenav tumende pe tumaro ladžavo. **35** Ali vareko phučela: “Sar vaskrsnin e mule?” thaj: “Sosko telo avela len?” **36** Bigođavereja! Okova so tu sijos, či džudola ako či merel. **37** Thaj godova so sijos či sijos o telo savo avela, već nango kućin e đivesko ili vareso aver, **38** a o Del del les telo sosko kamel, thaj godova svakone semenošće lesko telo. **39** Naj svako telo isto. Nego aver si e manušengo, aver si e životinjengo telo, aver si e čirkljengo telo, a aver si e mačhengo. **40** Si nebeske tela thaj phuvjače tela, ali o sjajo katar e nebeske tela si aver čhander katar o sjajo e phuvjače telendar. **41** Aver si o sjajo e khamesko, aver sjajo si e čhonutesko, a aver si o sjajo e čerejengo, a e čerain katar e čerain razlikuil pe po sjajo. **42** Gajda si vi e mulenca kana uštena andar e mule. O prahome

telo černjola, ali godova telo vaskrsnila palo trajo savo či propadnila. **43** Sejol pe ando ladžavo, vaskrsnil pe ande slava; sejol pe ande slabost, vaskrsnil pe ande sila, **44** sejol pe prirodno telo, vaskrsnil duhovno. Ako postojil prirodno telo, postojil bi duhovno. **45** Gajda si ramome ando Sveto Lil: "O prvo manuš, o Adam, postanisardas džudi duša", a o poslednjo Adam savo si o Hrist postanisardas duho savo del trajo. **46** Ali, naj prvo o duhovno, nego prirodno, pa askal o duhovno. **47** Prvo manuš si katar e phuv, phuvjako, o aver manuš si katar o nebo. **48** Sa e manušen si phuvjako telo sago e Adame, ali amare nebeske tela avena sago e Hristosko. **49** Thaj sago kaj samas slika e phuvjane manušešči, gajda avas vi slika e nebesko manušešči. **50** A akava tvrdiv tumende, phralalen: o telo thaj o rat našti nasledin e Devlesko carstvo, niti o propadljivo nasledil okova so naj propadljivo. **51** Ake, phenav tumende e tajna: či merasa savora, ali avasa promenime, **52** ande data, ando treno e jakhako, kana ašundola e poslednjo truba. Kaj kana e truba ašundola, askal e mule vaskrsnina e telenca save naj raspadljive, a amen avasa promenime. **53** Trubul, naime, akava propadljivo te lel pe peste nepropadljivo, a akava smrtno telo trubul te lel pe peste besmrtno telo. **54** A kana akava propadljivo telo lela pe peste okova savo naj propadljivo thaj akava smrtno lel pe peste okova besmrtno, askal pherdola e izreka savi si ramome ando Sveto lil: "E pobeda nakhadas, o smrtona." **55** "Smrtona, kaj si čiri pobeda? Smrtona, kaj si čiro žalco?" (Hadēs 986) **56** O žalco e smrtnosko si o bezeh, a e sila e bežehešči si o Zakon. **57** Ali, najs e Devlešče, savo del men pobeda kroz amaro Gospod Isuso Hristo. **58** Zato, drage mungre phral, aven zurale thaj ustrajne, uvek aven pherde e Gospodešče delenca, kaj džanen kaj tumaro trudo naj uzalud ando Gospod.

16 A o dobrovoljno prilog savo čidel pe pale Devlešče manuša, sledin e upute save dijem e khandirjenje ande Galatija. **2** Svako kurko neka svako tumendar odvoil pe rig vareso katar e love save zaradisarda, gajda naj moraš te čidena kana me avava. **3** A kana avava, bičhalava e lilenca e preporuke e manušenje saven tumen izabirina te anen tumaro daro ando Jerusalem. **4** Ako dikhav kaj si potrebno te vi me avav, von avena manca. **5** A tumende avava kana nakhava kroz e Makedonija. Kaj kroz e Makedonija samo nakhav, **6** a tumende možda zadrživa man ili možda čak vi ivendiva, te tumen pomožin mande palo drom kaj god teljarav. **7** Či kamlemas vi akava drom te dikhav tumen samo dok nakhav okotar, nadiv man kaj ačhava varesavi vrjama tumende, ako del o Gospod. **8** Ando Efes ačhava dži ko

prazniko Pandžvardešto des – Pedesetnica, **9** kaj putajli mande bari prilika pale lači buči, a but si okola save protivin pe. **10** Ako o Timotej avel, vodin e briga te avel bi darako dok si maškar tumende kaj vo čerel e Gospodešči buči sago vi me. **11** Zato neka khonikal či potcenil les. Pomognin lešče te džal po drom ando miro thaj aresel dži mande, kaj me ažučarav les te avel zajedno e phralenca. **12** A palo phral Apolos, but nagovorisardem les te avel tumende e phralenca, ali vo nisar či kamlas te avel akana. Ali, avela aver drom kana avela lači prilika. **13** Džungade len sam, čvrsto ačhen ando pačipe, inčaren tumen muški, aven zurale! **14** Sa so čeren neka avel ande ljubav. **15** Tumen džanen pale Stefanesci familija, kaj si von prve save obratisajle ande Ahaja thaj kaj posvetisajle te služin e Devlešče manušenje. Zato moliv tumen, phralalen, **16** te vi tumen aven pokorne kasavende thaj savorende save trudin pe thaj služin lenca. **17** Raduiv man kaj avile o Stefan, o Fortunat thaj o Ahajko kaj von nadoknadisardine mande godova kaj tumen naj sen akate. **18** Von smirisardine mungro duho baš sago vi tumaro. Zato cenin e manušen save si sago von. **19** Pozdravin tumen e khandirja andar e Cikni Azija. But pozdravin tumen ando Gospod o Akila thaj e Priska zajedno e khandirjasa savi čidel pe ande lengo čer. **20** Pozdravin tumen sa e phrala. Pozdravin jek avre ande ljubav. **21** Me, o Pavle, ramov tumende akala pozdrave mungre vastesa. **22** Ako vareko či volil e Gospode, neka avel proketo. Marana ta! (Av Gospode amareja!) **23** E Milost Gospodešči e Isusešči nek avel tumenca. **24** Mungri ljubav tumenca savorencia ando Hristo Isus. Amin.

2 Korinčanende

1 Akava lil ramov me o Pavle, apostoli e Isuse Hristosko pe volja e Devlešči thaj amaro phral o Timotej, e Devlešče khandirjače ando Korinto, thaj sa e Devlešče manušende save si ande sasti Ahaja: **2** Milost thaj miro tumende katar o Del amaro Dad thaj katar o Gospod Isus Hrist. **3** Blagoslovime o Del thaj o Dad amare Gospodesko e Isuse Hristosko, Dad milosrdno, thaj Del kastar si svako uteha. **4** Vo tešil men ande svako amari nevolja, te vi amen, godole utehasa savjava o Del tešil amen, šaj tešisaras sa okolen save si ande nevolja. **5** Kaj, sago kaj si amen but patnja zbog o Hristo, gajda si ando Hristo bari amari uteha. **6** Ako sam ande nevolje, godova si pale tumari uteha thaj pale tumaro spasenje. Ako sam utešime, godova si pale tumari uteha, savi čerel te strpljivo podnosin e patnje save vi amen podnosisaras. **7** A amari nada pale tumende si čvrsto, kaj džanas kaj si tumen ideo sar ande amare patnje gajda vi ande amari uteha. **8** Či kamas, phralalen thaj phejalen, te na džanen pale nevolje save sas amen ande Cikni Azija. Samas preko svako mera, preko svako snaga, opteretime gajda kaj već sas amen dar pale amare trajurja. **9** Hačardam ande amende kaj sam već osudime po smrto, ali sa godova sas te na uzdimen ande amende, nego ando Del savo vaskrsnil e mulen. **10** Vo izbavisarda men andar bari smrtno opasnost thaj majdur izbavila men. Ande leste si amari nada kaj vi majdur izbavila men. **11** A vi tumen aven amende ando pomoć tumare molitvenca. Askal but manuša dena najs e Devlešče pale amende – thaj o Del blagoslovila men zbog e bute molitve. **12** Ponosne sam kaj šaj te phenas ande mirno savest kaj sa so čerdam ando them sas iskreno thaj čisto ileja savo si katar o Del, a posebno prema tumende. Či vodilas men e mudrost akale themešči, nego e Devlešči milost. **13** Kaj, či ramosaras tumende khandi so našti čiton ili te hačaren. A nadv man kaj potpuno hačarena, **14** sago kaj dži varekaj hačardine men, thaj kaj po Đes amare Gospodesko e Isusesko ponosina tumen amenca sago vi amen tumenca. **15** Ande godova uverenje sas man gindo te avav prvo tumende, te primin dvostruko milost. **16** Sas man gindo te svrativ tumende kan džava pe mungro drom ande Makedonija, thaj te palem avav tumende kan boldava man andar e Makedonija, te tumen den man okova so trubul man palo drom ande Judeja. **17** Te či semas možda loće gindosa kana sas man kasavi namera? Ili si man možda namera te sago o manuš ando them, majsigo phenav “ej, gajda si”, a askal “na, naj gajda”? **18** Ali o Del si svedoko kaj amari poruka tumende naj “ej”

thaj “na.” **19** Kaj o Čhavo e Devlesko, o Isuso Hristo, saves me, o Silvan thaj o Timotej propovedisardam tumende nas “ej”, thaj “na”, nego ande leste uvek sas “ej”. **20** Kozom god si e Devlešče obećanja, ande leste si “ej”. Zato kroz leste vi phenas “amin”, e Devlešče pe slava. **21** A o Del si okova savo učvrstil men zajedno tumenca ando Hristo. Vo pomažisarda men **22** thaj čhuta piro pečato ande amende, thaj dija men pire Duho ande amare ile sar garancija kaj pherela pire obećanja. **23** Akharav e Devle palo svedoko kaj phenav tumende čačipe: či avilem tumende ando Korint samo zbog godova kaj či kamlem te ražalostiv tumen gajda te oštro ukoriv tumen. **24** Amen najsam gospodarja tumare paćipašće, nego e saradnikurja tumare bahtaće, kaj čvrsto ačhen ando paćipe.

2 Zato odlučisardem, te na avav tumende te na palem ražalostiv tumen. **2** Kaj, te me tumen žalostiv, ko man bahtarela? Zar okola saven me žalostiv? **3** Zato gajda ramosardem tumende, te kana avav tumende na ražalostin man okola save trubuinessas te bahtaren man, kaj uverime sem kaj vi tumen avena bahtale, ako sem me bahtalo. **4** Kaj, ramosardem tumende akava ande bari tuga, e phađe ileja thaj ande jasva. Ali, na te ražalostin tumen, nego te džanen kozom but voliv tumen. **5** Či preteriva ako phenav kaj okova savo čerda mande bilačipe, či ražalostisardas samo man već vi savoren tumen. **6** Vo si već dovoljno kaznime godoleja kaj but tumendar zbog godova osudisardine les. **7** Zato tumen majradije jartosaren lešće thaj utešin les, te e bari žalost na phadel les. **8** Zato moliv tumen, sikaven lešće kaj još uvek volin les. **9** Zato vi ramosardem tumende te proveriv sošće sen thaj te dikhav dali čhona mande kan ande sa. **10** Kašće tumen vareso jarton, jartov vi me. Kaj, vi me so jartosardem – ako sas vareso te jartolpe – jartosardem zbog tumende, anglo Hristo, **11** te o Satana či nadmudril man. Kaj, džanas lešće bilačhe namere. **12** Kana avilem ande Troada te propovediv e Bahtali nevimata palo Hristo, o Gospod putardas mande o vudar te služiv, **13** ali zurale zabrinisajlem kaj okote či arakhlem mungre phrale e Tito. Zato pozdravisajlem lenca thaj teljardem ande Makedonija. **14** Ali najs e Devlešče, savo uvek čerel te avas pobednikurja ando Hristo, thaj pe svako than prekal amende buljarel o miris džanglimako pale peste. **15** Kaj amen sam e Devlešče, e Hristosko ugodno miris maškar okola save si po drom te spasin pe, sago vi maškar okola save si po drom te propadnin: **16** okolende save si po drom te propadnin godova si o khandipe savo indarel ando meripe, a okolende save si po drom te spasin pe godova si o miris savo indarel ando trajo. Ko si sposobno pale kasavo zadatko? **17** Kaj amen či

trgujis e Devlešće alaveja zbog o dobitko, sago kaj čeren varesave, nego sago okola bičhalde katar o Del, iskreno propovedisaras anglo Del, sago okola save si ando Hristo.

3 Počnisaras li amen palem korkoro amen te preporučisaras? Ili si amende, sago varesavende, potrebne ramome preporuke pale tumende ili tumendar? **2** Tumen sen amaro lil, ramome ande amare ile, save džanen thaj čiton sa e manuša. **3** A očigledno si kaj sen vi tumen e Hristosko lil, sastavime amare službava, ramome na e mastilosa, nego e džude Devlešće Duhosa, na pe barende ploče, nego ande manušende ile. **4** Godova pouzdanje anglo Del si men kroz o Hristo. **5** Na kaj sam amen korkoro amendar sposobne te vareso pale amende tvrdis, nego amari sposobnost si katar o Del. **6** Vo čerda men sposobne te avas sluge e Neve savezsko. Godova naj savez ramome slovo, nego savez e Duhosko. Kaj o ramome slovo inđarel ando smrto, a o Sveto Duho del trajo. **7** Ako e služba e smrtošći, savi si e slovenca uklesime ande bara, sas gači slavno kaj e Izraelcurja našti dičhenas ande Mojsijesko muj, zbog e slava savi načelas lešće mujestar, **8** kozom avela majslavno e služba e Duhošći? **9** Kaj ako sas slavno e služba savi anel osuda, but si majslavno e služba savi anel pravednost. **10** Thaj čače, okova so sas slavno, naj slavno kana uporedil pe e majuzvisime slavava. **11** Ako okova prolazno sas slavno, kozom si majbari e slava savi ačhel pale uvek! **12** Pošto, dakle, si men kasavi nada, čeras svato potpuno slobodno. **13** Amen najsam sago o Mojsije, savo čholas o veo po muj te e Izraelcurja či dičhen godoja prolazno slava. **14** Ali, lenđe gindurja sas phandade, kaj sa dži ađes, o isto veo ačhel kana čitol pe o Purano zaveto. Godova veo vi majdur učarel lenđi godi te na hačaren o čačipe. A godova veo šaj vazdel pe samo ando Hristo. **15** Thaj gajda dži ađesko đes, kana čiton pe e Mojsiješće knjige, o veo ačhel pe lenđe ile. **16** Ali, kana god vareko obratil pe e Gospodešće, o veo uklonil pe. **17** O Gospod si Duho, a kaj god si o Duho e Gospodesko, o okote si e sloboda. **18** Thaj savora amen e mujesa savo naj učardo e velosa održisaras e Gospodešći slava thaj promenisarasa men ande lešći slika – andar e slava ande slava savi avel katar o Gospod savo si Duho.

4 Zato, najsam obeshrabrime, kaj o Del prekal piri milost poverisardas amende akaja služba. **2** Nego, odrekisajlam katar e ladžavne garade buča, či ponaši men lukavo, niti bandaras e Devlešće alava, naprotiv sikavas o čačipe, thaj gajda sa e manuša šaj džanen ande pire ile, sošće sam amen manuša anglo Del. **3** A ako si e Bahtali nevimata

savi propovedisaras, učardi e velosa, učardi si pale okola save si po drom te propadnin. **4** Von či paćan kaj o del akale themesko, korarda lenđi godi, te či dičhen o svetlost e Bahtale nevimataći pale slava e Hristošći, savi si e Devlešći slika. (aiōn g165) **5** Kaj, amen či propovedisaras korkoro amen, nego e Isuse Hristo sago e Gospode, a korkoro amen sago tumare slugen palo Isus. **6** O Del savo phendas: "Neka o svetlost zasvetil andar e tama", zasvetlisarda ande amare ile, te pindžaras e Devlešći slava pe Hristosko muj. **7** Ali akava blago si amen ande phuvjače vasurja, te avel jasno kaj akaja bari snaga avel katar o Del, a na amendar. **8** Katar sa e riga čičiden amen e nevolje, ali najsam phađe. Zbunime sam ali naj sam očajne, **9** progonime sam, ali naj sam mukline, haraven amen, ali či uništin amen. **10** Amen ande amaro telo uvek inđaras e Isusesko meripe, te e Isusesko trajo jasno sikadol pe ande amaro telo. **11** Kaj, amen save sam džude, stalno sam ande smrtno opasnost palo Isus, gajda te e Isusesko trajo jasno sikadol pes pe amare smrtno telurja. **12** Gajda o meripe deluil ande amende, a o trajo ande tumende. **13** A sar si amen isto duho e paćimasko, sago kaj si ramome ando Sveto lil: "Paćajem, zato mothavas", vi amen paćas thaj zato mothas, **14** džanas kaj o Del savo vazdas andar e mule e Gospode Isuse, vazdela andar e mule vi amen, thaj zajedno tumenca čhola amen paše peste. **15** Kaj, sa godova si pale tumende, te e Devlešći milost buljol pe butende, thaj te lenđi zahvalnosti avel izobiljno e Devlešće pe slava. **16** Zato či predaji men. Nego, čak vi ako amare telurja poloče propadin, amaro biće andral obnovil pe svako đes. **17** Kaj amare cikne thaj privremene nevolje pripremin amen pale večno slava savi si obilno majbari katar e nevolje ande save sam. (aiōnios g166) **18** Amen zato či dikhas pe okova so dičhel pe, nego pe okova so či dičhel pe, kaj okova so dičhel pe si privremeno, a okova so či dičhel pe si večno. (aiōnios g166)

5 Džanas, naime, kaj kana haradola amaro šator, so si amaro telo ande savo akana trajisaras akate pe phuv, si amen večno čer katar o Del pe nebesa, savo naj sazidome e manušešće vastesa. (aiōnios g166) **2** Zato vi uzdišisaras thaj čeznisaras ande akava telo te las pe amende amaro nebesko telo. **3** Kaj ako gajda las pe amende, či avasa nandē. **4** Amen, naime, save trajisaras ando šator, uzdišisaras talo pharipe, na zato kaj či kamas majbut te trajis ande leste, već kamas nevo, nebesko telo, savo lasa pe amende prekal akava phuvjako, te o trajo nakhavel okova so si smrtno. **5** A baš pale godova pripremisarda men o Del, savo dija men Duho sago garancija. **6** Uvek sam, dakle, pherde

pouzdanje thaj džanas kaj sam, dok trajisaras ando telo dur e Gospodestar, 7 kaj trajisaras prema o pačipe, a na prema okova so dikhas. 8 Pherde sam pouzdanje thaj majrado muklamas akava telo thaj delamas te trajisaras e Gospodesa. 9 Zato vi trudi men te ugodisaras lešće, bilo te ačas ande akava telo ili te andar leste džastar. 10 Kaj, savora moraš te ačhasa angle Hristosko sudo, te svako dobil e počin prema okova so čerda dok trajilas ando telo, bilo te si lačhe, bilo te si bilačhe. 11 Thaj pošto džanas pale dar e Gospodešči, trudi men te uverisaras e manušen. O Del potpuno pindžarel men, a nadiv man kaj pindžarel amen vi tumari savest. 12 Či preporučis palem korkoro amen, nego das tumen prilika te ponosin tumen amenca, sar avilosas tumen so te mothon okolenđe save ponosin pe okolesa so dičhel pe, a na okolesa so si ando ilo. 13 Kaj, ako najsam dži peste, godova si zbog o Del, a ako sam dži peste godova si zbog tumende. 14 Gajda postupisaras zbog e Hristošči ljubav savi upravit amenca kaj hačardam kaj, ako jek manuš mulo pale sa e manuša askal savora muline. 15 O Hristo mulo pale savorende te okola save, trajin či trajin majbut pešće, nego pale Okova savo pale lende mulo thaj vaskrnisardas. 16 Zato amen katar akana khonikas či pindžaras po telo. Ako e Hriste vi pindžarasas po telo, akana majbut gajda či pindžaras les. 17 Ako si, dakle, vareko ando Hristo, vo si nevo stvorenje. O purano nakhlas, a nevo ake avilo. 18 A sa si katar o Del, savo kroz o Hristo pomirisarda men pesa thaj poverisardas amende e služba palo pomirenje. 19 Kaj o Del ando Hristo pomirisarda e themes pesa thaj e manušenje či dinavel lende prestupurja, a amende dija te propovedisaras e poruka pale godova pomirenje. 20 Amen sam, dakle, e Hristošće poslanikurja – o Del opomenil tumen prekal amende. Ando Hristo molisaras tumen: pomirin tumen e Devlesa! 21 Les, savo či čerda bezeh, o Del zbog amende čerda les žrtva pale amare bezeha, te ande leste avas pravedne anglo Del.

6 Molisaras tumen sago e Hristošće saradnikon čeren buči zajedno e Devlesa, te či primin e Devlešči milost uzalud. 2 Kaj o Del phenel: "Čutem kan tute ande pravo vrjama thaj pomognisardem tuće ando đes palo spasenje." Ake akana si e pravo vrjama! Ake akana si o đes palo spasenje! 3 Trudi men te trajis gajda te khonikas či sablaznis thaj te khonik či arachel zamerka amare bućaće. 4 Nego, ande sa sikavas kaj sam sluge e Devlešće: strpljivo podnosisaras e bare nevolje, čoripe, thaj pharipe, 5 dok marenas men, čhudenas amen ande tamnice, suočisas men e holjariko themesa, čerasas phari buči, e račava či sovasas thaj

samas bokhale. 6 Sikadilam sago e Devlešće sluge ande čistoća, ando džanglipe, ande strpljivost, ando lačhipe, ando Sveto Duho, ande iskreno ljubav, 7 ando čačo alav, ande Devlešči sila, naoružime katar e pravednost palo napad thaj e odbrana. 8 Kasave sam kana slavin men thaj ladžaren men, e lačhe thaj e bilačhe glasosa, smatrin amen sago hohamnen vi ako samo mothas o čačipe. 9 Smatrin amen kaj sam sago okola kaj naj pindžarde, a pindžarde sam, sago kaj meras, a ake trajis, kaznime sam a najsam mudarde. 10 Žalosne sam, a palem uvek sam bahtale, čore sam, a palem buten barvardam, naj amen khanči, a palem sa si amen. 11 Mothas tumende iskreno, manušalen andar o Korinto, širom putardam amaro ilo pale tumende. 12 Amari ljubav pale tumende či nestanisarda, ali tumen phandadine tumaro ilo pale amende. 13 Phenav tumende sago mungre čhavrende: putren amende tumare ile sago kaj amen putardam tumende amare ile. 14 Na udružin tumen okolenca save či pačan. Kaj e pravednost thaj o bezakonje či džan zajedno. E svetlo naj khanči e tamava. 15 Ande soste o Hristo slažol pe e bendeja? Ili so si zajedničko e verniko thaj e neverniko? 16 Thaj so si e Devlešće Hramo e idolenca? Kaj, amen sam hramo e džude Devlesko, sago kaj o Del phendas: "Trajiva lenca thaj phirava maškar lende, thaj me avava lengo Del, a von avena mungro them." 17 Zato: "Inkljen andar lendi sredina thaj odvojin tumen, phenel o Gospod. Pe khanči so si nečisto na čhon tumare vas, thaj me primiva tumen." 18 "Me avava tumaro Dad, a tumen avena mungre čhave thaj čheja, phenel o Gospod savo sa šaj."

7 Pošto, dakle si amen akala obećanja, drage mungre, trubul te šilava men katar sa so meljarel o telo thaj o duho, thaj ande dar e Devlestar trudi men te aven potpuno svete. 2 Čeren than pale amende ande tumare ile! Kaj khonikašće či čerdam nepravda, khonikašće či dijam love te dukhavas varekas, niti varekastar vareso po hohaibe lijam. 3 Či phenav akava te osudiv tumen, kaj cara majsigo phendem kaj sen gači ande amare ile, kaj sam spremne te tumenca meras ili trajisaras. 4 Baro si mungro pouzdanje ande tumende thaj but sem ponosno pe tumende. But utešisardine men thaj pherde sam bah vi ako si amen but nevolje. 5 Kaj kana avilam ande Makedonija, nas amen odmor, nego katar sa e riga sas amen nevolje: avrjal sas amen čingara e manušenca, a andral ande amende sas amen dar. 6 Ali o Del, savo tešil okolen save si ponizne, utešisarda amen gajda kaj avilo o Tit 7 thaj na samo kaj vo avilo, nego o Del utešisarda men vi e utehasa savi tumen dine les. Vo čerda amende svato pale tumari želja te avas tumende, pale tumari bari žalost thaj pale briga savi si tumen

pale mande, godova još majbut bahtarda man. 8 Kaj, vi ako ražalostisardem tumen mungre lileša, naj mande žao. A ako sas mande žao – dikhav, naima, kaj godova lil samo pe harni vrjama ražalostisardas tumen. 9 Akana radujiv man, na zbog godova kaj sen žalosne, nego zato kaj tumari žalost sas pale tumaro pokajanje. Kaj tumari žalostinas avel katar o Del, gajda kaj amen či čerdam tumende khaŋči pe šteta. 10 Kaj e žalost savi avel katar o Del, bijanel pokajanje savo indarel ando spaseenje – o pokajanje palo savo či žalil pe – dok e žalost savi avel akale themestar bijanel žalost savi indarel ando smrto. 11 Dičhen akana sa so andas tumende godoja žalost savi si pe Devlešči volja. Sošči bari želja te odbranin tumari nevinost, sošči holji, sošči dar, sošči želja te dičhen amen, sošči briga thaj želja pale pravedno kazna kolešče savo sagrašisardas! Thaj ande sa sikadine kaj senas vi ande godova nevine. 12 Dakle, vi ako ramosardem tumende, či ramosardem zbog okova savo sagrašisardas, ni zbog okova savešče sagrašisardas, več te sikadol tumari revnost pale amende anglo Del. 13 Godova utešisarda men. A paše godova kaj utešisajlam, još majbut samas bahtale e Titosče bahtasa kaj savora tumen okrepisardine lesko duho. 14 Vi čače, ako hvalisardem tumen angle leste, či lađžajlem zbog godova, kaj sago kaj sa so phendam pale tumende sas čačipe, gajda vi amari pohvala anglo Tito sas čačipe. 15 A lešče osečaja prema tumende si još majzurala kana del pe gođi ke tumari poslušnost thaj sar primisardine les ande dar thaj ando poštupe. 16 Bahtalo sem kaj ande sa šaj pouzdiv man ande tumende.

8 Phralalen thaj phejalen, kamas te džanen, pale Devlešči milost savi si dini e khandirjende ande Makedonija. 2 Kaj vi ako sas iskušime e nevoljenca, lendi bah si bari, thaj lengo baro čoripe pretvorisajlo ande bari darežljivost. 3 Svedoko sem, kaj dobrovoljno dine na samo okova so šaj te den več vi majbut katar godova 4 varekozom drom molisardine men te das len prilika te sudelujin ande godova te čidel pe o dobrovoljno prilog pale Devlešče manuša ando Jerusalim. 5 A denas na samo sar očekuisardam, nego vi korkoro pes dine, prvo e Gospodešče, a askal vi amende pe volja e Devlešči. 6 Zato vi molisardam e Tito te sago kaj majsigo započnisardas, gajda vi završil maškar tumende akaja milosno služba. 7 Zato, sago kaj si tumen sa obilno: pačipe, propovedi, džanglipe, čači želja te pomognin thaj e ljubav prema amende, neka avel tumen obilno vi akaja milosno služba. 8 Či phenav tumende akava sago zapoved, nego dav tumen primer pale revnost averendi te iskušiv tumari ljubav dali si iskreno. 9 Kaj, tumen džanen e milost amare Gospodešči e Isuse Hristošči: vi ako sas

barvalo, zbog tumende postanisardas čoro, te tumen prekal lesko čoripe postanin barvale. 10 Akava si so me gndiv pale godova: pe tumari korist si godova kaj tumen prve počnisardine godoleja, thaj godova na samo delenca nego vi e željava te čeren godova pale Devlešče manuša. 11 Zato akana završin godova delo! Sago kaj senas spremne thaj sar mangline te den, gajda akana spremno dovršin godova delo prema godova kozom si tumen. 12 Kaj, ako sen čače spremne te darujin avren, naj važno kozom šaj te den. O Del očekuil te den okova so si tumen a na okova so naj tumen. 13 Naj amari namera te pale averende avel pomoć okova so pale tumende avilosas pharipe, nego te avel jednakost. 14 Amari namera si te tumaro viško avel pale lendi potreba, te majposle lengo viško avel pale tumari potreba – te avel jednakost, 15 sago kaj ramol ando Sveto lil: “Okova savo čida but nas les previše, niti okova savo čida cara, či falisardas lešče.” 16 Najs e Devlešče kaj kasavi isto briga pale tumende o Del čhuta ande Titosko ilo. 17 Vo či samo prihvatisarda amari molba, nego e bahtasa, katar piri volja, džal tumende. 18 Lesa bičhalas vi ječe phrale saves hvalin pe sa e khandirja zbog godova kaj propovedil e Bahtali nevimata. 19 A na samo godova nego les e khandirja odabirisardine te putujil amenca ande akaja milosno služba savjava slavis e Gospode thaj savjava sikavas amari spremnost te pomognisaras. 20 Gajda las sama te na khonik optužil amen sar postupisaras godole bare darosa savo si amende poverime. 21 Kaj, amen trudi men te čeras okova so si lačhe na samo anglo Gospod, nego vi angle manuša. 22 Lenca bičhalas vi amare phrales savo ande but varesoste thaj but drom potvrdisarda amende piri revnost. Akana si još majbut revno zbog o baro pouzdanje ande tumende. 23 Ako vareko phučel tumen palo Tito, phenen lešče kaj si vo mungro drugari thaj saradniko ande služba pale tumende, a pale amare phrala, von si apostolurja e khandirjende thaj anen slava e Hristošče. 24 Zato sikaven lende kaj volin len, te e khandirja šaj dičhen kaj si amen pravo te ponosi men tumenca.

9 A kana mothol pe pale pomoć e Devlešče manušende ando Jerusalim, naj potreba te ramov tumende. 2 Kaj džanav tumari spremnost te pomognin. Godoleja hvali man angle Makedoncurja gajda kaj phenav: “E manuša andar e Ahaja sas spremno te den pomoć još katar o prošlo brš.” Gajda kaj tumari revnost potaknisardas but aver manušen te počnin te den pomoć. 3 Bičhalav tumende akale phralen, sar avilemas sigurno kaj vi čače sen spremne sago kaj hvalivas man kaj avena. 4 Kaj, amen halamas lađžavo, a na tumen kana manca avilinesas varesave Makedoncurja, pa zateknin

tumen kaj naj sen spremne. 5 Zato gndivas kaj sas potrebno te zamolisaras akale phralen te majsigo amendar džan tumende thaj vodin e briga te tumaro majranije obečime daro avel spremno sago dobrovoljno daro, a na vareso prisilno. 6 A akava upamtin: ko handžvale sijol, handžvale vi čidela, a ko obilno sijol, obilno vi čidela. 7 Neka svako del sar si lešče po ilo, a na žalosno ili zato kaj vareko tradel les, kaj o Del volil kole savo radosno del. 8 A o Del šaj te izlil pe tumende piri obilno svako vrsno milost, te ande sa uvek avel tumen sa dovoljno thaj još te ačhel tumen te čeren svako lačo delo. 9 Sago kaj si ramome ando Sveto lil: "Vo obilno del e čore manuše. Lesko lačhipe ačhel pale uvek." (aiōn g165) 10 O Del savo del e sejače seme thaj mangro palo habe, dela thaj umnožila tumaro seme, thaj čerela te barjol o plodo katar tumari pravednost. 11 Gajda ande sa barvavona te ande svako pogled aven darežljive. Prekal amende tumare darurja potaknina e manušen te den najs e Devlešče. 12 Kaj, akaja služba savi vršin na samo kaj podmiril e potrebe e Devlešče manuše, nego vi obilno prelipe ande but zahvale e Devlešče. 13 Budući kaj akaja služba dokazisajli sago vredno, von slavin e Devle zato kaj pokorno priznajin e Hristošči Bahtali nevimata thaj kaj bare ileja delin tumaro lačhipe lenca thaj savorenca. 14 Von gorljivo molin pale tumende zbog e preobilno milost e Devlešči savi si sikadi pe tumende. 15 Najs e Devlešče pale lesko neopisivo daro!

10 Me, o Pavle, moliv tumen ande Hristošči blagost thaj lačhipe – me, savo sem ponizno kana sem maškar tumende, ali oštro prema tumende kana naj sem tumenca. 2 Moliv tumen, na traden man te, dok sem tumenca, avav gajda oštro sago kaj ažučarav kaj avava maškar varesave tumendar save gndin kaj trajisaras sar o telo kamel prema e telesne želje. 3 Kaj vi ako trajisaras sago e manuša ando telo, či bori men pe kasavo način. 4 Kaj, o oružje saveja amen bori men naj sago e manuško, nego si les e Devlešči snaga te haravel e dušmanošče utvrde. Lesa haravas e manuško mudrovanje, 5 thaj svako oholost savi sprečil te pindžaras e Devle, thaj zarobisaras svako gindimata, te avel poslušno e Hristošče. 6 Thaj spremne sam te kaznis svako neposlušnost, kana tumari poslušnost avela potpuno. 7 Površno dičen! Ako si vareko uverime kaj pripadil e Hristošče, neka palem razmisilil pale akava: sago kaj si vo e Hristosko, gajda sam vi amen. 8 Kaj ako cara majbut vi hvalisajlem amare vlastosa, savi o Gospod dija men pale tumari izgradnja, a na pale tumaro uništenje, či ladžav katar godova. 9 Samo te na gndin kaj kamav te daravav tumen e lilenca. 10 Kaj, varesave phenen: "Lešče

lila si phare thaj snažne, ali kana si akate, slabo si thaj lesko svato si nisosko." 11 Kasavešče neka avel jasno: so phenas ande lila kana sam dur, godova čeras vi kana sam okote tumenca. 12 Amen či usudime te usporedi men varesave manušenca save korkoro pes smatrin kaj si zurale važne, niti čhas amen maškar lende. Von godoleja kaj korkoro maškar pende usporedin pe thaj merin pe sikaven piro dilipe. 13 A amen či kamas te hvali men prekal e mere, nego dži ke mera savi odredisardas amende o Del, a godoja mera si amari buči maškar tumende. 14 Či hvali men previše, sago kaj avilosas te či avilamas tumende, kaj amen avilam tumende e Bahtale nevimatasa. 15 Či hvali men prekal e mera, niti averende bučava, nego nadi men kaj godoleja barjola tumaro pačipe thaj amari buči maškar tumende buljola. 16 Gajda pe godova način šaj te propovedisaras e Bahtali nevimata vi majdur katar tumare granice, či kamas te hvali men okoleja so si već čerdo pe averengo područje. 17 Nego sago kaj si ramome ando Sveto lil: "Ko kamel te hvalil pe, e Gospodeja neka hvalil pe." 18 Kaj, naj lačo okova savo korkoro pes preporučil, nego okova saves o Gospod preporučil.

11 Kana samo cara šaj trpisardinesas mungro dilipe! Ali, već trpin man. 2 Ljubomorno sem pe tumende sago kaj si o Del ljubomorno, kaj verisardem tumen ječe romesa, e Hristosa, te anav tumen angle leste sago čisto nevino čhej. 3 Ali, sar o sap ande piro lukavstvo hohada e Eva, gajda darav te vi tumare gindurja či bolden pe katar e čači thaj čisto odanost e Hristošče. 4 Tumen lačhe podnosin kana vareko avel thaj propovedil tumende aver Isuse, saves amen či propovedisardam tumende. Thaj spremne primin e duho, savo razlikuil pe katar o Duho save primisardine, thaj e Bahtali nevimata, savi si averčhandi katar okoja savi primisardine. 5 Smatriv kaj naj sem ni ande soste majcikno katar godola "nadapostolurja." 6 Ako sem nevešto ando svato, naj sem ando džanglipe, a godova vi sikadam tumende ande sa. 7 Zar čerdem bezeh kana korkoro man ponizisardem, te tumen avilinesas uzvisime kana ivja propovedisardem tumende e Devlešči Bahtali nevimata. 8 Katar aver khandirja lavas počin te šaj služivas tumende. 9 A kana semas tumende thaj semas ande oskudica, khonikašče naj semas po tereto, kaj mungre potrebe podmirisardine e phrala save aviline andar e Makedonija. Sago kaj dži akana lavas sama pe mande, gajda lava sama vi katar akana te na avav tumende ni ande soste po tereto. 10 Sigurno, sago kaj si sigurno e Hristosko čačipe ande mande, khonik či sprečila man te hvali man pe sasti Ahaja! 11 Sostar? Zbog godova kaj či voliv tumen? O Del džanel kaj voliv tumen! 12 A

godova so čerav, čerava vi majdur, te na dav prilika okolende save rodel lat te hvalinpe kaj si jednake amenca. **13** Kasave manuša si hohamne apostolurja, nepoštene radnikurja save čeren pe kaj si e Hristošće apostolurja. **14** A naj ni čudo, kaj vi o Satana čerel pe kaj si anđelo e svetlosko. **15** Isto gajda naj khanči neobično kaj lešće sluge čeren pe kaj si sluge e pravdače. Ali po krajo dobina pravednost savi zaslužisardine kroz pire dela. **16** Palem phenava: neka khonik či inčarel man kaj sem bigodako. Ali ako ipak inčaren kaj sem kasavo, prihvatin man makar vi sago bigodače manušes te vi me cara hvaliv man. **17** Ande akava mungro samouvereno hvalipe či čerav svato sago kaj o Gospod čerdasas svato, nego sago nerazumno manuš. **18** Pošto but hvalin pe sago kaj godova čerel o them, hvaliva man vi me. **19** Kaj, tumen rado podnosin e nerazumne manušen, tumen save sen mudre! **20** Vi čače, tumen podnosin ako vareko čerel tumen roburja, ako iskoristil tumen, ako otmil tumendar so si tumen, ako pe tumende dičhen opral, ako den tumen dab e palmenca po muj. **21** E ladžaveja moraš te phenav: amen samas slabe pale godova! Ali sova god vareko aver tromal te hvalil pe, sago bigodako manuš phenav, tromav vi me! **22** Da li si von Židovurja? Vi me sem! Da li si von Izraelcurja? Vi me sem! Da li si von e Avraamešće potomkurja? Vi me sem! **23** Da li si von e Hristošće sluge? Sago dilo manuš mothav: me sem još majbut! Majbut čeravas buči, majbut semas ande tamnice, majzurale semas mardo, majčesto semas ande smrtno opasnost. **24** Pandž drom katar e Židovurja dobisardem trijanda thajinja dab e bičosa. **25** Trin drom semas e rovljasa mardo, jekhar čhudenas bara pe mande, trin drom doživisardem brodolom thaj jek rjat thaj jek des semas ando paj ando more. **26** Često džavas po drom, semas ande opasnost katar e reke, ande opasnost katar e razbojnikurja, ande opasnost katar mungro vlastito them, ande opasnost katar okola save či pindžaren e Devle, ande opasnost ando gav, ande opasnost ande pustinja, ande opasnost po more thaj ando opasnost katar hohavne phrala. **27** Trudivas man thaj mučivas man, but data či sutem, semas bokhalo thaj trušalo kaj nas man so te hav, sas mande odviše šil thaj sas slabo drze pe mande. **28** A paše sa aver stvarja, svako des mučil man e briga pale sa e khandirja. **29** Kana si vareko slabo, vi me hačarav man slabo, kana vareko perel ando bezeh, mande si pharo pale leste. **30** Ako trubul te hvaliv man, hvaliva man okoleja so sikavel mungri slabost. **31** A o Del o Dad amare Gospodesko e Isusesko, savo si blagoslovime dži ko veko, džanel kaj či hohavav. **(aiōn g165)** **32** Ando Damask o upravniko e carosko o Arete, čhuta straža po gav te astarel man, **33** ali kroz e pendžera

mukline man tele ande korpa prekal e gavešće zidine, thaj našlem andar lešće vas.

12 Thaj nastaviva te hvalima, vi ako naj katar godova nisošči korist. Phenava tumende varesave viđenja thaj objave katar o Gospod: **2** Džanav manušes ando Hristo savo majsigo katar dešuštar brš sas vazdino dži ko trito nebo – da li ando telo ili avrjal o telo, či džanav, o Del džanel. **3** Thaj džanav pale godova manuš – da li ando telo, ili avrjal o telo, či džanav, o Del džanel – **4** sas vazdino ando rajo thaj ašundas e alava save naši phenen pe thaj save o manuš či tromal te mothol. **5** Godole manušeja hvali man, a korkoro manca či kamav te hvali man, osim ande mungri slabost. **6** A vi kana kamlemas te hvali man, či avilemas nerazumno, kaj phendemas o čači. Ali či kamav te hvali man kaj či kamav te vareko gindil kaj sem majlačho nego so sikadilem ande alava thaj ande dela. **7** A te na uzoholima zbog e but objave, dino sas mande o kangro ando telo, e Sotonesko anđelo, te mučil man, te na uzoholima. **8** Trin drom molisardem e Gospode, te lel mandar godova, **9** a vo phendas mande: "Dosta si tuče mungri milost, kaj mungri snaga majlačhe dičhol kana san slabo." Zato majrado hvaliva man ande mungre slabosti, te e Hristošči snaga ačhel ande mande. **10** Zato, zbog o Hristo, radiuv man kana sem slabo, kana vředon man, kana sem ande nevolje, kana progonin man, kana si mande pharo. Kaj kana sem slabo, askal sem zuralo. **11** Čeravas svato sago kaj sem dilo, ali tumen tradine man pe godova. Tumen trubuinesas te aven okola save hvalin man, kaj naj sem ni cara majgoro katar godola "bare apostolurja", vi ako naj sem khanči. **12** E znakurja save dokažin mungro apostolstvo si: e čudesne znakurja, e čudesa thaj silne dela, čerde maškar tumende uz baro strpljenje. **13** Pa ande soste godova askal majgore postupisardem prema tumende nego prema aver khandirja, osim kaj naj semas tumende po tereto? Jarton mande pale godova! **14** Ake, spremno sem te trito drom avav tumende thaj či avava tumende po tereto kaj me či rodav tumare love, nego tumen. E čavra naj udžile te steknin pale pire dada thaj deja, nego e dada thaj e deja pale pire čavra. **15** A me majrado potrošiva sa so si man thaj korkoro dav man pale tumare duše. Ako me gadiči but voliv tumen, zar tumen majcara volina man? **16** Ali, neka vi avel gajda – naj semas tumende po tereto nego lukavo sago kaj sem, astardem tumen po hohaip. **17** Da li iskoristisardem tumen prekal varekaste katar okola saven bičaldem tumende? **18** Zamolisardem e Tito te posetil tumen thaj lesa bičaldem još ječe phrales. Da li o Tit iskoristisardas tumen? Či,

kaj amen sam katar isto Duho, thaj phiras iste stopenca gajda kaj ćeras isto. 19 Tumen sigurno gndin kaj amen sasti vrjama angle tumende brani men. Anglo Del ando Hristo phenas tumende: sa si godova, drage mungralen, pale tumari izgradnja. 20 Kaj, darav kana avava, kaj arakhava tumen kaj sen averćhande, nego kaj kamlemas thaj kaj tumen araćhena man kaj sem averćhande, nego kaj kamline sas. Darav kaj mařkar tumende avela ćingara, ljubomora, holji, sebićne prepirke, klevetanje, ogovaranja, oholost thaj nered. 21 Ći kamlemas kana palem avava, te mungro Del ponizil man angle tumende, thaj te oźalostil man zbog e bute okola save majsigo zgreřisardine, a Ći pokajisajle pale piri nećistoća, seksualno bezah thaj e ladźava save ćerdine.

13 Akava si trito drom sar avav tumende. Ando Sveto lil si ramome: "Svako optuźba morař e temeljil pe po svedoćanstvo duje ili trine svedokonengo." 2 Već upozorisardem tumen kana semas tumende dujto drom. Akana, odsutno, majanglal upozoriv okolen save majranije greřinas thaj sa avren: kana palem avava tumende, Ći řtediva tumen. 3 Kaj, tumen roden dokaz kaj kroz mande ćerel svato o Hristo. Vo prema tumende naj slabo, nego si silno mařkar tumende. 4 Doduře, sas razapnime ande slabost, ali akana trajil e Devleřće silava. Gajda sam vi amen slabe ande leste, ali trajisarasa lesa e Devleřće silava pale tumende. 5 Phućen tumen korkoro: da li sen ando paćipe. Proverin korkoro tumen! Zar Ći haćaren kaj o Isuso Hristo si ande tumende? Ako na askal Ći nakhline o ispit. 6 Ipak nadi man kaj haćaren kaj amen nakhlam o ispit. 7 Moli men e Devleřće te na ćeren nisosko bilaćhipe. Ći ćeras godova te sikavel pe kaj sam amen ando pravo, nego te tumen ćeren okova so si laće, pa makar vi ćinisajlo kaj naj sam ando pravo. 8 Kaj, protiv o ćaćipe nařti ćeras khanći, nego samo palo ćaćipe. 9 Bahtale sam kana sam amen slabe, a tumen zurale. Thaj moli men te aven joř majsavrřene. 10 Zato vi ramov tumende akava dok sem dur tumendar, te naj morař te avav strogo prema tumende kana avava okote. Kaj o Gospod dija man vlast te izgradiv tumen, a na te haravav tumen. 11 Po krajo, phralalen thaj phejalen, raduin tumen, usavrřin tumen, ohrabrin tumen, aven sloźne, trajin ando miro, thaj o Del savo si ljubav thaj miro, avela tumenca. 12 Pozdravin jek avres ande ljubav. 13 Pozdravin tumen sa e Devleřće manuša. 14 E milost e Gospodeřći e Isuse Hristořći, thaj e ljubav e Devleřći thaj o zajedniřtvo e Sveto Duhosko nek avel savorenca tumenca!

Galaćanende

1 Akava lil ramov me, o Pavle, akhardo palo apostol, na e manušendar, niti čutino katar e manuša, nego čutino katar o Isus Hristo thaj katar o Del amaro Dad, savo vazda e Isuse andar e mule. **2** Zajedno e vernikonenca save si manca, pozdraviv e khandirjen ande Galatija: **3** Milost thaj miro tumende katar o Del amaro Dad thaj e Gospodestar e Isuse Hristostar, **4** savo dija korkoro pes pale amare bezeha, te izbavil amen katar akava bilačo them ande savo trajisaras, pe volja e Devlešči, amare Dadešči, (aiōn g165) **5** savešče slava pale uvek. Amin. (aiōn g165) **6** Čudiv man sar gajda sigo boldine tumen katar o Del savo akharda tumen kroz e Hristošči milost thaj pačaine ande varesavi aver Bahtali nevimata. **7** Vi ako aver Bahtali nevimata naj, si varesave save anen nemir maškar tumende thaj kamen te bandaren e Hristošči Bahtali nevimata. **8** Ali, te amen, ili o andelo andar o nebo propovedisaras tumende aver Bahtali nevimata katar okoja savi amen propovedisardam tumende, neka avel prokledo! **9** Sago kaj već phendami tumende, thaj akana palem phenav: ako vareko propovedil tumende Bahtali nevimata savi si aver čhände katar okoja savi već prihvatisardine, neka avel prokledo. **10** Dali me akana kamav te dopadniv man e manušende ili e Devlešče? Ili trudi man te ugodiv e manušende? Te još e manušende ugodiv, či avilemas sluga e Hristosko. **11** Kamav te džanen, phralalen, kaj e Bahtali nevimata savi propovedisardem tumende naj e manušendar. **12** Kaj me či primisardem lat katar varesosko manuš, niti vareko sikada man, nego objavisarda mande o Isuso Hristo. **13** Ašundine sosko sas mungro trajo varekana ande židovsko pačipe, kaj prekal svako mera progonivas e Devlešči khandiri thaj kamavas te uništiv lat. **14** Ande židovsko pačipe semas majnapredno katar but okola save sas andar mungri generacija thaj andar mungro them, kaj prekal svako mera revno inčaravas o sikavipe mungre pradžengo. **15** Ali kana svidosajlo Okolešče, savo losarda man još katar mungro bijandipe, thaj akharda pire milava **16** te objavil mande pire Čaves te propovediv les maškar okola save naj Židovurja – khonikasa či savetuisajlem, **17** niti đelem ando Jerusalem ke okola save sas majsigo mandar apostolurja, nego odma đelem ande Arabija, thaj palem bolde man ando Damask. **18** Askal, posle trin brš, đelem ando Jerusalem te pindžarav e Petre, thaj ačhilem leste dešupandž đes. **19** Aver apostolen či dikhlem, osim e Jakove, e Gospodešče phrales. **20** (Anglo Del phenav: akava so ramov naj hohaibe.) **21** A pale godova đelem ande Sirija thaj ande Kilikija. **22** A još naj semas lično pindžardo

ande Hristošče khandirja ande Judeja. **23** Samo ašundine: “Okova savo varekana progonilas men akana propovedil o pačipe savo varekana kamelas te uništil.” **24** Thaj slavinas e Devle zbog amende.

2 Askal posle dešuštar brš, palem đelem ando Jerusalem e Varnavava, a indardem manca vi e Titos. **2** Đelem okote kaj o Del sikadas mande kaj trubul te džav. Posebno okolende save sas e khandirjače vođe, phendem e Bahtali nevimata savi propovediv maškar okola save naj Židovurja. Kamlem te avav sigurno kaj von godoleja složinpe te či avel kaj trudiman ili kaj trudisajlem ivja. **3** Ali ni o Tit, savo sas manca, vi ako nas židovo, nas tradino te obrežilpe. **4** A sa godova sas zbog e hohamne phral, save čordane crdine pe maškar amende te špijunirin amari sloboda savi si amen ando Hristo Isus, thaj te čeren amen te avas roburja. **5** Ali amen ni po trenutko či pokorisajlam lende, te šaj o čačipe e Bahtale nevimatako ačhel čvrsto maškar tumende. **6** A okola manuša save smatrinpe e Khandirjače vođe, khandi či nadodaisardine e porukače savi propovediv. Mande nas važno godova kaj si von vođe, kaj o Del či dičhel ko si ko. **7** Naprotiv dikhline kaj si mande poverime te propovediv e Bahtali nevimata maškar okola save naj Židovurja baš sago e Petrešče te propovedil e Židovende. **8** Kaj, o Del osposobisarda e Petre te avel apostol maškar e Židovurja, a isto godova Del osposobisardas man te avav apostol maškar okola save naj Židovurja. **9** Kana o Jakov, o Petar thaj o Jovano, pale save smatrilaspe kaj si stuburja e khandirjače, priznaisardine e milost savi o Del dija man, dine piro desno vas e Varnavašče thaj mande sago znako pale saradnja. Složisajle te amen džas te propovedis maškar okola save naj Židovurja a von e Židovende. **10** Samo molisardine amen te na bistras te pomožisaras e čorende maškar e Židovurja, sago kaj vi korkoro kamlem te čerav. **11** A kana avilo o Petar ande Antiohija, me angle savorende suprostavisajlem lešče kaj zaslužisardas e osuda. **12** Kaj, majsigo nego so varesave aviline katar o Jakov, o Petar halas okolenca kaj nas Židovurja. A kana akala aresline, vo crda pe thaj odvojisajlo katar okola save nas Židovurja, kaj darajlo katar e obrezime vernikurja. **13** Thaj vi aver Židovurja pridružisajle lešče ande lesko licemerstvo. Čak vi o Varnava sas hohado lende licemerstvosa. **14** A kana dikhlem kaj či ponašinpe prema o čačipe e Bahtale nevimatako, phendem e Petrešče angle savorende: “Ako tu, savo san Židovo, trajis thaj inčares e običaja oklende save naj Židovurja, sostar askal trades okolen save naj Židovurja te trajin sago Židovurja?” **15** Amen save sam bijande sago Židovurja thaj či pripadis

okolende save naj Židovurja saven smatris kaj si bezehale, 16 džanas kaj o manuš či postanil pravedno anglo Del gajda kaj inčarel e Mojsijesko Zakon, nego samo pire pačimava ando Isuso Hristo. Zato vi amen pačajam ando Hristo Isus, te avas opravgdime anglo Del palo pačipe ando Hristo, a na kaj inčaras o Zakon, kaj godoleja kaj inčaras o Zakon khonik či opravgdila pes. 17 Ali, ako amen save rodas te avas opravgdime ando Hristo, sikadivas sago "bezehale", dali značil godova kaj o Hristo služil e bezehešče? Nisar! 18 Kaj, ako palem zidov okova so haradem, dokaživ kaj sem okova savo prekršil o Zakon. 19 Čače, me mulem e Zakonešče kaj o Zakon mudarda man, te trajiv palo Del. Godoleja kamav te phenav kaj sem razapnime e Hristosa. 20 Zato či trajiv majbut me, nego o Hristo trajil ande mande. A o trajo savo me akana trajiv ando telo, trajiv e pačipasa ando Čhavo e Devlesko, savo zavolisarda man thaj dijas piro trajo pale mande. 21 Či odbaciv e Devlešči milost, kaj te o Zakon šaj opravgdila men anglo Del, askal o Hristo ivja mulo.

3 O tumen nerazumne Galačaja! Ko hohada tumen? Gajda jasno mothodem tumende pale godova sar sas o Isus Hrist razapnime sago kaj vareko naslikosardas angle tumare jakha. 2 Samo akava kamav te džanav tumendar: dali e Sveto Duho primisardine zato kaj čeren e dela e Zakonešče ili zato kaj ašundine e Bahtali nevimata thaj pačajine ande late? 3 Zar sen gači nerazumne? Počnisadine ando Duho, a akana završin ando telo? 4 Zar ivja gači godova nakhline? Osim te vi čače nas ivja! 5 Da li, dakle, Okova savo del tumen Sveto Duho thaj čerel čudurja maškar tumende, čerel godova zato kaj čeren e dela e Zakonešče ili zato kaj ašundine e Bahtali nevimata thaj pačajine ande late? 6 Dičhen e Avraame: "Vo pačaja e Devlešče thaj godova đinada pe lešče ande pravednost." 7 Hačaren, dakle: okola save pačan, godola si e Avraamešče čhave. 8 A o Sveto Lil predvidisarda kaj o Del, okolen kaj naj Židovurja čerela pravedne zbog o pačipe, pa gajda e Avraamešče sas e Bahtali nevimata majanglal mothodi: "Prekal tute avela blagoslovime sa e thema." 9 Gajda si zajedno Avraameja, e pačivale manušesa, blagoslovime sa okola save pačan. 10 A okola save uzdinpe ande dela e Zakonešče, talo proklestvo si. Kaj ramome si ando Sveto Lil: "Neka si prokleto svako savo či inčarel istraino sa so si ramome ando Lil e zakonesko." 11 A jasno si kaj khonik našti postanil pravedno anglo Del godoleja kaj inčarel o Zakono, kaj ramome si ando Sveto Lil: "O pravedno manuš trajila katar o pačipe." 12 A o Zakon či avel katar o pačipe, nego: "O manuš savo inčarel o Zakon ande leste arachela trajo." 13 O Hrist otkupisarda

men katar o proklestvo e zakonesko gajda kaj zbog amende postanisardas proklestvo. Kaj ramome si ando Sveto Lil: "Neka si prokleto svako savo visil po kaš." 14 Godova čerda te okola save naj Židovurja primin e Avraamesko blagoslov ando Hristo Isus, thaj te kroz o pačipe primis e Duhos saves o Del obečisarda. 15 Phralalen, dav tumen primer andar svako đeseko trajo: kana e manuša maškar pende čeren savez savo si overime, khonik našti poništil godova savez, niti vareso te nadodail. Gajda si vi akale savezosa. 16 A o Del dija e obečanja e Avraamešče thaj lešče potomkošče. O Sveto Lil či phenel: "thaj e potomkonende", sago bute dženenende, nego ječe manušešče, lešče potomkošče, a godova si o Hristo. 17 Akava kamav te phenav: O Zakon, savo avilo štar šela thaj trijanda brš majkasnije, či phadel o overime savez savo o Del majranije potvrdisarda thaj či čhinel o obečanje. 18 Kaj ako o nasledstvo dobil pe zato kaj inčarelpe o Zakono, askal či dobil pe kroz o obečanje, a o Del milostivo dijas o nasledstvo kroz o obečanje e Avraamešče. 19 Sošče, askal služil o Zakon? Dodaime si te sikavel so si prestup, dok či avel e Avraamesko potomko kašče si o obečanje dino. O Zakono andine e andelurja, prekal o Mojsije sago posredniko. 20 A posredniko či trubul kaj si samo jek rig, a o Del si jek. 21 Dakle, dali si o Zakono protivno okolešče so o Del obečisarda? Nisar! Kaj, te avilosas dino o zakon gajda te šaj del trajo, askal o manuš šaj avilosas opravgdime gajda kaj inčarel o Zakon. 22 Ali, o Sveto Lil sa e manušen phandadas talo bezeh, te okola save pačan ando Isuso Hristo, kroz leste vi primin okova so si obečime. 23 A majsigo nego so avilo o pačipe, samas phangle talo Zakono, arakhade palo pačipe savo tek trubuja te avel sikado. 24 Gajda o Zakono lelas sama pe amende dok či avilo o Hristo, te šaj avas opravgdime kroz o pačipe. 25 A akana, kana avilo o pačipe, majbut najsam talo čuvari savo si o Zakon. 26 Kroz o pačipe ando Hrist Isus, savora sen čhave e Devlešče. 27 Kaj, savora tumen save ando Hristo sen bolde, e Hristo line pe tumende. 28 Naj majbut razlike maškar okova savo si Židovo niti okova savo naj Židovo, robo niti slobodno manuš, muško niti žensko, kaj sen savora jek ando Hrist Isus. 29 A ako pripadin e Hristošče, askal sen e Avraamesko potomstvo thaj nasledina o obečanje savo o Del dija les.

4 Akava kamav te phenav: sa dok si o nasledniko čhavo, či razlikuil pe katar o robo, vi ako si gospodari pe sa. 2 Vo si tale okola save len sama pe leste thaj tale upravnikurja, sa dži ke vrjama savi odredisardas lesko dad. 3 Gajda samas vi amen, dok samas cikne čhavra, samas roburja e duhovne silende akale themešče, 4 a kana avili e pravo vrjama, o Del

bičhalda pire Čhaves saves bijanda e manušnji. Vo trajilas talo Zakon, 5 sar o Čhavo šaj čindasas okolen save si talo Zakono, thaj postanis e Devlešće čhaves. 6 A pošto sen lešće čhavra, o Del bičhaldas ande tumare ile pire Čhavesće Duho, savo čhol muj: "Abba Dade!" 7 Gajda majbut naj san robo, nego čhavo, a ako san čhavo, askal o Del čerda tut te aves lesko nasledniko. 8 Majsigo kana či pindžarenas e Devle, robuinas e devlende save ni naj prave. 9 A akana, kana pindžaren e Devle – ili majlače phendo: akana, kana o Del pindžarel tumen – sar godova kaj palem bolden tumen e slabe thaj bedne silende thaj palem kamen te robuin lende? 10 Tumen slavin e đesa, e čhona, e vrjama thaj e brša. 11 Darav pale tumende – te či možda ivja trudisajlem oko tumende. 12 Moliv tumen, phralalen, aven sago me, kaj vi me postanisardem sago tumen, zato kaj naj sem majbut talo Zakon. Khanči bilače či čerdine mande. 13 Džanen kaj prvo data propovedisardem tumende e Bahtali nevimata zbog godova kaj semas nasvalo. 14 Vi ako sas tumende mungro nasvalipe po tereto, či prezirisardine man niti odbacisardine man, nego primisardine man sago e Devlešće andelo, sago e Hristo Isuse. 15 Kaj si akana tumari naklonost prema mande? Daman godi kaj askal pherdine sas sa pale mande te šaj tumare jakha inkaldinesas thaj dinesas len mande. 16 Dali postanisardem tumaro dušmano kaj mothavas tumende o čačipe? 17 Okola aver manuša zurale kamline te pridobin tumen pale peste, ali na pale tumaro lačhipe. Von kamen te crden tumen mandar, te sledin samo len. 18 Lače si uvek te vareko interesujilpe pale tumende, ali samo ako si godova ande lači namera, a na samo dok sem me maškar tumende, 19 čhavralen mungralen, saven palem ande muke bijanav, sa dži kaj god ande tumende či dičhol o Hristo. 20 Volisardemas te akana avav tumenca, thaj averčhände čerav tumenca svato, kaj či džanav so te čerav tumenca. 21 Phenen mande, tumen save kamen te aven talo Zakon: zar či ašunen so o Zakon phenel? 22 A ramome si ando Sveto lil kaj e Avraame sas duj čhaves: ječe katar e ropkinja a avres katar e slobodno manušnji. 23 Ali, okova savo sas bijando katar e ropkinja sas bijando sago sa e manuša, a okova savo sas bijando katar e slobodno manušnji sas bijando po obećanje e Devlesko. 24 Akava si phendo ande slike, kaj godola duj manušnja prestavin duj savezurja. Jek si katar e Sinajsko gora thaj bijanel e čhavren palo robstvo – godova si e Agara. 25 A e Agara prestavil e Sinajsko gora ande Arabija, savi si sago ađes o Jerusalim, kaj robujil zajedno pire čhavrenca. 26 Ali, okova Jerusalim savo si po nebo, slobodno si – vo si amari dej. Kaj, si ramome ando sveto Lil: 27 "Radui tut, manušnjije savi našti bijanes, čo

muj zurale thaj e bahtasa, tu savi či džanes pale dukha save si e manušnja kana bijanel. Kaj majbut čhavra si okola savi si korkoro nego okola savja si rom." 28 A tumen sen, phralalen, sago o Isak, čhaves save si obećime. 29 Thaj sago kaj sas ande okoja vrjama okova savo sas bijando sago sa e manuša progonilas okole savo si bijando e Devlešće Duhosa. Gajda si vi akana. 30 Ali so ramol ando Sveto lil? "Trade e ropkinja thaj lače čhaves, kaj o čhavo e ropkinjako či avela nasledniko zajedno e slobodne manušnjače čhavesa." 31 Gajda, phralalen, najsam čhavra e ropkinjače nego okolače savi si slobodno.

5 O Hrist oslobodisarda men te trajisaras ande sloboda. Zato čvrsto ačhen thaj na čhon tumen palem talo ropsko jarmo. 2 Ake, me, o Pavle, phenav tumende: ako obrežin tumen, o Hristo či avela tumende katar nisošči korist. 3 Thaj palem upozoriv svako manuše savo obrežilpe, dužno si te inčarel sa o Zakon. 4 Odvojisardine tumen katar o Hristo, tumen save kamen anglo Del te opravdin tumen e Zakoneja thaj hasardine gajda e Devlešči milost. 5 Ali amen kroz o Duho ažućaras te primis sa so si obećime amende, o opravdanje anglo Del prekal o pačipe. 6 Kaj, ando Hristo Isus či mol ni o obrezanje ni o neobrezanje, nego o pačipe savo sikadol kroz e ljubav. 7 Lači trka prastajine. Ko sprečisarda tumen te na majbut pokorin tumen e čačimašće? 8 Kasavo uverenje naj katar Okova savo akharda tumen. 9 Sago kaj phenel pe: "Katar cara kvasco sa o humer šukljol." 10 Me sem uverime pale tumende ando Gospod kaj či gndina averčhände. A okova savo zbulil tumen, avela kaznime, ma ko te vo avel. 11 Ako me, phralalen, vi majdur propovediv kaj o manuš trubul te avel obrezime, sostar sem vi majdur progonime? Te me godova vi čače propovediv, askal mungre sikavipešće palo trušul khonik či protivisajlosas. 12 Volisardemas te godola save tumen uznemirin, korkoro pes osakatin tele. 13 Tumen sen akharde pe sloboda, phralalen. Samo, na te tumari sloboda avel izgovor te udovoljin tumare bezahale željende save aven katar tumaro telo. Umesto godova, ande ljubav služin jek avrešće. 14 Kaj, o sasto Zakono si sadržime ande jek izreka: "Volí čire pašutne sago korkoro tut." 15 Ali, te maškar tumende jek avres dindalen thaj han, dičhen te na uništín jek avres. 16 Kamav te phenav: trajin ando Sveto Duho, pa či udovoljina tumare telošće e požudne željenca. 17 Kaj o telo džal protiv o Duho, a o Duho protiv o telo. Kaj, godola duj jek avrešće protivin pe thaj či čeren okova so kamen. 18 Ali te o Duho vodil tumen, naj sen talo Zakon. 19 A e dela e bezahale telošće si pindžarde. Godova si o bludo, nečistota, rumome

trajo, 20 idolopoklonstvo, drabaripe, neprijateljstvo, čingara, ljubomora, srdžba, spletke, razdor, podele, 21 zavist, matipe, bilače veselja, thaj akalešče slično. Upozoriv tumen, sago kaj več vi upozorivas tumen, okola save gajda vareso čeren či nasledina e Devlesko carstvo. 22 A o plodo e Duhosko si e ljubav, bah, miro, strpljivost, ljubaznost, lačhipe, vernost, 23 krotkost thaj uzdržljivost. Protiv akava naj zakon. 24 Okola save pripadin e Hristo Isusešče razapnisardine piri bezehali telesno narav zajedno e bilače željenca thaj e požudenca. 25 Ako trajisaras ando Duho, askal o Duho neka vodil men! 26 Na aven barikane, na izazivin jek avres thaj na aven zavidne jek avrešče.

6 Phralalen, ako vareko vi arakhadol ande varesavo prestup, tumen save sen vodime e Sveto Duhosa crden les te palem boldel pes po pravo drom, ali čeren godova ando duho blagosti. Samo letu sama te vi tu či peres ando iskušnje. 2 Inđaren o pharipe jek avresko, thaj gajda pherena e Hristosko zakon. 3 Kaj ako vareko gindil kaj si vareso a naj khanči – korkoro pes hohavel. 4 A svako nek preispituil piro ponašanje. Askal šaj te avel ponosno pe peste, a te či usporedil pes averenca. 5 Kaj svako trubul te inđarel e odgovornost pale okova so čerel. 6 Okova savo si sikado katar e Devlešče alava, neka delil sa piro lačhipe okolesa savo sikada les. 7 Na hohadon tumen: o Del či del te marelpe muj lestar. Kaj so o manuš posijol, godova vi čidela. 8 Ko udovoljil e telošče, andar o telo čidela propast. A ko udovoljil e Duhošče, andar o Duho čidela o večno trajo. (aiōnios g166) 9 Neka či dojadil amende te čeras lačhipe, kaj ako či klonis, ande pravo vrjama čidasa e žetva. 10 Zato, dok si amen vrjama, te čeras lačhipe sa e themende, a posebno e phalende ando pačipe. 11 Dičhen save bare slovenca ramov tumende, mungre vastesa. 12 Okola save kamen te hvalinpe okoleja so si telesno, traden tumen te obrezin tumen. Ali von čeren godova samo te na aven progonime zbog e Hristosko trušul. 13 Čak okola save si obrezime – korkore či inčaren o Zakon, nego samo kamen te čeren pes barikane kaj nagovorisardine tumen te obrezin tumen. 14 A me nade Devla te hvali man bilo sova osim amare Gospodešče Isuse Hristošče trušuleja, prekal leste si o them razapnime pale mande thaj me palo them. 15 Kaj, naj važno dali si o manuš obrezime ili naj, nego okova so si važno si te o manuš avel e Devlesko nevo stvorenje. 16 Miro thaj milosrđe savorende save inčarena akava pravilo. Von si e Devlesko Izrael. 17 Katar akana neka khonik majbut či dosadil mande, kaj me pe mungro telo inđarav e Isusešče

ožiljkurja. 18 E milost amare Gospodešči e Isuse Hristošči neka avel tumare duhosa phralalen! Amin.

Efežanende

1 Akava lil ramov me, o Pavle, savo sem e Devlešće voljava akhardo te avav apostoli e Hristosko Isusesko, e Devlešće manušende save si ando Efes, okolende save si pačivale e Hristošće Isusešće: **2** Milost thaj miro tumende katar o Del, amaro Dad thaj katar o Gospod Isus Hrist. **3** Blagoslovime o Del thaj o Dad amare Gospodesko e Isuse Hristosko, savo pe nebesa dija men svako duhovno blagoslov ando Hristo. **4** Ande leste losarda men majsigo nego so o them postanisardas, te avas angle leste svete thaj bi manako. Ande ljubav **5** o Del odredisardas majanglal pire lačhe voljava te amen avas lešće čhave kroz o Isuso Hristo, **6** thaj te hvalisaras lešći slavno milost savi dija men sago daro ande piro voljeno Čhavo. **7** Ande leste si amen otkupljenje lešće rateja, jartipe katar e bezeha, so sikavel kozom si o Del barvalo ande piri milost. **8** Lat o Del preobilno dija amende ande svako mudrost thaj svako hačaripe. **9** Vo pire lačhe voljava sikada amende piro tajno plano savo majanglal odredisardas ando Hristo. **10** Akava naum, pherdola kana avela e pravo vrjama, te sa po nebo thaj pe phuv čhol ando ječi pe tale jek šoro – e Hristosko. **11** Ande leste sam izabrane thaj majanglal odredime po naum Okolesko savo sa čerel gajda sar andas odluka pire voljava, **12** te amen, save amari nada majanglal čhutam ando Hristo, te hvalisaras lešći slava. **13** Isto si vi tumenca. Kana ašundine o Alav e čačimasko – e Bahtali nevimata palo tumaro spasenje, pačaine ando Hristo. Askal o Del zapečatisarda tumen pale peste gajda kaj dija tumen Sveto Duho saves obečisarda, **14** savo si zalog pale amaro nasledstvo dok či aven otkupime okola save si e Devlešći svojina te hvalil pe lešći slava. **15** Zato vi me, sar ašundem palo tumaro pači pe ando Gospod Isus thaj pale tumari ljubav prema sa e Devlešće manuša, **16** či ačhilem te zahvaliv e Devlešće pale tumende, thaj te dav man godi tumende ande mungre molitve. **17** Moliv te o Del, o slavno Dad amare Gospodesko e Isuse Hristosko, del tumen Duho mudrosti thaj otkrivenje, te majlačhe pindžaren les. **18** Moliv man te putrenape tumare ilende jakha, te šaj dičhen sošći si e nada pe savi akharda tumen, sosko si barvalo lesko slavno nasledstvo savo pripremisardas pire themešće, **19** thaj kozom si neuporedivo bari lešći snaga ande amende save pačas. **20** Vo godoja piri silno snaga sikadas ando Hristo kana vazda les andar e mule thaj čhuta les pe piri počasno desno rig ando Nebesko carstvo. **21** O Del čhuta e Hristo pe svako poglavarstvo, vlast, sila thaj gospodstvo thaj pe svako alav savo šaj del pe, na samo ande akava them, nego vi ande okova savo avel. (aiñ g165)

22 Thaj sa podložisardas tale lešće pungere thaj čhuta les pe savorende te avel Šoro e Khandirjako, **23** savi si lesko Telo, punina e Hristošći savo pherel sa ande savorende.

2 A tumen senas duhovno mule zbog tumari neposlušnost thaj tumare bezeha, **2** ande save varekana trajinas, sago kaj trajil akava them. Sledinas e bende savo vladil e bilačhe duhonenca ando vazduh. Godova si isto okova duho savo akana deluil maškar o okola save či pokorin pe e Devlešće. (aiñ g165) **3** Amen varekana isto trajisas maškar lende. Udoboljisas amare željende thaj zadovoljisas e požude amare telošće thaj amare gindimatende. Ande kasavo stanje sam sago vi savora aver thaj zavredisardam e Devlešći holji. **4** Ali, o Del si pherdo milosti thaj zbog piri bari ljubav prema amende, **5** e Hristosa žudardas vi amen, save samas mule zbog amare bezeha. Zbog e milost sen spasime! **6** O Del amen, save sam ando Hristo, vazdas e Hristo Isuseja thaj čhuta amen zajedno lesa po prestolje ando Nebesko carstvo. **7** Godova čerda te ande vekurja save aven sikavel o baro barvalipe savo si lešći bari milost thaj lačhi pe prema amende ando Hristo Isus. (aiñ g165) **8** Kaj, prekal e milost sen spasime, kroz o pači pe. Godova či avel katar tumaro trudo – godova si e Devlesko daro. **9** Naj sen spasime prekal tumare dela, gajda te khonik našti hvalil pe. **10** Kaj, amen sam lesko delo, stvorime ando Hristo Isus pale lačhe dela save o Del majanglal pripremisardas te čeras. **11** Zato den tumen godi kaj naj sen bijande sago Židovurja. E Židovurja save si "obrezime" tumen akharen "bi obrezime". Ali, lengo obrezanje si čerdo e manušešće vastesa. **12** Isto gajda, majsigo senas bi o Hristo thaj senas avrijal andar izraelošći zajednica, isključime andar e Devlešće savezurja thaj andar lešće obećanja. Trajinas ando them bi e nada thaj bi o Del. **13** Majsigo senas dur katar o Del, ali akana sen ando Isuso Hristo andine paše pašo Del, kroz e Hristosko rat. **14** Kaj o Hristo si amaro miro. Vo ujedinisardas e Židoven thaj okolen save naj židovurja. Pire telosa harada o zido savo razdvojilas len te na aven majbut dušmaja. **15** E Židovengo Zakon sas pherdo pravilurja thaj odredbe, ali o Hristo poništisarda len te katar e duj thema stvoril ande peste jek nevo them thaj gajda uspostavil miro. **16** Pire smrtosa po trušul, o Hristo uništisarda o dušmanipe duje themengo, thaj čerda te aven jek telo. Gajda liduj riga pomirisarda e Devlesa. **17** Vo avilo thaj propovedilas palo miro tumende, save naj sen Židovurja thaj senas dur katar o Del thaj amende save sam Židovurja thaj sam paše pašo Del. **18** Prekal leste ječhen thaj vi averen, ande jek Duho si pristup e Dadešće. **19** Prema godova, majbut naj sen strancurja thaj došljakurja, nego sen

državljanurja e Devlešće manušenca thaj andar jek čer e Devlesa. 20 Tu men sen građevina izgradime po temelji e apostolengo thaj e prorokonengo, a korkoro o Hristo Isus si lako glavno bar. 21 Ande leste si sasti građevina sastavime thaj vazdel pe ando sveto hramo ando Gospod. 22 Ande leste sen vi tumen zajedno ugradime te aven o than kaj o Del trajil ando Duho.

3 Me, o Pavle sem zarobime kaj služiv e Isuse Hristošće palo lačhipe tumende save naj sen Židovurja. 2 Tumen svakako, ašundine kaj si mande dini služba e Devlestar kroz lešći milost pale tumende. 3 O Del mande objavisarda piro tajno naum sar ukratko već ramosardem tumende. 4 Kana čiton godova, šaj hačarena sar me hačarav e tajna palo Hristo, 5 savi nas pindžardi e manušenđe ande e naraštaja save sas majsigo, a akana o Duho dija te avel pindžardi e svete apostolende thaj e prorokonende: 6 kaj kroz e Bahtali nevimata, okola save naj Židovurja postanisardine e Izraelošće naslednikurja, te pripadin isto telošće thaj lenca te delin o obećanje savo o Del dija ando Hristo Isus. 7 Me postanisardem sluga e Bahtale nevimatači prekal e Devlešći milost savi si mande daruime lešće snagava. 8 Vi ako sem majcikno katar sa e Devlešće manuša, dini si mande akaja milost: te okolende save naj Židovurja propovediv e Hristosko barvalipe savo si neistraživo 9 thaj te savorende rasvetliv ande soste sastoil pe e Devlešći tajna savi sas ande nakhli vrjama garadi ando Del, savo sa stvorisarda. (aiōn g165) 10 Lešći namera sas te akana, kroz e Khandiri, e poglavarende thaj e vlastonende ande nebesa obznani Devlešći mudrost ande sa različite oblikurja, 11 prema lesko večno naum, savo ostvarisardas ando Hristo Isus, amaro Gospod. (aiōn g165) 12 Ande leste thaj kroz o pačipe ande leste, si amen sloboda thaj pouzdanje te avas anglo Del. 13 Zato moliv tumen te na obeshrabrin tumen zbog e nevolja savi si man kaj propovediv e Bahtali nevimata tumende a na e Židovende – sa si godova pale tumari korist. 14 Andar godova banđarav mungre koča anglo Dad, 15 katar savo svako familija po nebo thaj pe phuv primil piro pravo alav. 16 Moliv man te vo kroz piro slavno barvalipe zurjarel tumare andrune manuše pire Duhosa, 17 te o Hristo, kroz o pačipe, trajil ande tumaro ilo, thaj te aven ukorenime thaj utemeljime ande ljubav, 18 te šaj hačaren sa e Devlešće manušenca, kozom si buli, lungo, vuči thaj handuk 19 e Hristošći ljubav, thaj te džanen kaj voj si iznad svako džanglipe – te potpuno aven ispunime e Devlestar. 20 A Okolešće savo pire silava, savi ande amende deluil, šaj čerel neuporedivo majbut nego so sam amen sposobne ande molitva te mangas lestar ili te

gndisaras, 21 lešće slava ande Khandiri thaj ando Hristo Isus ande sa e pokoljenja pale uvek. Amin. (aiōn g165)

4 Zato moliv tumen, me phanglo palo Gospod, te trajin dostojno okolešće pale soste o Del akharde tumen. 2 Uvek aven ponizne thaj blage. Aven strpljive thaj ande ljubav podnosin jek avren. 3 Trudin tumen te inčaren o ječipe ando Duho kroz o miro savo povezil tumen! 4 Jek si telo thaj jek Duho, sago kaj si jek nada pe savi o Del akharda tumen. 5 Jek si o Gospod, jek pačipe, jek bolipe. 6 Jek si o Del thaj Dad savorengo. Vo gospodaryl pe savorende amende, deluil kroz savorende amende thaj trajil ande savorende amende. 7 A svakonešće amendar si dini e milost sar o Hristo kašće podarisardas. 8 Zato ando Sveto lil ramol: "Kana lija pe opre ande visine, indarda pesa e zarobimen thaj dija e manušenđe darurja." 9 So značil godova "kana lija pe opre"? Godova sigurno značil kaj prvo fuljisto ande telune thana e phuvjaće. 10 A Okova savo fuljisto, isto si Okova savo vi lija pe opre iznad sa e nebesa te sa pherel. 11 Vo korkoro čuta varesaven pale apostolurja, varesaven pale prorokurja, varesaven pale propovednikurja e Bahtale nevimatači, a varesaven pale pastirja thaj pale učitelja, 12 te pripremil e Devlešće manušen pale služba, te izgradin e Khandiri savi si e Hristosko telo, 13 dok savora či avas sago jek ando pačipe te pindžaras e Devlešće Čhaves, te barjos ande zrele manuša thaj postanisaras sago o Hristo potpune thaj savršene. 14 Gajda majbut či avasa cikne čhavra, čhudine akaring – okoring, thaj či inđarela amen e balval katar svako sikavipe. Či džasa pale svakakve manušengo hohaipe thaj prevare save lukavo inđaren po pogrešno drom. 15 Nego umesto godova, mothosa o čačipe ande ljubav thaj gajda barjosa te avas ande sa sago o Hristo savo si o Šoro e Khandirjako. 16 Vo čerel te o sasto telo avel povezime thaj ujednime e zglobonenca thaj svako udo lačhe čerel piri bući. Godova čerel te o Telo barjol thaj izgradil pe kroz e ljubav. 17 Zato akava vi phenav tumende thaj upozoriv tumen ande Gospodesko alav: na majbut trajin sago okola save či pindžaren e Devle, ande pire čuče gndurja. 18 Godole manušenđe si zamračime o razum thaj lende ile barosajle pa zbog godova trajin ando biđžanglipe, odvojime katar o trajo savo o Del del. 19 Hasardine o hačaripe palo ladžavo thaj predaisajle ande razuzdanost pa požudno čeren svako vrsta melalipe. 20 Ali, tumen naj sen gajda sikade kana pindžardine e Hristo. 21 Džanav kaj ašundine pale leste. Sago e Hristošće učenikurja, sikade sen ando čačipe, a o Isus si o čačipe. 22 A sikade sen pale tumaro purano ponašanje, trubul te fuljaren tumendar e purane manuše,

savo propadil zbog pire hohade požude, 23 te obnovin tumen ando način pe savo gndin 24 thaj te len pe tumende e neve manuše, savo si stvorime te avel slično sago o Del ande čačutni pravednost thaj svetost. 25 Zato čhuden tumendar o hohaipe thaj “svako pire pašutnešće nek mothol o čačipe”, kaj sam jek avrešće delurja e telošće. 26 “Kana holjavon, len sama te na čeren bezeh.” Na mučen te o kham inkjel, a tumen te aven još holjarike, 27 niti na den e benđe than ande tumaro trajo! 28 Ko čorelas, neka majbut či čorel, nego neka majlačhe vredno čerel buči, gajda kaj čerel lačhipe pire vastenca, te avel les so te podelil okolenca saves si ande potreba. 29 Neka ni jek rđavo alav či inkjel andar tumaro muj, nego samo okova savo si lačho thaj korisno pale izgradnja averende, prema lende potrebe, te avel po korist okolende save čhon kan. 30 Na žalostin e Devlešće Sveto Duhos, saveja sen zapečatime palo des kana avena otkupime. 31 Čhuden tumendar svako gorčina, holji, thaj gnjevo, na čhon muj, na vredon, thaj na čeren nijek aver bilačipe. 32 Jek prema avreste aven lačhe thaj suosečajne thaj jarton jek avrešće sago kaj o Del ando Hristo jartosardas tumende.

5 Zato dičen te aven sago o Del, zato kaj sen lešće voljene čhavra 2 thaj trajin ande ljubav, sago kaj o Hristos volilas amen thaj korkoro pes dija pale amende sago mirisno žrtva e Devlešće. 3 O blud thaj svako duhovno melalipe ili pohlepa neka či ni gindil pe maškar tumende – sago kaj priličil e Devlešće manušende. 4 Neka na avel maškar tumende nisošće ladžavne alava, niti dilipe, niti bilačhe komendije, kaj sa godova či priličil tumende, nego majradije – zahvalin e Devlešće. 5 Kaj, akava lačhe džanen: nijeće bludniko, niti nečiste manuše, niti pohlepne manuše, savo si isto sago vi o idolopokloniko – naj nasledstvo ande Hristosko thaj e Devlesko carstvo. 6 Na den khonikašće te hohavel tumen čuče alavenca, kaj zbog godova e Devlešći bari holji avel pe kasave neposlušne manuša. 7 Na te avel tumen lenca khanči. 8 Kaj varekana senas tama, a akana sen svetlost ando Gospod. Trajin sago čhavra e svetlošće. 9 Akava si o plodo e svetlosko: sa so si lačho, pravedno thaj čačutno. 10 Roden te čeren so si ugodno e Gospodešće. 11 Na te avel tumen talo ande jalave dela e tamače, nego majrado sikaven pe lende kozom si kasave buča bilačhe. 12 Kaj, ladžavo si vi svato te čerel pe pale godova so potajno čeren. 13 Ali sa so inkjel po svetlo, jasno dičhol, 14 kaj sa so inkjel po svetlo, postanil svetlo. Zato phenel pe: “Džungado, tu savo soves, ušti andar e mule thaj o Hristo obasjaila tut.” 15 Zato, len sama sar trajin – na sago dile, nego aven mudre.

16 Gođaver koristin e vrjama, kaj e đesa si bilačhe. 17 Zato na aven nerazumne, nego svatin so si e Devlešći volja. 18 Thaj na maton katar e mol – kaj ande leste si o bezehalo trajipe – nego, pheren tumen e Duhosa. 19 Jek avrešće mothon ande psalmurja, ande dilja save zahvalin thaj ande duhovne dilja. Dilaben thaj slavin e Devle ande tumare ile, 20 thaj uvek pale sa zahvalin e Devlešće thaj e Dadešće ando alav amare Gospodesko e Isuse Hristosko. 21 Pokorin tumen jek avrešće ande dar anglo Hristo! 22 Neka e romnja pokorin pe pire romende sago e Gospodešće! 23 Kaj o rom si šoro e romnjako, sago kaj si o Hristo Šoro e Khandirjako savi si lesko telo, a kasko si vo Spasitelj. 24 Pa sago kaj e Khandiri pokoril pe e Hristošće, gajda neka e romnja pokorin pe pire romende ande sa. 25 Romalen, volin tumare romljen sago kaj o Hristo zavalisardas e Khandiri thaj korkoro pes dija pale late, 26 te posvetil lat, gajda kaj šilada lat e najipeja ando paj e alavengo, 27 te angle peste postavil e slavno Khandiri, savja naj mrlja, niti bora, ni bilo so aver slično, nego si sveto thaj naj lat mana. 28 Gajda vi e roma trubun te volin pire romljen sago piro telo. Ko volil pire romnja, korkoro pes volil. 29 Kaj, khonik nikad či mrzalas piro telo, nego pravarel les thaj neguil les, baš sago vi o Hristo e Khandiri – 30 kaj amen sam udurja lešće telosko. 31 Sago kaj ramol ando Sveto lil: “Zato o manuš mučela pire dades thaj pire deja thaj avela jek pire romnjava, thaj von duj avena jek telo.” 32 Godova si e bari tajna thaj phenav tumende kaj godova odnosil pe po Hristo thaj pe Khandiri. 33 Dakle neka svako tumendar volil pire romnja sago korkoro pes, a e romnji neka poštuil pire romes.

6 Čhavralen, čhon kan ke tumare dada thaj tumare deja zbog o Gospod, kaj si godova ispravno. 2 “Poštuisar čire dades thaj čire deja” – godova si e prvo zapovest savja pratil o obećanje: 3 “te avel tuće lačhe thaj te dugo trajis pe phuv.” 4 A tumen, dadalen, na holjaren tumare čhavren, nego sikaven len te barjon gajda kaj džanen e Devlešće pouke thaj opomene. 5 Robonalen, čhon kan ke tumare phuvjaće gospodarja e darasa thaj e izdraipeja. Čeren godova e iskreno ileja, sago kaj čhon kan e Hristo – 6 na samo dok sen angle lende jakha, te svidon tumen lende, nego sago e Hristošće roburja save saste ileja čeren e Devlešći volja. 7 Služin tumare voljasa, sago e Gospodešće, a na sago e manušende, 8 gajda džanen kaj svako tumendar, ako čerel lačhipe, dobila nagrada katar o Gospod, bilo te si vo robo ili slobodno manuš. 9 Vi tumen, gospodarja, isto gajda lačhe vladin tumen prema lende. Len tumen majdur katar e pretnje, kaj džanen kaj vi tumaro thaj vi lengo Gospodari si

po nebo thaj kaj vo či dičhel ko si ko. 10 Po krajo, zuravon kroz o zajedništvo e Gospodeja thaj oslonin tumen pe lešči bari snaga. 11 Len pe tumende e sasti Devlešči oprema te šaj oduprin tumen katar e benđesko lukavstvo. 12 Kaj, amari borba naj protiv e manuša katar o rat thaj o mas, nego protiv o vladari thaj e vlasti, protiv e sile save vladin ando carstvo e tunjarikosko, protiv e bilače duhurja save si ande nebesa. (aiōn g165) 13 Zato len pe tumende e sasti Devlešči oprema, te šaj oduprin tumen po đes kana avela o bilačipe thaj nakon e borba ačhen čvrsto pe pungere. 14 Gajda aven spremne! Sago pojas, oko maškar čhon o čačipe, pe tumende crden o oklop pravednosti, 15 a pe tumare pungere len e spremnost savi avel katar e Bahtali nevimatako miro. 16 A uz sa godova, len o pačipe sago štito saveja šaj mudarena sa e jagaće strelice save aven katar o beng. 17 Len o spasenje sago e kaciga thaj o mačo e Duhosko savo si o Alav e Devlesko. 18 E svako molitvava thaj e molbasa molin tumen ande svako prilika ando Duho. A uz sa godova aven uvek džungade thaj ustrajno molin tumen pale sa e Devlešće manuša. 19 Molin tumen vi pale mande, te o Del del man prave alava kana god putrav mungro muj, thaj te hrabro objaviv e tajna e Bahtale nevimatako, 20 pale savi sem poslaniko ande okurja. Molin tumen te hrabro mothav, gajda sago kaj vi trubul. 21 A o Tihik, o volime phral thaj verno sluga e Gospodesko sa javila tumende pale mande, te džanen sar sem thaj so ćerav. 22 Les baš pale godova vi bičhaldem tumende, te ašunen sar sam amen thaj te ohrabril tumen. 23 Miro e phralende thaj ljubav e paćimava, katar o Del o Dad thaj katar o Gospod Isus Hrist. 24 Milost savorende save volin amare Gospode e Isuse Hriste pale uvek.

Filipjanende

1 Akava lil ramov me, o Pavle, thaj o Timotej, sluge katar o Hristo Isus, sa e Devlešće manušende ando Hristo Isus save trajin ande Filipe, zajedno e starešinenca thaj e đakonenca: **2** Milost tumende thaj miro katar o Del, amaro Dad, thaj katar o Gospod Isuso Hristo. **3** Zahvaliv e Devlešće kan god dav man godi tumende. **4** Ande svako mungri molitva pale tumende uvek radujimasa moliv man **5** zbog tumari pomoć savi dine man katar o prvo đes dži akana dok buljarav e Bahtali nevimata. **6** Uverime sem ande akava: Okova savo ande tumende započnisarda o lačno delo, dovršla les dži ko đes kana o Hristo Isus boldela pe. **7** Thaj pravo si te gajda gndiv pale sa tumende, kaj inđarav tumen ande mungro ilo. Tumen manca delin e milost savi dija man o Del, bilo te sem ande okurja, bilo te braniv e Bahtali nevimata thaj dokaživ kaj si čači. **8** O Del si mungro svedoko, kozom čezniv pale sa tumende ande ljubav e Hristošći Isusešći. **9** Thaj pale akava moliv man: te tumari ljubav sa majbut napreduil ande spoznaja thaj ando potpuno uvid sar te ispravno trajin, **10** te šaj prosudin so si majlače thaj te aven čiste thaj besprekorne palo đes kana boldela pe o Hristo, **11** pherde plodurja pravednosti save aven kroz o Isuso Hristo, pe slava thaj najs e Devlešći. **12** Kamav te džanen, phralalen, kaj sa akava so dogodisajlo mande služil te napreduil e Bahtali nevimata. **13** Gajda kaj si sa e carošće stražarende thaj savorende akate jasno kaj me sem ande okurja zbog o Hristo, **14** a sa majbut phrala save si ohrabrime ando Gospod mungre okonenca, sa majbut troman te propovedin o alav e Devlesko bidarako. **15** Jek manuša propovedin e Hristo andar e zavist thaj te takmičinpe, a aver katar e lačni volja. **16** Akala aver andar e ljubav, kaj džanen kaj me sem ando phanglipe te odbraniv e Bahtali nevimata. **17** A okola prve objavin e Hriste andar piri sebično volja, neiskreno thaj gndin kaj gajda čerena te mungri nevolja avel još majbari ando phanglipe. **18** Pa so askal? Važno si te pe svako način, bilo te si iskreno, bilo te naj iskreno, phenel pe palo Hristo, thaj zbog godova radujiv man. Thaj vi majdur radujiva man, **19** kaj džanav kaj kroz tumare molitve thaj uz o pomoć e Duhosko e Isuse Hristosko avava izbavime andar akala nevolje save astardine man. **20** Željno ažučarav thaj nadiv man kaj ni zbog soste či hava ladžavo, nego kaj avela man bari hrabrost te vi akana, sago vi uvek, o Hristos proslavilpe ande mungro telo, bilo mungre trajosa ili mungre smrtosa. **21** Kaj pale mande si o Hristo trajo, a o meripe dobitko. **22** A te trajiv majdur ando telo, godova pale mande značil te čerav plodonosno bući palo

Gospod. A pale soste odlučiva man, či džanav. **23** Čićidino sem katar liduj riga: kamav te merav thaj te avav e Hristosa, so si but majlače, **24** ali zbog tumende si potrebno te ačhav te trajiv ando telo. **25** Uverime sem ande godova. Džanav kaj ačhava maškar tumende pale tumaro napretko thaj pale tumari bah ando paćipe, **26** te još majbut ponosin tumen zbog okova so o Hristo čerda pale mande, zato kaj sem palem tumenca. **27** Samo, trajin dostojno e Hristošće Bahtale nevimataće. Gajda bilo te avav thaj dikhav tumen, bilo te sem odsutno thaj ašunav pale tumende, džanava kaj ačhen čvrsto ande jek duho, thaj jeće ileja borin tumen palo paćipe e Bahtale nevimatako, **28** thaj ande khančeste na te daran katar tumare protivnikurja. Lende si godova znako palo propast, a tumende palo spasenje, thaj godova si e Devlestar. **29** Kaj tumende si dini milost na samo ando Hristo te paćan nego pale leste vi te trpin. **30** Vodin borba sošći dikhline kaj me vodiv, a vi akana ašunen kaj vodiv.

2 Ako, dakle, si tumen varesavo ohrabrenje ando Hristo, ako si tumen uteha ande lešći ljubav, ako si tumen zajedništvo ando Duho, ako si tumen nežnost thaj suošećanje, **2** askal čeren te mungri bah avel pherdi – aven složne, volin jek avren, aven jek ando duho thaj nek avel tumen isto ciljo. **3** Na čeren khanči ande sebično volja niti ando barikanipe, nego ande poniznost smatrin jek avres majbare pestar. **4** Neka khonik či dičhel samo piri korist, nego vi e korist averendi. **5** Gndin thaj trajin isto gajda sago kaj gindilas thaj trajilas o Hristo Isus. **6** O Hristo vi ako sas ande Devlesko obličje, či rodelas piro pravo te avel jek e Devlesa, **7** nego ponizisardas korkoro pes, lijas o obličje e robosko, thaj bijandilo ando manušesko obličje. Kana pojavisajlo sago manuš, **8** ponizisarda korkoro pes thaj postanisardas poslušno dži ko smrto thaj godova dži ko smrto po trušul. **9** Zato o Del vazdas les pe majvučo than thaj dija les alav savo si iznad svako aver alav, **10** te pe Isusesko alav bandol svako koč po nebo, pe phuv thaj tale phuv, **11** thaj te svako čhib priznail kaj si o Isus Hristo Gospod, pe slava e Devlešći Dadešći. **12** Zato drage mungralen, sago kaj uvek čhonas kan mande – na samo kana me semas tumenca nego još vi majbut akana kana naj sem okote – ande dar thaj ando izdrape napreduin ande tumaro spasenje. **13** Kaj o Del si godova savo čerel ande tumende te kamen thaj čeren okova so si lešće ugodno. **14** So god te čeren, na te mrmljin thaj na han tumen, **15** te aven besprekorne thaj čiste, e Devlešće čhavra bi manako maškar e bilači thaj rumome generacije, maškar save svetlin sago e čereja ando svemir. **16** Čvrsto inčaren o Alav e trajosko, gajda te avav ponosno

pe tumende ando Ďes kana o Hristo boldela pe thaj te šaj dikhav kaj či ivja prastajem e trka niti uzalud trudisajlem. 17 Pa čak vi ako mungro trajo trubul te ĉhordol sago žrtva pale tumaro paĉipe, bahtalo sem thaj raduima tumenca. 18 Gajda vi tumen aven bahtale thaj raduin tumen manca. 19 A nadv man ando Gospod Isus kaj uskoro biĉhalava tumende e Timoteje, te vi me ohrabriv man kana ašunav sar sen tumen. 20 Kaj naj man khonik ko si mande gajda paše sago vo, ko gajda laĉhe vodil e briga pale tumende. 21 Kaj, savora roden piro, a na okova so si e Isuse Hristosko. 22 A tumen džanen kaj o Timotej dokažisajlo, gajda kaj služilas manca sago o ĉhavo e Dadesa te buljol e Bahtali nevimata. 23 Zato nadv man kaj biĉhalava les tumende ĉim dikhav so avela manca. 24 A paĉav kaj o Gospod pomožila mande, te vi korkoro uskoro avava. 25 Ipak, smatriv kaj si potrebno te biĉhalav tumende palpale e Epafrodite – mungre phrale, saradniko, thaj saborco, saves biĉhaldine mande te pomognil mande ande mungre potrebe – 26 kaj, saste ileja kamel sa te diĉhel tumen, thaj uznemirisajlo kaj ašundine kaj sas nasvalo. 27 A ĉaĉe sas gajda nasvalo skoro po smрто. Ali o Del smiluisajlo lešće – thaj na samo lešće nego vi mande, te či aresel man još majbari žalost. 28 Zato kamav so majsigo te biĉhalav les te šaj palem raduin tumen kana diĉhen les, a te me majbut či vodiv e briga pale tumende. 29 Primin les, askal ando Gospod e bare bahtasa, thaj poštui kasaven sago kaj si vo. 30 Kaj, vo skoro mulo ande bući palo Hristo. Ĉhuta piro trajo ando opasnost te pomognil mande ande okova so tumen našti, kaj naj senas manca.

3 Još te phenav tumende, phralalen mungralen, raduin tumen ando Gospod! Naj mande pharo te ramov tumende palem isto, a pale tumende si majsigurno. 2 Len tumen sama katar okola džučhela, len tumen sama katar okola bilaĉe radnikurja, len tumen sama te na sakatilpe tumaro telo. 3 Kaj, amen sam vi ĉaĉe obrezime, amen save služisaras e Devlešće Duhosa thaj hvali men e Hriste Isuseja, a či uzdimen ando telo, 4 vi ako me šaj ando telo te pouzdiv man. A te vareko gindil kaj šaj pouzdilpe ando telo, me šaj još majbut: 5 obrezime sem ohtoto ĉes nakon so bijandilem, andar o Izraelsko them sem, andar e Venjaminesko pleme, Židovo bijando katar o Židovo, po Zakono farisej, 6 ande mungri revnost progonivas e Khandiri, pe pravda savi avel katar o Zakon semas besprekorno. 7 Ali okova so sas mande varekana dobitko, godova zbog o Hristo inĉarav kaj si gubitko. 8 Thaj na samo godova, inĉarav kaj si sa gubitko kana uporedilpe koleja so si majvredno, a godova si te pindžarav e Hriste Isuse, mungre Gospode. Zbog leste sa hasardem thaj sa inĉar kaj si gunoj, samo te dobiv e

Hriste, 9 thaj ande leste te arakhav man – na kroz mungri pravednost savi avel katar o Zakono, nego katar koja savi avel kroz o paĉipe ando Hristo: e pravednost savi avel e Devlestar, katar o paĉipe. 10 Kamav te pindžarav e Hriste thaj e sila savi vazda les andar e mule. Kamav te avel man udeo ande lešće patnje thaj te avav sago vo ande lesko smрто, 11 či li varesar areslemas dži ko vaskrsenje andar e mule. 12 Či phenav kaj godova već si man, niti kaj sem već savršeno, ali ustrajno trudiman te osvojiv godova ciljo kaj o Hristos Isus osvojisarda man. 13 Phralalen, me či gndiv kaj već osvojisardem o ciljo. Ali jek ĉerav: bistarav okova so si pale mande, a inzarav man ke okova so si angle mande. 14 Prastav karingal o ciljo, te dobiv nagrada pale savi o Del ando Hristo Isus akharda man po nebo. 15 Savora, dakle, save sam paće ando paĉipe, agajda trubul te gndisaras. A te pale varesoste naj tumen iste gndurja, o Del dela tumen te džanen godova jasno. 16 Samo, trubul te sledis o ĉaĉipe savo već siĉilam. 17 Sledin mungro primer, phralalen, thaj siĉon katar okola save trajin gajda sar sikadam tumende. 18 Kaj, but okola pale save ĉesto phenavas tumende, a akana e jasvenca phenav tumende, trajin sago dušmaja okolešće so propovedisaras pale Hristosko smрто po trušul. 19 Lengo krajo si lendi propast, lengo del si lengo ĉi, ĉerenpe barikane okoleja pale soste trubuinessas te ladžan thaj von gndin samo pe akava phuvjako trajo. 20 A amari otadžbina si pe nebesa, katar e ileja ažuĉaras e Spasitelje, e Gospode Isuse Hriste. 21 Vo pire silava – savjava sa šaj ĉhol tale piri vlast – promenila amaro bedno telo te avel sago lesko slavno telo.

4 Zato, mungre drage phralalen, saven jedva ažuĉarav te dikhav, kaj tumen sen mungri bah thaj mungri nagrada pale mungro trudo, ĉvrsto aĉhen ando Gospod sago kaj phendem tumende, drage mungralen! 2 Moliv e Evodija thaj e Sintiha te aven složne ando Gospod. 3 Ej, moliv vi tut, verno drugarina, pomognisar lende te aven složne, kaj zurale trudisajle te buljaren e Bahtali nevimata zajedno manca, e Klimentosa thaj e avere mungre saradnikonenca savende alava si ramome ande Lil e trajosko. 4 Uvek raduin tumen ando Gospod! Palem phenav: raduin tumen. 5 Neka tumaro laĉhipe avel pindžardo maškar sa e manuša. Zato kaj si o Gospod paše! 6 Na den tumen ande bari briga ni pale soste, nego molin thaj roden katar o Del sa so trubul tumen ande zahvalnost, 7 thaj e Devlesko miro, savo našti haĉarel ni jek manušešći gođi, lela sama pe tumare ile thaj pe tumare gindimata ando Hristo Isus. 8 Po krajo, phralalen, pheren tumare gindimata okoleja so si ĉaĉe, so si plemenito, so si pravedno, so si ĉisto, so si šukar, so si po laĉho glaso, so si ĉasno thaj so si hvale vredno. 9 Okova so mandar siĉiline,

primisardine, ašundine thaj dikhline, godova čeren thaj o miro
 e Devlesko avela tumenca. **10** Semas zurale bahtalo ando
 Gospod kaj palem sikadine tumari briga pale mande. Vodinas
 tumen e briga pale mande vi maj sigo, ali nas tumen prilika
 te sikaven godova. **11** Či phenav gadava zato kaj vareso
 trubul man; kaj, me sičilem ande svako situacija te avav
 zadovoljno. **12** Džanav te trajiv vi kana si man sa, vi kana naj
 man khanči. Sičilem pe sa thaj pe svašta: te avav čaljardo
 thaj vi bokhalo, te avel man but thaj te či avel man so trubul
 man. **13** Me sa akava šaj ande Okova savo del man snaga.
14 Ali, šukar si tumendar kaj podelisardine manca mungri
 nevolja. **15** A vi tumen, manušalen andar e Filipe, džanen
 kaj ando početko kana propovedilaspe e Bahtali nevimata
 tumenđe, thaj kana đelemtar andar e Makedonija, tumen
 senas jedino khandiri savi dija man pomoć. **16** Čak vi ando
 Soluno varekozom drom bičhaldine mande so trubul man.
17 Či phenav godova zato kaj rodav poklonurja tumendar,
 nego te tumari nagrada avel još majbari. **18** Akana si man
 sa so trubul man, čak vi majbut katar godova, sar kana
 katar o Epafrodit primisardem okova so bičhaldine mande –
 prihvatljivo žrtva, gogle mirisosa, ugodno e Devlešće. **19** A
 mungro Del pherela svako tumari potreba prema piro slavno
 barvalipe ando Hristo Isus. **20** Amare Devlešće thaj Dadešće
 neka si e slava pale uvek. Amin. (aiōn g165) **21** Pozdravin
 sa e Devlešće manušen ando Hristo Isuso. E phral save si
 manca pozdravin tumen. **22** Pozdravin tumen sa e Devlešće
 manuša, posebno okola andar e carsko čher. **23** Milost e
 Gospodešči Isusešči Hristošči neka avel tumare duhosa.
 Amin.

Kološanende

1 Akava lil si katar o Pavle, savo si apostol e Hriste Isusesko e Devlešće voljava, thaj lesa o phral o Timotej, **2** e svete thaj verne phralende ando Hristo, save si ande Kolose: Milost tumende thaj miro katar o Del, amaro Dad. **3** Uvek dav najš e Devlešće thaj e Dadešće katar amaro Gospod Isus Hrist, kana god pale tumende moli men, **4** kaj ašundam pale tumaro pačipe ando Hristo Isus, thaj pale ljubav savi si tumen pale sa e Devlešće manuša. **5** Godova pačipe thaj ljubav avel katar e nada savi si spremno pale tumende pe nebesa, a pale savi ašundine ande čačutni poruka e Bahtale nevimatači, **6** savi avili tumende. Voj po sasto them anel plodurja thaj barjol. Baš sago vi maškar tumende katar okova des kana ašundine pale Bahtali nevimata thaj potpuno hačardine o čačipe pale Devlešći milost. **7** Godova sičiline katar amaro voljeno saradniko Epafras, savo si sago vi amen, e Hristosko sluga. Vo verno služil e Hristošće pale tumari korist. **8** Lestar ašundam pale tumari ljubav savi si tumen ando Duho. **9** Zato vi amen, katar okova des kana godova ašundam, či ačilam te moli men pale tumende thaj te mangas te o Del pherel tumen gajda te pindaren lešči volja ande sa e mudrost thaj hačaripe savo o Duho del, **10** te gajda trajin dostojno trajo palo Gospod, te ande sa ugodin lešće, te aven plodonosne ande svako lačno delo, thaj te barjon ando pindžaripe e Devlesko. **11** Moli men te o Del zurjarel tumen svako snagasa savi avel katar lešči slavno sila thaj isto gajda moli men te sa šaj izdržin ando strpljenje. **12** E bahtasa zahvalin e Dadešće, savo čerda tumen dostojne te avel tumen udeo ando nasledstvo e Devlešće manušenca save si ando svetlo. **13** Vo izbavisarda men katar e vlast e tamači thaj premestisarda men ando Carstvo pire volime Čavesko, **14** ande savo si amen otkupljenje, thaj jartipe e bezehendar. **15** O Hristo si slika e nevidljivo Devlešći, Prvobijando pe sa so si stvorime. **16** Kaj kroz leste si stvorime sa so si ando nebo thaj pe phuv, sa vidljivo thaj nevidljivo – bilo te si prestolurja ili carstvurja, vladarja thaj vlasti, sa si kroz leste thaj pale leste si stvorime. **17** O Hristo postoišas majsigo katar sa aver thaj ande leste sa čvrsto ačhel. **18** Vo si Šoro e telosko, a godova si e Khandirjače. Vo si Početko, Prvobijando savo uštilo andar e mule, te ande sa avel prvo. **19** Kaj, e Devlešće svidosajlo te ande leste nastanil sasti piri punina **20** thaj kroz leste, pomirisarda pesa sa, sa so si pe phuv, thaj sa so si po nebo, gajda kaj uspostavisardas o miro lešće ratesa savo čordilo katar o trušul. **21** Jekhar vi tumen senas dur e Devlestar, senas lešće dušmaja, zbog tumare bilače gindurja thaj

tumare bilače dela. **22** Ali, akana o Del pomirisarda tumen pesa gajda kaj o Hristo mulo ando manuško telo, te anel tumen angle peste svete, bi mana thaj besprekorne. **23** Samo moraš te ačhen čvrste thaj istrajne ando pačipe thaj te na durjon katar e nada savi si tumende dini kana ašundine e Bahtali nevimata. Zbog godoja Bahtali nevimata, savi si propovedime svakonešće po them, me, o Pavle, postanisardem sluga. **24** Akana radujiv man zato kaj trpiv pale tumende, kaj godoleja pe mungro telo dovršiv e patnja save trubul još te izdrživ, sago kaj o Hristo podnesisardas patnja pe piro telo, a so si e khandiri. **25** Me postanisardem e khandirjako sluga pe Devlešći naredba savi si mande dini pale tumaro lačhipa, a godova si te objaviv tumende e Devlesko alav ande sasti punina. **26** Godoja poruka sas tajna garadi kroz e vekurja thaj kroz e sa pokoljenja, a savi si akana objavime e Devlešće manušende. (aiōn g165) **27** Lende o Del kamlas te sikavel kozom si barvali e slava akale tajnači maškar okola save naj Židovurja, a godoja tajna si: o Hristos ande tumende, vo si nada te avel tumen udeo ande slava e Devlešći. **28** Amen e Hriste objavisaras e manušende. Urazumisaras thaj sikavas svakone manuše ande sa e mudrost te svakone manuše anas dži ko duhovno pače ando Hristo. **29** Zato trudiv man thaj boriv man e Hristošće delotvorno snagasa, savi ande mande silno delujil.

2 Kamav te džanen kozom boriv man pale tumende, pale okola ande Laodikija thaj pale sa okola save još či lično džanen man. **2** Kamav, dakle, te lende ile ohrabrin pe thaj udružin pe ande ljubav, te aven dži ko sa o barvalipe savo anel dži ko pherdo razum, te pindžaren e Devlešći tajna – e Hristo, **3** ande savo si garado sa o barvalipe katar e mudrost thaj katar džanglipe. **4** Akava phenav te khonikal či hohavel tumen gule alavenca. **5** Kaj, vi ako e telosa naj sem tumenca, ipak sem ando duho tumenca thaj raduiv man kana dikhav o redo savo vladil maškar tumende thaj tumaro zuralo pačipe ando Hristo. **6** Gajda, sar primisardine e Isuse Hristo, sago e Gospode, gajda vi majdur trajin ande leste. **7** Aven ande leste čvrsto ukorenime thaj pe leste nazidome, zuravon ando pačipe, sago kaj sen sikade thaj aven but zahvalne e Devlešće. **8** Len sama te na zarobil tumen vareko gajda kaj hohavel tumen e čuča alavenca save temeljin pe samo pe manušende običaja. Kasavo sikavipe či avel katar o Hristo, već avel katar e sila savi delujil ande akava them. **9** Kaj, ando Hristo trajil svako punina e Devlešći, čak vi dok trajilas pe phuv. **10** A tumen primisardine o ispunjenje ande leste, savo si šoro pe svako poglavarstvo thaj vlast. **11** Ando Hristo sen obrezime gajda kaj fuljardine tumendar e bezehali

narav, na e obrezanjeja savo si čerdo e manušešće vastesa, nego e Hristošće obrezanjeja, **12** kaj, kana senas bolde, askal senas prahome e Hristosa thaj lesa vi uštiline andar e mule, kroz o pačipe ande sila savi avel katar o Del savo vazdas e Hristos andar e mule. **13** Kana senas duhovno mule zbog tumare bezeha thaj zbog godova kaj još naj senas oslobodime katar tumari telesno narav, o Del vazda tumen andar e mule zajedno e Hristosa thaj jartosardas amende sa e bezeha, **14** gajda kaj khoslas e optužnica pe savi sas ramome amare prekršaja. Godoja optužnica sas protiv amende, ali o Del uništisarda lat po trušul. **15** Thaj fuljardas katar e vlast e poglavaren thaj e vladaren thaj dija len po ladžavo angle savorende gajda kaj pobedisardas len e trušuleja. **16** Zato, neka khonik či sudil tumen palo habe ili palo pipe, palo prazniko, ili kaj slavin o terno čhonut, ili o savato. **17** Godova si tek e senka okolešči so trubul te avel, a o čačipe si o Hristo. **18** Na den te lel tumendar e nagrada khonik savo uživil ande hohamni poniznost thaj slavil e andelen, thaj mothon kaj godova dikhline ande pire vizije, ivja čeren pe barikane pire telesne godasa, **19** a či podložisajle e Šorešće savo si o Hristo, katar savo si zavisno sasto Telo, poduprime thaj povezime e zglobonenca thaj e žilenca, a barjol gajda sar o Del dela les te barjol. **20** Ako gajda kaj muline e Hristosa, oslobodisardine tumen katar e sile akale themešči, sostar askal trajin sago kaj još trajin ando them thaj pokorin tumen lešće propisonende. **21** "Na dir", "Na okusisar", "Na dotakni"? **22** Sa godova kana upotrebil pe propadnil, kaj godova si e manušenje pravilurja thaj lengo sikavipe. **23** Godova, doduše, izgledil sago mudrost, kaj si katar e nametnime pobožnost, hohamni poniznost thaj gajda kaj kaznin piro telo, ali nisar či pomožil ande borba protiv e telesno želja.

3 Ako, dakle, vaskrnsisardine e Hristosa andar e mule, roden okova so si po nebo, okote kaj o Hristo bešel e Devlešće pe desno rig. **2** Gndin pe okova so si opre, a na pe stvarja save si pe phuv. **3** Kaj, tumen muline thaj tumaro trajo si e Hristosa garado ando Del. **4** A kana pojavila pe o Hristo, savo si tumaro trajo, askal vi tumen pojavina tumen lesa ande slava. **5** Zato odbacin tumendar sa okova so si katar tumari phuvjani thaj bilači narav: o bludo, e moralno nečistota, e požuda, e zle želje thaj e pohlepa so si isto sago vi o idolopoklonstvo. **6** Zbog kasave stvarja avel e Devlešči bari holji pe sa save si nepokorne. **7** Godole dromesa vi tumen varekana džanas kana trajinas maškar lende. **8** Ali akana odbacin tumendar sa akava: e holji, e srdžba, e opakost, o vredo, e bilače alava andar tumaro muj. **9** Na

hohaven jek avres, kaj čudine tumendar e purane manuše lešće bilače delenca, **10** a line pe tumende e neve manuše, savo si pe slika pire Stvoritelješči savo obnovil pe te šaj majlače pindžaren les. **11** Thaj ando nevo trajo naj majbut razlika maškar okova savo naj Židovo thaj okova savo si Židovo, maškar o obrezime manuš thaj okova savo naj obrezime, maškar o stranco thaj divljako, maškar o robo thaj slobodno manuš, nego o Hristo si majvažno thaj vo trajil ande amende savorende. **12** Furjadon, dakle, sago e Devlešće svete izabranikurja, sago lesko drago them, ando milosrdno ilo, ando lačhipe, ande poniznost, ande krotkost, thaj ande strpljivost. **13** Podnosin jek avres thaj jarton ako si tumen vareso jek protiv avreste. Sago kaj o Gospod jartosardas tumende, gajda vi tumen jarton avrende. **14** A prekal sa akava len pe tumende e ljubav savi sa inčarel ando savršeno ječipe. **15** Neka o miro e Hristosko, pe savo sen akharde ande jek telo, vladil ande tumare ile thaj aven zahvalne. **16** Neka e Hristosko alav barvale trajil ande tumende. Sičon thaj opomenin jek avres ande sa e mudrost. Zahvalne ilenca đilaben psalmurja, himne, thaj duhovne đilja e Devlešće. **17** Thaj so god te čeren alavenca ili delenca, čeren sa ando alav e Gospodesko e Isusesko thaj zahvalin e Devlešće e Dadešće kroz leste. **18** Romljalen, pokorin tumen tumare romende, sago kaj dolikujil okolende save sledin e Gospode! **19** Romalen, volisaren tumare romnjen thaj na aven grube prema lende. **20** Čhavralen, ande sa čhon kan ke tumaro dad thaj ke tumari dej, kaj godova si e Gospodešće ugodno. **21** Dadalen, na ogorčin tumare čhavren, te na aven malodušne. **22** Roburja, čhon kan ke tumare phuvjane gospodarja, na samo dok sen angle lende jakha, sago okola save kamen te ulizin pe e manušenje, nego aven iskreno ileja ande dar e Devlestar. **23** Sa so čeren, čeren e saste ileja, sago palo Gospod, a na pale manuša. **24** Džanen kaj katar o Gospod dobina nagrada sago nasledstvo savo obečisarda. Služin e Hriste, vo si čačutno Gospodari! **25** Kaj svako nepravedno manuš avela kaznime pale nepravda savi čerda, kaj o Del či dičhel ko si ko.

4 A tumen gospodarja, den tumare robonen okova so si pravo thaj pravedno thaj den tumen godi kaj vi tumen si Gospod po nebo. **2** Posvetin tumen e molitvače. Aven džungade ande late e zahvalenca. **3** Molin tumen isto vi pale amende, te o Del putrel o vudar te šaj propovedisaras e Bahtali nevimata thaj te šaj objavisaras e Hristošči tajna, pale savi sem me ando phanglipe. **4** Molin tumen te šaj gajda jasno te propovediv lat, sago kaj trubul. **5** Mudro ponašin tumen prema okola save naj vernikurja. Godaver koristin e vrjama. **6** Kana čeren svato uvek aven ljubazne

thaj mudre. Gajda džanena te odgovorin svakonešće sar trubul. 7 A sa pale mande obavestila tumen o Tihik, mungro drago phral ando Hristo, paćivalo suradniko thaj zajedno manca sluga ando Gospod. 8 Pale godova bičhalav les te mothol tumende so si nevo amende thaj te ohrabil tumen. 9 Lesa bičhaldem vi e Onesime, e paćivale thaj volime phrale ando Hristo, savo si jek tumendar. Von obavestina tumen pale sa so si akate. 10 Pozdravil tumen o Aristarh, savo si zajedno manca ando phanglipe, thaj o Marko, savo sas familija e Varnavava. Ako avel tumende, šukar primin les, prema e upute save dijam tumen. 11 Pozdravil tumen vi o Isus, savo si akhardo Just. Von si jedine katar e obrezime vernikurja save čeren bući manca palo Carstvo e Devlesko. Von sas mande uteha. 12 Pozdravil tumen o Epafra, savo si jek tumendar thaj sluga e Isuse Hristosko. Vo ande molitve uvek boril pe pale tumende, te o Del učvrstil tumen, te duhovno aven paće, potpuno uverime thaj čvrsto ačhen ande sa so si pe Devlešći volja. 13 Svedočiv pale leste kaj zurale trudil pe pale tumende thaj pale okola andar o gav Laodikija thaj andar o Jerapolje. 14 Pozdravil tumen o drago doktori o Luka thaj o Dimas. 15 Pozdravin e vernikonen ande Laodikija, thaj e Nimfana zajedno e khandirjasa savi čidel pe ande lako čer. 16 Kana akava lil čitola pe tumende, vodini e briga te čitol pe vi ande khandiri ande Laodikija, a vi tumen te čiton okova andar e Laodikija. 17 Thaj phenen e Arhipešće: "Le sama te des dovršis e služba savi o Gospod poverisarda tuće." 18 A kava pozdrav ramov tumende me, o Pavle, mungre vastesa. Den tumen gođi kaj sem ando phanglipe! Milost e Devlešći tumenca.

1 Solunjanende

1 Akava lil ramov me o Pavle, o Silvan thaj o Timotej e khandirjače ando Soluno, savi si ando Del amaro Dad thaj ando Gospod Isus Hrist: Milost thaj miro tumende. **2** Uvek das najs e Devlešće pale tumende savorende thaj neprekidno moli men pale tumende. **3** Stalno damen godi anglo Del amaro Dad, ke tumaro džudo pačiće, tumaro trudo, tumari ljubav, tumari strpljivost ande nada ando amaro Gospod Isus Hrist. **4** Džanas, phralalen thaj phejalen kaj o Del volil tumen thaj kaj izabirisarda tumen. **5** Kaj e Bahtali nevimata savi andam tumende či sikadili tumende samo ando alav, nego vi ande sila e Sveto Duhošći, thaj ando baro uverenje ande lesko čačiće. Džanen sar trajisardam maškar tumende, zbog tumaro lačhiće. **6** Primisardine o Alav katar o Sveto Duho e bahtasa vi ako sas tumen bare patnje. Ande godova dikhline tumen pe amende thaj po Gospod. **7** Gajda sen akana uzor sa e vernikonende ande Makedonija thaj ande Ahaja. **8** E Devlešći poruka tumendar či ašunda pe samo ande Makedonija thaj ande Ahaja, već tumaro pačiće ando Del postanisarda pe sa riga pindžardo. Zato naj potrebno te vareso raspravisaras pale godova. **9** Korkoro ćeren svato sar šukar primisardine men thaj sar katar e idolurja boldine tumen te služin e džude thaj e čačutne Devlešće. **10** Thaj ćeren svato sar ažučaren te katar o nebo palem avel e Devlesko čhavo, saves vazdas andar e mule – e Isuse, savo spasila men katar e bari holji e Devlešći savi avel.

2 Vi korkoro džanen, phralalen thaj phejalen, kaj godova kaj avilam tumende nas uzaludno. **2** Sago kaj džanen, ande Filipe sas men majsigo nevolje thaj samas vredome, ali ande Devlešći pomoć hrabro propovedisardam tumende e Bahtali nevimata, vi ako but džene protivinas pe. **3** Dičhen dakle kaj ande amaro propovedanje nas zabluda ili bande motivurja. Či kamlam khonikas te hohavas. **4** Naprotiv propovedisardam e Bahtali nevimata upravo gajda sar o Del poverisarda amende te ćeras. Či trudisajlam te ugodisaras e manušenje, nego e Devlešće savo ispituil amare ile. **5** Sago kaj džanen, či avilam tumende gule alavenca niti amende o propovedanje služisarda sago izlika te garavas amari pohlepa. O Del si amende svedoko ande godova! **6** Thaj či rodam pohvala katar e manuša – niti tumendar, niti bilo kastar. **7** Vi ako šaj sago e Hristošće apostolurja te avas tumende po tereto, ali amen samas prema tumende blage sago e dej savi pravarel thaj neguil pire čhavren. **8** Samas gaći pherde ljubav prema tumende kaj samas voljne te predaisaras tumende na samo

e Devlešći Bahtali nevimata, nego te das vi amare trajurja pale tumende, kaj postanisardine amende drage. **9** Pa den tumen godi, phralalen thaj phejalen, ke amaro pharo trudo thaj ke amaro hičiće! Dok mothasas tumende e Bahtali nevimata, ćerdam bući e račava thaj dešēja te na avas khonikašće tumendar po tereto. **10** Tumen thaj o Del sen amende svedokurja kaj sveto, pravedno thaj besprekorno vladisajlam prema tumende save pačan. **11** A džanen kaj prema svakoneste tumendar, ponašisajlam sago o dad prema pire čhavra. **12** Hrabrisardam tumen, tešisardam thaj opomenisardam tumen te trajin dostojno e Devlešće, savo akharel tumen ande piro Carstvo thaj piri slava. **13** Zato uvek das najs e Devlešće kaj e Devlešći poruka, savi ašundine amendar, či primisardine sago e manušení poruka, nego gajda sago kaj voj čače si: sago e Devlešći poruka savi deluil ande tumende save pačan. **14** Kaj, vi tumen phralalen thaj phejalen, sledinas o primer sago vi okola andar e Devlešće khandiri ande Judeja save si ando Hristo Isus, kaj vi tumen isto propatisardine katar tumaro them sago vi von katar e Židovurja, **15** katar okola save mudardine e Gospode Isuse thaj e prorokonon, a vi amen progoninas. Von či ugodin e Devlešće thaj protivin pe sa e manušenje **16** kaj či mućen amende te propovedisaras okolende save naj Židovurja te vi von spasin pe, gajda von pherdine e mera pire bezehenca. Ali e Devlešći bari holji konačno aresla len. **17** A amen, phralalen thaj phejalen, pošto samas odvojime tumendar e telosa, ali na vi e ileja, ande bari želja rodasas prilika te avas tumende te dikhas tumen. **18** Zato kamlam te avas tumende. Me, o Pavle lično, majbut drom, ali o Satana sprečisarda men. **19** Kaj, ko si amari nada, amari bah, ili o venco saveja avas ponosne angle amaro Gospod Isus kana palem avela? Naj sen li godova tumen? **20** Ej, Tumen sen amari slava thaj amari bah!

3 Pošto našti majbut inčardam, odlučisardam te ačas ande Atina, **2** a e phrale e Timoteje, e Devlešće suradniko ando propovedanje e Hristošći Bahtali nevimata, bičaldam te učvrstil tumen thaj te ohrabril tumen ando pačiće, **3** te khonik na obeshrabrilpe akale nevoljenca. Vi korkoro džanen kaj e nevolje dogodin pe amende. **4** Dok samas maškar tumende, majanglal phendam tumende kaj tprisaras kasave nevolje. Thaj sago kaj džanen, gajda vi sas. **5** Zato našti majbut inčardem pa bičaldem e Timoteje te saznajiv sar ačhen ando pačiće. Daravas pale tumende te o kušači na anda tumen ando iskušenje thaj te amaro trudo nas uzaludno. **6** A o Timotej baš akana bolda pe tumendar thaj anda amende lači poruka pale tumaro pačiće thaj pale

tumari ljubav. Phendas kaj još e bahtasa den tumen godi amende thaj kaj kamen te dičen men, sago kaj vi amen kamas te dikhas tumen. 7 Zato, phralalen thaj phejalen, utešisajlam tumare zurale paćimava ande sa amari teskoba thaj ande amari nevolja. 8 Amen akana vi čače trajisaras kana džanas kaj čvrsto ačhen ando Gospod. 9 Sar dovoljno te das najs e Devlešće pale tumende, pale sa e bah savjava raduji men zbog tumende angle amaro Del. 10 Ćesenca thaj e raćenca e ilestar moli men e Devlešće te šaj palem dikhas tumen thaj te pheras tumende okova so falil tumen ande tumaro paćipe. 11 Neka korkoro o Del amaro Dad thaj amaro Gospod Isus usmeril amaro drom te avas tumende! 12 A tumende neka o Gospod del te barjon thaj te avel tumen bari ljubav jek pale avreste thaj vi pale sa e manuša, sago kaj amen si pale tumende. 13 Neka aven tumare ile zurale te aven besprekorne thaj svete anglo Del amaro Dad, po Ćes kana avel amaro Gospod o Isus pire sa manušenca.

4 Po krajo, phralalen thaj phejalen, sikadam tumen sar trubun te trajin thaj te ugodin e Devlešće, tumen gajda već vi trajin. Akana molisaras tumen thaj ohrabrisaras tumen ando Gospod Isus te trajin gajda sa majbut. 2 Džanen e upute save dijam tumen ando alav e Gospode Isusesko. 3 O Del kamel te aven svete thaj te inčaren tumen majdur katar o bludo. 4 Gajda svako amendar džanela te inčarel piro telo sveto thaj časno, 5 a na ande požudno strast sago okola save či pindžaren e Devle. 6 Na ćeren nepravda tumare phralešće niti hohaven les gajda kaj soven lešće romnjava. Kaj o Gospod pale sa godova osvetila pe, sago kaj već mothodam thaj upozorisardam tumen. 7 Kaj o Del či akharda men te trajisaras rumome trajo, nego sveto. 8 Prema godova, ko odbacil akala upute, či odbacil e manuše, nego e Devle savo del tumen piro Sveto Duho. 9 A pale phralendi ljubav savi moraš te vladil maškar e Devlešće manuša či trubul ni te ramov tumende kaj o Del korkoro sikada tumen te volin jek avres. 10 A tumen vi čače sikaven bari ljubav e phralende pe sasti Makedonija. Ipak molisaras tumen, phralalen thaj phejalen, te ande godova još majbut napredujin. 11 Trudin tumen te trajin po miro, te dičen tumare buća thaj te e vlastite vastenca ćeren bući sago kaj mothodam tumende. 12 Gajda časno trajina angle bipaćivale manuša thaj khonik či trubula e lovenca te pomožil tumende. 13 Či kamas, phralalen thaj phejalen, te či džanen so avel okolenca save muline, pa te tugujin sago okola saven naj nada. 14 Amen pačas kaj o Isus mulo thaj uštilo andar e mule, askal pačas vi kaj o Del e Isuseja vazdela andar e mule vi okolen save muline e paćimava ande leste. 15 Akava

phenav tumende e Gospodešće alavenca: amen džude save ačas dok o Gospod či avel, či malavasa les majsigo katar okola save muline. 16 Kaj, korkoro o Gospod pe zapovest, po glaso arhandelosko, po zvuko e Devlešće trubako, fuljela andar o nebo, thaj prvo uštena okola save muline e paćimava ando Hristo. 17 Askal amen, save ačhilam džude, avasa line zajedno lenca ande visine, pe oblakurja, ando susret e Gospodešće, te avas leja pale uvek. 18 Gajda tešin jek avres akale alavenca!

5 A kana thaj sar sa godova avela, phralalen thaj phejalen, naj potrebno te ramov tumende. 2 Kaj vi korkoro lačhe džanen kaj o Ćes e Gospodesko avela iznenada sago o Ćor ande rjat. 3 Dok e manuša još mothona: "Sa si mirno thaj sigurno", iznenada aresela len lendi propast sago e duk e khamne romnja, thaj našti našena. 4 Ali tumen, phralalen thaj phejalen, naj sen ande tama, te godova Ćes avel iznenada pe tumende sago o Ćor. 5 Kaj, savora tumen sen čhavra e svetlošće thaj čhavra e desešće. Amen či pripadisaras e raćaće niti e tamaće. 6 Zato na te sovas sago aver, nego džugade thaj trjazne te avas. 7 Kaj, okola save soven, soven raćava, thaj okola save maton, maton raćava. 8 A amen, pošto pripadisaras e desešće, trjazne te avas thaj te las pe amende o oklop so si o paćipe thaj e ljubav, thaj te čhas po šoro e kaciga, so si e nada ando spasenje! 9 Kaj o Del či losarda men pale piri bari holji, nego te avel men spasipe kroz amaro Gospod Isuso Hristo, 10 savo mulo pale amende, te džude ili mule zajedno lesa trajisaras. 11 Zato ohrabrin thaj izgradin jek avres, sago vi kaj ćeren. 12 Ali moliv tumen, phralalen thaj phejalen, te poštuin okolen save trudin pe maškar tumende, thaj save vodin tumen thaj sikaven tumen ando Gospod. 13 Poštuin len thaj volin len zbog e bući savi ćeren. Trajin maškar tumende ando miro jek avresa. 14 Molisaras tumen, phralalen thaj phejalen, opomenin okolen kaj khanči či ćeren po soro Ćes, ohrabrin kolen save si malodušne, pomognin kolende kaj si slabe, aven strpljive prema savorende. 15 Len sama te na vareko varekašće boldel bilačhipa palo bilačhipa, nego uvek trudin tumen te ćeren lačhipa jek avrešće thaj sa e manušenje. 16 Uvek raduin tumen! 17 Stalno molin tumen! 18 Den najs pale sa, kaj godova si e Devlešći volja pale tumende ando Isuso Hristo. 19 Na mudaren e jag e Sveto Duhošći, 20 o proroštvo na prezirin, 21 sa proverin thaj zadržin so si lačhe. 22 Katar svako bilačhipa len tumen majdur. 23 A korkoro o Del e mirosko, neka dovršil tumaro posvećenje, te sasto tumaro biće – o duho, e duša, thaj o telo – avel besprekorno dok či avel amaro Gospod o Isus Hrist. 24 Verno si o Del savo akharel tumen. Vo godova vi ćerela. 25

Phralalen thaj phejalen, molin tumen vi pale amende. 26
Pozdravin sa e phralen ande ljubav. 27 Dav tumen solah te
čitol pe akava lil sa e phralende thaj e phejende. 28 Milost
amare Gospodesko e Isuse Hristosko nek avel tumenca!

2 Solunjanende

1 Akava lil ramov me o Pavle, o Silvan thaj o Timotej e khandirjače ando Soluno, savi si ando Del amaro Dad, thaj ando Gospod Isus Hrist. **2** Milost tumende thaj miro katar o Del amaro Dad thaj katar o Gospod Isus Hrist! **3** Udžile sam uvek te das najs e Devlešće pale tumende, phralalen thaj phejalen, so si vi ispravno, kaj tumaro pačiće sa majbut barjol, a tumari ljubav maškar tumende sa majbut zuravol. **4** Zbog godova ponosno čeras svato pale tumende pe aver Devlešće khandirja pale tumari strpljivost thaj tumaro pačiće ande progonstvurja thaj ande nevolje save trpin. **5** Sa godova si dokaz kaj o Del pravedno sudil thaj kaj avena dostojne pale Devlesko carstvo pale savo akana trpin nevolje. **6** Kaj, o Del si pravedno te boldel e muka okolende save tumen mučin, **7** a tumende, save sen mučime, ločarel zajedno amenca, kana o Gospod Isus objavilpe katar o nebo pire moćne andelenca **8** ande plamtečo jag. Vo kaznila okolen save či pindžaren e Devle thaj či pokorin pe e Bahtale nevimatače katar amaro Gospod Isus. **9** Von avena kaznime pe večno propast, dur katar e Gospodesko muj thaj katar lešči silno slava, (aiōnios g166) **10** pe okova des kana vo avela te proslavilpe ande pire manuša thaj te divin pe sa save paćan. A godova odnosil pe vi pe tumende, kaj paćaine ande amaro svedočanstvo. **11** Zato moli men uvek pale tumende te o Del čerel tumen te aven dostojne pale lesko poziv thaj te pire silava pherel svako tumari lači namera thaj svako tumaro lačo delo potaknutime e paćimava, **12** te o alav amare Gospodesko e Isusesko proslavilpe ande tumende, a tumen ande leste, kroz e milost amare Devlešči thaj e Gospodešči e Isuse Hristošči.

2 Akana, phralalen thaj phejalen, si man vareso te phenav tumende so ticolpe palo avipe amare Gospodesko e Isuse Hristosko thaj pale godova kana čidas men oko leste. **2** Na olako te hasaren o razum ili te uznemirin tumen ako ašunen kaj e Gospodesko des već avilo. Varesave godova šaj phenen gajda kaj tvrdin kaj si len o proročko duho, ili te godova prepisin e sikavipešće ili e lilešće, savo navodno amen ramosardam. **3** Na den khonikašće te hohavel tumen ni pe savo način, kaj e Gospodesko Des či avela dok majsigo či avel dži ke pobuna protiv o Del thaj či sikadol o Manuš e bizakonesko, čhavo savo avela uništíme. **4** Vo protivila pe thaj vazdela pe iznad sa e bićurja saven e manuša poštujin thaj akharen del. Vo čak avela ande Devlesko hramo, bešela po prestolje thaj korkoro pes proglasila devlesa. **5** Zar či den tumen gođi kaj akava phenavas tumende još dok semas

tumenca? **6** Akana džanen so inčarel les te či pojavilpe dok či avel lešči vrjama. **7** Kaj, e tajna e bizakonešči već si po delo, a okova savo akana zadržil lat, zadržil lat dok korkoro či avel uklonime. **8** Askal pojavila pe o Manuš e bizakonesko. Les o Gospod Isus mudarela e dahosa andar piro muj thaj uništila les pire slavava ande savi avela. **9** A o Manuš e bizakonesko avela e Sotonešće silava, thaj čerela razne hohamne znakurja thaj čudurja. **10** Thaj koristila svako vrsta bilačipe thaj hohaibe te zavodil okolen save propadin, kaj odbisardine te volin o čačiće thaj te gajda spasin pe. **11** Zato o Del bičhale lenđe zurali zabluda te paćan ando hohaibe, **12** thaj te aven osudime savora save či paćajine ando čačiće, nego uživinas te trajin ando bilačipe. **13** A amen sam uvek udžile te zahvalis e Devlešće pale tumende, phralalen thaj phejalen saven o Gospod volil, kaj o Del katar o početko izabirisardas tumen te spasin tumen gajda kaj o duho čerela tumen te aven svete thaj te paćan ando čačiće. **14** Pe godova akharda tumen kana amen propovedisardam tumende e Bahtali nevimata te avel tumen talo ande slava amare Gospodešči e Isuse Hristošči. **15** Zato, phralalen thaj phejalen, čvrsto ačhen thaj inčaren tumen ko sikavipe savo predaisardam tumende bilo te sas osobno e alavenca ili kroz o lil save ramosardam tumende. **16** A korkoro amaro Gospod o Isus Hrist thaj o Del, amaro Dad, savo zavolisarda men thaj savo pe piri milost dija men večno uteha thaj lači nada, (aiōnios g166) **17** neka utešil tumare ile thaj učvrstil tumen ande svako lačo delo thaj alav.

3 Thaj po krajo, phralalen thaj phejalen, molin tumen pale amende, te o alav e Gospodesko brzo buljol thaj te proslavilpe, baš sago vi tumende. **2** Isto gajda molin tumen te izbavisaras men katar e rumome thaj bilačhe manuša, kaj naj savoren pačiće. **3** Ali, o Gospod si verno, vo zurjarela tumen thaj aračhela tumen katar o Bilačho. **4** A amen sam uverime ando Gospod kaj čeren okova so phendam tumende thaj kaj vi majdur čerena. **5** A o Gospod neka usmeril tumare ile ke Devlešči ljubav thaj ke Hristošči strpljivost. **6** A akava zapovedisaras tumende, phralalen thaj phejalen, ando alav e Gospodesko e Isuse Hristosko te len tumen majdur katar svako phral savo trajil bibučarno thaj či trajil ando sikavipe savo primisardine amendar. **7** Tumen, vi korkoro lačhe džanen kaj trubul te dičhen tumen pe amende, kaj nikad či samas bibučarne kana samas maškar tumende, **8** niti amen halam varekasko mangro ivja, nego amen phare čerasas bući te khonikašće tumendar na avas po tereto. **9** Na zbog godova kaj či avilosas men pravo pe godova, nego sar dijamas tumen amaro lično primer te dičhen tumen pe

amende. **10** Dok samas još maškar tumende, dijam tumen akaja zapovest: "Okova savo či kamel te ćerel bući, neka na ni te hal!" **11** Ašundam, kaj varesave tumendar trajin bibučarne, khanči či ćeren, nego hamin pe ande avrenđe buća. **12** Kasavenđe zapovedisaras thaj molisaras len ando alav e Gospodesko e Isuse Hristosko, neka mirno ćeren bući thaj neka han piro mangro. **13** A tumenđe, phralalen thaj phejalen, neka na dojadil te ćeren lačhipe. **14** Ako vareko či kamel te čhol kan ke akava so mothas ando lil, inćaren les pe jak. Na družin tumen lesa te šaj ladžavol, **15** ali na inćaren les sago dušmano, nego savetuin les sago phrales. **16** Neka korkoro o Gospod e mirosko del tumen miro ande svako vrjama thaj ande sa. O Gospod savorenca tumenca! **17** Me o Pavle, ramov akava pozdrav mungre vastesa. Gajda ćerav ande svako mungro lil sar džanglasas pe kaj me ramov. **18** E milost amare Gospodešći e Isuse Hristošći savore tumenca. Amin!

1 Timoteješće

1 Akava si lil katar o Pavle, apostoli e Isuse Hristosko, pe zapovest e Devlešči, amare Spasiteljēšči, thaj e Isuse Hristošči, savo si amari nada. **2** E Timoteješće, savo si mungro istinsko čhavo ando pačiḡe: Milost, milosrđe thaj miro katar Del o Dad, thaj katar o Hristo Isus, amaro Gospod. **3** Sago kaj zamolisardem tut kana teljardem te džav ande Makedonija, te ačhes ando Efes thaj te zapovedis varesave manušenḡe, te na majdur sikaven o hohavno sikavipe. **4** Thaj na te hasaren vrjama e beskorisne paramičenca thaj e rodoslovljeja. Godova samo anel majbut rasprave, nego so sikavel e Devlesko naum savo pindžarel pe kroz o pačiḡe. **5** A o ciljo pale akaja naredba si te e manušen avel ljubav andar o čisto ilo, lačhi savest, thaj čačo pačiḡe, **6** katar soste varesave manuša line pe majdur thaj boldine pe ande beskorisne svaturja. **7** Von kamen te aven učitelja e Mojsiješće zakonestar, a ni korkoro či hačaren so phenen ni so odlučno tvrdin. **8** Amen džanas kaj si o zakon lačno ako pravilno koristil pe. **9** A džanas kaj o Del či dijas o zakon pale pravedne manuša, već pale okola save či inčaren o zakon thaj pale buntovnikurja, pale bidevlešće manuša, pale bezehale, pale okola save naj svete nego svetovne, pale ubice save mudaren čak vi pire dade thaj pire deja, thaj pale sa aver ubice, **10** pale okola save si seksualno nemoralne, pale homoseksualcurja, pale okola save činjen thaj bičinjen e robonen, pale hohamne, pale okola save han solah bande, thaj pale sa so protivil pe e ispravno naukaće. **11** Godova sikavipe si prema e Bahtali nevimata e slavno thaj blagoslovime Devlešči, savo mande poverisarda. **12** Zahvalno sem e Isuse Hristošće, amare Gospodešće, savo dija man snaga gajda kaj smatrisarda man dostojno te del man piro poverenje te čhol man ande služba, **13** vi ako majsigo hulivas po Del, progonivas okolen save pačan thaj semas nasilniko. O Del smiluisajlo mande, kaj godova čeravas ando bi džanglipe thaj ando bi pačiḡe. **14** Ali e milost amare Gospodešči obilno izlisajli pe mande, zajedno e pačimava thaj e volimava ando Hristo Isus. **15** Akava si pouzdano sikavipe te potpuno prihvatil pe: O Isuso Hristo avilo po them te spasil e bezehalen, katar save sem me majgoro. **16** O Del smiluisajlo mande te avav primer savorende sar e Isuse Hristo si strpljenje vi e majgore bezehalenca. Gajda askal vi e aver manuša hačarena kaj vi von šaj pačan ande leste thaj te avel len večno trajo. (aiōnios g166) **17** Neka si slava thaj čast e Devlešće ande veke vekurja. Vo si večno, besmrtno thaj nevidljivo Caro, jedino Del. Amin. (aiōn g165) **18** Timoteje, čhaveja, poveriv

tuće akaja poruka saglasno okoleja so sas majsigo mothodo pale tute sago proroštvo. Sledisar akava proroštvo thaj vodija lačni bitka. **19** Inčar o pačiḡe thaj lačni savest save varesave odbacisardine thaj doživisardine brodolom ando pačiḡe. **20** Maškar lende si o Imenej thaj o Aleksandar, saven predaisardem e Sotonešće te sičon te na hulin po Del.

2 Ohrabrisarav tumen, majsigo katar sa, te molin pale sa e manuša, roden e Devlešči milost pale lende potrebe thaj zahvalin e Devlešće pale lende. **2** Molin tumen vi pale carurja thaj pale sa okola save si pe vlast, te šaj trajisaras ando miro, ande pobožnost, thaj ande svetost. **3** Godova si lačhe thaj ugodno e Devlešće, amare Spasiteljēšće. **4** Kaj vo kamel te sa o them spasil pe thaj te pindžaren o čačiḡe. **5** Kaj jek si o Del thaj jek si o posredniko maškar o Del thaj maškar e manuša, o Manuš o Isus Hrist, **6** savo dijas piro trajo sago otkup pale sa o them. Akava si akana svedočanstvo ande pravo vrjama. **7** Thaj ande godoja svrha me sem odredime palo propovedniko thaj palo apostoli. Čačiḡe phenav tumende či hohavav, odredime sem te okolen save či pindžaren e Devle sikavav o pačiḡe thaj o čačiḡe. **8** Kamav dakle, te e muškarcurja molin pes pe svako than, thaj te vazden e svete vas karingal o Del, bi holji thaj bi čingara. **9** A e manušnja neka len pe peste pristojne drže. Thaj nek kiiti pes umereno thaj jednostavno, a na e khuvde balenca, e sunakajesa, biserenca, ni e kuč haljinenca. **10** Umesto godova neka čeren lačhe dela, sago kaj priliičil e pobožne manušnjende. **11** Neka e manušnji sičol ando miro thaj ande sasti pokornost. **12** E manušnjaje či mukav te sikavel e manušes, niti te gospodaryl pe leste, nego neka avel mirno. **13** Kaj o Del prvo stvorisarda e Adame, pa tek askal e Eva. **14** Thaj nas hohado o Adam, nego e Eva sas hohadi thaj peli ando bezeh. **15** Ali e manušnja spasina pe gajda kaj bijanena e čhavren thaj ako ačhen verne, ande ljubav, ande svetost thaj ande razboritost.

3 Akava so phenav čačiḡe si: ako vareko kamel te avel starešina, časno služba kamel. **2** O starešina moraš te trajil besprekorno trajo. Moraš te avel pačivalo ječe romnjaće, moraš te avel poštuime, razborito, skromno, gostoljubivo thaj lačno učitelj. **3** Či tromal te avel matarno, niti nasilno, niti čingaralo, nego nek avel popustljivo thaj ljubazno, a na sago okola save volin e love. **4** Moraš lačhe te upravit pire familijava, a lešće čhavra moraš te čhon leste kan thaj te poštuin les. **5** Kaj ako o manuš našti upravljil pire familijava, sar vodila e briga pale e Devlešči Khandiri? **6** O starešina či tromal te avel terno ando pačiḡe te či uzoholil pes thaj te perel tale bendešči osuda. **7** Vi e manuša save naj

andar e Khandiri moraš te čeren lače svato pale leste te na perel ande benđešči zamka thaj te či ladžavol. 8 Isto gajda e đakonurja trubun te zaslužin poštuipe thaj te aven časne manuša, a na licemerne. Či troman te aven matarne niti pohlepne pale love. 9 Von trubun ande mirno savest sledin o čačo pačiipe. 10 A vi von majsigo trubun te aven proverime pa tek askal, ako si verne neka inčaren e đakonsko služba. 11 Lende romnja isto gajda trubun te zaslužin o poštuipe, thaj te aven časne manušnja, a na sklone te klevetin, trubun te aven umerene thaj ande sa pouzdane. 12 O đakon moraš te avel pačivalo ječe romnjače thaj lače te upravit pire čavrenca thaj pire čheresa. 13 Kaj okola save lače obavin e đakonsko služba steknin pešče lačo položaj thaj baro pouzdanje ando pačiipe ando Isuso Hristo. 14 Ramov tuče akava thaj nadiv man kaj uskoro avava tute, 15 a te zadržisajlem, tu džaneja sar trubul o manuš te ponašilpe ande Devlesko čher, savo si e Khandiri e džude Devlešči, stupo thaj temelji palo čačiipe. 16 Bi sumnja, e tajna palo pobožnost si bari: O Hristo pojavisajlo ando telo, e Duhosa sikadilo pravedno, e anđelurja dikhline les, e themešče sas propovedime pale leste, ando them pačanas ande leste, thaj ande slava sas vazdino ando nebo.

4 O Duho jasno phenel kaj ande poslednjo vrjama varesave džanatar katar o pačiipe thaj priklonina pe e hohamne duhonende thaj e benđešče naukače. 2 Kasavo sikavipe avel katar licemerja save mothon hohaipe, lendi savest otupisarda. 3 Von zabranin e manušenje te ženin pe thaj te han određeno vrsta habe savo o Del stvorisarda te zahvalne han okola save pačan thaj džanen o čačiipe. 4 Kaj, sa so o Del stvorisarda lačo si thaj či trubul te odbacil pe khanči so primil pe ande zahvalnost, 5 zato kaj si posvetime e Devlešče alaveja thaj e molitvava. 6 Sikav akava e phralen thaj e phejen thaj aveja lačo sluga e Isuse Hristosko, pravardo san ando čačiipe e pačimasko thaj ando lačo sikavipe savo sledis. 7 Le tut majdur katar e bidevlešče thaj mamijende paramiče, a vežbisar tut ando sveto trajo e Devlesa. 8 Kaj e vežba palo telo anel cikini korist, a e vežba ando pobožnost si korisno pale sa, pošto si lat obećanje vi pale akava trajo thaj vi palo buduće trajo. 9 Akaja poruka si čačiipe thaj zaslužil te avel potpuno prihvatime. 10 Pale akava amen trudi men thaj bori men, kaj amen amari nada čutam ando džudo Del, savo si Spasitelj sa e themengo, a majsigo okolengo save pačan. 11 Akava zapovedisar thaj sikav. 12 Na de khonikašče te majcara poštuil tut zato kaj san terno, nego av primer e vernikonende ando alav, ando ponašanje, ande ljubav, ando pačiipe thaj ande čistoća. 13 Dok me či

avav, posvetisar tut te čitos o Sveto lil angle manuša, te ohrabris, thaj sikaves e vernikonen. 14 Na zanemarisar o duhovno daro savo primisardan kroz o proročanstvo gajda kaj e starešine čhutine pire vas pe tute. 15 Av potpuno posvetime godolešče te savora dičhen čiro napretko. 16 Le sama pe tute thaj po sikavipe. Ačh ande okova so si ispravno gajda spasija tut thaj okolen kaj čhon kan tute.

5 E purane manuše na kuš strogo, nego čer lesa svato sago čire dadesa. E terne manušenca postupisar sago e phralenca, 2 e purane manušnjenca sago čire dejenca, a e čhejenca sago čire phejenca ande sasti čistoća. 3 Poštujisar okole udovicen save si čače udovice. 4 Ali, ako e udovica si čhavra ili unukurja, neka von majsigo sičon te sikaven piri pobožnost gajda kaj vodin e briga pale piri familija, thaj te odužin pe pire dadešče thaj pire dejače. Akava si ugodno e Devlešče. 5 Pravo udovica, savi si korkoro thaj naj lat khonik te vodil briga pale late, pouzdilpe ando Del. E raćenca thaj e đesenca rodel lestar pomoć thaj molil pe. 6 Ali e udovica savi trajil raspustime vi ako si džudi, duhovno si muli. 7 Kava zapovedisar lende te aven bi zamerakako. 8 Ali, ako vareko či vodil briga pale pire familija, a posebno pale pire čerutne, odrekisajlo katar o pačiipe thaj majgore si katar okola save či pačan ando Del. 9 Na ramon po udovičko popis ni ječe udovica, ako još naj lat šovardeš brš thaj savi sas majbut katar jek drom udajime. 10 Voj moraš te avel pindžardi pe pire lače dela: kaj lače odgoisarda pire čavren, kaj sas gostoljubivo, kaj thovelas e pungere e Devlešče manušenje, kaj pomožilas okolende save sas ande nevolja, kaj predano čerelas svako lačo delo. 11 E majterne udovicen na ramo ando udovičko zapis. Kaj, kana e telesno požuda savladil lendi odanost e Hristošče, kamen te udajin pe. 12 Gajda pe peste crden osuda, pošto ušadin e prvo vernost. 13 A osim godova, džan katar o čer dži ko čer thaj sičon te aven bibučarne. Thaj na samo godova, nego hamin pe ande averende buća, brbljive si thaj čeren svato okova so či trubun. 14 Zato savetuiv te e majterne udovice udajin pe, thaj bijanen čhavren, te aven domačice thaj te na den nisosko povodo e dušmanošče te klevetil. 15 Kaj varesave već boldine pe katar o pačiipe thaj teljardine palo Sotona. 16 Ako varesave vernica si udovice saven pomognil, neka majdur vodil briga pale lende, te e khandiri či avel opteretime, nego te šaj pomožil e prave udovicende. 17 E starešinende save lače upravin piri služba ande khandiri trubul te del pe dvostruko čast, a majsigo okolende save propovedin thaj sikaven. 18 Kaj ando Sveto lil ramol: "Na phande o muj e guruvesko savo vršil o điv!" thaj "O radniko

si vredno te primil piri počin." 19 Na primi e pritužbe protiv o starešina, osim uz duj ili trin svedokurja. 20 Okolen save grešin ukorisar angle savorende te vi ande averende del e dar. 21 Dav tut solah anglo Del, anglo Isus Hristo thaj angle izabrane anđelurja, te inčares akala upute bi predrasuda. Thaj na čer khanči pristrasno. 22 Ni pe kaste na čho čire vas gajda brzo. Na av učesniko ande bezeha e aver manuše. Arakh tut čisto! 23 Na majbut pi samo paj, nego le cara vi mol zbog čiro di thaj zbog čiro često nasvalipe. 24 E bezeha varesave manuše jasno dičon angle savorende thaj anglal sikaven kaj avena sudime. A si vi okola savende bezeha dičhona majposle. 25 Gajda si vi e lače delenca, dičhon angle savorende a varekana vi či dičhon, ali naši garaven pe nikad.

6 Savora save si talo robstvo neka pire gospodaren smatrin kaj si dostojne te primin potpuno poštupe, te či bilače čerel pe svato pale Devlesko alav thaj pale amaro sikavipe. 2 A okola roburja savende gospodarja si vernikurja, či troman majcara te poštuin pire gospodaren zato kaj si phral. Naprotiv, trubun te služin lenđe još majlače, kaj pire trudosa si korisne averende. Godova sikav thaj mang lendar te čeren gajda. 3 Ako vareko averčande sikavel e manušen thaj zanemari o čačo sikavipe amare Gospodesko e Isuse Hristosko thaj o sikavipe savo si temelji te trajisaras pobožno trajo, 4 kasavo manuš si barikano thaj či džanel khanči. Patil katar e želja te samo prepiril pe thaj te bolden jek avrešće alava, zbog soste avel dži ke zavist, čingara, vredepe, thaj bilače sumnje, 5 godola si čingaraće manuša bilače godasa save či džanen majbut so si čačipe, von smatrin kaj si e služba e Devlešće, način sar te zaradin. 6 O pobožnost si pravo barvalipe ako si o manuš zadovoljno okoleja so si les. 7 Kaj amen khanči či andam pe akava them, pa khanči lestar či ni indarasa. 8 Ali ako si amen habe thaj drze, godoleja šaj te avas zadovoljne. 9 A okola save kamen te barvavon, peren ando iskušenje, ande zamka thaj ande but aver nerazumne thaj štetne želje save strovalin e manušen ande propast thaj ando uništenje. 10 Kaj e pohlepa pale love si uzrok pale svako bilačipe. Varesave predajisajle e pohlepaće thaj odlutisardine katar o pačipe, thaj korkoro pešće andine but bilačipe. 11 Ali tu, e Devlešće manušeja, letu majdur katar sa godova. A dža pale pravda, palo pobožnost, palo pačipe, pale ljubav, strpljivost, thaj pale blagost. 12 Borisar tut lači borba ando pačipe. Težisar palo večno trajo savo o Del dija tut thaj pale savo gajda šukar svedočisardan angle but e svedokurja. (aiōnios g166) 13 Zapovediv tuće anglo Del, savo sa džudarel thaj anglo Isuso Hristo, savo dijas šukar svedočanstvo anglo Poncije

Pilato: 14 Izvršisar akaja zapovest čisto thaj besprekorno dok či boldel pe amaro Gospod o Isuso Hristo. 15 Kaj kana pale godova avela e vrjama, o Del sikavela e Hristo. O Del savo si blagoslovime thaj jedino vladari, Caro e carengo thaj Gospodari e gospodarengo godova čerela. 16 Vo si jedino besmrtno thaj trajil ande kasavo sjajno svetlo kaj khonik našti avel leste paše. Khonik katar e manuša či dikhla les niti šaj dičhel les. Lešće neka si čast thaj moć zauvek. Amin. (aiōnios g166) 17 Okolende save si barvale pe akava them zapovedisar te na aven barikane thaj te či uzdinpe ando nesigurno barvalipe, nego ando Del, savo barvale dela men sa te ande godova uživisaras. (aiōn g165) 18 Zapovedisar te čeren lačhipe, te aven barvale e lače delenca, te aven darežljive thaj voljne te delin, 19 gajda te čiden pešće blago savo avela lačo temelji palo budućnost, te zadržin istinsko trajo. 20 Timoteje, le sama pe okova so si tuće poverime. Le tut majdur katar o isprazno brbljanje thaj katar e čingara zbog godova sikavipe so akhardol hohavno "Džanglipe" savo protivil pe e čačipešće. 21 Varesave save prihvatisardine godova "Džanglipe" thaj odlutisardine katar o pačipe. E Devlešći milost neka avel savorencia tumenca. Amin.

2 Timoteješće

1 Akava si lil savo ramosarda o Pavle, apostol e Isuse Hristosko savo si bičhaldo e Devlešće voljasa, te navestil o trajo savo o Del obečisarda kroz o pačipe ando Isuso Hristo. **2** Mungre voljeno čhavešće e Timoteješće: Milost tuće, milosrđe thaj miro katar o Del o Dad thaj katar o Isus Hristo amaro Gospod. **3** Timoteje, zahvalno sem e Devlešće, savešće služiv ando čisto savest sago vi mungre pradada, dok dav man godi tute ande mungre molitve e đesenca thaj e raćenca. **4** Kana dav man godi ke čire jasva, astarel man e želja te dikhav tut thaj te razveseliv man. **5** Dav man godi ke čiro iskreno pačipe savo si tut ando Del – sago kaj sas majprvo čire mamija e Loida, a askal vi čire de ja e Evnika. Uvereno sem kaj vi tut akana si kasavo pačipe. **6** Zato dav tut godi te raspiris o duhovno daro savo dija tut o Del kana čutem mungre vas pe tute. **7** Kaj o Del či dija men Duho te avas darane, nego dija men Duho savo del amen snaga, ljubav thaj razboritost. **8** Na ladža te svedočis palo amaro Gospod, niti pale mande, vi ako sem ando phanglipe! Av spremno te trpis manca zbog godova kaj navestis e Bahtali nevimata. O Del dela tut snaga pale godova. **9** Vo spasisarda men thaj akharda amen te trajisaras e sveto trajosa – na zato kaj godova zaslužisardam amare delenca, nego zato kaj godova sas lesko naum još katar o večnost te del amen piri milost ando Isus Hristo. (aiōnios g166) **10** Akana sa godova objavisarda amende sar avilo amaro Spasitelj o Isuso Hristo, savo uništisardas o smrto thaj čerda te zasjail o trajo thaj o bimeripe kroz e Bahtali nevimata. **11** O Del čhuta man te avav propovedniko, apostol thaj učitelj e Bahtale nevimatako. **12** Zbog godova vi trpiv sa akava. Ali či ladžav katar godova, kaj pindžarav okoles ande savo pouzdiv man thaj sigurno sem kaj Vo šaj arachel okova so si mande poverime dži ke okova đes. **13** O uzor neka avel tuće o lačo sikavipe savo mandar ašundan ando pačipe thaj volipe ando Isuso Hristo. **14** Lače arakh o dragoceno lačhipe savo si tuće poverime pomoću e Sveto Duhosa savo trajil ande amende. **15** Sago kaj džanes, sa andar e Cikni Azija boldine mandar e zeja – maškar lende si vi o Figel thaj o Ermogen. **16** Neka o Gospod sikavel pesko milosrđe e Onisiforošće familijaće kaj često ohrabrilas man thaj či ladžalas mandar kaj sem ando phanglipe. **17** Naprotiv, kana vo sas ando Rimo, brižljivo roda man thaj arakhla man. **18** Neka o Gospod del les piro milosrđe ande godova đes. Tu lače džanes pe kozom but načinurja vo pomožisarda man ando Efes.

2 A tu Timoteje, čhaveja, zuravo ande milost savi del amen o Isuso Hristo! **2** Okova so ašundan mandar angle but e svedokurja, godova poverisar e pačivale manušenje save avena sposobne avren te sikaven. **3** Delisar manca o pharipe sago lačo vojniko e Isuse Hristosko! **4** Khonik savo služil sago vojniko thaj kamel te ugodil pire zapovednikošće, či hamil pe ande svako đesešće trajošće buća. **5** Thaj ako vareko takmičil pe, či dobila e nagrada ako či takmičil pes pe pravila. **6** O zemljoradniko savo naporno čerel bući trubul prvo te uživil ande plodurja pire trudošće. **7** Gndisar pe godova so phenav tuće! O Gospod dela tut te sa hačares. **8** Zapamtisar o Isuso Hristo savo uštilo andar e mule, savo si e Davidesko potomko, prema e Bahtali nevimata savi propovedisarav. **9** Pale late trpiv nevolje ande okurja sago kaj sem varesosko zločinco. Ali te sem me ande okurja, e Devlesko alav našti te avel okuime! **10** Spremno sem sa te trpiv pale okola saven o Del odabirisarda te isto gajda postignin o spasenje thaj večno slava ando Isuso Hristo. (aiōnios g166) **11** Akava si sigurno čači pe: Te mulam e Isuseja, lesa vi trajisaras. **12** Ako nastavisaras te trpisaras nevolje, lesa vi caruisaras. Ako odrekni men lestar, vi vo amendar odreknila pe. **13** Ako sam lešće bipačivale, vo ačhela pačivalo kaj vo našti odreknil pe korkoro pestar. **14** De godi e manušen pe godova thaj upozorisar len anglo Del te na traden pe maškar pende zbog e alava. Kaj godova khanči či koristil, a po propast si okolende save čhon kan. **15** De sa tutar te sikaves tut anglo Del sago dostojno radniko saves naj sostar te ladžal, thaj savo ispravno inčarel o čačo alav. **16** Katar e bezbožne thaj dilivane svaturja le tut majdur kaj crden sa majbut ande bezbožnost. **17** Kasave alava si sago e putardi rana savi buljol. Maškar lende si duj manuša, o Imenej thaj o Filit. **18** Von dujril katar o čači pe thaj tvrdin kaj o uštipe andar e mule već sas. Von godolesa crden varesaven katar o pači pe. **19** Ali e Devlesko čači pe ačhel čvrsto sago o temelji pe savo ramol: "O Gospod pindžarel okolen save si lešće" thaj "Ko god tvrdil kaj pripadil e Gospodešće nek lel pes majdur katar o bilači pe." **20** Ando barvalo čer si vasurja čerdine katar o sunakaj thaj katar o rup, ali vi katar o kaš thaj vi katar e glina. Jek koristin pe ande časne, a aver ande nečasne svrhe. **21** Ako o manuš šilavel pes katar sa godola bilače buća, avela posvetime, časno thaj koristime posuda pire Gospodešće, pripremimo pale svako lačo delo. **22** Katar e ternikane požude naš! Dža pale, pravednost, pači pe, ljubav, miro, zajedno okolenca save čiste ilenca rode e Gospode! **23** Le tut majdur katar e dile thaj nerazumne rasprave, kaj džanes kaj godova anel samo čingara. **24** A o sluga e Gospodesko či tromal te hal

pes, nego trubul te avel ljubazno prema savorende. Moraš te avel sposobno te sikavel thaj te avel strpljivo thaj te trpil o bilačhipe, 25 te ande blagost poučil e protivnikonen, sar o Del dijas len šansa te pokajin pe thaj te pindžaren o čačipe. 26 Thaj te aven peste, thaj len pes majdur andar e zamka e benđešći, savo zarobisarda len te čeren lešći volja.

3 Akava zapamtisar Timoteje: ande poslednje đesa avela phari vrjama. 2 Kaj e manuša avena sebične thaj pohlepne pale love, avena ohole thaj barikane, vredona e Devle thaj avena neposlušne pire dadešće thaj pire dejaće, avena nezahvalne thaj khanči či avela lende sveto. 3 Avena bezosečajne, nepomirljive, okola save ogovorin, neopuzdane, surove, von či volina o lačhipe. 4 Avena izdajnikurja, okola save či gindin kana vareso čeren, barikane, thaj majbut volina o užitko nego e Devle. 5 Čerena pes kaj poštujin e Devle, ali či mučen te lešći sila promenil len. Le tut majdur katar kasave manuša! 6 Kasave si okola save crden pes ande čera thaj pridobin e manušnjen save si nestabilne thaj opteretime e bezahenca, savenca vladin e različite strasti. 7 Von uvek sičon, ali nikad či hačaren o čačipe. 8 Sago kaj o Janije thaj o Jamvrije usprotivisajle e Mojsijašće, gajda vi godola manuša usprotivisajle e čačipešće. Lende godi si rumome thaj nepokorno ando pačipe. 9 Ali von či aresena gajda dur kaj savorende, lendi dilimata avela jasno dikhlini sago kaj jasno sikhadili e dilimata katar o Janije thaj katar o Jamvirije. 10 A tu Timoteje verno sledis mungro sikavipe, načino sar trajiv, mungro ciljo, mungro pačipe, mungri strpljivost, mungri ljubav, mungri istrajnost. 11 Džanes save progonstvurja thaj patnje sas man ande Antiohija, ande Ikonijum thaj ande Listra. Ali o Gospod andar sa izbavisarda man. 12 A vi savora save kamen te trajin pobožno ando Isuso Hristo, avena progonime. 13 E bilače manuša thaj e varalice avena sa majgore thaj majgore, hohavena avren thaj vi korkoro avena hohade. 14 Ali tu Timoteje ačh ande okova so sičilan thaj ande soste san uverime, kaj svesno san kastar sičilan. 15 Thaj kaj katar o ciknipe pindžares e Svete lila, save dine tut mudrost te primis o spasenje po pačipe ando Isusu Hristo. 16 Svako si Sveto lil e Devlestar nadahnime thaj korisno palo sikavipe, te lel pe sama katar o bezeh, te ispravisaras e pogreške thaj te sikavel men sar te ispravno trajisaras, 17 te šaj e Devlesko manuš avel potpuno sposobno pale svako lačno delo.

4 Dav tut solah anglo Del thaj anglo Isuso Hristo savo sudila e mulende thaj e džudende thaj pale godova kaj vo avel te vladil sago Caro: 2 propovedisar e Bahtali nevimata! Av spremno te ispunis čiro zadatko vi kana si

tuće zgodno vi kana si tuće nezgodno! Phen e themende so trubun te čeren, opomenisar len kana grešin, ohrabrisar len strpljivo ande pouka. 3 Kaj avela e vrjama kana e manuša či kamena te čhon kan ko lačno sikavipe. Džana pale pire vlastite želje thaj pešće aračhena but aver sikavipe savo godila lende kanende. 4 Von boldena pire kan e čačipestar thaj džana pale hohamne paramiče. 5 Ali tu av ande sa godova trajazo. Podnesisar e patnja. Propovedisar e Bahtali nevimata. Potpuno ispunisar e dužnost savi dija tut o Del. 6 A so si dži mande, mungro trajo uskoro avela dino sago žrtva, thaj avili e vrjama kana trubul te džavtar katar akava them. 7 Lačne borisajlem palo mungro Gospod, e trka završisardem, o pačipe inčardem. 8 Pripremimo si mande o venco pravednosti savo o Gospod, o pravedno sudco, dela man po đes kana avela. Thaj na samo mande nego savorende save čeznin palo đes kana pojavila pe. 9 Timoteje, moliv tut, av so majsigo mande. 10 O Dimas mukla man kaj zavolisardas akava them thaj delotar ando Soluno. O Kriskent delotar ande e Galatija, a o Tit ande Dalmacija. (aiōn g165) 11 Manca si samo još o Luka. An tusa e Marko kana aveja, kaj si mande korisno pale služba. 12 E Tihiko bičhaldem ando Efes. 13 Kana aveja, an mande o ogrtači savo muklem ande Karposko čer ande Troada. An vi e knjige, posebno okola save si čerde katar e morči. 14 O kovači savo akhardol Aleksandar andas mande but bi lačhipe. O Gospod počinela lešće prema lešće dela. 15 Vi tu le tut lestar sama kaj but protivisajlo amare alavende save propovedisardam. 16 Ke mungri prvo odbrana po sudo, khonik nas uz mande. Savora mukline man. Neka o Gospod godova či lel lende pale doš! 17 Ali o Gospod sas manca thaj dija man snaga te propovediv e Bahtali nevimata ande sasti punina te ašunen okola save či pindžaren e Devle. Thaj izbavisarda man andar e lavosko muj. 18 O Gospod izbavila man katar svako bilačhipe thaj aračhela man pale piro nebesko carstvo. Neka si lešće slava ande veke vekurja. Amin. (aiōn g165) 19 Pozdravisar e Priska thaj e Akila thaj e Onisiforosko čer. 20 O Erast ačhilo ando Korinto, a e Trofime nasvale muklem ando Milit. 21 Siđar te aves akaringal majsigo nego so avel o ivend. Pozdravin tut o Evulus, Pud, Lin, Klaudija, thaj sa e phral. 22 Neka o Gospod avel čire duhosa. Milost tumenca!

Titošće

1 Akava ramov me, o Pavle, o sluga e Devlesko thaj o apostol e Isuse Hristosko. Me sem bičhald o te okolen saven o Del losarda zuravav ando pačiće thaj te sikavav len te pindžaren o čačiće savo si ugodno e Devlešće. **2** Godova pačiće thaj o pindžaripe del len nada ando večno trajo savo o Del obečisarda lende katar e večnost, a o Del či hohavel. (aiōnios g166) **3** Ande pravo vrjama objavisarda e manuše piro alav kroz o propovedanje savo o Del, amaro Spasitelj, zapovedisardas mande te propovediv. **4** Ramov e Titošće, mungre čače čhavešće ando zajedničko pačiće: Milost thaj miro katar o Del o Dad thaj katar o Hristo Isus, amaro Spasitelj. **5** Muklem tut pe Krita pale godova te anes ando redo okova so nas dovršime thaj te pe thana čhos e starešinen ande zajednice sago kaj me naredisardem tuće. **6** O starešina trubul te avel manuš pale savo naj khanči bilače te mothol pe, rom pačivalo ječe romnjače, lešće čavra trubun te aven vernikurja, save či avena došarde palo bezehalo trajipe thaj kaj si bilače thaj neposlušne. **7** Kaj o nadgledniko, sago upravitelj e Devlešće čherešće, trubul te avel manuš pale savo naj khanči bilače te mothol pe, te na gindil samo pe peste, te na avel čingaralo, te na avel matarno, te na avel nasilniko, thaj te na avel sklono palo bilačo dobitko. **8** A trubul te avel gostoljubivo, te volil o lačhiće, razumno, pravedno, sveto thaj te si les kontrola pe peste. **9** Trubul zurale te inčarel pe ko čačikano sikaviće, te šaj te hrabil averen thaj te uveril e protivnikonen ando ispravno sikaviće. **10** Kaj si but neposlušne, brbljivcurja, thaj hohavne, osobito maškar okola save sikaven palo obrezanje. **11** Lende trubul o muj te phandvel pe, kaj zbog o bilačo dobitko upropastin e saste familijen gajda kaj sikaven okova so či trubul. **12** Jek katar lende, vi lengo proroko, korkoro phendas: "E manuša katar e Krita si uvek hohavne, opake zveri, bibučarne thaj handžvale po habe." **13** Godova si čačo svedočanstvo. Pale godova strogo kuš len, te aven saste ando pačiće, **14** thaj te majbut či zanosin pe e židovske paramičenca thaj e naredbenca katar okola save bolden e dume e čačimašće. **15** E čisto manuše e bezehendar si sa čisto, a okolende save si melale e bezehendar thaj e bipačivalende khanči naj čisto, nego si vi lendi godi thaj vi lendi savest melali. **16** Tvrđin kaj pindžaren e Devles, ali godova či dokažin pire delenca. Von si odvratne, nepokorne thaj naj sposobne te čeren bilo savo lačo delo.

2 A tu sičar savoren te složin pe e ispravno sikaviće: **2** e purane manušen sičar te aven staložene, dostojne

poštupe, razumne, ispravne ando pačiće, ande ljubav, thaj ando strpljenje. **3** Isto gajda, sikav e purane manušen te ponašin pe pobožno, te na ogovorin thaj te na aven matarne. Nego te sikaven okova so si lače. **4** Neka sikaven e majterne manušen te volin pire romen thaj pire čhavern, **5** te aven razumne, čiste ilenca, vredne domačiće, lače, poslušne pire romende, te či čerel pe bilače svato pale Devlesko alav. **6** Isto gajda, e terne čhaven ohrabrisar te aven razumne. **7** Ande sa av lende lačo primer gajda kaj čereja e lače dela. Ande okova so sikaves av iskreno thaj ozbiljno. **8** Neka čiro sikaviće avel gajda ispravno te okola save protivin pe tuće ladžavon kaj najlen so bilače te phenen pale amende. **9** E roburja ande sa moraš te pokorin pe pire gospodarende! Neka ugodin lende thaj nek či bolden lende o alav, **10** neka či čoren lendar, nego neka sikaven kaj šaj te pačalpe lende, te o sikaviće e Devlesko, amare Spasiteljeko, ande sa avel prihvatiće. **11** Kaj, pale sa e manuša o Del sikadas piri milost, savi anel spasenje. **12** E milost sikavel men te odrekni men katar o bezbožnost thaj akale themešće želje, te ande akava them trajisaras razumne, pravedne thaj pobožne (aiōn g165) **13** dok ažučaras e Bahtali nada thaj te ande slava pojavil pe amaro baro Del thaj Spasitelj, o Isus Hrist. **14** Vo korkoro pes dijas pale amende te otkupil amen katar svako bezakonje thaj te čerel amen te avas čiste pale peste, thaj them savo pripadil samo lešće, savo uvek truil pe te čerel lače dela. **15** Sa akava sikav! Ohrabrisar thaj opomenisar ande sa o autoriteto! Thaj na muk te khonik preziril tut.

3 Stalno de godi e vernikonen kaj trubun te pokorin pe e šorvalende thaj okolende save si pe vlast. Phen lende kaj trubun te čhon kan lende thaj te aven spremne pale svako lačo delo. **2** Phen lende te či čeren bilače svato pale khonikaste. Neka či han pe thaj neka uvek aven blage thaj but ljubazne prema savorende. **3** Kaj vi amen samas varekana nerazumne, neposlušne thaj zavedime. Robuisardam e razne požudente thaj e svako vrsno užitkonende. Trajisarasas ando bilačiće thaj ande zavist, mrzanas amen thaj amen mrzisarasas avren. **4** Ali askal o Del, amaro Spasitelj, sikadas amende piro lačiće thaj piri ljubav prema e manuša. **5** O Del spasisarda men, na zbog amare lače dela save čerdam, nego zbog piro milosrđe. Thoda men katar o bezeh thaj dija men te bijandivas ande nevo trajo po Sveto Duho **6** saves obilno izlisardas pe amende kroz o Isus Hristo, amaro Spasitelj. **7** Prekal lešći milost sam opravidime anglo Del, te šaj postanisar naslednikurja ando večno trajo savešće nadi men. (aiōnios g166) **8** Sa so phendem tuće si čačiće. Thaj me kamav te godova čvrsto tvrdis, te okola

save paćaine e Devlešće posvetin pe gajda kaj ćerena laćhe dela. Godova si laćhe thaj korisno pale sa e manuša. **9** Le tut majdur katar e dile rasprave thaj katar o rodoslovlja katar e prepirke thaj katar e ćingara palo Zakono, kaj si beskorisne thaj bezvredne. **10** E manušes savo anel razdor opomenisar jekhar, pa duvar, a ako nastavil godoleja, le tut lestar majdur, **11** kaj tu džanes kaj si kasavo manuš rumome thaj ćerel bezeh. Vo korkoro pes osudil. **12** Kana bićhalava tute e Arteme ili e Tihiko, potrudisar tut te aves mande ando Nikopolj, kaj odlučišardem te ivendiv okote. **13** Potrudisar tut te pomognis e advokatošće e Zinošće thaj e Apološće ande sa so trubun palo drom, sar khanći či falisardasas lenđe! **14** A amare manuša trubun te posvetin pe gajda kaj ćeren laćhe dela, kaj god si čači potreba, sar či avilinesas bibućarne. **15** Pozdravin tut savora save si manca. Pozdravisar okolen save volin men ando paćipe. Milost tumenca savorenca.

Filemonešće

1 Akava ramov me o Pavle, savo sem ando phanglipe palo o Isuso Hristo, thaj manca o phral o Timotej, e dragone Filimonešće, amare saradnikošće, 2 e phejaće e Apfijaće, e Arhipešće amare suborcošće ando Hristo, thaj e khandirjaće ande čiro čer: 3 Milost thaj miro tumende e Devlestar, amare Dadestar thaj e Gospodestar e Isuse Hristostar. 4 Uvek zahvaliv mungre Devlešće kana moliv man pale tute Filimone, 5 kaj ašunav pale čiri ljubav pale sa e Devlešće manuša thaj pale čiro pačipe ando Gospod Isus. 6 Moliv man te amaro zajedništvo savo si amen ando pačipe anel tuće majhanduk hačaripe e svako lačhipestar savo si amen ando Hristo. 7 Kaj čiri ljubav but bahtarda man thaj utešisarda man, kaj tu, phrale, osvežisardan e ile e Devlešće manušenje. 8 Zato, vi ako si man ando Hristo pherdo pravo te zapovediv tuće so te čeres, 9 zbog e ljubav majradije moliv tut, kasavo sosko sem, me, o phuro Pavle, a akana vi ando phanglipe palo Isuso Hristo. 10 Moliv tut pale mungro čhavo Onisim, kašće postanisardem duhovno dad ando phanglipe. 11 Vo nas tuće majranije korisno, ali akana si korisno na samo tuće, nego si korisno vi mande. 12 Bičhalav les tuće palpale, les savo si mungro ilo. 13 Kamlem te ačhavav les mande, te služil mande umesto tute dok sem ando phanglipe pale Bahtali nevimata. 14 Ali či kamlem khanči te čerav dok tu či pristanis, sar akava lačo delo či avilosas sago moraš, nego katar čiri lači volja. 15 Šaj te sas baš andar godova pe harni vrjama odvojime tutar sar avilosas čiro pale sa e vrjama (aiōnios g166) 16 thaj na majbut sago robo, nego majlače katar o robo – sago voljeno phral. Vo si mande but drago, a kozom majbut avela tuće, ali na samo sago manuš, nego vi sago phral ando Gospod. 17 Pa ako, man inčares palo čiro saradniko primisar askal les sago kaj primisardanas man. 18 A te čerda tuće vareso pe doš ili ačhilo udžile tuće vareso, me godova lav pe mande. 19 Me, o Pavle, ramov akava mungre vastesa: me počinava tuće, a te na phenav kaj san mande udžile vi čiro trajo. 20 Ej, phrale, volisardemas te avel man tutar varesošči korist ando Gospod. Osvežisar mungro ilo ando Hristo. 21 Ramov tuće kaj sem uverime ande čiri poslušnost. Džanav kaj čereja vi majbut nego so mangav tutar. 22 Thaj još vareso: lačhar mande e gostinsko soba kaj nadv man kaj o Del uslišila tumare molitve thaj dela te uskoro avav tumende. 23 Pozdravin tut o Epafra, savo si zajedno manca ando phanglipe palo Hristo Isuso, 24 thaj mungre saradnikurja o Marko, o Aristarh, o Dimas thaj o Luka. 25 Neka e milost amare Gospodešči e Isuse Hristošči avel tumare duhosa.

Jevrejende

1 O Del ande okoja vrjama but droma thaj pe but načinurja motholas amare pradadende kroz e prorokurja, **2** ali ande akala poslednje đesa amende motholas kroz piro Čhavo. Les odredisardas te avel nasledniko pe sa, thaj kroz kaste stvorisarda vi o them. (aiōn g165) **3** O Čhavo si odsjaj katar e Devlešči slava thaj čačo odraz katar lesko biće, savo indarel sa pire silno alavesa. Pošto mulo te šilavel men katar o bezeh, bešlo ando nebo pe počasno desno rig e Devlešči savo sa šaj. **4** Gajda Vo postanisardas gadići majmočno katar e anđelurja kozom o Del dija les majuzvisime alav katar lengo. **5** Kaj savešće katar e anđelurja o Del varekana phendas: "Tu san mungro Čhavo, ades bijandem tut"? thaj još: "Me avava lešće Dad, a vo avela mande Čhavo"? **6** Thaj palem, kana e prvo bijande Čhave uvodil ando them, phenel: "Neka den koča angle leste sa e Devlešće anđelurja." **7** O Del phenel pale anđelurja: "Pire anđelen čerel balvajenca thaj pire slugen sar jagale plamenurja", **8** a e Čhavešće phenel: "Čiro prestolje, Devla, ačhel pale uvek. Pravedno vladis čire Carstvosa. (aiōn g165) **9** Volis e pravednost, a mrzis o bezakonje. Zato o Del, čiro Del, makhla tut e uljesa katar o bahtalipe sago ni jeće katar čire drugaren", **10** thaj: "Ando početko tu, Gospode, čhutan e temelurja e phuvjaće thaj e nebesa delo si čire vastengo. **11** Tu ačhes, a von nestanina thaj sa phurjola sago e drze. **12** Pačareja len sago ogrtači, zamenina pe sago e purane drze. A tu san uvek isto, čire bršende naj krajo." **13** Ni jeće anđelošće o Del nikad či phendas: "Beš pe mungri počasno desno rig dok či čhav čire dušmajen tale čire pungere." **14** Gajda, ko si e anđelurja? Von si duhurja save služin e Devlešće, bičhalde te služin okolende save nasledina o spasenje.

2 Zato još majbut trubul te las sama pe okova so ašundam, te či promašis o ciljo. **2** Kaj, o sikavipe savo o Del bičhaldal prekal e anđelurja sikadilo kaj si čačo thaj svako prestup thaj neposluh primisardas pravedno kazna. **3** Sar askal amen gndis kaj nakhasa bi kaznako ako zanemaris gajda baro spasenje? Godova spasenje prvo najavisardas o Gospod, a amende potvrdisardine okola save ašundine les. **4** A o Del potvrdisarda les e znakonenca, e čudenca thaj e silne delenca, sago vi e Sveto Duhošće darenca, save razdelisardas pe piri volja. **5** O Del či dija e namenisardas e anđelende te vladin e themeja savo avel a pale savo amen phenas. **6** Kaj, vareko varekaj posvedočisardas: "So si o manuš te des tu leste godi? Ili o čhavo e manušesko te vodis e briga pale leste? **7** Pe harni vrjama čerdan les

cara majcikne katar e anđelurja, okrunisardan les e slavava thaj e časteja, **8** sa čhutan tale lešće pungere." Kana o Del sa čhuta tale lešće pungere, gajda khandi či ačhilo so naj lešće podložime. Pa, ipak, još či dikhas kaj sa pokoril pe lešće. **9** Ali dikhas e Isuse, savo sas pe harni vrjama čerdo cara majcikno katar e anđelurja, ali akana si okrunime e slavava thaj e časteja zato kaj pretpisardas o smrto sar kroz e Devlešči milost okusisardas o smrto pale sa e manuša. **10** O Del, pale savo thaj kroz savo sa postojil, kamlas te avel les but čhave save učestvujina ande lešči slava, pa sas potrebno prekal e patnje čerel savršeno e Isuse savo indarel len ando spasenje. **11** Kaj, o Isus savo posvećuil len thaj vi okola save si posvetime silen isto Dad. Zato o Isus či lađžal te akharel len phralenca **12** kana phendas e Devlešće: "Objaviva čiro alav mungre phralende, dilabava najs tuće maškar e čidine manuša." **13** Thaj još: "Ande leste pouzdiva man." Thaj još: "Ake taman me thaj e čhavra saven o Del dija man." **14** Godola čhavra si katar o rat thaj o mas, gajda vi o Isus postanisardas manuš sago vi von, te pire smrtosa uništil e bende saves sas vlast po smrto, **15** thaj te oslobodil okolen save sasto piro trajo robuin e daraće katar o smrto. **16** Kaj, jasno si kaj o Isus či avilo te pomognil e anđelende, nego e Avraamešće potomkonende. **17** Zato sas potrebno te ande sa avel slično e phralende, te šaj anglo Del te postanil milosrdno thaj paćivalo Baro rašaj, savo ostvaril o jartipe pale bezeha e manušende. **18** Kaj, pošto vi korkoro trpisarda dok sas iskušime, šaj te pomognil okolende save si iskušime.

3 Zato, svete phralalen, tumen saven si udeo ando nebesko poziv, usmerin tumare gindurja po Isus, savo si Apostol thaj Baro rašaj amare paćimako. **2** Vo si verno e Devlešće savo postavisarda les, baš sago kaj sas vi o Mojsije verno e Devlešće ande sasto Devlesko čher. **3** A e Isusešće pripadil majbari slava nego e Mojsiješće, baš sago kaj okolešće savo gradil o čher pripadil majbari čast nego e čherešće savo sas čerdo. **4** Kaj, svako čher vareko gradil, a o Del sagradisardas sa so postojil. **5** O Mojsije sas verno sago sluga ande Devlesko čher, thaj svedočilas pale okova so o Del ande buduće vrjama objavila. **6** Ali o Hristo si verno sago Čhavo pe sasto lesko čher. A lesko čher sam amen, ako inčaras o pouzdanje thaj e nada savjava hvali men. **7** Zato, sago kaj o Sveto Duho phenel: "Ades ako ašunen lesko glaso, **8** neka či zuravon tumare ile sago ande vrjama kana tumare pradada pobunisajle, ando des kana iskušisardine les ande pustinja, **9** kaj tumare pradada iskušinas man thaj izazivinas man, vi ako štarvardeš brš dičhenas mungre dela. **10** Zato bari holji astarda man pe godova naraštaj thaj

phendem: 'Uvek ileja durjon mandar, thaj mungre droma či pindžardine.' **11** Gajda ande mungri bari holji halem solah: 'Či dena ando than mungre odmorosko!'" **12** Len sama, phralalen, te varekasko ilo maškar tumende či avel bilačo thaj bipačivalo, pa te džaltar e džude Devlestar. **13** Nego, svako đes, ohrabrin jek avres dži kaj god si okova "ađes", te na vareko tumendar zavedime katar o bezeh otvrđnil piro ilo. **14** Kaj sa amen si udeo ando Hristo ako dži ko krajo čvrsto inčaras o pouzdanje savo sas amen ando početko. **15** Sago kaj si mothodo ando Sveto lil: "Ađes ako ašunen lesko glaso, neka či zuravon tumare ile sago ande vřjama kana tumare pradada pobunisajle." **16** Kaj save si godola save ašundine, pa pobunisajle? Zar nas okola save n Mojsije inkalda andar o Egipt? **17** A pe save sas o Del holjariko štarvardeš brš? Zar nas pe okola save sagrašisardine thaj savende tela muline ande pustinja? **18** A savende godova hala solah kaj či dena ando than lešće odmorosko, ako či okolende save sas neposlušne? **19** Thaj dikhlam kaj našti dine ando than lešće odmorosko zbog piro bipačipe.

4 Dakle vi ako još vředil e Devlesko obećanje kaj dasa ande lesko odmor, daran te varekašće či dogodil pe te či del inča. **2** Kaj, vi amende si propovedime e Bahtali nevimata, baš sago vi lende. Ali, lende o alav savo ašundine nas katar o korist, kaj či prihvatisardine les e pačipeja sago okola save čutine kan leste. **3** Kaj ande lesko odmor das amen save pačajam, sago kaj o Del phendas: "Gajda ande mungri bari holji halem solah: 'Či dena ando than mungre odmorosko!'" Vo godova phendas vi ako si lešće dela završime još sar o them postanisardas. **4** Kaj, varekaj pale eftato đes gajda phenel: "A o eftato đes o Del odmorisajlo katar sa pire dela." **5** A akate si palem phendo: "Či dena ando than mungre odmorosko." **6** Okola save prve ašundine e Bahtali nevimata či dine ando odmor kaj nas poslušne e Devlešće. Dakle, akate si varesave aver džene save trubun te den ando than e odmorosko. **7** Zato o Del palem odredisarda aver đes, savo akharel "ađes". Vo phenel pale godova đes but brš majposle prekal o David, sago kaj si već mothodo: "Ađes ako ašunen lesko glaso, neka či zuravon tumare ile." **8** Godova than palo odmor naj o Hanaan ande savo indarda len o Isus Navin. Kaj te avilosas gajda, o Del majposle či mothodasas pale aver đes e odmorosko. **9** Dakle, ipak ačhel o eftato đes palo odmor e Devlešće manušenđe, **10** kaj ko del ande Devlesko odmor, odmorisajlo katar pire dela sago vi o Del nakon so stvorisarda o them. **11** Zato, trudi men te das ando odmor thaj te khonik amendar či propadnil gajda kaj sledil o primer okolengo save sas neposlušne e

Devlešće. **12** Kaj e Devlesko alav si džudo, delotvorno thaj majošto si katar svako mačo e duj oštricenca, thaj del dži okote kaj razdelil e duša thaj o duho, e zgloburja thaj e kokala. Vo prosudil e gindimata thaj e namere e ilešće. **13** Thaj naj stvorenje savo si garado anglo Del, a angle lešće jakha si sa putardo thaj jasno dičhol. Lešće savora moraš te dasa o računo. **14** Zato trubul čvrsto te inčaras o pačipe savo ispovedis, kaj si men uzvisime Baro rašaj savo đelo po nebo – o Isus, e Devlesko Čhavo. **15** Kaj, amen si Baro rašaj savo hačarelp amenca ande amare slabosti, kaj sas ande sa iskušime sago vi amen, samo či sagrašisardas. **16** Zato hřabro trubul te avas angle Devlesko prestolje milosti te primis milosrđe thaj milost baš kana si mende potrebno.

5 Svako baro rašaj losarelp katar e manuša thaj pale manuša čhol pe anglo Del te prinosil darurja thaj žrtve pale bezeha. **2** Vo šaj avel kovle ileja prema okola save si ando bidžanglipe thaj ande zabluda, zato kaj vi les korkore si slabost. **3** Zbog godova kaj si vi les slabost vo moraš te prinosil žrtve pale pire bezeha thaj vi pale manušenđe bezeha. **4** Godoja čast khonik našti lel korkoro pale peste, nego o Del akharel les ande godoja služba, baš sago kaj akhardas vi e Aarone. **5** Gajda ni o Hristo či proslavisardas korkoro pes kana postanisardas Baro rašaj, nego proslavisarda les Okova savo phendas lešće: "Tu san mungro Čhavo, ađes bijandem tut", **6** sago kaj vi pe aver than phenel: "Tu san rašaj dži ko veko po redo e Melhisedekosko." (aiōn g165) **7** Vo pale vřjama kana trajilas pe phuv ando baro vapaj thaj ande jasva, prinosilas e molitve thaj e molbe Okolešće savo šaj spasilas les katar o smrto thaj sas uslišime zato kaj sas ponizno thaj pokorno e Devlešće. **8** Vi ako sas e Devlesko Čhavo, o Isus sićilo te avel poslušno kroz okova kaj patisarda. **9** A kana postignisardas savršenstvo, postanisardas izvor palo večno spasenje savorende save si lešće poslušne (aiōnios g166) **10** thaj o Del proglasisarda les palo Baro rašaj po redo e Melhisedekosko. **11** Pale godova šaj but čerdamas svato, ali phare si te objasn timer, pošto postanisardine lenje te ašunen. **12** Thaj umesto te aven dži akana učitelja, tumende si palem potrebno te vareko sikavel tumer okola početne osnove e Devlešće alavešće. Još uvek si tumende potrebno thud, a na zuralo habe. **13** Kaj, ko još pravarel pe e thudeja, či hačarel so si, a so naj ispravno, zato kaj još si beba. **14** A o zuralo habe si pale okola save si zrele, thaj zbog godova kaj si zrele si len sposobnost te razlikuin o lačhip e katar o bilačhip e.

6 Zato trubul te mukas pale amende o početno sikavipe palo Hristo thaj te džas anglal ando zrelo sikavipe, gajda

kaj či boldas amen pe osnove save si: pokajanja pale dela save inđaren ando smrto, pačipe ando Del, 2 sikavipe palo bolipe, pale godova te čhonpe e vas pe manuša, palo uštippe andar e mule, thaj palo večno sudo. (aiōn g166) 3 Thaj vi akava čerasa ako mučel Del. 4 Kaj si nemoguće te anen palem dži ko pokajanje okolen save već sas prosvetlime thaj okusisardine o nebesko daro thaj saven sas udeo ando Sveto Duho, 5 save okusisardine o lačhippe e Devlešće alavengo thaj e sila e vřjamači savi avela, (aiōn g165) 6 a askal peline katar o pačipe, kaj von palem pale peste razapnin e Devlešće Čhave thaj javno lađžaren les. 7 O Del blagoslovil e phuv savi si natopime e bršndeja, savo često perel pe late thaj bijanel lačhe plodurja save si korisne pale okola save vi obradin lat. 8 A okoja phuv savi bijanel kangre thaj čičkurja, či mol khanči thaj paše si dži ko prokletstvo – po krajo avela uništíme ande jag. 9 Vi ako gajda mothas, drage mungralen, uverime sam pale tumende kaj tumen ažučarel okova so si majlačhe, okova so pripadil okolende saven o Del spasil. 10 Kaj, o Del naj nepravedno, pa te bistrel tumaro delo thaj tumari ljubav savi sikadine prema leste gajda kaj služisardine, thaj još služin e Devlešće manušenje. 11 A amen kamas te svako tumendar sikavel isto revnost dži ko krajo te pherdol okova sošće nadin tumen, 12 gajda či postanina lene, nego sledina o primer okolengo save kroz o pačipe thaj strpljenje primin ando nasledstvo okova so o Del obečisarda. 13 Kaj, kana o Del dijas o obečanje e Avraamešće, pošto nas les vareko majbaro te hal solah, hala solah korkoro pesa, 14 phendas: “Čače blagosloviva tut thaj dava tut but potomkurja.” 15 Gajda o Avraam strpljivo ažučardas thaj dobisardas okova so o Del obečisarda. 16 Kaj e manuša han solah okolesa savo si majbaro lendar, a e solah potvrdil okova so si phendo thaj završil svako rasprava. 17 Gajda vi o Del kamlas te okolende save si naslednikurja palo obečanje jasno sikavel kaj či promenila piri odluka pa o obečanje potvrdisarda e solahasa. 18 O Del dijas o obečanje thaj e solah. Godova duj našti promenil pe thaj o Del našti hohavel. Zato, amen, save ando Del arakhas sigurnost, te šaj avas zurale ohrabrime te čvrsto inčaras e nada savi o Del čhuta angle amende. 19 Godoja nada si amen sago pouzdano thaj čvrsto sidro pale amare duše. Voj inđarel amen pale hramske firanglje, ande Svetinja pe Svetinje, 20 okote kaj o Isus dijas pale amende thaj postanisardas Baro rašaj pale uvek po redo e Melhisedekosko. (aiōn g165)

7 A godova Melhisedek sas caro ando gav Salim thaj rašaj e Majbare Devlesko. Vo inklijsto anglo Avraam kana akava boldelas pe andar piri pobeda pe štar carurja thaj

blagoslovisarda les. 2 A o Avraam dija les deš posto katar sa so ando rato osvojisarda. E Melhisedesko alav značil, prvo “caro e pravdako”, a askal caro Salimsko so značil “caro e mirosko”. 3 Lešće dadestar thaj lešće dejatar, sago vi lešće pradadendar, či džanel pe khanči. Isto gajda či džanel pe ni kana bijandilo ni kan mulo, a pošto si slično e Devlešće Čhavešće, ačhel rašaj pale uvek. 4 Dičen samo kozom si baro godova kašće čak vi o Avraam, pradad amare themesko, dija deš posto katar sa majlačhe so lijas ando rato. 5 Doduše, vi e Levijevešće potomkonende save postanin rašaja, o Zakon zapovedil te len deš posto katar o them, godova si katar pire phrala, vi ako vi len si poreklo e Avraamesko. 6 Ali, o Melhisedek, savo naj andar o poreklo e Levijesko, lijas deš posto katar o Avraam thaj blagoslovisarda okoles save si e Devlesko obečanje. 7 A naj sumnja kaj uvek o majbaro blagoslovil okole majciknes. 8 A ando slučaj e rašajengo, dikhas kaj deš posto len e smrtne manuša, a ando slučaj e Melhisedekosko, deš posto lel o Melhisedek pale savo tvrdil pe kaj si još džudo. 9 Čak šaj phendasas pe kaj o Levije, savešće potomkurja len deš posto, dija deš posto e Melhisedekošće prekal o Avraam, 10 još kana o Levije nas bijando, ali postoilas ando telo pire pradadesko e Avraamesko, kana o Melhisedek inklijsto anglo Avraam. 11 O levitsko rašajipe sas čhutino prekal o Zakon savo si dino e themešće. Ali ako o savršenstvo šaj postignil pe prekal o levitsko rašajipe, sostar još avilosas potrebno te o Del bičhalel rašajes savo si aver čhander, savo si slično e Melhisedekošće, a na andar e Aronosko redo? 12 A kana menjil pe o rašjipe, moraš te menjil pe vi o zakon. 13 A o Isus pale savo si akava phendo, pripadil aver plemenošće, a khonik katar godova plemo či služilas po žrtveniko. 14 Jasno si kaj amaro Gospod avel andar e Judasko plemo, a o Mojsija godova plemo či spomenisarda kana motholas pale rašaja. 15 A sa si još majjasno kana postavil pe aver rašaj savo si slično e Melhisedekošće. 16 Vo godova či postanisarda gajda kaj pherelas e purani odredba te pripadil e Leviješe plemenošće, već ande sila e trajošči savi našti uništila pe. 17 Kaj pale leste tvrdil pe: “Tu san rašaj dži ko veko po redo e Melhisedekosko.” (aiōn g165) 18 Čhinel pe dakle, e zapovest savi sas majranije dini, kaj sas slabo thaj beskorisno. 19 A pošto o Zakon khonikas či čerda savršeno, akana si dini amende majlačhi nada savjava avasa majpaše e Devleste. 20 Akava o Del potvrdisarda uz e solah, dok aver rašaja den ande služba bi e solah. 21 Ali o Isus postanisardas rašaj kana o Del phendas lešće thaj halas solah: “O Gospod hala solah thaj či menjila pesko gindo: ‘Tu san rašaj pale uvek.’” (aiōn g165) 22

Godole solahasa o Del potvrdil kaj o Isus postanisardas jamco e majlače savezosko. **23** Thaj rašaja sas but, kaj o smrto sprečisarda len te ačhen uvek ande služba, **24** ali pošto o Isus trajil pale uvek, lesko rašajipe nikad či načela. (aiōn g165) **25** Zato vo šaj jekhar thaj pale uvek te spasil okolen save kroz leste aven e Devleste, kaj vo pale uvek trajil te avel posredniko pala lende. **26** Kaj kasavo baro rašaj vi sas amende potrebno: sveto, bi došako, bi okaljime, odvojime katar e bezehale manuša thaj majuzvisime katar e nebesa. **27** Vo naj moraš sago aver bare rašaja svako đes te prinosil žrtva pale bezeha, prvo pale peste, a askal palo them, kaj vo čerda godova jekhar thaj pale uvek kan prinesisardas pes sago žrtva. **28** O Zakono postavil pale bare rašaja e manušen saven si lende slabosti, ali e solah e Devlešči savi avili posle o Zakono, postavil e Čhave savo si zauvek savršeno. (aiōn g165)

8 Glavno ande sa akava si: kaj amen si kasavo Baro rašaj savo bešlo pe desno rig katar o prestolje e veličanstveno Devlešće pe nebesa, **2** savo služil ando Svetište, savo si čačo Šator savo vazdas o Gospod, a na o manuš. **3** Svako baro rašaj čutino si te prinosil darurja thaj žrtve. Zato sas potrebno te amaro Baro rašaj vareso prinesil. **4** Te akana trajil pe phuv, či ni avilosas rašaj, pošto akate već si rašaja save po Zakono prinesin darurja. **5** O than, kaj von obavin e služba samo si e slika thaj e senka e svetinjači savi si ando nebo. Zato o Del upozorisardas e Mojsija kana trubuja te vazdel o Šator. Godoleja phendas lešće: "Le sama te čeres sa sar sikadem tuče pe planina!" **6** A akana o Isus dobisardas majuzvisime služba katar lendi, pošto vi o savez savesko si vo posredniko majlačo katar o purano savez kaj si utemeljime pe majlače obečanja. **7** Kaj te o prvo savez avilosas bi mana, či avilosas potrebno te rodel pe dujto. **8** Ali korkoro o Del arakhlas mana e savezošće pa phendas e themešće: "Ake avel o đes, phenel o Gospod, kana pherava o nevo savezo e manušenca andar o Izrael thaj e manušenca andar e Judeja. **9** Godova či avela sago kana sklopisardem o savez lende pradadenca, ande okova đes kana lijem len palo vas thaj inkaldem len andar o Egipt. Pošto či ačhiline pačivale mungre savezošće, pa vi me boldem mungre dume lendar, phenel o Gospod. **10** A akava si o savez savo sklopiva e Izraelošće themesa posle godoja vrjama, phenel o Gospod. Čhava mungre zakonurja ande lende gindimata, thaj ramova len ande lende ile. Me avava lengo Del, a von avena mungro them. **11** Thaj khonik majbut či trubula te sikavela pire komšija niti pire phrales e alavenca: 'Pindžar e Gospode', kaj pindžarena man savora

katar majcikno dži ke majbaro maškar lende. **12** Kaj, jartova lende lengo bilačipe thaj majbut či dava man godi ke lende bezeha." **13** A kana o Del phenel palo nevo savez značil kaj okova prvo phurilo. A sa so phurjol uskoro vi nestanil.

9 Vi ando prvo savez maškar o Del thaj maškar e Izraelcurja sas odredbe palo bogoslužje thaj palo svetište akate pe phuv. **2** Kaj o Šator sas agajda lačhardo: ando lesko prvo deo sas o čirako, e sinija thaj e svete mangre, a godova deo akhardolas Svetinja. **3** O dujto deo e Šatorosko palal e firanglja akhardolas Svetinja pe svetinje, **4** a ande leste sas o sunakuno kadio žrtveniko thaj o Kovčeg e savezosko, sa obložime e sunakajesa. Ando Kovčeg sas o sunakuno čaro e manava, e Aronošči rovli, savi mukla e patrija, thaj e barune ploče pe save sas ramome e Devlesko savez. **5** A opral po Kovčeg sas e sunakune anđelurja save akhardonas "heruvimurja". Von prestavin e Devlešči slava, thaj pire buljarde phakenca zasenin o than kaj jarton pe e bezeha. Ali, pale godova akana našti čeras detaljno svato. **6** Pošto godova sas gajda lačhardo, e rašaja stalno denas andre ando prvo deo e Šatoresko te obavin e služba, **7** a ande dujto deo e Šatoresko, šaj delas andre samo o baro rašaj thaj godova samo jekhar ando brš, e ratesa savo prinosil e Devlešće pale pire bezeha thaj pale bezeha e manušenđe save sas čerde ando bidžanglipe. **8** Gajda o Sveto Duho sikavelas kaj o drom ande Svetinja pe svetinje još naj putardo sa dok ačhel o prvo Šator. **9** Godova si slika pale akaja vrjama, savi sikavel kaj e prinesime darurja thaj žrtve našti savršeno šilaven e savest okole manušešči savo služil e Devlešće, **10** pošto e žrtve thaj e darurja sas samo ando habe thaj ando pimo thaj ando razno obredno thoipe, a godova sas samo telesne pravilurja save vredinas dži ke vrjama kana avilo o nevo sustav. **11** A o Hristo avilo sago Baro rašaj okole lačhipeja savo akana si men. Vo nakhlo kroz o majbaro thaj majsavršeno Šator savo či čerdine e manušenđe vas thaj savo či pripadil akale stvorime themešće. **12** Vo či dija ande Svetinja pe svetinje e ratesa katar o jarco ili katar o guruv, nego dijas jekhvar pale uvek pire vlastito ratesa thaj gajda dobisarda pale amende večno otkupljenje. (aiōnios g166) **13** Kaj ako o rat katar o jarco thaj katar o guruv thaj o praho e gurunjako kana poškropil pes pe okola save si obredno nečiste, posvetil len te aven avrjal čiste, **14** kozom majbut o rat e Hristosko, savo kroz o večno Duho korkoro pes bi manako prinesisardas e Devlešće, šilavela amari savest katar e dela save indaren ando smrto te šaj služisaras e džude Devlešće. (aiōnios g166) **15** A o Hristo si posredniko e Neve savezosko zbog godova

te šaj okola save si akharde primin o večno nasledstvo, savo o Del obečisarda, pošto o Hristo mulo sago otkupnina pale prestupurja save sas čerde talo prvo savezo. (aiñios g166) 16 Kaj okote kaj postoil e oporuka moraš te utvrdil pe o smrto okolesko savo ramosarda e oporuka, 17 pošto e oporuka važil tek posle o smrto, a nikad či važil dok si džudo okova savo ramosarda piri oporuka. 18 Zato ni o prvo savezo či avilo pe snaga bi ratesko. 19 Kaj, kana o Mojsije objavisarda sa e themešće e zapovesti e Zakonešće, lijas o rat e guruvesko thaj e jarcosko e pajesa, e lole vunava thaj e biljkenca katar o isop, pa poškopisardas čak vi o lil thaj sa e themes. 20 Vo motholas: "Akava si o rat savo potvrdil o savezo thaj saves odredisardas tumende o Del." 21 Isto gajda e ratesa poškopisardas o Šator thaj sa e predmeturja save sas odredime palo bogoslužje. 22 A po Zakono gata sa šilavel pe e ratesa thaj bi čorde ratesko naj jartipe. 23 Sas, dakle, potrebno te e slika e nebeske stvarenje šilaven pe kasave žrtvenca, a korkoro e nebeske stvarja si potrebno te šilaven pe e majlačhe žrtvenca katar akala. 24 Kaj, o Hristo či dijas ando svetište savo si čerdo vastesa, savo si tek slika katar e pravo svetinja, nego ando nebo, te posredujil pale amende anglo muj e Devlesko. 25 Thaj godova na te korkoro pes majbut drom prinesil sago e žrtva, sago kaj o baro rašaj svako brš del andre ande Svetinja pe svetinja na pire ratesa, 26 kaj ande godova slučaj o Hristo trubujasas majbut drom te trpil e patnja katar o postanko e themesko. Nego, vo akana, po krajo e vekonengo, pojavisajlo jekhar pale uvek, te pire žrtvasa uklonil o bezeh. (aiñ g165) 27 Thaj sago kaj si e manušenje odredime jekhar te meren, a pale godova avel o sudo, 28 gajda sas vi o Hristo jekhar prinesime sago žrtva, te indarel e bute manušenje bezeha. A pojavila pe vi dujto drom, ali na zbog o bezeh, nego te anel o spasenje okolende save ažučaren les.

10 O Zakon dela men samo e senka pale okova lačhipe savo avela, a na pravo obličje. Vo si samo odraz palo čačipe. E žrtve ando purano zakon stalno prinosin pe andar o brš ando brš, ali našti savršeno te šlaven e manušen save aven anglo Del. 2 Kana o Zakon godova šaj čerdasas, zar godola žrtve či ačhilesas te prinosin pe? Kaj, okola save gajda služin avilesas jekhvar pale sa e vrjama šilade thaj či majbut hačardinesas pe kaj si došale pale pire bezaha. 3 Ali, e žrtve svako brš samo den godi pe bezeha, 4 kaj o rat e guruvengo thaj e jarconengo nisar našti khosel e bezaha. 5 Zato o Hristo kana avilo po them phendas: "Či kamlan e žrtve thaj e prinosi, nego dijan man telo. 6 Nas tuće ugodne e žrtve paljenice niti e prinosi pale bezeha. 7

Askal phendem: 'Ake, avav – kaj pale mande ramol ande Sveto lil – te pherav čiri volja Devla!'" 8 Prvo phendas: "Či kamlan žrtve thaj prinosi, e žrtve paljenice thaj e prinosi pale bezeha, niti sas tuće ugodne", vi ako o Zakon phenel te prinosin pe. 9 A askal phendas: "Ake, avav te pherav čiri volja." Gajda vo čineli o prve prinosi te čhol e dujte prinosi. 10 O Isus Hrist sas poslušno e Devlešće voljaće thaj dijas piro telo sar žrtva jekhvar pale uvek thaj gajda čerda amen te avas svete. 11 Svako rašaj svako des čerel piri služba e Devlešće thaj neprestalno prinesil palem iste žrtve, save nikada našti len e bezeha. 12 Ali o Hristo prenesisardas korkore pes, sar jek žrtva pale bezeha pale uvek thaj bešlo pe počasno than pe desno rig e Devlešće. 13 Vo katar askal ažučarel sa dok lešće dušmaja či aven čhutine tale lešće pungre. 14 Kaj, vo ječe jedino žrtvava čerda pale uvek savršene okolen save si posvetime. 15 A pale godova svedočil amende vi o Sveto Duho kana phenel: 16 "Akava si o savez savo lenca sklopiva posle godoja vrjama, phenel o Gospod: čhava mungre zakonurja ande lengo ilo thaj ramova len ande lende gindimata." 17 Thaj: "Majbut či dava man godi ke lende bezeha niti ke lende bilače dela." 18 A kaj si e bezeha jartome, okote majbut či trubun žrtve pale lende. 19 Zato, phralalen, si amen pouzdanje kaj e Isusešće rateja das ande Svetinja pe svetinje, 20 e neve thaj e džude dromesa savo vo putardas amende kroz e firanglja – pire telosa. 21 A pošto si amen vi vrhovno rašaj savo vladil po čher e Devlesko, 22 trubul te avas anglo Del e iskrene ileja thaj pačipeja savo si pherdo pouzdanja, kaj si amare ile šilade katar e bilači savest, a o telo thodo e čiste pajesa. 23 Zato trubul čvrsto te inčara men ke nada savi ispovedis kaj pačivalo si okova savo dijas o obečanje. 24 Thaj trubul te las sama pe godova te jek avres potaknis pe ljubav thaj pe lače dela. 25 Thaj te na propustis te avas pe amare zajedničke sastankurja, sar kaj varesaven si običaj, nego trubul te ohrabris jek avren. Akava čeren sa majbut sar dičen kaj si paše o des kana avela o Gospod! 26 Kaj, ako namerno grešis nakon so pindžardam o čačipe, askal majbut naj žrtve palo bezah, 27 nego samo te ažučaras strašno sudo thaj e bari jag savi buktil savi nakhavela okolen save suprostavinpe e Devlešće. 28 Kaj, kana vareko odbacil e Mojsijesko Zakon, bi e milost avel mudardo pe izjava e duj ili trin svedokurja. 29 A zamislin kozom majgoro kazna primila okova save uštavel e Devlešće Čhave, thaj ko smatril kaj si bezvredno o rat e Neve savezosko savo posvetisarda les thaj ko uvredil e Duho milosti! 30 Kaj, amen džanas Okoles savo phendas: "Mungri si e osveta, me boldava!" Thaj palem: "O Gospod sudila pire themešće." 31 Strašno si te perel pe

ande vas e džude Devlešče! **32** Den tumen godi ke okola prve đesa kana tek senas prosvetlime, thaj načenas kroz e but e patnje, ali ačhiline čvrste. **33** Varekana javno marenas muj tumendar thaj marenas tumen, a varekana pomogninas averende save trpinas isto. **34** Tumen učestuinas ande patnja okolenca saven phandavenas. Kana otmisardine tumendar sa so sas tumen, bahtasa godova prihvatisardine gajda kaj džanenas kaj ando večnost ažučarel tumen vareso majlačhe thaj trajno. **35** Zato, na odbacin o pouzdanje kaj godova anela tumende bari nagrada. **36** Aven ustrajne ande godova kaj čeren e Devlešči volja thaj gajda primin okova so o Del obečisarda. **37** Kaj: "Još cara, još samo cara, thaj avela Okova savo trubul te avel thaj či zakasnila. **38** Mungro pravedniko trajila katar o pačipe, Ali ako crdel pes palpale, či avava zadovoljno lesa." **39** Ali, amen najsam katar okola save odustanin, pa crden pes palpale, nego sam katar okola save paćan thaj si spasime.

11 A o pačipe si pouzdanje ande okova sošče nadi men thaj uverenje pale okova so či dikhas. **2** Kroz o pačipe amare pradada dobisardine pohvala. **3** E paćimava džanas kaj o svemir si stvorime e Devlešče alaveja, thaj godova gajda kaj okova so dićhel pe stvorime si katar okova so či dićhel pe. (aiōn g165) **4** E paćimava o Avelj e Devlešče dijas majlačhi žrtva katar e Kainošči, thaj zbog o pačipe dobisardas pohvala kaj si pravedno, kaj o Del prihvatisarda lešči žrtva. Gajda o Avelj, vi ako si mulo još čerel svato kroz piro pačipe. **5** E paćimava o Enoh sas vazdino ando nebo te na iskusil o smrto, thaj "našti arakhline les, kaj o Del lija les opre." A majsigo nego so sas lino, dini sas lešče pohvala kaj ugodisarda e Devlešče. **6** Ali bi pačipe si nemoguće te ugodil pe e Devlešče, kaj okova savo kamel te avel anglo Del, trubul te paćal kaj vo postojil thaj kaj del nagrada okolende save roden les. **7** O Noja sas upozorime pe okova so još našti dićhelas. A e paćimava o Noja, ande ozbiljnost thaj ando poštupe, haćardas o upozorenje thaj sagrađisardas brodo te spasil pire familija. Gajda o them sas osudime, a o Noja opravdime kroz o pačipe. **8** E paćimava o Avraam kana sas akhardo te džal ando than savo majkasnije primila ando nasledstvo, čhuta kan e Devleste thaj teljardas, vi ako či džanelas kaj džal. **9** Paćimava nistanisajlo sago stranco ande obećime phuv thaj trajilas ando šator ande tuđina. Gajda trajinas vi o Isak thaj vi o Jakov, savende o Del dijas isto obećanje, **10** kaj ažučarelas o gav e večne temeljenja, savo zamislisardas thaj sagrađisardas o Del. **11** E paćimava vi e Sara, savi našti bijanelas, aćhili khamni, vi ako nas majbut ande vrjama te bijanel kaj paćalas kaj o

Del si verno savo dija lat o obećanje. **12** Gajda godole jeće manušestar e Avraamestar, savo sas but purano te avel les čhavra, bijandilo o bezbrojno them gajda baro sago e čereja po nebo thaj sago o pesko pe morsko obala. **13** Sa godola manuša ando pačipe muline, a te či primisardine so o Del obečisarda lende, već godova dikhline samo dadural thaj bahtasa priznajisardine kaj si pe phuv strancurja thaj prolaznikurja. **14** A okola save gajda phenen, sikaven kaj roden piri vlastito otadžbina. **15** Te gndisardinesas pe okoja phuv andar savi inklijstine, von arakhline sas prilika te okote vi bolden pe. **16** Ali akana von čeznin pale majlačhi otadžbina, a godova si pale nebesko otadžbina. Zato o Del či lađžal te akharel pe lengo Del, kaj vo pripremisarda nebesko gav pale lende. **17** E paćimava o Avraam sas spremno te prinesil e Isaako sago žrtva kana o Del čhuta les pe kušnja. Okova savo primisardas o obećanje sas spremno te prinesil pire jedine čhaves, **18** okova kašče o Del phendas: "Čiro potomstvo avela katar o Isaak." **19** O Avraam sas uverime kaj e Devlešče si moguće vi andar e mule te vazdel, thaj šaj gajda phenel pe, kaj dobisardas e Isaako palpale andar e mule. **20** E paćimava o Isaak blagoslovisarda e Jakove thaj e Isave pale budućnost. **21** E paćimava o Jakov, kana sas po smrto, blagoslovisarda e Josifešče liduj čhaven thaj mukla o šoro tele pe rovli kana slavisarda e Devles. **22** E paćimava o Josif, kana merelas, phendas palo izlasko e Izraelconengo andar o Egipat thaj dijas upute so te čeren lešče kokalenca. **23** E paćimava e Mojsije garavenas lesko dad thaj lešči dej trin čhon kana bijandilo, kaj dićhenas kaj si o čhavo posebno thaj či darajle katar e carošči naredba. **24** E paćimava o Mojsije, kana barilo, či kamelas te akharen les čhavo e faraonešče čhejako. **25** Majrado lijas te zajedno e Devlešče themesa avel zlostavime, nego te pe harni vrjama uživil ando bezeh. **26** E nemilost ande savi pelo zbog o Hristo, inćarelas kaj si majlačhi katar o egipatsko barvalipe, kaj piro pogled čhuta ande nagrada savi dobila e Devlestar. **27** E paćimava đelotar andar o Egipat thaj či daralas katar e carošči bari holji, kaj zurale inćarelas pe sago kaj si o nevidljivo Del angle lešče jakha. **28** E paćimava proslavisarda e Pasha thaj uredisarda te dovratkurja poprskope e ratesa, te okova savo mudarel či mudarel izraelconende prve bijande čhaven. **29** E paćimava e Izraelcurja, sago pe šući phuv, nakhline o Lolo more, a kana godova kamline e Egipćanurja, tasadije ando paj. **30** E Izraelconende paćimava peline vi e zidurja ando Jerihon nakon so o them efa đes džalas oko lende. **31** E paćimava e bludnica e Raava, zato kaj šukar primisarda e špijunen, nas mudardi zajedno okolenca save sas neposlušne e

Devlešće. 32 Taj so još te phenav? Naj man vrjama te detaljno ćerav tumende svato palo Gedeon, Varak, Samson, Jeftaj, David, Samuilo taj vi pale aver prorokurja, 33 save e paćimava pokorisardine e carstvrja, pravedno vladinas, dobisardine so o Del obećisarda, phandadine o muj e lavonende, 34 mudardine e sila e bare jagači, spasisajle katar e dušmajende maćurja, dobisardine snaga ande slabost, zurajle ande borba, avrende vojsken ando našipe tradine. 35 E romnja, kroz o vaskrsenje dobisardine palpale pire mulen, save boldine pe ando trajo. Aver manuša sas ćhutine pe muke, ali von majsigo kamline te meren, nego te odreknin pe e Devlestar sar avilesas oslobodime katar e muke. Von nadisajle kaj dobina vaskrsenje ando majlačho trajo. 36 Varesaven ladžarenas taj marenas e bićosa, varesaven phandenas ande lancurja taj ande tamnica. 37 Sas mudarde e barenca, činde po opaš, mudarde e maćonenca. Phirenas okolo ande bakhrende taj buzjnende morćha, sas čore, progonime taj zlostavime. 38 O them nas lende dostojno. Lutinas e pustinjenca taj e gorenca, garadonas ande pećine taj ande hvja. 39 Taj savora von si pohvalime zbog piro paćipe, ali čī primisardine okova so o Del obećisarda lende. 40 Kaj e Devle sas majlačho plano pale amende, te von na dostignin o savršenstvo bi amengo.

12 Pošto sam, okružime gajda but svedokonca, trubul te ćhudas amendar svako pharipe savo smetol amen, taj o bezeh pe savo loće spotakni men, taj ustrajno trubul te prastas e trka savi si angle amende! 2 Čvrsto dićhen po Isus, savo zapoćnisardas taj završila amaro paćipe. Vo zbog e bah, savi ažućarel les, podnesisardas o smrto po trušul taj čī marisardas palo ladžavo, taj bešlo po počasno than pe desno rig ke Devlesko prestolje. 3 Gndin samo pe leste savo kasavo neprijateljstvo vo podnesisardas katar e bezehale, te tumen čī aven obeshrabrime taj te čī klonin e duhosa. 4 Ande tumaro rato protiv o bezah još čī aviline dži ke godova te den tumaro trajo. 5 Bistardine e opomena savi si tumende uputime sago e ćhavende: “Ćhaveja mungreja, na haćar samo tek gajda e Gospodešćī stega, taj na av obeshrabrime kana o Del opomeni tut. 6 Kaj, kas o Gospod volil, godole vi vaspitil e stegasa, taj kaznil svakones saves prihvatil sago ćhaves.” 7 Prihvatin e Devlešćī stega kaj o Del tumenca postupil sago pire ćhavenca. Kaj, savo si godova ćhavo saves o dad čī vaspitil e stegasa? 8 A ako naj sen vaspitine e stegasa sago sa rođene ćhavra, askal sen kopilja, a na lešće ćhavra. 9 Pa vi amare telesne dada vaspitinas men e stegasa taj amen poštuisas len. Zar askal čī još majbut podložiša men e duhovne Dadešće te avel amen čačo trajo? 10 Amare dada vaspitinas men jek harni

vrjama e stegasa sar von smatrinas kaj trubul, a o Del godova ćerel pale amaro laćhipe, te avel men talo ande lešćī svetost. 11 Ipak, svako vaspitno mera ando početko anel žalost, a na bah, ali majposle bijanel plodo savo anel miro taj pravednost okolende save si vaspitine pe godova naćin. 12 Zato vazden tumare oslabime vas taj ispravni e klecave koća. 13 Poravnin o drom pale tumare pungere, te e slabe pungere čī uganin pe, nego te saston. 14 Trudin tumen te trajin ando miro savorenca, čisto taj sveto trajosa, kaj okola save naj svete čī dićhena e Gospode. 15 Len sama te khonik čī aćhel bi e Devlešćī milost taj te čī inkijel varesosko ćerko koreno savo šaj ćerel nevolje taj otrujil e buten. 16 Len sama te khonik čī avel bludniko ili bidevlesko, sago o Isav, savo pale jek habe bićinda piro pravo sago prvo bijando. 17 Sago kaj dženan, posle godova kamlas te dobil e dadesko blagoslov, ali o dad odbisarda te del les, kaj našti promenisardas e dadešćī odluka vi ako o blagoslov rodelas ande jasva. 18 Kaj, tumen čī aviline sago e Izraelcurja angle gora savi šaj dotaknil pe taj savi phabol ande jag. Čī aviline po than kaj vladin e tama, e pomračina taj e oluja, 19 ni anglo zvuko e trubako, ni anglo glaso savo gajda motholas lende kaj okola, save ašundine godova glaso, molinas te majbut čī mothol lende. 20 Kaj našti podnesisardine okova so sas lende naredime: “Ćak vi e životinja, ako dotaknil e planina, neka avel mudardi gajda kaj ćhudena bara pe late.” 21 A o prizori sas gajda strašno kaj o Mojsije phendas: “Dar si mande taj izdrav!” 22 Tumen naprotiv, aviline ke Sionsko gora, ko gav e džude Devlesko, e nebesko Jerusalimešće taj e bute milje anđelende po svećano skupo. 23 Aviline ando zajedništvo ke Devlešće prvo bijande ćhavra, savende alava si ramome po nebo. Aviline anglo Del savo si sudija savorende taj angle duhurja okolende save si pravedne save si ćerde te aven savršene. 24 Aviline anglo Isus, savo si posredniko palo Nevo savez, taj anglo pošćropime rat savo phenel majzurala katar o rat e Aveljesko. 25 Len sama te na odbin Okoles savo mothol. Kaj, ako čī našline okola save odbisardine te ćhon kan ke okova savo opomenisarda len pe phuv, sar našasa amen ako boldas men katar Okova savo opomenil amen katar o nebo? 26 Lesko glaso askal ćhinola e phuv, a akana del amen akava obećanje: “Još jekhvar ćhinova na samo e phuv nego vi o nebo.” 27 Akava “još jekhvar” sikavel kaj nestanila okova so šaj te ćhinolpe, godova si okova so si stvorime, te aćhel okova so našti ćhinolpe. 28 Zato kaj primis o carstvo savo našti ćhinolpe, trubul te avas zahvalne taj te služis e Devlešće gajda sar si lešće mīlo, ando poštovanje taj e dar. 29 Kaj, amaro Del si e jag savi phabarel.

13 Neka tumari phralendi ljubav vi majdur vladil maškar tumende. **2** Na bistaren te aven gostoljubive e stranconende kaj varesave gajda ugostisardine e anđelen, a te godova či ni džanenas. **3** Den tumen godi ke okola save si ande tamnica, sago kaj sen vi tumen okote lenca. Den tumen godi ke okola save si zlostavime, sago kaj sen vi tumen lenca zlostavime. **4** O trajo maškar o rom thaj e romnji neka savora poštuin, a o rom thaj e romnji neka aven verne jek avrešće, kaj o Del osudila e bludnikonen thaj e preljubnikonen. **5** Na aven okola save volin e love, nego aven zadovoljne okoleja so si tumen. Kaj, o Del phendas: "Nikada či napustiva tut, nikada či mukava tut." **6** Zato ando pouzdanje šaj phenas: "O Gospod si mungri pomoć, zato či darava. So šaj čerel mande o manuš?" **7** Den tumen godi ke tumare vođe save propovedinas tumende e Devlesko alav. Gndin sar von trajinas thaj sar muline thaj pouzdin tumen ando Del sago vi von. **8** O Isus Hrist si isto vi arači, vi ađes thaj pale uvek. (aiōn g165) **9** Na den tumen te aven hohade katar o razno averengo sikavipe. Kaj, o ilo si lačhe te zurjarelp e ande milost, a na e obredne habenca katar save nas korist okolen save hanas len. **10** Amen si žrtveniko katar savo či troman te han okola save služin ando Šator. **11** O baro rašaj ande Svetinja pe svetinje anel o rat e životinjengo sago žrtva palo bezeh, ali e životinjende telurja den pe jag avrjal o tabor. **12** Zato vi o Isus trpilas avrjal e gavešće vudarestar, te posvetil e theme pire ratesa. **13** Zato hajde te džas leste avrjal o tabor, thaj te inđaras lesa lesko lađžavo. **14** Kaj amen akate naj gav savo ačhel pale uvek, nego ažučaras okova gav savo avela. **15** Kroz leste, dakle, či ačas te das žrtva zahvalnica e Devlešće, plodo e vuštengo savo ispovedin lesko alav. **16** Thaj na bistaren te čeren lačhip e thaj te delin tumaro lačhip e averenca, kaj kasave žrtve si ugodne e Devlešće! **17** Čhon kan ke tumare vođe thaj aven lende podložne, kaj von džugade len sama pe tumare duše sago okola save dena računo pale lende. Zato dičhen te von čeren godova e bahtasa, a na e žalimava ando ilo. Godova ni tumende či avilosas korisno. **18** Molin tumen pale amende, kaj sam uverene kaj si amen čisto savest thaj kamas te ande sa lačhe ponaši men. **19** Naročito moliv tumen te molin tumen te so majsigo boldav man tumende. **20** A neka o Del e mirosko, savo zbog o rat e večno savezosko vazdas andar e mule amare Gospode Isuse, e bare Pastires e bakhrende, (aiōnios g166) **21** osposobil tumen svako lačhip eja te izvršin lešči volja thaj neka ande amende čerel okova so si lešće ugodno, kroz o Isuso Hristo kašće slava pale uvek. Amin. (aiōn g165) **22** Moliv tumen, phralalen, te prihvatin akala alava sago ohrabrenje, kaj čače ukratko ramosardem tumende. **23** Kamav te džanen kaj amaro phral o Timotej si oslobodime andar o phanglipe. Ako uskoro aresela, avava lesa tumende. **24** Pozdravin sa tumare vođen thaj sa e Devlešće manušen. Pozdravin tumen savora akatar andar e Italija. **25** Milost tumenca savorenca!

Jakovesko

1 Me, o Jakov, sluga e Devlesko thaj e Gospode Isuse Hristosko, pozdravim e dešuduje Izraelošče plemenen save si rasejime pe sa o them. **2** Mungre phralalen thaj phejalen, kana god si tumen varesave kušnje, inčaren kaj si tumen pale soste te raduin tumen. **3** Kaj tumen džanen kana si tumaro pačipe pe kušnja, zuravol tumari istrajnost. **4** Tumari istrajnost neka avel delotvorno ande tumende, te tumen postanin savršene thaj potpune bi manako. **5** Te varekašče tumendar nedostajil mudrost, neka rodel katar o Del, savo svakonešče rado dela thaj khonikas či prekoril, thaj avela lešče dino. **6** Ali neka rodel ando pačipe, gajda te na ni cara sumnjil. Kaj, o okova savo sumnjil nestabilno si sago morsko talaso saves e balval vazdel thaj inđarel. **7** Kasavo manuš na ni te gindil kaj vareso primila katar o Gospod, **8** kaj o manuš savo dvoumil pes ande piro ilo naj stabilno ande sa so čerel. **9** O čoro phral neka hvalil pe godoleja kaj o Del uzvisisarda les, **10** a o barvalo phral godoleja kaj o Del ponizisarda les, kaj nestanila sago poljsko luludi. **11** Kaj, kana o kham inkjel thaj avel e bari žega, šučarel e čar, a e luludi ande late uvenil thaj sa lako šukaripe propadnil. Gajda vi o barvalo načela dok džal pale pire buća. **12** Blago e manušešče savo strpljivo trpil e kušnje. Kaj kana pobedil e kušnje, primila venco e trajosko, savo o Del obečisarda okolende save volin les. **13** Khonik, kana si les kušnje, či trubul te phenel: "O Del iskušil man", kaj o Del našti avel iskušime te čerel bilačipe, niti vo varekas iskušil. **14** Nego, svakones iskušil lešči vlastito požuda, savi crdel les thaj mamil les. **15** Kana e požuda ačhel khamni bijanel bezeh, a kana o bezah barjol, bijanel smрто. **16** Na hohaven tumen, drage mungre phralalen. **17** Sa jek lačo daro thaj savršeno poklon avel opral, katar o Dad savo stvorisarda sa so svetil. Vo nikad či menjilpe sago senka godole svetlendi. **18** Vo odlučisardas te bijanel men e čačutne alavesa, te amen avas prve maškar lešče stvorenja. **19** Akava džanen, drage mungre phralalen: svako manuš neka avel brzo te čhol kan, a sporo te čerel svato thaj sporo pe holji, **20** kaj e manušešči holji našti anel e pravednost savi o Del rodel. **21** Andar godova, čuden andar tumaro trajo svako duhovno melalipe thaj svako bilačipe. Ponizno prihvatin e Devlešči poruka savi si zasadime ande tumare ile thaj savi šaj spasil tumare duše. **22** Na aven samo okola save ašunen o alav e Devlesko thaj gajda korkoro pes hohaven, aven okola save čeren okova so o alav sikavel. **23** Kaj okova savo samo ašunel o alav, a či čerel so o alav mothol, slično si e manušešče savo lačhe dikhla pesko rođeno muj ande gledala, **24** ali čim

lačhe dikhla pe, đelotar thaj odma bistardas sar izgledilas. **25** Ali ko lačhe dičhel pe ando savršeno zakono, savo anel sloboda, thaj nastavil te dičhel, a či bistarel okova so ašunel, nego gajda čerel, avela blagoslovime ande okova so čerel. **26** Te vareko gindil kaj si pobožno, a či lel sama pe piri čhib, godova korkoro pes hohavel; lešči pobožnost khanči či mol. **27** Akava si čisto thaj birumome pobožnost anglo Del o Dad: te vodisaras e briga pale čhavra save ačhile čore thaj pale udovice ande lende nevolje thaj te las sama te na avas okaljime akale rumome themestar.

2 Phralalen mungralen, tumen save pačan ande amaro slavno Gospod Isus Hrist, na dičhen ko si ko. **2** Kaj te pe tumaro sastanko avel o manuš e sunakune angruščava thaj ande kuč drze, a avel vi o čoro manuš ande pharade drze, **3** a tumen sikaven posebno pažnja e manušešče savo inđarel pe peste kuč drze thaj phenen lešče: "Beš akate pe jek katar akala anglune thana", a e čore manušešče phenen: "Tu ačh okote, ili beš akate tele paše mungre pungere," **4** či li gajda čeren razlika maškar tumende thaj postanin nepravende sudije e bilačhe gindimasa? **5** Ašunen, mungre drage phralalen: či li o Del odabirisarda okolen save si čore ande jakha e themešče te aven barvale ando pačipe thaj te nasledin o Carstvo, savo obečisarda okolende save volin les? **6** A tumen ladžaren e čoren! Naj li baš e barvale okola save mučin tumen thaj crden tumen pe sudurja? **7** Či li baš von čeren bilačo svato palo časno e Hristosko alav savešče tumen pripadin? **8** Ako čače inčaren e carosko zakon savo ramol ando Sveto lil: "Voli čire pašutne sago korkoro tut", lačhe čeren. **9** Ali ako dičhen ko si ko, čeren bezeh thaj o zakon osudil tumen sar okolen save phađen les. **10** Kaj, ko inčarel sasto Zakon, a pogrešil samo ande jek, došlo si pale sa. **11** Kaj o Del savo phendas: "Na čer preljub" phendas vi: "Na mudar!" Pa vi ako či čeres preljub, ali varekas mudares, došlo san kaj phaglan o Zakon. **12** Zato mothon thaj čeren sago okola savende avela sudime prema o zakon savo oslobodila tumen. **13** Kaj e Devlesko sudo avela nemilosrdno prema okova savo korkoro nas milosrdno. O milosrđe pobedil e osuda! **14** Savi si korist katar godova, phralalen mungralen, ako vareko phenel kaj si les pačipe, a najles dela? Šaj li kasavo pačipe te spasil les? **15** Ako varesave phrale ili pheja naj so te len pe peste ili najlen so te han svako đes, **16** a vareko tumendar phenel lende: "Džan ando miro, taton thaj čaljon", a či den len okova so si lende potrebno palo telo, savi si korist katar godova. **17** Gajda si vi o pačipe: ako si o pačipe korkoro thaj najles dela, mulo si. **18** Ali vareko phenela: "Tut si pačipe, a man si

dela." Sikav mande čiro pačipe bi e delengo, a me sikavava tuče o pačipe mungre delenca. 19 Tu pačas kaj si samo jek Del. Godova si lače! Čak vi e bilače duhurja godova pačan thaj izdran e daratar. 20 O, nerazumne manušeja! Kames te uveris tut kaj o pačipe bi e delengo si beskorisno? 21 Či li amaro pradžad o Avraam sas opravdime anglo Del pire delenca kana predajisardas pire čhaves e Isako po žrtveniko? 22 Dičhes kaj o pačipe sas jek lende delenca thaj kaj o pačipe e delenca postanisardas savršeno. 23 Gajda pherdilo okova so ramol ando Sveto lil: "O Avraam pačaja ando Del thaj godova dinada pe lešče sago pravednost." Thaj zato sas akhardo e Devlesko drugari. 24 Dičhen kaj o manuš opravdil pe vi e delenca, a na samo e pačimava. 25 Či li gajda vi e bludnica e Rahava opravdisajli e delenca kana primisarda e špijunen thaj inkalda len andar o gav aver dromesa? 26 Sago kaj si o telo bi e duhosko mulo, gajda si vi mulo o pačipe bi e delengo.

3 Phralalen mungralen, neka či avel maškar tumende but učitelja, kaj džanas kaj amende e učiteljende avela majstrogo sudime. 2 Kaj savora amen but grešisaras. Ako vareko či grešil ande alava, godova si savršeno manuš, sposobno te obuzdil piro sasto telo. 3 Kana čhas e grastende e žvala ando muj te pokorin pe amende, upravis pe sasto lengo telo. 4 Dičhen vi e lađe, gajda si bare thaj e zurale balvaja indaren len, a lenca upravis o cikno kormilo inča kaj o kormilaro kamel. 5 Gajda si vi e čhib cikno deo katar o telo, ali falil pes e bare bučenca. Dičhen sar e cikni jag šaj phabarel o baro voš. 6 Gajda vi e čhib si jag, them nepravedno maškar amare delurja e telošče. Voj kaljarel amaro sasto telo, e paklostar phabardi del jag amaro sasto trajo. (Geenna g1067) 7 Sa vrste životinje, čiriklja, gmizavcurja thaj e morske životinje den pes te aven pokorime thaj o manuš pokorisarda len, 8 ali e čhib, khonik našti pokoril. Voj si nemirno zlo pherdi smrtonosno otrovo. 9 Lava blagoslovisaras e Gospode thaj e Dade thaj lava das romaja e manušen save si stvorime pe Devlešči slika. 10 Andar o isto muj inkjel o blagoslov thaj e romaja. Godova gajda či tromal te avel, mungre phralalen. 11 Šaj li andar jek izvor inkjel o guglo thaj o čerko paj? 12 Šaj li phralalen mungralen, e smokva te bijanel masline ili e loza smokve? Gajda ni o čerko izvori našti del guglo paj. 13 Ko si mudro thaj razumno maškar tumende? Neka sikavel e lače dela pire lače trajosa, ande poniznost savi avel katar e mudrost. 14 Ali te si tumen ando ilo čerči zavist thaj čingara, na falin tumen thaj na phenen kaj sen mudre kana godova naj čače. 15 Kasavi mudrost či avel e Devlestar, nego akale themestar, naj duhovno thaj avel e bendestar. 16

Nego, kaj si zavist thaj čingara, okote si nered thaj svako vrsno bilačipe. 17 A e mudrost savi avel e Devlestar si majsigo čisto, askal mirotvorno, krotko, blago, popustljivo, pherdi milosrđe thaj lače dela. Či lel khonikašči rig thaj naj licemerno. 18 A e pravednost si plodo savo kušena okola save sejn o miro – okola save čeren o miro.

4 Katar raturja thaj čingara maškar tumende? Či li aven katar tumare želje save borin pe ande tumare telurja? 2 Tumen žudin pale okova so naj tumen, ali či dobin, pa zato mudaren thaj sen zavidne. Či dobin okova so kamen pa ratuin thaj han tumen. Či dobin zato kaj či molin tumen e Devlešče. 3 A kana molin tumen, či dobin, zato kaj molin andar e bilače razlogurja: te godova potrošin ande tumare požude. 4 Tumen bipačivale manušalen! Džanen kaj e ljubav prema akava them si isto sago vi neprijateljstvo prema o Del. Zato ko kamel te avel drugari e themesko, postanil dušmano e Devlesko. 5 Ili gndin kaj o Sveto lil ivja phenel kaj o Del ljubomorno čeznil palo duho saves čhuta te trajil ande amende? 6 A o Del del amen vi majbari milost. Zato ando Sveto lil ramol: "O Del protivil pes kolende save čeren pes bare, a okolende save si ponizne del milost." 7 Zato podložin tumen e Devlešče, a protivin tumen e bendešče, pa o beng našela tumendar. 8 Aven majpaše e Devleste thaj vi vo avela majpaše tumende. Tumen save trajin ando bezeh, šlaven tumare trajurja katar o bezeh! A tumen e razdelime dušava, šlaven tumare ile! 9 Tugujin, žalini, thaj roven pale tumare bezeha! Pretvorin tumaro asajipe ando roipe, a o veselje ando žalost! 10 Ponizin tumen anglo Gospod thaj vo uzvisila tumen! 11 Phralalen, na čeren svato jek protiv avreste! Kaj ko čerel svato protiv piro phral, ili osudil pire phrales, čerel svato protiv o Zakono thaj osudil o Zakon. A ako osudis o Zakon, či pokoris tu lešče, nego postanisardan sudija. 12 Kaj samo si o Del Zakonodavco thaj Sudija, okova savo šaj spasil thaj mudarel. A ko san tu te sudis čire pašutne? 13 Ašunen akana, tumen save phenen: "Ađes ili thejara džasa ande okova thaj o okova gav thaj okote ačhasa jek brš, trguisa thaj zaradisa", 14 a či džanen ni so avela thejara! Kaj so si tumaro trajo? Vo si sago e magla savi pojavilpe po treno a askal nestanil! 15 Umesto te phenen "Ako o Del kamel trajisa thaj čerasa akava ili okova", 16 tumen akana hvalin tumen thaj čeren tumen barikane. Svako kasavo hvalipe si bilačo. 17 Kaj ko či čerel okova so džanel kaj si lače, čerel bezeh.

5 Akana ašunen, tumen barvale manušalen. Roven thaj kukin zbog e nevolja savi avela pe tumende. 2 Tumaro barvalipe černjola, a tumare drže hana e moljcurja. 3 Tumaro

sunakaj thaj tumaro rup e rđa učharella, e rđa lendi protiv tumende svedočila, a e jag tumare tela nakhavela. Barvalipe čidine tumende, a poslednje si e đesa! **4** E manuša čerenas bući pe tumare njive, ali tumen lendi počin či dine! Von akana čhon muj protiv tumende thaj o Gospod pe vojske ašundas o roipe okolengo save čerdine bući ande tumare njive. **5** Tumen trajinas pe phuv raskošno thaj uživas; thuljardine tumen sago e stoka pale čhuri. **6** Osudisardine thaj mudardine e pravedniko, a vo či protivisajlo tumende. **7** Zato phralalen, aven strpljive, dok o Gospod či avela. Dičhen sar o zemljoradniko ažučarel o dragoceno rodo e phuvjako, strpljivo ažučarel o jesensko thaj o proletno bršnd. **8** Vi tumen strpljivo ažučaren thaj učvrstin tumaro ilo, kaj avilo majpaše o đes kana o Gospod avela. **9** Na gundin, phralalen, jek pe avreste te na aven sudime. Dičhen o Sudija već ačhel po vudar! **10** Phralalen, neka e prorokurja, save mothonas ande Gospodesko alav, aven tumende uzor. Von but godova trpisardine thaj sas strpljive. **11** Džanen kaj blagoslovime akharas okolen save sas istrajne. Ašundine sar sas o Jov strpljivo thaj dikhline so o Gospod po krajo čerda te pomognil les. O Gospod si but milostivo thaj milosrdno. **12** A majsigo katar sa, phralalen mungralen, na den tumen solah ni e nebosa ni e phuvjasa, niti den tumen solah ande bilo so aver. Kana phenen: "Kamav", neka avel "Kamav", thaj kana phenen: "Či kamav", neka avel "Či kamav", te na peren tale osuda. **13** Te vareko tumendar trpil nevolja, neka molil pe. Te si vareko bahtalo, neka đilabel najš e Devlešće. **14** Te si vareko nasvalo tumendar, neka akharel peste e starešinen andar e khandiri thaj e starešine neka molin pes pe leste thaj neka mačhen les e uljeja ando alav e Gospodesko, **15** thaj e molitva mothodi ando pačipe sastarel lat e nasvales. O Gospod vazdela les thaj te čerda vi bezeha, avena lešće jartome. **16** Prema godova mothon tumare bezeha jek avrešće thaj molin tumen jek pale avreste te šaj saston. But šaj e molitva e pravednikošči kaj si močno thaj delotvorno. **17** O proroko Ilija sas samo manuš sago vi amen. Vo žarko pomolisajlo te na avel bršnd thaj nas bršnd pe phuv trin brš thaj šov čhon. **18** Askal palem pomolisajlo thaj o nebo dijas bršnd, a e phuv andas rodo. **19** Phralalen mungralen, te vareko tumendar hasajlo katar o drom e čačipesko thaj vareko boldel les, **20** džanen kaj okova savo boldel e bezehales e hasarde dromestar spasila lesko trajo thaj učharella e but e bezeha.

1 Petresko

1 Akava lil ramov me, o Petar savo sem apostoli e Isuse Hristosko, e losarde manuše save trajin raspršime sago strancurja, ando Ponto, Galatija, Kapadokija, Cikni Azija thaj Vitinija. **2** O Del o Dad džangla tumen thaj majanglal izabirisarda tumen, a e Duhosa posvetisarda tumen te aven poslušne e Isuse Hristošće thaj thoda tumen lešće ratesa. Milost thaj miro tumende ando izobilje. **3** Neka si blagoslovime o Del, o Dad amare Gospodesko e Isuse Hristosko. Vo amen ando piro baro milosrđe, gajda kaj vaskrnsisarda e Isuse Hristo andar e mule, palem bijanda pale džudi nada, **4** palo nasledstvo savo či propadnil, či rumol pe thaj či uvenil. Okova pe nebesa arakhadol pe pale tumende, **5** saven e Devlešći sila, kroz o pačipe, lel sama palo spasenje, savo si spremno te objavil pe ande poslednjo vrjama. **6** Tumen raduin tumen akalešće, vi ako sen akana, kana već gajda trubul te avel, pe harni vrjama ožalostime e razne nevoljenca save aven pe tumende. **7** E nevolje si potrebne te proveril pe tumaro pačipe savo si majdragoceno katar o sunakaj savo propadil, ali iskušil pe e jagasa. Nakon so si tumaro pačipe iskušime, primina najs, slava thaj čast katar o Del kana objavil pe o Isuso Hristo. **8** Vi ako či dikhline les, tumen volin les. Vi ako ni akana našti dičhen les, pačan ande leste thaj raduin tumen e slavno bahtasa savi našti e alavenca te mothol pe, **9** kaj postignin o ciljo tumare pačimasko: o spasenje pale tumare duše. **10** Godova spasenje marljivo rodenas thaj ispitinas e prorokurja, save prorokuinas pale milost savi si namenime tumende. **11** Von kamenas te doznajin ande savi vrjama thaj okolnost uputilas e Hristosko Duho savo sas ande lende, kana majanglal motholas lenđe pale Hristošće patnje thaj slava savi avela les posle godova. **12** Lenđe o Del objavisarda kaj či služinas pešće, nego tumende, kana mothonas pale akava so si akana tumende objavime prekal okola save propovedinas tumende e Bahtali nevimata gajda kaj pomognisardas lenđe o Sveto Duho, savo si bičhaldo andar o nebo. Ande godova vi e anđelurja kamen te zavirin. **13** Zato, tumari godi neka avel spremno, aven trjazine, ande sa pouzdin tumen ande milost savi anela tumende e objava e Isuse Hristošći. **14** Sago poslušne čhavra, na trajin sago varekana ando bidžanglipe, kana vladinas tumenca tumare razne bilače želje. **15** Nego sago kaj si sveto Okova savo akharda tumen, vi tumen aven svete ande sa so čeren. **16** Kaj, ramome si ando Sveto lil: "Aven svete kaj sem me svetol!" **17** Ako e Devle akharen tumare Dadesa, savo si nepristrasno thaj svakonešće sudil kroz lešće dela, provodin

sago strancurja e vrjama tumare trajosko pe phuv e darasa angle leste. **18** Kaj tumen džanen kaj katar tumaro isprazno način sar trajinas, savo nasledisardine katar tumare pradada, naj sen otkupime varesova so si raspadljivo sago kaj si o rup ili o sunakaj, **19** nego e dragoceno Hristošće ratesa, savo si e Devlesko Bakhro saves naj mana ni ljaga. **20** Vo si preodredime majsigo nego so postanisardas o them, a objavisajlo ande akaja poslednjo vrjama zbog tumende **21** save kroz leste pačan ando Del, savo vaskrnsisarda les andar e mule thaj proslavisarda, te tumaro pačipe thaj tumari nada avel ando Del. **22** Pokorne e čačimašće, šladine tumare duše te šaj iskreno volin tumen sago phrala thaj pheja e saste ileja. **23** Kaj tumen sen palem bijande, ali na katar o propadljivo seme, nego katar o nepropadljivo – kroz o džudo thaj večno alav e Devlesko. (aiōn g165) **24** Kaj ando Sveto lil si ramome: "Svako manuš si sago e čar thaj sa lešći slava sago poljsko luludi, e čar šučol thaj e luludi perel, **25** ali e Gospodesko alav ačhel pale uvek." A godova alav si e Bahtali nevimata savi si tumende objavime. (aiōn g165)

2 Čuden tumendar svako bilačipe, hohaipe, licemerje, zavist thaj svako ogovaranje. **2** Sago tek bijande čhavra roden o čisto duhovno thud, te lestar šaj barjon dži ko spasenje. **3** Akana kana već okusisardine kaj si o Gospod lačo. **4** Aven e Isuseste, savo si džudo bar saves e manuša odbacisardine, ali o Del izabirisarda les thaj dragoceno si ande lešće jakha, **5** pa sago džude bara mučen te o Del ugradil tumen ando duhovno hramo, te aven svete rašaja, te kroz o Isuso Hristo anen duhovne žrtve save si e Devlešće mile. **6** Kaj ando Sveto lil si ramome: "Ake, čhav po Sion izabrano bar, dragoceno bar e temeljesko, thaj ko pačal ande leste, či ladžala." **7** Pale tumende, save pačan, vo si dragoceno, a pale okola save či pačan ramol: "bar saves o e graditeljurja odbacisardine postanisarda e temeljesko bar", **8** thaj: "bar pe savo spotaknin pe thaj stena pe savi peren." A spotaknin pe e manuša zato kaj naj pačivale e Devlešće Alavende, pale soste vi si odredime. **9** A tumen sen izabrano them thaj carstvo rašaja, sveto them, them savo pripadil e Devlešće, odredime te objavin e slavnja dela katar Okova savo andar e tama akharda tumen ande piro čudesno svetlost. **10** Varekana naj senas them, a akana sen e Devlesko them. Varekana či primisardine e Devlešći milost, a akana primisardine lat. **11** Drage mungre, moliv tumen te sago e strancurja thaj sago okola save aviline pe akaja phuv, len tumen majdur katar e telesne želje save borin pe protiv tumari duša. **12** Maškar okola save či pačan vladin tumen šukar, te vi ako bedin pe tumende kaj sen zločinurja,

dičen tumare lačhe dela thaj den slava e Devlešće po Đes kana vo avela te sudil o them. **13** Zbog o Gospod, pokorin tumen sa e manušenđe save si pe vlast, bilo te si e carošće kaj si poglavari akale phuvjako, **14** ili e upraviteljende saven o caro čhuta pe vlast te kaznin e zločincen, a te pohvalin okolen save čeren lačhipe. **15** Kaj akava si e Devlešći volja: te tumare lačhe delenca phandaven e muja e bidžangle thaj nerazumne manušenđe. **16** Trajin sago slobodne manuša, ali na den te godoja sloboda avel tumende sago izgovor palo bilačhipe, umesto godova, aven e Devlešće sluge. **17** Poštujin sa e manušen, volin aver vernikonen, daran katar o Del, poštuiin e caro. **18** Roburja, pokorin tumen tumare gospodarenđe sa e poštui masa, thaj na samo okolende save si lačhe thaj blage, nego vi okolende save si stroge. **19** Kaj godova si pale pohvala kana vareko trpil nevolje thaj patil nepravedno, svesno kaj godova čerel zbog o Del. **20** Ali ako kaznin tumen palo bilačhipe savo čerdine, naj razlog te hvalin tumen kaj trpin pale godova. Ali, ako trpin palo lačhipe savo čeren thaj sen ustrajne ande godova, godova si pohvalno anglo Del. **21** Pe godova trpljenje sen akharde, kaj vi o Hristo trpisarda pale tumende thaj mukla tumende primer, te džan lešće tragosa. **22** "Vo savo či čerda bezah, thaj hohaipe či arakhla pe ande lesko muj." **23** Kana vředonas les, či bolda e uvredenca, kana trpisarda, či pretisarda, nego godova mukla e Devlešće savo si pravedno sudija. **24** O Hristo ande piro telo inđarda amare bezeha po trušul, te amen meras e bezehešće thaj trajisaras pale pravednost. Lešće ranenca sen sastarde. **25** Kaj, lutinas sar e hasarde bakhre, ali akana boldine tumen e Pastirešće thaj Okolešće savo lel sama pe tumare duše.

3 Gajda vi tumen romnjalen, pokorin tumen tumare romende te varesave lendar save či pokorin pe e Devlešće alavešće, aven pridobime palo pačipe bi alavengo, kana dičen o ponašanje pire romnjengo, **2** kana dičen o poštuipe thaj e čistota ande tumaro ponašanje. **3** Neka tumaro šukaripe či avel avrjal, gajda kaj khuvena tumare bal ili gajda kaj ukrasin tumen e sunakajesa ili gajda kaj lena pe tumende kuč drže. **4** Umesto godova, ukrasin tumen andral e šukarimasa savi naj prolazno, savi avel katar o krotko thaj katar o mirno duho, so si dragoceno ande Devlešće jakha. **5** Kaj, gajda varekana ande purani vrjama ukrasinas pe e svete manušnja save pouzdinas pe ando Del thaj pokorinas pe pire romende, **6** sago e Sara, savi sas pokorno e Avraamešće thaj akharelas les pire gospodaresa. Tumen sen laće čheja, ako čeren lačhipe thaj či mučen te bilo so čhol dar ande tumende. **7** Isto gajda vi tumen, romalen, aven

obzirne prema tumare romnja thaj sikaven lende poštuipe sago okolende save si majslobo polo tumendar thaj save zajedno tumenca nasledina o milosno daro e trajosko. Gajda askal khanči či ačhela pe drom te tumare molitve aven uslišime. **8** Po krajo, savora aven složne ande jek gindimata, aven saosećajne, volin jek avres sago phralen thaj phejen, aven milosrdne thaj ponizne! **9** Na bolden o bilačhipe palo bilačhipe, niti uvreda pale uvreda, nego blagoslovin, kaj sen pe godova akharde te šaj nasledin o blagoslov. **10** Kaj ando Sveto lil si ramome: "Ko kamel te volil o trajo thaj te dičhel e lačhe đesa, neka e čhibjava či mothol bilačhipe thaj e vuštenca alava hohavne. **11** Neka bolden pe katar o bilačhipe thaj lačhipe neka čerel, neka rodel miro thaj neka del sa pestar te ačhel ande leste. **12** Kaj e Gospodešće jakha dičen e pravedne manušen, thaj lešće kan e molitve lende ašunen, a pe zločincurja mrštil pesko muj." **13** Ko naudila tumende ako trudin tumen te čeren lačhipe? **14** Ali, blago tumende ako vi nastradin zbog e pravednost. "Na den te čhon dar ande tumende niti te daraven tumen." **15** Častin ande tumare ile e Hriste sago e Gospode! Uvek aven spremne te den odgovor svakonešće ko phučel tumendar te obrazložin e nada savi si tumen. **16** Ali čeren godova ande blagost thaj ando poštuipe. Neka tumari savest avel čisto, te okola save mothon hohaipe pe tumaro lačno trajo ando Hristo, lađžavon ande okova so mothon pale tumende. **17** Kaj, majlačhe si te trpin zbog o lačhipe savo čeren, ako si e Devlešći volja, nego zato kaj čeren bilačhipe. **18** Kaj, o Hristo jekhar thaj pale uvek mulo palo bezeh – vo pravedno pale nepravedne – te anel tumen e Devleste. Lesko telo mudardine, ali e Devlešće Duhosa sas boldino ando trajo. **19** Ando Duho također fuljisto thaj propovedilas e duhonende ande tamnica, **20** save varekana, ande Noješći vrjama, sas neposlušne e Devlešće. O Del strpljivo ažučarelas dok gradilas pe e brodo, ande savi samo varekozom lendar, tek ohto manuša save spasisajle kroz o paj. **21** Lači slika si o bolipe – savo či thovel o telesno melalipe, nego si molitva uputime e Devlešće pale čisto savest, a akana vi tumen spasil kroz e Isusesko Hristosko vaskrsenje andar e mule, **22** savo si e Devlešće pe desno rig, pošto đelotar po nebo, kaj pokorin pe lešće sa e andelurja, sa e vlasti thaj e sile.

4 Pošto o Hristo trpisarda e telesno patnja, gajda vi tumen zuravon isto gindosa. Okova savo prihvatil e telesno patnja, či čerel majbut bezah, **2** pa e vrjama savi ačhili tuće na trajisar prema e manušenđe požude, nego prema e Devlešći volja. **3** Dosta si, kaj majsigo trajinas sago bipačivale ande razuzdanost, požude, matipe, bilačhe veselja

gozbe, pijanke, thaj ando odvratno idolopoklonstvo. 4 Zato akana čudin pe kaj majbut či džan pale lende ande isto divljo thaj nemirno trajo, pa zato vredon tumen. 5 Von dena o računo Okolešće savo si spremno te sudil e džudenđe thaj e mulenđe. 6 Kaj, zato si vi e mulenđe propovedime e Bahtali nevimata, pošto si sago vi sa e manuša osudime po telesno meripe te šaj trajin ando duho sago kaj vi o Del trajil. 7 Avilo paše o krajo pale sa. Zato aven svesne thaj džungade, te šaj molin tumen. 8 A majsigo katar sa, iskreno volin jek avren kaj e ljubav učarel e but bezeha. 9 Aven gostoljubive jek prema averende thaj na prigovorin. 10 Svako tumendar neka služil e duhovne darosa savo primisarda sago pačivalo upravitelj katar e Devlešći milost ande različite oblikurja. 11 Ako vareko propovedil, neka avel svesno kaj mothol e alava save del les o Del. Ako vareko služil, neka avel svesno kaj služil e snagava savi del les o Del, te ande sa proslavil pe o Del kroz o Isuso Hristo. Lešće slava thaj moć pale uvek. Amin. (aiōn g165) 12 Na čudin tumen, drage mungralen, e nevoljenđe save buktin sago e jag maškar tumende te iskušil tumen, na gndin kaj dogodil pe tumenđe vareso neobično. 13 Naprotiv, raduin tumen kaj si tumen zajedništvo ande Hristošće patnje, te šaj raduin tumen thaj aven bahtale kana objavil pe lešći slava. 14 Blago tumenđe ako vredon tumen zbog e Hristosko alav, kaj ande tumende trajil o Duho e slavako, e Devlesko Duho. 15 Neka khonik tumendar či trpil sago ubica, čor, ili sago varesavo aver zločinco, pa čak ni sago manuš savo hamil pe ande avrenđe buća. 16 Ali ako vareko trpil zato kaj si hrišćano, neka na ladžal, nego zahvalil e Devlešće kaj šaj gajda akhardol. 17 Kaj, avili e vrjama palo Sudo savo započnila katar e Devlesko čer. A ako o sudo započnil amendar, sosko krajo tek ažučarel okolen save naj poslušne e Devlešće Bahtale nevimataće? 18 Kaj ando Sveto lil si ramome: "Ako o pravedniko jedva spasil pe, so tek avela e bidevlešće manušenca thaj e bezehalenca?" 19 Gajda, okola save trpin zato kaj si godova e Devlešći volja, poverin piri duša e verno Stvoritelješće gajda kaj čeren lačhipe.

5 Moliv e starešinen maškar tumende, me savo sem starešina thaj svedoko e Hristošće mukenđe thaj okova saves avela udeo ande slava savi avela amende sikadi kana vo avela: 2 aven pastirja pe Devlesko stado savo si tumenđe poverime. Ali na čeren godova sago kaj moraš pe sila, nego dragovoljno, sar si pe Devlešći volja, na zbog e zarada, nego andar o oduševljenje; 3 na sago gospodarja pe okola save si tumenđe poverime, nego aven primer lende. 4 A kana avela o Vrhovno pastiri, primina kruna lešće slavaći savi nikada či izbledila. 5 Gajda vi tumen, terne čhaven, aven poslušne e

starešinenđe. A savora jek prema avreste aven ponizne. Kaj: "O Del protivil pe e ohole manušenđe, a e ponizne manušenđe sikavel e milost." 6 Ponizin tumen, dakle, talo moćno Devlesko vas, te uzvisil tumen kana avela e vrjama. 7 Sa tumari briga čhon ande leste, kaj vo vodil briga pale tumende. 8 Aven džungade thaj aven oprezne. Kaj tumaro protivniko, o beng, sago lavo savo ričil thaj džal okolo thaj rodel kas te rastrgnil. 9 Aven zurale ando pačipe thaj oduprin tumen lešće kaj džanen kaj vi tumare phrala po sasto them načen kroz e iste patnje. 10 A o Del savo si milostivo ande sa, thaj savo akharda tumen ande piri večno slava ando Hristo, usavršila tumen posle tumari harni patnja thaj čerela tumen te aven čvrste, zurale thaj postojne. (aiōnios g166) 11 Lešće moć pale uvek veko. Amin. (aiōn g165) 12 Ramosardem tumenđe akava harno lil gajda kaj pomognisarda man o Silvan, kas inčarav palo verno phral, te opomeniv tumen thaj potvrdil tumenđe kaj akava si čači milost e Devlešći. Late inčaren tumen. 13 Pozdravin tumen e manuša andar e khandiri ando Vavilon. Von si izabrane sago vi tumen. Pozdravil tumen vi o Marko mungro čhavo ando Hristo. 14 Pozdravin jek avres ande ljubav. Miro tumenđe savorende save sen ando Hristo!

2 Petresko

1 Akava lil si ramome katar o Simon Petar, sluga thaj apostol e Isuse Hristosko, okolende save e pravdasa katar amaro Del thaj katar amaro Spasitelj Isus Hristo primisardine isto dragoceno pačipe sago vi amen: **2** Milost thaj miro tumende ando izobilje kroz o pindžaripe e Devle thaj e Isuse amare Gospode. **3** Lešči božanstveno sila dija amen sa so trubul men palo trajo thaj pale pobožnost. Sa godova primisardam gajda kaj pindžardam Okoles savo akharda men pire slavava thaj lačhipeja. **4** Godolesa daruisardas amende dragocene thaj bare obećanja, te preko lende šaj len udeo ande božansko narav, pošto našen katar o bilačipe savo si ando them, a avel katar e požude. **5** Zato den tumendar svako trudo te ando tumaro pačipe nadodajin o lačhipe, ando lačhipe o džanglipe, **6** ando džanglipe uzdržljivost, ando uzdržljivost strpljenje, ando strpljenje pobožnost, **7** ande pobožnost ljubav maškar e phral, a ande godoja ljubav, ljubav prema savorende. **8** Kaj, ako si tumen sa akala vrline thaj napredujin ande lende, askal či avena bibučarne ni besplodne ando džanglipe amare Gospode e Isuse Hriste. **9** A kas naj akala vrline, koro si thaj kratko vidno – bistardas kaj si šilado katar pire purane bezeha. **10** Andar godova, phralalen thaj phejalen, trudin tumen tumare trajosa te dokažin kaj o Del akharda tumen thaj losarda tumen. Ako gajda čeren, nikad či perena katar o pačipe. **11** Gajda avela tumende sikadi barvali dobrodošlica ando večno Carstvo amare Gospodesko thaj e Spasiteljesko e Isuse Hristosko. **(aiōnios g166)** **12** Zato uvek dava tumen godi pe godova, vi ako sa godova već džanen thaj čvrsto ačhen ando čačipe savo si tumen. **13** Inčarav kaj si ispravno te dav tumen godi pe sa godova, sa dži kaj trajiv ande akava telo savo si sago šator, **14** kaj džanav kaj uskoro mukava akava šator, sago kaj godova objavisarda mande amaro Gospod o Isus Hrist. **15** Zato truvivama te vi nakon so džavtar uvek den tumen godi ke godova. **16** Kaj amen tumende či objavisardam e sila thaj o Avipe amare Gospodesko e Isuse Hristosko e lukavo čerde paramičenca, nego amen amare jakhenca dikhlam lesko veličanstvo. **17** Kaj kana primisarda čast thaj slava katar o Del o Dad, ašunda pe o glaso e Devlesko savo si veličanstveno ande piri slava sar phenel: "Akava si mungro volime Čhavo, Vo si mungri bah." **18** Vi amen ašundam godova glaso savo avelas andar o nebo kana samas lesa pe sveto gora. **19** Gajda si potvrdime amende o proročko alav, a tumen lačhe čeren kaj len sama pe akala alava sago pe svetiljka savi phabol ando tunjariko, dok či osvanil o đes thaj e čerein e Danica či pojavilpe ande tumare ile. **20** A majsigo

katar sa akava džanen: nijek proroštvo andar o Sveto lil naši tumačilpe sar ko kamel. **21** Kaj o proročko alav nikad či avilo katar e manušendi volja, nego e potaknime manuša vodime e Sveto Duhosa mothonas e Devlešće alava.

2 Ali, maškar e Devlesko them sas vi hohamne prorokurja, sago kaj vi maškar tumende avela hohavne učitelja, save anena hohavno sikavipe thaj odbacina e Gospode Isuse savo otkupisarda len. Gajda crdena pe peste brzo propast. **2** Thaj but džene džana pale lengo lađzavno ponašanje thaj zbog lende bilačhe čerel pe svato palo Hristosko čačo Drom. **3** Ande piri pohlepa, iskoristina tumen gajda kaj phenena tumende bičače paramiče. Ali lendi osuda već katar dumut visil pe lende thaj lendi propast ažučarel len. **4** Kaj, ako o Del či poštedisarda e anđelen save sagrašisardine, nego čhuda len ande mračne tamnice e paklošće, te ažučaren thaj aven arakhade palo Sudo, **(Tartaroō g5020)** **5** ako o Del ni o purano them či poštedisardas kana bičalda o potop pe phuv savi sas pherdi manuša save protivinas pe lešće, nego poštedisarda samo e Noja, savo sas propovedniko pale pravednost, thaj ehta averen, **6** gajda osudisarda vi e gava e Sodoma thaj e Gomora, dija len jag gajda kaj pretvorisarda len ando praho, thaj čhuta len sago primer okolende save protivin pe e Devlešće. **7** Ali o Del spasisarda e Lote, savo sas pravedno manuš thaj patilas zbog o razuzdano trajo e manušengo save či pindžarenas e Devle. **8** E pravedno duša godole manušesči mučinas e bilačhe dela save dičelas thaj ašunelas svako đes dok trajilas maškar lende. **9** Godova značil o Gospod džanel sar te izbavil e pobožne manušen andar o iskušenje, a e bilačhen aračhela pale kazna ando Đes e sudosko, **10** posebno okolen save džan pale melale požude e telošće thaj mrzan e Gospodešči vlast. Godola si drske thaj bezobrazne manuša, von či daran te vređon e nebeske bičen, **11** dok e anđelurja, vi ako si majzurala thaj majmočne, či mothon pogrdne optužbe protiv lende anglo Gospod. **12** Godola manuša si sago nerazumne životinje save trajin po nagon e prirodako, bijande palo lovo thaj mudaripe, kaj či džanen kas vređon. Pale godova, sago e životinje, vi avena uništimo. **13** Trpina o bilačipe sago kazna palo bilačipe savo čerdine. Von save si ljage thaj rugobe nasladin pes pire hohaimasa dok tumenca gostin pe, pale naslada smatrin e razuzdanost ando opaš o đes. **14** Lende jakha si pherde požude pale manušnja. Nikad naj čaljarde e bezeheja, thaj crden po bezah okolen save naj čvrste ando pačipe. Lende ile si uvežbime ande pohlepa. Von si talo proklestvo e Devlesko. **15** Đeletar katar o čačo drom thaj hasajle, teljardine e Valaamešće dromesa savo sas

e Veorovosko čhavo, savo prihvatisarda e počin pale pire bilače dela. 16 O Valaam sas ukorime pale piro bilačipe: e magarica savi inače našti čerel svato, počnisarda te čerel svato e manušešče glasosa thaj sprečisardas e prorokosko dilipe. 17 Godola manuša si sago e izvorja bi pajesko thaj e oblakurja saven tradel e balval, pale lende si arakhado o than kaj si o majkalo tunjariko. 18 Von e čuče alavenca hvalinpe thaj e telesne požudenca mamin okolen save tek našline katar okola save trajin ande zabluda. 19 Obečin lende sloboda, a vi korkoro si roburja e bilačimašče – kaj svako robujil okolešče so svladisarda les. 20 Kaj, ako okola save našline katar akava rumome them, kana pindžardine amare Gospode thaj Spasitelje e Isuse Hristo, a askal palem zaputisajle ande themesko bilačipe thaj peren tale lendi vlast, lengo stanje si majgore nego majsigo. 21 Pale lende avilosas majlače te nikad či ni pindžardinesas o pravedno drom nego so pindžardine les, a askal boldine e dume katar e sveto zapoved savi sas lende dini. 22 Dogodisajlo lende okova pale soste phenen e čače izreke: “O džučhel boldel pes pe piro čhaglipi” thaj “O thodo balo boldel pe te valjilpe ande čik.”

3 Drage mungre, akava si već dujto lil savo ramov tumende.

Ande liduj dav tumen godi thaj potakniv tumen te ispravno gndin 2 thaj mangav te den tumen godi ke alava save prorokuisardine e svete prorokurja majsigo ande okoja vrjama thaj ke zapovedi amare Gospodešče thaj e Spasitelješče, save dine pe tumende kroz e apostolurja. 3 Majsigo katar sa džanen akava: ande poslednje đesa avena e izrugivača save marena muj thaj save trajina gajda te ugodin pire vlastite bilače željenje. 4 Von mothona: “Či li vo obečisarda kaj palem avela? Pa kaj si vo askal? Kaj vi amare pradada muline, a sa si isto katar kana o them si stvorime.” 5 Von namerno bistaren kaj e nebesa postojin katar e dumutni vrjama thaj kaj e phuv postanisarda e Devlešče alavesa andar o paj thaj kroz o paj. 6 Godole pajesa si potopime thaj vi uništimo godova purano them, 7 a godole isto alaveja akava nebo thaj akaja phuv si mukle palo oganj – von arakhadon palo Đes e sudosko kana e bezbožne manuša avena uništimo. 8 Ali, jek na te bistaren, drage mungre: anglo Gospod jek đes si sago milja brš, a milja brš sago jek đes. 9 O Gospod či kasnil te pherel piro obećanje, sago kaj varesave gndin, nego si strpljivo prema tumende, kaj vo či kamel te bilo ko tumendar propadnil, nego te sa e manuša ando them pokajin pe. 10 A o Đes e Gospodesko avela sago o čor. Godova đes o nebo nestanila e glasno bukasa, a e jagasa avena uništimo e nebeske sile, a e phuv thaj sa pe

late avela opustošimo. 11 Pošto sa gajda avela uništimo, sar tek sveto thaj pravedno moraš tumen te trajin, 12 dok željno ažučaren o Đes e Devlesko thaj gajda sidaren lesko avipe. Lešče avipeja e nebesa nestanina ando plameno, a e nebeske sile ande jag rastopina pes. 13 A amen sar o Del obečisarda ažučaras o nevo nebo thaj nevi phuv, kaj vladil e pravda. 14 Pošto godova ažučaren, drage mungre, trudin tumen te trajin čisto thaj besprekorno ando miro e Devleja. 15 Smatrin kaj si tumaro spasenje ande Gospodešči strpljivost, sago kaj ramosarda tumende vi amaro volime phral o Pavle kroz e mudrost savi sas lešče dini. 16 Vo pale godova mothol ande sa pire lila. Ande lende varesave stvarja si phare te hačaren pe, a save e neuke thaj nepostojne manuša bande tumačin. Von godova čeren vi pe aver thana ando Sveto lil, pešče pe propast. 17 Prema godova, drage mungre, pošto sen majjnglal upozorime, len tumen sama te na peren ande zabluda godole bilače manušenđi thaj te na hasaren tumari postojnost. 18 Barjon ande milost thaj ande spoznaja amare Gospodešči thaj e Spasitelješči e Isuse Hristošči. Lešče slava vi akana thaj pale uvek. Amin. (aiōn g165)

1 Jovanesko

1 Okova savo sas katar o početko isto si okova saves ašundam, saves amare jakhenca dikhlam, saves posmatrisardam thaj amare vastenca dirdam. Vo si o Isuso Hristo, o Alav e trajosko. **2** Vo, savo si trajo katar o Del, pojavisajlo thaj dikhlam les. Akana mothas thaj das tumende po džanglipe kaj si vo večno trajo savo sas ko Dad thaj amende sikadilo. (aiōnios g166) **3** Akana mothas tumende okova so lično dikhlam thaj ašundam te šaj vi tumen avel zajedništvo amenca. A amaro zajedništvo si e Dadesa thaj lešće Čhavesa e Isuse Hristosa. **4** Ramosaras tumende te amari bah avel potpuno. **5** Akaja poruka ašundam katar o Del thaj mothas lat tumende: O Del si svetlost thaj ande leste naj nisošći tama. **6** Te phenas kaj sam ando zajedništvo e Devlesa, a vi majdur trajisaras ande duhovno tama, hohavas thaj či trajisaras ando čačipe. **7** Ali, ako trajisaras ando svetlost, sago kaj si o Del ando svetlost, askal si amen zajedništvo jek averesa thaj o rat e Isusesko, lešće Čhavesko, šilavel men katar svako bezeh. **8** Te phendam kaj naj amen bezeh, korkoro amen hohavas thaj o čačipe naj ande amende. **9** Ali vo si verno thaj pravedno, gajda, ako priznajisaras lešće amare bezeha, jartola mande thaj šilavela men katar svako nepravda. **10** Te phendam kaj či sagrašisardam, čeras e Devle kaj si hohamno thaj sikavas kaj lesko Alava naj ande amende.

2 Čhavralen mungralen, akava ramov tumende te na čeren bezeh. Ali, te vareko vi čerel bezeh, si amen zastupniko ko Dad o Del, e Isuse Hristo savo si pravedniko. **2** Vo si žrtva savo lel amare bezeha thaj na samo amare, nego vi e bezeha e saste themešće. **3** A pe akava džanas kaj pindžaras e Devle, ako inčaras lešće zapovesti. **4** Ako vareko phenel kaj pindžarel e Devle, a či inčarel lešće zapovesti, hohamno si thaj ande leste naj čačipe. **5** Ali ko trajil gajda sar sikavel e Devlesko alav, ande leste e Devlešći ljubav čače postanisarda savršeno. Pe akava džanas kaj trajisaras ande leste. **6** Ako vareko phenel kaj ačhel ando Del, godova moraš te trajil sago kaj trajilas o Isus. **7** Drage mungre drugarja, či ramov tumende nisavi nevi zapovest, več e purani, okoja savi dobisardine katar o početko. Godoja si e purani zapovest o sikavipe savo več ašundine. **8** A palem ramov tumende godoja zapovest sago kaj si nevi. Lako čačipe dičhol ando Isus thaj ande tumende. Kaj e tama načhel, a o čačo svetlo več svetli. **9** Ako vareko phenel kaj si ando svetlo, a mrzal pire phrale, još si ande tama. **10** Ako vareko volil pire phrale, trajil ando svetlo thaj

či čerel khanči zbog soste hasardasas o pačipe. **11** A ko mrzal pire phrales, ande tama si, phirel ande tama thaj či džanel kaj džal, kaj e tama korarda lešće jakha. **12** Ramov tumende, čhavralen, zato kaj si tumare bezeha jartome zbog e Isusesko alav. **13** Ramov tumende, dadalen, zato kaj pindžardine okoles savo si katar o početko. Ramov tumende, terne čhavalen, zato kaj pobedisardine e Bilačhes. **14** Ramosardem tumende, čhavroralen, zato kaj pindžardine e nebesko Dades. Ramosardem tumende, dadalen, zato kaj pindžardine okole savo si katar o početko. Ramosardem tumende, terne čhavalen, zato kaj sen zurale, thaj kaj e Devlesko alav trajil ande tumende thaj kaj pobedisardine e Bilačhes. **15** Na volin akava them ni okova so si ando them. Te vareko volil akava them, ande leste naj e Dadešći ljubav. **16** Kaj sa so o them nudil samo si požuda e telošće, požuda pale okova so e jak dičel thaj o barikanipe zbog o barvalipe. Godova či avel katar o Dad o Del, već katar akava bilačo them. **17** Akava them pire požudava načhel, a ko čerel e Devlešći volja, trajila pale uvek. (aiōn g165) **18** Čhavralen, o krajo si paše! Ašundine kaj avel o Antihrist. Več akana pojavisajle e but e antihristurja. Pe godova džanas kaj si o krajo paše. **19** Amendar inklijstine, ali nas amare. Kaj te čače aviline sas amare, ačhilesas amenca. Ali trubuja te sikadol kaj naj savora amare. **20** A tumen primisardine e Sveto Duhos thaj savora džanen o čačipe. **21** Či ramov tumende zato kaj či džanen o čačipe, već pale godova kaj pindžaren o čačipe thaj pale godova kaj nijek hohaipe či avel katar o čačipe. **22** Ko si o hohavno, ako naj okova savo tvrdil kaj o Isus naj o Hristo? Ko či priznail e Dade thaj e Čhave, vo si antihrist. **23** Svako ko či priznail e Čhaves, najles ni Dad. A ko priznail e Čhaves, si les vi Dad. **24** O okova sikavipe savo ašundine katar o početko, neka ačhel ande tumende. Ako godova sikavipe savo ašundine katar o početko ačhel ande tumende, askal vi tumen ačhena ando Čhavo thaj ando Dad. **25** A akava si o obećanje savo dija amen o Del: večno trajo. (aiōnios g166) **26** Akava ramov tumende pale okola manuša save kamen te hohaven tumen thaj te crden tumen katar o pravo drom. **27** Ali tumen primisardine e Sveto Duho saves dija tumen o Hristo. Vo ačhel ande tumende thaj naj potrebno khonik te sikavel tumen. O Duho sikavel tumen sa thaj lesko sikavipe si čačo, a na hohavno. Zato vi majdur te trajin ande leste, sar vo sikadas tumen. **28** Ej čhavralen, trajin ande leste, gajda avasa pherde pouzdanje kana boldela pe o Hristo. Thaj či ladžasa angle leste kana pojavila pe. **29** Ako džanen kaj si o Hristo pravedno gajda vi džanen kaj svako savo čerel so si pravedno si e Devlesko čhavo.

3 Dičhen Čefal bari ljubav dija men o Dad: te akhara men e Devlešče čhavrenca! A godova vi sam. E manuša akale themešče či pindžaren men zato kaj či pindžaren les. **2** Drage mungre drugarja, akana sam e Devlešče čhavra, a još či sikadilo so avasa. Ali džanas kana o Hristo pojavila pe, avasa lešče slične, kaj dikhasa les kasaves sosko si. **3** Taj svako savo čhuta akaja nada ande leste, šilavel pe sago kaj si vi o Hristo čisto. **4** Svako savo čerel bezeh, prekršil o zakono, kaj si o bezeh protivno katar e Devlesko zakon. **5** Džanen kaj o Isus avilo te lel amendar amare bezeha taj ande leste naj bezeh. **6** Svako savo ačhel ando Hristo, či trajil ando bezeh. A svako savo trajil ando bezeh, či dikhla les niti pindžarda les. **7** Čhavroralen, na den khonikašče te hohavel tumen! Ko čerel okova so si pravedno, pravedno si sago o Hristo. **8** Ako vareko trajil ando bezeh, godova sikavel kaj pripadil e benđešče kaj o beng grešil katar o početko. O Čhavo e Devlesko avilo pale godova: te uništil e benđešče buća. **9** Svako savo si e Devlesko čhavo či trajil ando bezeh kaj si e Devlešči narav ande leste. Vo našti te trajil ando bezeh kaj postanisarda e Devlesko čhavo. **10** E Devlešče čhavra taj e benđešče čhavra pindžardonpe pe akava: svako savo či čerel so si pravedno taj či volil pire phrale, či pripadil e Devlešče. **11** Kaj akava si e poruka savi ašundine katar o početko: volin jek avren! **12** Na aven sago o Kain, savo pripadilas e Bilačešče taj mudardas pire phrales. A sostar mudarda les? Zato kaj sas lešče dela bilače, a e dela lešče phralešče pravedne zato mrzalas les. **13** Na čudin tumen, phralalen, ako e manuša akale themešče mrzina tumen. **14** Amen džanas kaj nakhlam andar o smrto ando trajo kaj volisaras amare phralen. Ko či volil pire phralen ačhel duhovno mulo. **15** Svako savo mrzal pire phrales, ubica si, a džanen kaj ni ječe ubica naj ande leste večno trajo. (aiōnios g166) **16** Pe akava džanas so si pravo ljubav: o Isus dijas piro trajo pale amende. Gajda vi amen trubul te das amaro trajo pale amare phral. **17** Kas si akale themesko barvalipe, a dičhel pire phrale ande potreba taj či pomognil lešče, našti phenel pe pale leste kaj si les e Devlešči ljubav ando ilo. **18** Čhavralen mungralen, na volin samo e alavenca taj e čhibjava, nego e delenca taj iskreno. **19** Pe godova džanas kaj pripadis e čačimašče taj gajda umirisarasa amari savest anglo Del **20** kana god e savest osudil amen. Kaj o Del si majbaro katar amari savest taj sa džanel. **21** Drage mungre drugarja, ako amari savest či došarel men, si amen pouzdanje anglo Del **22** taj dobisaras lestar okova so zamolisaras, kaj inčaras lešče zapovesti taj čeras okova so si lešče milo. **23** A akava si lešči zapovest: te pačas ando alav lešče Čhavesko e Isuse

Hristosko taj te volisaras jek avren sago kaj zapovedisarda amende. **24** Ko inčarel e Devlešče zapovesti, ačhel ando Del taj o Del ačhel ande leste. A kaj o Del trajil ande amende, džanas po Duho saves dija men.

4 Drage mungre drugarja, na pačan svakone duhošče, nego proverin e duho – dali si katar o Del – kaj but hohavne prorokurja pojavisajle ando them. **2** Pe akava pindžaren e Devlešče Duhos: svako duho savo priznail kaj o Isus Hrist avilo ande manušesko telo, si katar o Del. **3** Taj ni jek duho savo či priznail e Isuse, naj katar o Del. A vo si katar o Antihrist pale savo ašundine kaj avel, taj več akana si ando them. **4** Čhavralen, tumen sen katar o Del taj pobedisardine e hohavne prorokonon, kaj si okova savo si ande tumende majbaro katar okova savo si ando them. **5** Von pripadin akale themešče taj zato čeren svato sago kaj čeren svato okola save si andar akava them taj e manuša akale themešče čhon kan lende. **6** Amen pripadisaras e Devlešče. Ko pindžarel e Devle, čhol kan amende. Ko či pripadil e Devlešče, či čhol kan amende. Pe godova džanas dali si varekas čačo Duho ili hohavno duho. **7** Drage mungre drugarja, trubul te volisaras jek avren, kaj e ljubav si katar o Del. Svako savo volil, e Devlesko si čhavo taj pindžarel e Devle. **8** Ko či volil, či pindžardas e Devle, kaj o Del si ljubav. **9** O Del gajda sikadas amende piri ljubav: bičhalda pire jedine Čhaves po them te trajisaras prekal leste. **10** Ande akava si e ljubav: či amen volisardam e Devle, nego vo volisardas amen taj bičhalda pire Čhaves te avel žrtva savi lel amare bezeha. **11** Drage mungre drugarja, ako o Del gači zavolisarda men, askal vi amen moraš te volisaras jek avren. **12** E Devles nikada khonik či dikhla, ali ako volisaras jek avres, o Del trajil ande amende taj lešči ljubav si ande amende savršeno. **13** Pe akava džanas kaj trajisaras ando Del taj vo ande amende: dija men katar piro Duho. **14** A amen dikhlam kaj o Dad bičhaldas pire Čhaves te avel Spasitelj e themesko taj pale godova akana svedočisaras. **15** Ko priznail kaj si o Isus o Čhavo e Devlesko, ande leste trajil o Del taj vo trajil ando Del. **16** A amen pindžardam e ljubav savi si e Devle pale amende taj pačajam laće. O Del si ljubav. Ko trajil ande ljubav, trajil ando Del taj o Del trajil ande leste. **17** Pe akava e Devlešči ljubav postanil savršeno ande amende kaj več šaj avel men pouzdanje pale Sudosko đes. Godova si zato kaj sam amen sago o Hristo pe akava them. **18** Ande ljubav naj dar, nego e savršeno ljubav tradel e dar andar o manuš. Okova savo daral, si les dar katar e kazna, so značil kaj naj savršeno ande ljubav. **19** Amen volisaras zato kaj o Del prvo zavolisardas amen. **20**

Ako vareko phenel: "Voliv e Devles", a mrzal pire phrales, hohavno si. Kaj ko či volil pire phrale, saves dičhel, našti te volil ni e Devles, saves či dičhel. **21** A akaja zapovest si amen lestar: ko volil e Devle, trubul te volil vi pire phrale.

5 Svako savo pačal kaj o Isus si o Hristo, bijando si katar o Del. Thaj svako savo volil e Dade volil vi lešče čhavres. **2** Pe akava džanas kaj volisaras e Devlešče čhavren: kana volisaras e Devle thaj inčaras lešče zapovesti. **3** Kaj akava si ljubav prema o Del: te inčaras lešče zapovesti. A lešče zapovesti naj phare. **4** Kaj sa so si bijando katar o Del, pobedil o them. A akava si pobeda savi pobedisardas o them: amaro pačipe. **5** A ko pobedila akava them, ako či okova savo pačal kaj o Isuso si e Devlesko Čhavo? **6** Vo, o Isuso Hristo, avilo kroz o paj kana bolape thaj kroz o rat kana mulo – na samo e pajesa, nego e pajesa thaj e ratesa. A o Duho si godova savo svedočil pale godova, kaj o Duho si čačipe. **7** Gajda trin svedočin: **8** o Duho, o paj thaj o rat, thaj godola trin svedokurja slažonpe. **9** Ako pačas ande manušengo svedočanstvo, trubul te džanas kaj si e Devlesko svedočanstvo majbaro, kaj godova svedočanstvo si saveja o Del svedočisarda pale piro Čhavo. **10** Ko pačal ando Čhavo e Devlesko, si les godova svedočanstvo ande peste. A ko či pačal e Devlešče, mothol kaj o Del hohavel, godoleja kaj či pačaja ande Devlesko svedočanstvo saveja o Del svedočil pale pesko Čhavo. **11** A akava si godova svedočanstvo: o Del dija amen večno trajo thaj godova trajo si ande lesko Čhavo. (aiōnios g166) **12** Kas si Čhavo, si les trajo. A kas naj Čhavo e Devlesko, najles trajo. **13** Akava ramosardem tumende save pačan ando alav e Devlešče Čhavesko te džanen kaj si tumen večno trajo. (aiōnios g166) **14** Akava si pouzdanje savo si amen ande leste: vo ašunel men so god te mangas lestar so si pe lešči volja. **15** A kana džanas kaj ašunel men ande sa so mangas, askal džanas kaj si amen okova so manglam lestar. **16** Ako vareko dičhel pire phrales kaj čerel bezeh savo či indarel ando smrto, neka molil pale leste thaj o Del dela les trajo. Mothav pale okola save či čeren smrtno bezeh. Ali si bezeh savo indarel ando smrto. Pale kasave bezeha či phenav te molin. **17** Svako nepravda bezeh si, ali si bezeh savo či indarel ando smrto. **18** Džanas kaj svako savo si bijando katar o Del či trajil ando bezeh, nego lel les sama okova savo si bijando katar o Del thaj o Bilačo či astarel pe pale leste. **19** Amen džanas kaj sam e Devlestar, a kaj si o sasto them ando vas e Bendesko. **20** A džanas kaj o Čhavo e Devlesko avilo thaj dija men hačaripe te pindžaras e čačutne Devle. Thaj amen sam ando čačutno Del, ande lesko Čhavo o Isuso Hristo.

Vo si čačo Del thaj večno trajo. (aiōnios g166) **21** Čhavoralen mungralen, len tumen sama katar e idolurja.

2 Jovanesko

1 Me, o Jovano o starešina, ramov e rajaće savja o Del izabirisarda thaj laće čhavrende saven čaće voliv thaj na samo me nego vi sa okola save pindžardine o čačipe. **2** Voliv tumen zbog o čačipe savo trajil ande amende thaj savo avela amenca pale sa e vrjama. (aiōn g165) **3** Milost, milosrđe thaj miro katar o Dad o Del thaj katar lesko Čhavo o Isuso Hristo, avela amenca ando čačipe thaj ande ljubav! **4** But raduisajlem kaj maškar čire duhovne čhavra arakhlem varesaven save trajin ando čačipe, upravo gajda sar zapovedisardas amende o Dad. **5** A akana moliv tut, rajje, te volisaras jek avren. Či ramov tuće varesavi nevi zapovest, nego okoja isto savi si amen katar o početko. **6** A akava si e ljubav: te trajisaras prema e Devlešće zapovesti. Sago kaj ašundine katar o početko, godoja zapovest si: te trajin ande ljubav. **7** Ando them pojavisajle but hohavne manuša save či priznain kaj o Isus Hrist avilo pe phuv ando telo. Svako kasavo manuš si hohavno thaj antihrist. **8** Len sama pe tumende te na hasaren okova so steknisardine, nego te primin e pherdi počin. **9** Svako savo či ačhel ande Hristosko sikavipe thaj durjol lestar, najles Del. A ko ačhel ande Hristosko sikavipe, si les vi Del thaj vi Čhavo. **10** Ako vareko avel tumende, a či anel godova sikavipe, na primin les ande tumaro čher thaj na ni pozdravin les. **11** Kaj ko pozdravil les, si les talo ande lešće bilačhe dela. **12** Si man još but godova te phenav tumende, ali či kamav godova te čerav prekal o lil. Nego nadiv man kaj avava tumende thaj čerava tumenca svato jakha ande jakha te amari bah avel potpuno. **13** Pozdravin tut e čhavra čire phejaće savja o Del izabirisardas.

3 Jovanesko

1 Me o Jovano o starešina, ramov e Gajošče saves čače but voliv. **2** Drago mungro drugarina, moliv man te aves sasto thaj te ande sa avel tuče lače sago kaj si lače čire dušače. **3** Kaj but raduisajlem kana aviline varesave phral thaj mothodine amende pale čiri vernost ando čačipe, sago kaj vi trajis ando čačipe. **4** Pale mande naj majbari bah, nego kana ašunav kaj mungre duhovne čhavra trajin ando čačipe! **5** Drago mungro drugarina, verno san ande sa so čeres pale phrala, saven čak či ni pindžares. **6** Godola phral angle khandiri mothonas pale čire ljubav. Lače čereja te dijan len so trubula len po drom sago kaj si dostojno anglo Del. **7** Kaj von teljardine po drom zbog o Hristosko alav thaj khanči či kamen te len katar okola kaj či pindžaren e Devles. **8** Amen sam dakle udžile te sikavas lende gostoprimstvo, te avas suradnikurja palo čačipe. **9** Ramosardem vareso e khandirjače, ali o Diotref, savo kamel te avel prvo maškar lende, či kamel te primil men. **10** Zato mothava lešče, te avilem, palo bilačipe savo čerel thaj pale bilače alava save mothol ando dilipe pale amende. Ali ni godova naj lešče dosta, nego sar vo korkoro či kamel te primil e phralen, gajda či mučel godova ni okolende save godova kamline sas thaj andar godova tradel len andar e khandiri. **11** Drago mungro drugarina, na dik sar čerdanas bilačipe, nego čer okova so si lačipe. Ko čerel lačipe, katar o Del si, a ko čerel bilačipe, či dikhla e Devle. **12** Palo Dimitrija savora šukar mothon, a vi o čačipe šukar mothol pale leste. Vi amen šukar mothos pale leste, a tu džanes kaj amen phenas okova so si čačipe. **13** Si man još but godova te phenav tuče, ali či kamav prekal o lil. **14** Nego nadiv man kaj sigo dikhav tut thaj kaj askal čerasa svato jakha ande jakha. Miro e Devlesko tusa. Pozdravin tut e drugarja! Pozdravisar amare drugaren svakones po alav.

Judasko

1 Me o Juda, sluga e Isuse Hristosko thaj e Jakovesko phral, ramov okolende saven o Del o Dad akhardas, save volil thaj saven lel sama ando Isuso Hristo. **2** Milosrde, miro thaj ljubav tumende nek umnožil pe! **3** Drage mungre, lijem te ramov tumende palo amaro zajedničko spasipe, ali hačardem kaj trubul te ohrabriv tumen te borin tumen palo pačipe savo si jekhar thaj pale sa vrjama dini e Devlešće svete manušenđe. **4** Kaj maškar tumende crdine pe varesave manuša save si već dumut odredime palo sudo. Von si bidevlešće manuša save dičen e milost amare Devlešći sago izgovor te šaj trajin ando bezeh thaj či priznajin amare jedino Vladares thaj e Gospodes e Isuse Hriste. **5** A kamlemas te dav tumen gođi pe varesoste so već džanen kaj o Isus majsigo spasisardas e Israelošće themes andar o Egipto thaj askal uništisardas okolen save či pačanas. **6** Thaj vi e andelen save či inčarenas dži ke piro autoriteto savo sas len, thaj mukline pesko boravište, o Del inčarel ando tunjariko phandade ande večne okurja palo baro đes kana avena osudime. (aiǵios g126) **7** Gajda vi e manuša andar e Sodoma thaj andar e Gomora zajedno okolenca andar e okolne gava, po isto način dine pe ando bludo te soven e muškarcurja e muškarconenca, thaj von si sago primer gajda kaj trpin e kazna ando večno jag. (aiǵnios g166) **8** Gajda isto vi akala manuša, dičen sune thaj e bezehesa meljaren pešće telurja, či priznajin e Devlešći vlast thaj vredon e slavne andelen. **9** Čak ni o Mihailo, jek katar e majbare andelurja, kana tradelas pe e benđeja ko lela e Mojsijesko telo, či tromaja te phenel pogrdne alava protiv o beng, nego phendas: "O Del neka prekoril tut!" **10** No akala manuša maren muj katar okova so či pindžaren. Sago nerazumne životinje si, čeren sa pe soste crdel len lende telesne nagonurja thaj gajda džan ando propast. **11** Teško lende! Kaj von teljardine e Kainošće dromesa thaj zbog e love dine pe ande Valaamešći zabluda thaj vazdine pobuna sago o Korej. Zato gajda vi uniština pe. **12** Godola manuša si opasne sago garade stene ando more pe tumare zajedničke gozbe pe save proslavin e Devlešći ljubav. Biladžavesko han tumenca, a vodin samo piri briga. Von si sago bipajale oblakurja saven indarel e balval karingal kamel. Von si sago jalave kaš save či den pesko plodo ando jesen, inkalde andar o koreno save duj data muline. **13** Thaj sago kaj e holjarde morske talasurja čuden pešći spuma, gajda von sikaven pešće ladžavne dela. Von si sago e čereja save lutin thaj pale save aračhel pe o majkalo tunjariko pale uvek. (aiǵn g165) **14** Pale lende prorokuisardas o Enoh, savo sas eftato čang katar o Adam:

"Ake o Gospod avel e bute miljenca pire svete andelenca, **15** te sudil savorende thaj te osudil sa e bidevlešće manušen pale sa lende bidevlešće dela save čerdine pe bidevlesko način, thaj pale sa okrutne alava save phendine e bidevlešće bezehale manuša protiv leste." **16** Godola manuša uvek guđin thaj žalin pes pe sudbina; von trajin te ugodin pire željende, e mujesa ohole alava mothon, a averenca čeren pe šukar te avel len korist. **17** A tumen drage mungre, den tumen gođi ke okova so e apostolurja katar amaro Gospod o Isuso Hristo prorokuisardine. **18** Von phendine tumende kaj ande poslednjo vrjama pojavina pe varesave manuša save marena muj thaj save trajina bidevlesko te ugodin pire željende. **19** Kasave maškar tumende čeren razdor thaj trajin sago telesne manuša andar godova kaj najlen ande peste e Devlesko Duho. **20** A tumen, drage mungre, duhovno barjon ando tumaro majsvelo pačipe. Molin tumen ando Sveto Duho. **21** Inčaren tumen ande Devlešći ljubav dok ažučaren amare Gospode e Isuse Hristo, te ande piro milosrde indarel men ando večno trajo! (aiǵnios g166) **22** Aven milosrdne prema okola save naj sigurne ando pačipe. **23** Spasin e avren manušen gajda crdena len andar e jag e Devlešće sudošći! Aven milosrdne prema averende, ali ande isto vrjama len tumen sama! Mrzan čak vi lende drze meljarde ando lengo bezeh! **24** O Del šaj lel tumen sama te na peren ando bezeh thaj te bi manako, ando baro bahtalipe čhol tumen angle piri slava. **25** Lešće, savo si jedino Del, amaro Spasitelj, slava, veličanstvo, moć thaj vlast, kroz amaro Gospod Isuso Hristo, katar o početko thaj vi akana thaj pale uvek! Amin. (aiǵn g165)

Otkrivenje

1 Akava si o otkrivenje e Isuse Hristosko, savo o Del dija les te sikavel pire slugende so uskoro trubula te avel. O Isus godova sikada gajda kaj bičhaldas pire anđele pire slugašće e Jovanošće. **2** O Jovan svedočil pale sa so dikhla: pale Devlesko alav thaj palo svedočanstvo e Isuse Hristosko. **3** Blago okolešće savo čitol thaj okolende save ašunen e alava andar akava proroštvo thaj incaren pes ke okova so si ande leste ramome, kaj e vrjama kana akava proroštvo pherdola si paše. **4** Me o Jovano, ramov e efta khandirende ande Cikni Azija: Milost thaj miro tumende katar okova savo si, savo sas, thaj savo avela thaj katar e efta duhurja save si angle lesko prestolje **5** thaj katar o Isus Hristo, savo si verno svedoko, prvo savo uštilo andar e mule thaj savo si vladari pe akale phuvjače carurja. Okolešće savo volil men thaj savo pire rateja oslobodisarda men katar amare bezeha, **6** thaj čerda men te avas carstvo rašaja save služin e Devlešće, lešće Dadešće – lešće slava thaj moć pale uvek. Amin. (aiōn g165) **7** Ake, vo avel pe oblakurja, thaj svako jak dičhela les, čak vi okola save pusadine les. Thaj sa e plemenurja po them e čerće jasvenca rovena zbog leste. Ej, gajda avela. Amin. **8** "Me sem o Alfa thaj o Omega – Početko thaj Krajo", phenel o Gospod o Del, savo si, savo sas, thaj savo avel – Okova savo sa šaj. **9** Me, o Jovano, tumaro phral ando Hristo, savo tumenca deliv e patnje, o Carstvo thaj e strpljivo istrajnost ando Isus. Semas po ostrvo Patmos andar godova kaj propovedivas e Devlesko alav thaj e Isusesko svedočanstvo. **10** Ando đes e Gospodesko, semas ando Duho. Pale mande ašundem zuralo glaso, sago e trubako, **11** savo phendas mande: "Ramo ando lil okova so dičhes thaj bičhal ande efta khandirja: ando Efes, Smirna, Pergam, Tijatira, Sard, Filadelfija thaj ande Laodikija." **12** Boldem man te dikhav kasko glaso mothol mande thaj kana boldem man, dikhlem efta sunakune čirakurja, **13** a maškar e čirakurja varekas sago e Čhave e Manušešće. Sas furjardo ando lungo ogrtači, thaj oko kolin sas les sunakuno pojas. **14** Lesko šoro thaj lešće bal sas parne sago parni vuna ili sar o iv, a lešće jakha sago o jagalo plameno. **15** Lešće pungere sas sago e sjajno bronza užarime ande bov, a lesko glaso sas sago e buka katar e bare morske talasurja. **16** Ande piro desno vas incarelas e efta čereja, a andar lesko muj inkijelas o mačo savo sas oštro pe liduj riga. Lesko muj sas sago o kham kana majzurala phabol. **17** Kana dikhlem les, pelem angle lešće pungere sago mulo. Ali vo čhuta piro desno vas pe mande thaj phendas mande: "Na dara! Me sem Prvo thaj Poslednjo, **18** okova savo trajil. Semas mulo, ali, ake,

trajiv pale uvek, thaj si man e čije katar o smrto thaj katar o Them e mulengo. (aiōn g165, Hadēs g86) **19** Zato ramosar okova so dikhlan, so akana si thaj so majposle avela. **20** Akava si e tajna katar e efta čereja save dikhlan ando mungro desno vas thaj katar efta sunakune čirakurja: e efta čereja si e anđelurja e efta khandirjače, a e efta čirakurja si e efta khandirja."

2 "E anđelošće andar e khandiri ando Efes ramosar: 'Akava phenel Okova savo incarel e efta čereja ande piro desno vas thaj savo phirel maškar e efta sunakune čirakurja: **2** Džanav čire lače dela. Dikhlem sar trudistu thaj sar san istrajno. Džanav vi godova kaj našti trpis e bilače manušen. Probisardan okolen save pale peste phendine kaj si apostolurja, a naj, thaj arakhlan len kaj si hohavne. **3** Strpljivo trpisardan pale mande thaj či odustanisardan. **4** Ali, si man vareso protiv tute: kaj muklan čiri prvo ljubav prema mande savi sas tut majsigo. **5** Zato, de tut godi sosko sanas majsigo nego so pelan, pokajisar tut thaj čer okova so majsigo čerejas – kaj ako či čereja godova, avava tute thaj lava majdur čiro čirako katar lesko than maškar e khandirja, ako či pokajis tut. **6** Ali ipak, akava čeres lače: mrzis godova so čeren e nikolaiturja sago vi me. **7** Ašun kana već si tut kan, so o Duho phenel e khandirjende. E pobednikošće dava te hal katar o kaš e trajosko, savo si ande Devlesko rajo.'" **8** "E anđelošće andar e khandiri ande Smirna ramosar: 'Akava phenel o Prvo thaj o Poslednjo, savo mulo thaj džudilo: **9** Džanav pale čiri patnja thaj pale čiro čoripe – ali tu san barvalo. Džanav vi kaj vredonas tut okola save akharen pes Židovurja, vi ako naj godova, nego si e Sotonešči sinagoga. **10** Na dara katar okova so trubul te pretrpis. Ake, o beng varesaven tumendar čhudela ande tamnica te probil tumen thaj avena deš đes ande nevolje. Av verno dži ko smrto thaj dava tut venco e trajosko. **11** Ašun kana već si tut kan, so o Duho phenel e khandirjende. E pobednikošće či naudila o dujto smrto.'" **12** "E anđelošće andar e khandiri ando Pergam ramosar: 'Akava phenel Okova saves si mačo oštro pe liduj riga: **13** Džanav kaj trajis – okote kaj si o Sotonsko prestolje. A palem, ačhılan verno mungre alavešće thaj či odreknisajlan katar o pačipe ande mande, čak ni ande vrjama kana mungro verno svedoko o Antipa sas mudardo tumende – okote kaj o Satana trajil. **14** Ali si man vareso cara protiv tute: si tut okote varesave manuša save incaren e Valaamesko sikavipe, savo sikadas e Valake te crdel po bezeh e Izraelošće theme gajda kaj sikada len te han o mas savo si žrtvuime e idolende thaj den pe ando bludo. **15** Isto gajda, si tut vi okola save incaren

o sikavipe e nikolaitesko. 16 Zato, pokajisar tut, ili ubrzo avava tute thaj boriva man protiv lende e mačesa savo si e alava andar mungro muj. 17 Ašun kana već si tut kan, so o Duho phenel e khandirjende. E pobednikošće dava o garado mangro savo akhardol "mana" thaj dava les parno bar pe savo ramola lesko nevo alav, savo či džanel khonik osim okova savo dobil les." 18 "E andelošće andar e khandiri ande Tijatira ramosar: 'Akava phenel o Čhavo e Devlesko, savešće si jakha sago o jagalo plameno, a lešće pungere sar e sjajno bronza: 19 Džanav čire lače dela, čiri ljubav, čiro pačipe, čiri služba thaj čiri istrajnost, thaj kaj akana čeres majbut nego ando početko. 20 Ali si man vareso protiv tute: mućes okole manušnja e Jezavelja, savi korkoro pes akharel kaj si proročica te pire sikavipeja crdel mungre slugen te den pe ando bludo thaj han o mas savo si žrtvuime e idolende. 21 Dijem lat vrijeme te pokajil pe, ali voj či kamel te pokajil pe pale piro bludo. 22 Ake, čhudava lat ando than nasvalja, a okolen save dine lasa ando bludo ande bari nevolja, ako či pokajin pe pale pire dela. 23 Thaj mudarava lače čhavren e nasvalipeja. Gajda sasti khandiri džanela kaj sem me Okova savo ispitujiv e manušešće gindimata thaj lesko ilo. Thaj svakonešće tumendar dava prema tumare dela. 24 A akana phenav tumende averende andar e Tijatira, save či inčaren akava sikavipe thaj či pindžardine e Sotonešće gajda akharde bare tajne: či čhav pe tumende nisosko aver tereto. 25 Samo zurale inčaren okova so si tumen dok me či avav. 26 E pobednikošće, savo dži ko krajo čerel okova so zapovedisardem, dava vlast pe thema – 27 "thaj vo vladila pe lende e sastrune rovljasa, thaj phadela len sago e glinaće vasurja." 28 Avela les isto vlast savi me primisardem katar mungro Dad. Thaj dava les vi e čerein Danica. 29 Ašun kana već si tut kan, so o Duho phenel e khandirjende."

3 "E andelešće andar e khandiri ando Sardo ramosar: 'Akava phenel okova saves si ešta Devlešće duhurja thaj ešta čereja: džanav čire dela – ličis sago džudo, ali san mulo. 2 Džungado thaj zurjar okova so ačhilo majsigo nego so vi godova merel. Kaj, čire dela naj dosta lače angle mungro Del. 3 Zato de tut gođi ke okova so primisardan thaj so ašundan. Inčar tut ke godova thaj pokajisar tut. A te či avilan džungado, avava sago čor thaj či džaneja ande savo sato dava pe tute. 4 Ipak, si tut ando Sardo varekazom manuša save či meljarde pire haljine e bilače bućenca. Von phirena manca lačharde ando parnipe, zato kaj si dostojne. 5 Gajda vi pe svako savo pobedil dava parne drže thaj či kosava lesko alav andar o Lil e trajosko, nego lesko alav priznajiva angle mungro Dad thaj angle

lešće andelurja. 6 Ašun kana već si tut kan, so o Duho phenel e khandirjende." 7 "E andelešće andar khandiri ande Filadelfija ramosar: 'Akava phenel okova savo si Sveto thaj Čačo, Okova saves si e čija e carošči Davidešči. So vo putrel, khonik našti te phandavel, thaj so vo phandavel khonik našti te putarel. 8 Džanav čire dela. Ake putardem angle tute o vudar, savo khonik našti phandavel. Kaj, tut si cara snaga, a ipak inčares tut ke mungro sikavipe thaj či odrekisajlan katar mungro alav. 9 Ake, anava varesaven andar e Sotonešči sinagoga save phenen pale peste kaj si Židovurja, ali naj, nego hohaven. Me čerava te aven tute thaj te poklonipe ke čire pungere thaj te hačaren kaj me voliv tut. 10 Thaj zbog godava kaj čhutan mande kan thaj ačhilan istrajno, lava tut sama katar o časo kana e kušnje avena, a avena po sasto them, te aven iskušime okola kaj trajin pe phuv. 11 Me avav sigo. Inčar zurale okova so si tut, te khonik či lel čiro venco. 12 E pobedniko čerava te avel stupo ando Hramo mungre Devlesko, thaj vo majbut či inkijela avri andar leste. Pe leste ramosarava o alav mungre Devlesko thaj o alav e gavesko mungre Devlesko, e nevo Jerusalimesko, savo fuljel katar o nebo katar mungro Del. Thaj mungro nevo alav ramosarava pe leste. 13 Ašun kana već si tut kan, so o Duho phenel e khandirjende." 14 "E andelošće andar e khandiri ande Laodikija ramosar: 'Akava phenel o Amin, o Verno thaj o Čačutno svedoko, savo si gospodari pe sa so o Del stvorisarda: 15 Džanav čire dela: naj san lačo sago kaj si lačo o šudro ili o tato paj. Te aves barem šudro ili tato. 16 Ali pošto san mlako, ni tato ni šudro, čhungarava tut andar o muj. 17 Tu mothos: "Barvalo sem, barvajlem thaj khanči či trubul man", a či dičhes kaj san jadno, bedno, čoro, koro thaj nango. 18 Savetujiv tuće te mandar čines sunakaj pročistime ande jag. Gajda vi čače aveja barvalo. Čin tuće vi parne drže thaj le pe tute te na dičhol čiro ladžavno nandipe! Čin vi pomast pale jakha te maćes len thaj te šaj dičhes. 19 Me koriv thaj barjarav sa okolen saven voliv. Zato av revno thaj pokajisar tut. 20 Ake, ačhav anglo vudar thaj marav. Ko ašunel mungro glaso thaj putrel o vudar, dava leste andre thaj hava lesa thaj vo manca. 21 E pobednikošće dava te bešel manca pe mungro prestolje, sago kaj vi me pobedisardem thaj bešlem mungre Dadeja pe lesko prestolje. 22 Ašun kana već si tut kan, so o Duho phenel e khandirjende!"

4 Pale godova dikhlem, a angle mande sas putardo o vudar po nebo. Thaj ašundem okova isto glaso savo majsigo ašundem kaj mothol mande sago e truba, phendas: "Av akaring opre thaj sikavava tuće so avela pale akava!" 2 Odma lija man o Duho thaj dikhlem po nebo o prestolje

thaj varekas sar bešel pe leste. **3** Okova savo bešelas po prestolje izgledilas sago drago bar o jaspis thaj o sardo, a oko o prestolje sas e duga savi izgledilas sago smaragd. **4** A oko o prestolje sas još biš thaj štar prestolja pe save bešenas biš thaj štar starešine, furjarde ande parne drze thaj sas len sunakune vencurja pe šore. **5** Andar o prestolje inklenas e munje, e gromurja thaj e grmljevina, a anglo prestolje phabonas ehta baklje, godova si e Devlešće ehta duhurja. **6** Anglo prestolje sas vi vareso sago stakleno more, slično sago kristali. Maškare, oko prestolje, sas štar džude bičurja, pherde jakha vi anglal vi palal. **7** Prvo biće sas slično sago o lavo, o dujto po guruv, e trito sas muj sago e manušesko, a o štarto sas sago o orao kana furjal. **8** Svakone katar godola štar bičurja sas po šov phaka. E bičurja sas pherde jakha pe sasto telo. Von o des thaj e rjat neprestalno phenen: "Sveto, sveto, sveto si o Gospod Del, Okova savo sa šaj, savo sas, savo si thaj savo avela." **9** A kana god godola bičurja den slava, čast thaj zahvala Okolešće savo bešel po prestolje, Okolešće savo si džudo pale uvek, (aiōn g165) **10** okola biš thaj štar starešine peren pe kočā e mujesa dži ke phuv angle Okova savo bešel po prestolje thaj klanjinpe Okolešće savo trajil pale uvek. Čhon pire vencurja anglo prestolje thaj phenen: (aiōn g165) **11** "Dostojno san, Gospode Devla amareja, te primis slava, čast thaj moć, kaj tu sa stvorisardan, thaj čire voljasa si sa stvorime thaj sa postanisarda."

5 Askal ando desno vas Okolesko savo bešelas po prestolje dikhlem o svitak savo sas ramome andral thaj avrjal thaj zapečatime ehta pečatenca. **2** Thaj dikhlem moćno anđele sar zurale glasosa objavil: "Ko si dostojno te phadel e pečaturja thaj te putarel o svitak?" **3** Ali, khonik po nebo, ni pe phuv, ni tale phuv našti putarel o svitak thaj te dičhel ande leste. **4** Thaj but rujem zato kaj či arakhla pe khonik dostojno te putarel o svitak thaj te dičhel ande leste. **5** Askal jek katar e starešine phendas mande: "Na te roves. Eke, pobedisardas o Lavo andar e Judasko pleme, o Koren e Davidesko. Vo šaj te phadel e ehta pečaturja thaj te putarel o svitak." **6** Askal dikhlem e Bakhres sago kaj sas dino e čhurjasa sar ačhel anglo prestolje. E štar džude bičurja thaj e starešine sas oko leste. E Bakhres sas ehta šnga thaj ehta jakha, save si e ehta Devlešće duhurja bičhalde pe sasti phuv. **7** Thaj o Bakhro avilo thaj lijas o svitak andar o desno vas Okolesko savo bešel po prestolje. **8** A kana lijas o svitak, okola štar džude bičurja thaj e biš thaj štar starešine peline pe kočā anglo Bakhro e mujesa dži ke phuv. Svakone lendar sas harfa thaj sunakune čare pherde tamjanesa, a godova

si e molitve e Devlešće manušende. **9** Thaj von dilabenas nevi dilji: "Dostojno san te les o svitak, thaj te phades lešće pečaturja, kaj sanas dino čhurjasa thaj čire ratesa čindan e Devlešće manušen, e manušen andar svako plemeno, čhib, them thaj nacija. **10** Tu čerdan lendar carstvo thaj rašaja amare Devlešće, thaj von vladina pe phuv." **11** Askal dikhlem thaj ašundem e glasurja katar e but anđelurja, oko prestolje, oko e bičurja thaj oko starešine. E anđelurja sas e bute miljenca thaj e but milionenca. **12** Dilabenas andar o sasto glaso: "Dostojno si o Bakhro savo si dino čhurjasa te primil moć thaj barvalipe, mudrost thaj sila, čast, slava thaj blagoslov." **13** Askal ašundem sa e stvorenjen po nebo thaj pe phuv, tale phuv thaj so trajil ando more thaj sa so si ande lende sar mothon: "Okolešće kaj bešel po prestolje thaj e Bakhrešće, blagoslov thaj čast thaj slava thaj moć pale uvek!" (aiōn g165) **14** A e štar džude biča phendine: "Amini", a starešune peline e mujesa dži ke phuv thaj poklonisajle.

6 Askal dikhlem sar o Bakhro phadel jek katar e ehta pečaturja thaj ašundem ječe katar okola štar džude bičurja sar phenel e glasosa sago e grmljevina: "Avi!" **2** Askal dikhlem, a angle mande ačhelas parno gras, thaj pe leste o manuš savo inčarel o luko ando vas. Lešće sas dino o venco, thaj vo sago pobedniko đelo te pobedil. **3** Kana o Bakhro phagla o dujto pečato, ašundem sar o dujto džudo biće phenel: "Avi!" **4** Askal pojavisajlo o dujto gras savo sas lolo sar e jag, a okova savo jašilas pe leste dobisarda vlast te lel o miro katar e phuv, te e manuša maškar pende mudaren pe. Dobisarda vi baro mačo. **5** Kana o Bakhro phagla o trito pečato, ašundem e trito džudo biće sar phenel: "Avi!" Askal dikhlem, a angle mande ačhelas kalo gras. O manuš savo jašilas pe leste ando vas inčarelas kantari. **6** Askal ašundem varesavo glaso savo avelas katar godola štar bičurja thaj phenel: "Jek kila div ili trin kile ječmo mola jek dešešči počin. Ali e ulješće thaj e molaće na an štetali!" **7** Kana o Bakhro phagla o štarto pečato, ašundem e štarto džudo biće sar phenel: "Avi!" **8** Dikhlem, a angle mande ačhelas sivo gras. Okova savo jašilas pe leste akhardolas Smrto, a pale leste džalas o them e Mulengo. Lenđe sas dini e vlast pe četvrtina e manuša pe phuv te mudaren e ratova, e bokhasa, e nasvalimasa thaj e divlje životinjenja. (Hadēs g86) **9** Kana o Bakhro phaglas o pančto pečato, dikhlem talo žrtveniko e duše okolende save sas dine čhurjasa pale Devlesko alav thaj palo svedočanstvo savo sas len. **10** Godola duše čhonas muj andar o sasto glaso: "Kozom još, sveto thaj čačutneja Gospodarina, či sudija e manušende save trajin pe phuv thaj osvetis amaro rat?" **11** Thaj svako lendar dobisarda parni

haljina thaj sas lenđe phendo te još cara strpinpe dok či pherdol o broj o lenđe phralengo, e Hristošē slugengo, save trubun te aven mudarde sago vi von. 12 Askal dikhlem sar o Bakhro phadel o šovto pečato. Sas baro potres, o kham kaljilo sago e drze palo žalovanje, a sasto čhonut loljilo sago o rat. 13 E čereja peline katar o nebo pe phuv, sago e zelene smokve kaj peren katar o kaš kana čhinson les e zurale balvaja. 14 O nebo smotisajlo sar o svitak, a sa e planine thaj e ostrvurja pomaknisajle katar piro than. 15 Askal sa e themešče carurja, e vladarja, zapovednikurja, barvale thaj moćnikurja, e roburja thaj okola save si slobodne garadile ande pećine thaj pale stene ande planine. 16 Phenenas e planinende thaj e stenende: "Peren pe amende thaj garaven men katar o muj okolesko savo bešel po prestolje, thaj katar e Bakhrešči bari holji! 17 Kaj avilo o Baro đes lenđe bare holjako, thaj ko šaj ačhela džudo?"

7 Pale godova dikhlem štar anđelen sar ačhen pe štar riga e phuvjači thaj inčaren štar balvaja te ni jek balval či phurdel ni pe phuv ni po more, niti pe varesavo kaš. 2 Askal dikhlem aver anđele sar avel katar o istok. Inđarelas pesa o pečato e džude Devlesko. Vo čhuta muj e zurale glasosa okole štare anđelende savende si dini e vlast te naudin e phuvjače thaj e morešče: 3 "Na naudin e phuvjače, ni e morešče, ni e kaštende, dok amare Devlešče slugen či obeležis e pečateja po čikat!" 4 Askal ašundem o broj okolengo kaj sas obeležime. Sas šel thaj štarvardeš thaj štar milje andar o svako pleme e Izraelošče themesko: 5 Andar e Judasko pleme dešuduj milje obeležime e pečateja, andar e Ruvimosko pleme dešuduj milje, andar e Gadesko pleme dešuduj milje, 6 andar e Asiresko pleme dešuduj milje, andar e Neftalimesko pleme dešuduj milje, andar e Manasijesko pleme dešuduj milje, 7 andar e Simeonesko pleme dešuduj milje, andar e Levijesko pleme dešuduj milje, andar e Isaharesko pleme dešuduj milje, 8 andar e Zavulonesko pleme dešuduj milje, anda e Josifesko pleme dešuduj milje, thaj andar e Venijaminesko pleme dešuduj milje obeležime e pečatesa. 9 Pale godova dikhlem e but manušen, saven khonik našti dinavelas, andar e svako nacija, pleme, them thaj čhib. Ačhenas anglo prestolje thaj anglo Bakhro lačharde ande parne haljine, thaj ande vas indarenas e palmende krandže. 10 Von glasno čhon muj: "O spasenje pripadil amare Devlešče savo bešel po prestolje thaj e Bakhrešče!" 11 A sa e anđelurja ačhenas oko prestolje, oko e starešine thaj oko e štar džude bićurja. Von peline pe koča e mujesa dži ke phuv thaj poklonisajle e Devlešče, 12 thaj mothonas: "Amin! Blagoslov thaj slava, mudrost thaj

zahvalnost, čast, sila thaj snaga, pripadil amare Devlešče pale uvek. Amin!" (aiōn g165) 13 Askal phućla man jek katar o starešina: "Ko si akala save si lačharde ande parne haljine thaj katar avile?" 14 Me phendem lešče: "Tu godova džanes, gospodarina." A vo phendas mande: "Godola si okola kaj avile katar e bari nevolja, thaj save e Bakhrešče ratesa thodine thaj parnjardine pire haljine. 15 Zato ačhen angle Devlesko prestolje thaj đes thaj rjat služin e Devlešče ande lesko Hramo. A okova savo bešel po prestolje trajila maškar lenđe thaj štitila len. 16 Von nikad majbut či avena bokhale thaj trušale, niti phabarela len o kham niti varesavi žega. 17 Kaj, lengo pastiri avela o Bakhro, savo si maškare po prestolje, thaj inđarela len po izvor e džude pajesko. A o Del khosela svako jasvin katar lenđe jakha."

8 Kana o Bakhro phaglas o eftato pečato, po nebo postanisarda tišina oko opaš o sato. 2 Askal dikhlem ešta anđelurja save ačhenas anglo Del. Von dobisardine ešta trube. 3 Askal avilo aver anđelo, inčarelas o sunakuno kadioniko thaj ačhilo anglo žrtveniko. Vo dobisarda but tamnjano te anel les zajedno e molitvenca katar sa e Devlešče svete manuša po sunakuno žrtveniko anglo prestolje. 4 O anđelo inčarelas ando vas o kadioniko andar savo vazdelas pe anglo Del o thuv e tamjanosko zajedno e Devlešče manušende molitvenca. 5 Askal o anđelo lija o kadioniko, pherda les e jagasa katar o žrtveniko, thaj čhuda pe phuv. Pale godova aviline e gromurja thaj e grmljevine, sevinas e munje thaj e phuv čhinosajli. 6 E ešta anđelurja saven sas ešta trube spremisajle te zatrubin. 7 Kana o prvo anđelo zatrubisarda, o ledo thaj e jag hamime e rateja sas čhudine pe phuv, pa e trito kotor e phuvjači, e trito kotor e kaštendi thaj e sasti zeleno čar phabili. 8 Kana o dujto anđelo zatrubisarda vareso sago bari planina savi phabol e jagasa, sas čhudini ando more thaj o trito kotor e morešči pretvorisajli ando rat 9 thaj o trito kotor katar sa so sas džudo ando more mulo a o trito kotor e brodurja sas uništine. 10 Kana zatrubisarda o trito anđelo, andar o nebo peli e bari čerejin, savi phabolas sago e baklja. Voj peli pe trito kotor pe reke thaj pe izvorurja e paješče. 11 A o alav godole čerejako sas Pelen (so značil "Čerko"). Thaj e trito kotor sa e pajesko postanisarda čerko sar o pelen thaj o but o them mulo kaj piline o čerko paj. 12 Kana zatrubisarda o štarto anđelo, vareso pekla ando trito kotor e khamesko, trito kotor e čhonutesko thaj o trito kotor e čerejendi pa pomračisajle pale o trito kotor. O đes hasardas o trito kotor katar piro svetlo, a gajda vi e rjat. 13 Askal dikhlem opre thaj ašundem e orlos sar furjalas vuče dži ko nebo thaj andar o sasto glas o čholas muj: "Jao! Jao! Jao, okolende save trajin pe phuv,

kana ašundola o zvuko e poslednje trubengo katar e trin andelurja save trubun te zatrubin.”

9 Kana zatrubisarda o pančto anđelo, dikhlem e čerein savi katar o nebo peli pe phuv. Laće sas dini e čija katar o prolaz e bezdanosko. (Abyssos g12) **2** Kana putardas o prolaz e bezdanosko, andar o bezdan vazda pe o thuv sago andar o baro bov. O kham thaj o nebo pomračisajle katar o thuv andar o prolaz e bezdanosko. (Abyssos g12) **3** Thaj andar o thuv inklijstine pe phuv e skakavcurja, save dobisardine moć sago kaj si e škorpijen pe phuv. **4** Thaj sas lende naredime te na naškodin e čarjaće pe phuv, niti bilo save aver biljkaće, ni bilo save kaštešće, nego samo e manušenje saven naj e Devlesko pečato po čikat. **5** Ali nas lende dino te mudaren e manušen, nego samo te mučin len pandž čhon. A e muka sas sago e duk kana e manušes pusavel e škorpija. **6** Ande godola đesa e manuša rodена smrto, ali či arachena; kamena te meren, ali o smrto našela lendar. **7** E skakavcurja po izgled sas sago e gras spremne pale borba. Pe šore sas len vareso so izgledilas sago sunakune vencurja, a lende muja sas sago e manušenje muja. **8** Lende bal sas sago kaj si e romnjen, a e danda sago kaj si e lavonen. **9** Pe lende sas oklopurja sago katar o sastri, a o zvuko katar lende phaka sas sago o zvuko e bute vordonengo thaj e grastengo save sigo prasten ande borba. **10** Pe porja sas len kangro sago kaj si e škorpijen, thaj ande lende sas len moć te naudin e manušenje pandž čhon. **11** Pe lende vladilas o caro, o Anđelo e Bezdanosko, savo pe hebrejsko čhib akhardol Avadon, a pe grčko Apolion (so značil “Uništitelj”). (Abyssos g12) **12** E prvo nevolja nakhli. Ali dik, pale late aven još duj! **13** Kana zatrubisarda o šovto anđelo, ašundem jek glaso sar avelas andar e štar šnga e sunakune žrtveniko savo ačhel anglo Del. **14** Godova glaso phendas e šovto andelešće save sas e truba: “Muk okolen štar andelen save si phangle pe bari reka Euftrat!” **15** Askal sas mukle štar andelurja save sas spremne te baš ande godova sato, đes, čhon thaj brš mudaren e trećina manušen pe sasti phuv. **16** Ašundem kaj o brojto godole vojska si duj šela milionurja vojnijkurja pe grasta. **17** A e grasten thaj e jahačen, saven dikhlem ando viđenje agajda izgledinas: Inđarenas oklopurja: lole sar e jag, tamnovunate thaj galbene sar o sumpor. E šore e grastende sas sago ande lavurja, a andar o muj inkijelas lende e jag o thuv thaj o sumpor. **18** Katar akala trin nevolje – jag, thuv thaj sumpor kaj inkijenas andar lengo muj, sas mudardi trećina manuša pe phuv. **19** O zuralipe akale grastengo sas ande lengo muj thaj ande lende porja. Lende porja sas sago e sapende šore savenca dukavenas e

manušen. **20** Ali aver manuša save nas mudarde katar akaja nevolja, ipak či pokajisajle pale idolurja save čerenas pire vastenca. Von vi majdur klanjinaspe e bilače duhonende thaj e idolende save si cerde katar o sunakaj, katar o rup, katar e bronza, katar o bar, thaj katar o kaš, thaj save našti dićen, našti ašunen thaj našti phiren. **21** Či pokajisajle ni zato kaj mudarenas, ni zato kaj drabarenas, ni zato kaj čerenas bludo, ni zato kaj čerenas.

10 Askal dikhlem još jek aver moćno anđele sar fuljel andar o nebo. Sas furjardo ando oblako, a oko lesko šoro sas e duga. Lesko muj sas sago o kham, a e pungre sago e stuburja katar e jag. **2** Ando vas inčarelas cikno putardo svitak. Vo e desno pungresa ačhilo po more, a e levo pungresa pe phuv, **3** pa andar sasto glaso čhuta muj, sago o lavo kana ričil. A kana čhuta muj, e ehta gromurja putardine o muj te mothon pire glasonenca. **4** A kana putardine o muj te mothon e ehta gromurja, kamlem godova te ramov ali ašundem o glaso andar o nebo savo phendas: “Inčar ande tajna okova so e ehta gromurja phendine. Godova na ramosar!” **5** Askal o anđelo saves dikhlem kaj ačhelas opaš po more opaš pe phuv, vazdas piro desno vas karingal o nebo **6** thaj hala solah okoleja savo trajil pale uvek, savo stvorisarda o nebo thaj sa okova so si ande leste, e phuv thaj sa so si pe late, thaj o more thaj okova so si ande leste: “O Del majbut či odložila. (aiōn g165) **7** Ali kana avela e vrjama te zatrubil o eftato anđelo ande piri truba, askal avela gata e Devlesko tajno plano, savo objavisarda pire slugende e prorokonende.” **8** Askal palem ašundem o isto glaso andar o nebo sar phenel mande: “Dža thaj le o putardo svitak andar o vas e andelosko savo ačhel po more thaj pe phuv.” **9** Đelem dži ko anđelo, thaj phendem lešće te del man godova cikno svitak, a vo phendas mande: “Le les thaj ha les. Ando muj avela tuće guglo sago o medo, ali avel tuće čerko ando di.” **10** Me lijem o svitak andar e andelosko vas thaj halem les. Ando muj sas mande guglo sago o medo, ali kana nakhadem les, sas mande čerko ando di. **11** Askal phendine mande: “Trubul palem te prorokuis e bute themestar thaj e nacijendar, e manušendar save si andar e aver čhibja thaj e but caronendar.”

11 Askal dobisardem trska slično sago rovlji savjava merilaspe, thaj sas mande mothodo: “Ušti, izmerisar e Devlesko Hramo, o žrtveniko thaj dinav okolen kaj poštuin e Devle ande leste. **2** Ali e hramošči avlija savi si avrjal o Hramo, muk thaj na izmerisar, kaj si dini e manušenje save naj Židovurja te uštaven o Sveto gav štarvardeš thaj duj čhon. **3** A me dava moć mungre duje svedokonon te ande

pokajničke drže prorokuin godola milja thaj duj šela thaj šovardeš đesa." 4 Von si duj masline thaj duj čirakurja save ačhen anglo Gospodari e phuvjako. 5 Ako vareko kamel te naudil lenđe, e jag inkjel andar lengo muj thaj hal lenđe dušmajen. Ako vareko kamla te naudil lenđe baš agajda moraš te avel mudardo. 6 Len si moć te phandaven o nebo te na perel o bršnd pale vřjama dok von prorokuin, a si len vi moć te pretvorin o paj ando rat thaj te mućen pe phuv svakojako nevolja kana god godova kamen. 7 A kana završina piro svedočanstvo, lenca zaratila e Zver savi inkjel andar o Bezdan. Vo pobedila len thaj mudarela len. (Abyssos g12) 8 Thaj lenđe mule tela pašljona po trgo e bare gavesko savo simbolično akhardol Sodoma thaj Egipt, kaj sas lengo Gospod vazdino po trušul. 9 Trin tepaš đesa e manuša andar svako them, plemeno, čhib thaj nacija, dičhena lenđe mule tela thaj či dena te aven čhutine ando limori. 10 E manuša kaj trajin pe phuv raduinape thaj veselinape thaj poklone jek avrešće bičhalena zbog e propast okole duje prorokonendi save but mućinas len. 11 Ali, pale trin tepaš đes, dija ande prorokurja e Devlesko Duho e trajosko thaj von uštile pe pire pungre, a e bari dar astarda okola save dičhenas len. 12 Askal e prorokurja ašundine o zuralo glaso andar o nebo, savo phendas lenđe: "Aven akaring opre!" Thaj von po oblako vazdine pe po nebo angle jakha sa e dušmajende. 13 Thaj baš ande godova časo sas o baro zemljotres thaj haradilo o dešto kotor e gavesko. Katar o zemljotres sas mudardo ehta milje manuša. A okola kaj ačhile zurale darajle thaj dine slava e Devlešće savo si po nebo. 14 E dujto nevolja nakhli. Ake, sigio avel e trito. 15 Kana o ehtato andelo zatrubisarda, po nebo ašundile zurale glasu sar mothon: "O carstvo e themesko si akana carstvo amare Gospodesko thaj lešće Hristosko, thaj vo vladila pale uvek." (aiōn g165) 16 A e biš thaj štar starešine, save bešen pe pire prestolja anglo Del, peline pe koča e mujesa dži ke phuv thaj poklonisajle e Devlešće. 17 Mothonas: "Najs tuće, Gospode Devla, tu savo sa šaj, savo san, thaj savo sanas, kaj lijan čiri bari sila thaj počnisardan te vladis! 18 E thema but holjajle, ali avili čiri bari holji thaj e vřjama te sudis e mulende, thaj te nagradis čire slugen e prorokonon, čire manušen thaj okolen save daran tutar, e ciknen thaj e baren thaj te uništis okola save upropastin e phuv!" 19 Askal putajlo e Devlesko Hramo ando nebo, thaj ande leste sikadilo Kovčeg lešće savezosko. Askal bašle e munje, ašundine pe e gromurja thaj e grmljavina, avilo o zemljotres thaj počnisarda te perel o baro ledo.

12 Po nebo pojavisajlo baro znako: manušnji lačhardi ando kham, tale laće pungre sas o čhonut, a pe lako šoro o venco katar e dešuduj čereja. 2 Sas khamni thaj čholas muj katar e bijandipešće muke, thaj mućilaspe te bijanel. 3 Askal po nebo pojavisajlo aver znako: Aždaja, bari, loli sago jag. Sas lat ehta šore thaj deš šnga, a pe laće šore ehta krune. 4 Pire porjava voj crdas o trito kotor čereja katar o nebo thaj čhuda len pe phuv. Askal ačhili paše manušnji savi trubuja te bijanel, te hal laće čhavre kana bijanela. 5 E manušnji bijandas muško čhavre, savo vladila pe sa e thema e sastrune rovljasa. Ali o čhavro sas lino ko Del thaj ke lesko prestolje, 6 a e manušnji našli ande pustinja, po than savo o Del pripremisaarda pale late, te okote vodina e briga pale late milja duj šela thaj šovardeš đes. 7 Askal po nebo nastanisarda o rato. O Mihailo zaratisarda protiv e Aždaja pire andelenca. A e Aždaja zaratisarda pire andelenca protiv o Mihailo, 8 ali našti izdržisarda thaj hasarda piro than po nebo. 9 Gajda sas čhudini e bari Aždaja, o purano Sap, savo akhardol beng thaj Satana, savo sasto them andas ande zabluda. Sas čhudino pe phuv, a lasa vi laće andelurja. 10 Askal ašundem o zuralo glaso po nebo sar phenel: "Akana areslo o spasenje thaj sila thaj o carstvo amare Devlesko. Lesko Mesija sikada piri vlast kaj, čhudino si okova savo prl amare phralen. Vo prlas len o đes thaj e rjat angle amaro Del. 11 Von pobedisardine les e Bakhrešće ratesa thaj e alavenca katar piro svedočanstvo. Thaj uesto te volin o trajo, von izabirisardine o smrto. 12 Zato raduin tumen e nebesa thaj vi tumen save trajin pe lende. A teško tumende e phuvjaće thaj e morešće, kaj o beng fuljisto tumende e bare holjasa, zato kaj džanel kaj ačhilo lešće još cara vřjama." 13 Kana e Aždaja dikhla kaj si čhudini pe phuv, teljarda te progonil e manušnja savi bijanda muško čhavre. 14 Ali e manušnji dobisarda duj phaka e bare orlošće gajda te šaj furjal ande pustinja kaj si laće pripremimo o than dur katar o Sap kaj vodina e briga pale late trin thaj epaš brš. 15 Askal o Sap mukla andar o muj sago e reka o paj pale manušnji te e reka indarel lat. 16 Ali e phuv pomognisardas e manušnjaje gajda kaj putardas piro muj, thaj nakhadas e reka savi e Aždaja mukla andar piro muj. 17 E Aždaja holjajli pe manušnji thaj đeli te ratuil protiv laće potomkurja save ačhiline. Godova si okola save inčaren e Devlešće zapovedi thaj svedočin palo Isus.

13 Thaj e Aždaja ačhili pe obala e morešći. Askal dikhlem sar andar o more inkjel e Zver. Sas lat deš šnga thaj ehta šore, a pe šnga sas lat deš krune thaj pe svako lako šoro sas alav savo vřđolas e Devle. 2 E Zver savja dikhlem ličilas po leopard, a laće pungre sas sago kaj si e medvedo,

a o muj lako sago kaj si e lavo. E Aždaja dija lat piri sila, piro prestolje, thaj bari vlast. 3 Jek lako šoro sas sago kaj sas dino čhurjasa, ali laći smrtno rana sastili. Thaj o sasto them divilas pe thaj džalas pale Zver, 4 thaj klanjinaspes e Aždajace kaj dija e Zverka vlast. A klanjinaspes vi e Zverkaće, thaj mothonas: "Ko si sago e Zver?" thaj: "Ko šaj ratujil protiv late thaj te pobedil lat?" 5 E Zverkaće sas muklo te mothol ohole thaj uvredne alava protiv o Del. Dini si laće e vlast te čerel godova štarvardeš thaj duj čhon. 6 Thaj askal putardas o muj te vredol e Devles, te vredol lesko alav, lesko prebivalište thaj okolen kaj trajin ando nebo. 7 Thaj sas laće muklo te ratujil protiv e Devlešće manuša thaj te pobedil len, a dobisardas vi vlast pe svako pleme, them, čhib thaj nacija. 8 Klanjinape laće sa e manuša save trajin pe phuv, kašće alava naj ramome ando Lil e trajosko savi pripadil e Bakhrešće savo sas dino e čhurjasa katar o postanko e themesko. 9 Ašun kana več si tut kan! 10 Ko si odredime palo robstvo, ando robstvo džala. Ko si odredime te avel mudardo katar o mačo, katar o mačo avela mudardo. Akava e Devlešće manušendar rodel te aven istraine ando paćipe. 11 Askal dikhlem e dujto Zver sar inkjel andar e phuv. Sas lat duj šnga sago e bakhres, ali čerelas svato sago e Aždaja. 12 Akaja Zver izvršilas sa e vlast katar e prvo zver ande lako alav thaj prisilisarda e phuv thaj okolen kaj trajin pe late te klanjipe e prvo Zverkaće, kolaće savjaće e smrtno rana sastili. 13 Čerelas bare čudurja – čak vi e jag mućelas katar o nebo pe phuv angle jakha sa e manušenje. 14 Zavodilas e manušen save trajin pe phuv e čudenca save sas laće dine te čerel ando alav e prvo Zverkako. Phendas e manušenje save trajin pe phuv te čeren kipo katar okoja Zver savja sas smrtno rana katar o mačo thaj savi džudili. 15 Sas laće dino te phurdel o trajo ando kipo e Zverkako, te šaj čerel svato thaj zapovedisardas te mudaren sa okolen save či klanjinaspes e kipošće. 16 A čerda vi godova te savora, e cikne thaj e bare, e barvale thaj e čore, e slobodne thaj roburja, primin žigo po desno vas ili po čakat, 17 gajda te khonik našti činel thaj bićinel, ako najles žigo e alavesa katar e prvo Zver ili o brojo laće alavesko. 18 Akate trubul mudrost. Ko si godaver neka đinavel o brojo e Zverkako, kaj godova si brojo e manušesko. A o brojo si 666.

14 Askal dikhlem thaj dik, e Bakhres sar ačhel pe Sionsko gora thaj lesa 144.000 okola savende po čakat ramolas lesko alav thaj o alav lešće Dadesko. 2 Ašundem o glaso andar o nebo sago e buka katar e bare morske talasurja ili e bare gromovengo. Godova glaso sas isto gajda sago vi kana e svirača đilaben ande pire harfe. 3 Thaj đilabenas nevi

đilji anglo prestolje thaj angle štar džude bićurja thaj angle starešine. Thaj khonikal našti sićilo godoja nevi đilji osim okola 144.000 otkupime katar e phuv. 4 Godova si okola save či meljardine pe e romnjenca nego ačhiline čiste. Von džan palo Bakhro kajgod vo džal. Otkupime si maškar aver manuša sago prvencurja e Devlešće thaj e Bakhrešće. 5 Von nikad či hohadine. Von si bi manako. 6 Askal dikhlem još ječe anđele sar furjal vuće dži ko nebo. Inđarelas e večno laćhi nevimate te objavil lat okolende save trajin pe phuv, sa e naciende, plemenende, čhibjende thaj e themende. (aiōnios g166) 7 E bare glasosa phendas: "Daran e Devlestar thaj den les slava, kaj avilo o čas lešće Sudosko! Slavin Okoles savo stvorisarda o nebo, e phuv, o more thaj e izvore e paješće!" 8 A jek aver anđelo avilo pale leste thaj phendas: "Pelas! Pelas o baro gav o Vavilon, savo sa e themen matarda molasa e holjasa thaj pire bludosa!" 9 Pale leste avilo vi o trito anđelo thaj e bare glasosa phendas: "Ko poklonil pes angle Zver thaj lako liko, thaj primil o žigo pe piro čakat ili vas, 10 vo pijela mol e Devlešće bare holjaći savi naj razblažime ando tahtaj lešće holjaći, pa avela mućime e jagasa thaj e sumporosa angle svete anđelurja thaj anglo Bakhro. 11 Thaj o thuv lende mukengo, vazdela pe pale uvek, thaj či avela miro ni o đes ni e rjat okolen save pokloninpe angle Zver thaj lako kipo thaj okola save primin o žigo laće alavesa." (aiōn g165) 12 Akava rodel te e Devlešće manuša, okola save inđaren e Devlešće zapovedi, trubun te aven ustrajne thaj ačhen verne e Isusešće. 13 Askal ašundem o glaso andar o nebo savo phenel mande: "Ramosar: 'Blago okolende save katar akana meren ando Gospod!'" "Gajda si", phenel o Duho. "Von odmorina pe katar piro trudo, kaj lende dela svedočina pale lende." 14 Askal dikhlem angle mande thaj lijem sama o parno oblako. Po oblako bešelas vareko slično sago o Čhavo e Manušesko. Po šoro sas les sunakuno venco, a ando vas oštro srpo. 15 Askal andar o Hramo inklijsto jek aver anđelo thaj andar o sasto glaso čhuta muj okolešće savo bešelas po oblako: "Le čiro srpo thaj čide o plodo, kaj avili e vrjama pale žetva. Paći si e phuvjaći žetva." 16 Thaj okova savo bešelas po oblako zamahnisardas pire srposa karingal e phuv thaj čida o plodo katar e phuv. 17 Još jek anđelo inklijsto andar o Hramo po nebo thaj vi les sas oštro srpo. 18 A katar o žrtveniko avilo jek aver anđelo – okova saves si vlast pe jag – thaj andar o sasto glaso čhuta muj okole anđelošće e oštro srposa: "Zamahnisar čire oštro srposa thaj čide e drak katar e phuvjako o čakot, kaj e drak si paći." 19 O anđelo zamahnisarda e srposa pe phuv thaj čides e čakotosko plodo thaj e drak čudas ande bari presa katar e Devlešći holji. 20 Thaj e drak ande presa sas

izgnječime avrjal o gav, thaj andar e presa poteknisarda o rat lungo varekaj dži ke trin šela kilometerja thaj vučo dži ke jek thaj epaš meterja.

15 Askal dikhlem aver baro thaj čudesno znako ando nebo: eŧa anđelen e eŧa poslednje nevoljenca – poslednje, kaj lenca završilpe e Devlešči bari holji. **2** Thaj dikhlem vareso sago more katar e stakla, hamime e jagasa, thaj okote okolen kaj pobedisardine e Zver, lako kipo thaj o broj o laće alavesko. Ačhenas pašo more katar e stakla thaj inčarenas e harfe save o Del dija len. **3** Ćilabenas e Ćilji e Mojsiješči savo si sluga e Devlesko, thaj e bakhrešči Ćilji: “Bare si thaj čudesne Ćire dela, Gospode Devla, tu savo sa šaj, pravedne si thaj ispravne Ćire droma, Carona e themengo. **4** Ko te na daral tutar, Gospode thaj te na slavil Ćiro alav? Tu san jedino sveto. Sa e thema avena thaj dena koča angle tute, kaj sikadan Ćire pravedne dela.” **5** Pale akava dikhlem sar ando nebo putajlo o Hramo, o Šator svedočanstva. **6** Andar o Hramo inklijstine eŧa anđelurja e eŧa nevoljenca. Sas lačharde ando blistavo parno thaj čisto lano, thaj sas opasime e sunakune pojasenca dži ko kolin. **7** Askal jek katar e štar džude bićurja dija e eŧa anđelen eŧa sunakune čare save sas pherde bare holjava katar o Del, savo trajil pale uvek. (aiōn g165) **8** Thaj o Hram pherdilo thuvesa katar e Devlešči slava thaj katar lešće sila, gajda kaj khonik našti delas ando Hramo sa dok nas gata e eŧa nevolje e eŧa anđelendar.

16 Askal andar o Hramo ašundem o baro glaso sar phenel e eŧa anđelende: “Džan thaj Ćhoren pe phuv eŧa čare e Devlešće holjava!” **2** O prvo anđelo Ćelo thaj Ćhordas piro čaro pe phuv. Pe okola manuša, pe save sas o žigo katar e Zver thaj pe okola save denas koča angle lako kipo izbinas e džungale thaj dukhane Ćirurja. **3** Askal o dujto anđelo Ćhordas piro čaro po more. O more pretvorisajlo ando rat slično sago o rat e mulengo thaj sa so sas džudo ando more mulo. **4** Askal o trito anđelo Ćhordas piro čaro pe reke thaj pe izvorurja e paješće, thaj von pretvorisajle ando rat. **5** Askal ašundem e anđele save sas vlast pe paja sar phenel: “Pravedno san thaj sveto, tu savo san thaj savo sanas, kaj gajda presudisardan. **6** Kaj, von Ćhordine o rat e svete manušengo thaj e prorokonengo, pa dijan len te pijen o rat, sago kaj vi zaslužisardine!” **7** Askal ašundem o žrtveniko sar phenel: “Ej, Gospode Devla, tu savo sa šaj, Ćire presude si čače thaj pravedne!” **8** O štarto anđelo Ćhordas piro čaro po kham, savešće sas muklino te phabarel e manušen e jagasa. **9** O baro tatipe phabarelas e manušen, pa von denas romaja o alav e Devlesko, saves sas vlast pe akala

nevolje, ali Ći pokajisajle niti dine les slava. **10** Askal o pančo anđelo Ćhordas piro čaro po prestolje katar e Zver, thaj lako carstvo učarda e tama. E manuša e dukhatar dindalenas pire Ćhibja. **11** Thaj denas romaja e nebešće Devle zbog e dukha thaj e Ćirurja, ali Ći pokajisajle pale pire delurja. **12** Askal o šovto anđelo Ćhordas piro čaro pe bari reka savi akhardol Euftrat thaj lako paj šučilo, te pripremil pe o drom te načhen e carurja katar o istoko. **13** Askal dikhlem sar andar o muj e Aždajako, andar o muj e Zverkako, thaj andar o muj e Hohamne prorokosko, inkljen trin bilače duhurja, sago e žambe. **14** Akava si e bilače duhurja demonurja saven si moć te Ćeren Ćidurja, a teljardine ke carurja e saste themešće te Ćiden len pale bitka po Baro đes e Devlesko savo sa šaj. **15** (A o Isus phenel:) “Ake avav iznenada sago o Ćor! Blago okolešće savo si džungado thaj lel sama pe pire drze, sar Ći đelosas nango thaj te aver Ći dičhen lesko lađžavo.” **16** E bilače duhurja askal andine sa e caronen po than savo pe hebrejsko Ćhib akhardol Armagedon. **17** Askal o eftato anđelo Ćhordas piro čaro ando vazduh, a andar o Hramo, katar o prestolje, avilo o snažno glaso savo phendas: “Gata si!” **18** Askal pojavisajle e munje, e gromurja thaj e grmljevina thaj o bare potres. Godova sas o majbaro potres savo sas sar si e manuša pe phuv! **19** O baro gav pharadilo pe trin delurja, a e gava e themende raspadnisajle. O Del dija pe godi ko baro Vavilon, pa dijale o tahtaj pherdo mol savi sas lešči bari holji. **20** Sa e ostrvurja nestanisardine thaj ni jek planina Ći ačhili. **21** Askal pe manuša andar o nebo pelo o baro ledo, thaj svako kotor sas varekaj katar štarvardeš kile. E manuša denas romaja e Devle zbog e nevolja katar o ledo, kaj sas lende bare muke.

17 Askal avilo jek katar e eŧa anđelurja saven sas eŧa čare, thaj phendas mande: “Av te sikavav tuće sar avela kaznime e Bari bludnica, savi bešel pe but paja. **2** Lasa e phuvjaće carurja denas pe ando bludo, a e manuša kaj trajin pe phuv matonas katar e mol laće bludostar.” **3** Askal o anđelo ando Duho inđarda man ande pustinja, kaj dikhlem jeće manušnja sar bešel pe loli Zver. E Zver sas pherdi bogohulne titule. Sas lat eŧa šore thaj deš šnga. **4** E manušnji sas lačhardi ande grimizne thaj lole drze thaj sas okitime e sunakajesa, e drage barenca thaj e biserenca. Ando vas sas lat sunakuno tahtaj pherdo odvratno bilačipe thaj melalipe pire bludosko, **5** a po Ćikat sas laće ramome alav save si tajno značenje: O BARO VAVILON, DEJ SA E BLUDNIĆENDE, THAJ E ODVRATNO BILAČIPEŠĆE PE PHUV. **6** Dikhlem kaj si e manušnji mati katar o rat e Devlešće manušengo thaj katar o rat e

Isusešče svedokengo. Kana dikhlem lat, but začudisajlem. 7 A o anđelo phučla man: "Sošče čudis tut? Me phenava tuče so si o tajno značenje pale manušnji thaj pale Zver e eŧa šorenca thaj deš šngenca pe savi e manušnji jašil. 8 E Zver savja dikhlan, varekana sas, a akana naj, palem inkjljela andar o bezdan thaj džala ando propast. E manuša kaj trajin pe phuv saveŋde alava naj katar o postanko e themesko ramome ando Lil e trajosko začudinape kana dičhena e Zver, savi varekana sas a akana naj, ali avela. (Abyssos g12) 9 Akate trubul mudro godi. Eŧa šore si eŧa bregurja pe save bešel e manušnji. A godola si takoder vi eŧa carurja 10 – pandž več peline, jek vladil, a o dujto još či avilo, a kana avela, trubul samo cara te ačhel. 11 E Zver savi varekana sas, a akana naj, si ohtoto caro; voj si jek katar e eŧa carurja thaj džal ando propast. 12 E deš šnga save dikhlan, deš si carurja, save još či vladin, ali dobina carsko vlast te vladin e Zverkava pe jek sato. 13 Len si jek ciljo: te piri sila thaj vlast den e Zverkače. 14 Ratuina protiv o Bakhro, ali o Bakhro pobedila len, kaj si vo Gospodari pe gospodarja thaj Caro pe carurja, a lesa avena lešče akharde, losarde, thaj verne." 15 Askal o anđelo phendas mande: "E paja save dikhlan, pe save bešel e Bludnica, godola si e but e thema, manuša, nacije thaj čhibja. 16 A okola deš šnga save dikhlan thaj e Zver – von mrzana e Bludnica. Opustošina lat thaj mučena lat nandi, hana lako mas thaj dena lat jag. 17 Kaj o Del čhuta lenđe ando ilo te izvršin lesko naum: te sa aven složne thaj te predain piri carsko vlast e Zverkače, dok či pherdon e Devlešče alava. 18 A e manušnja savja dikhlan, voj si o baro gav savo vladil pe phuvjače carurja."

18 Pale godova dikhlem jek aver anđele sar fuljel andar o nebo. Sas les bari vlast, a lesko sjajo rasvetlilas e phuv. 2 Askal o anđelo čhuta muj e bare glasosa: "Pelas, pelas o baro gav o Vavilon! Postanisarda than e demonengo, sklonište sa e bilačhe duhonengo, thaj sklonište pale sa nečiste thaj odvratne čiriklja. 3 Kaj sa e thema piline e mol katar lači holjasa thaj lako bludo. E phuvjače carurja dine pe lava ando bludo, a e phuvjače trgovcurja barvajle katar lako baro raskoš." 4 Askal ašundem varesavo aver glaso andar o nebo savo phendas: "Inkljen andar late, mungre manušalen, te na sudeluin lasa ande lako bezeh thaj gajda či aresela tumen e nevolje save aven pe late. 5 Kaj, lače bezeha čidine pe dži ko nebo thaj o Del dija pe godi ke lako bilačhipe. 6 Bolden lače isto mera, bolden lače duj drom majbut pale okova so čerda. Ando tahtaj, ande savo voj čhordas averende, čhon lače duvar majzurali mol. 7 Den lat muke thaj žalost gadiči kozom voj dijas pešče slava thaj

raskoš! Kaj voj gindil ande peste: 'Bešav pe mungro prestolje sago carica. Naj sem udovica thaj nikad či tugujiva.' 8 Zato ande jek deš areseŋa lat akala nevolje: o smrto, e tuga thaj e bok. Thaj avela dini jag e bare jagasa, kaj si močno o Gospod Del savo sudil lače. 9 E phuvjače carurja, save lava dine pe lava ando bludo thaj raskošno trajinas, rovena thaj zakukina pe late kana dičhena o thuv katar e bari jag ande savi voj phabol. 10 Pherde dar katar lače muke, ačhena majdur thaj phenena: 'Jao! Jao, bare gaveja Vavilona, močno gaveja! Ande jek čas o aresla tut e osuda!' 11 A e phuvjače trgovcurja rovena thaj tugujina pale late, kaj khonik majbut či činel lendi roba. 12 A lendi roba si sunakaj, rup, drago bara thaj biserja, pohtan katar o fino lano, grimiz, svila thaj lolo, svako vrsta mirisne kaš thaj e predmeturja katar e slonovača, sa e predmeturja katar o kuč o kaš, katar e bronza, o sastri, thaj o mermer, 13 o cimet, začin, miomiris, mirisno ulje, tamnjan, mol, maslinovo ulje, parno aro, div, guruva thaj bakhre, gras thaj kočije, roburja, thaj e manušende duše. 14 Sa o raskoš pale savo žudisardan nestanisardas. Sa čiro raskoš thaj čo sjajo hasajle thaj nikada majbut či boldena pes. 15 E trgovcurja save trguinas sa akaleja, thaj save zbog late barvajle, ačhena dur pherde dar katar lače muke, rovena thaj tugujina. 16 Thaj phenena: 'Jao! Jao, bare gaveja! Sanas lačhardo ando fino lano, grimiz thaj lolo, thaj ukasime e sunakajesa, drago baresa thaj e biserenca! 17 Sa godova barvalipe sas uništine ande jek čas!' Askal sa e brodošče kapetanurja thaj e putnikurja, e mornarurja thaj sa okola save trajin katar o more ačhile dur katar o gav. 18 A kana dikhline o thuv katar e bari jag ande savi phabolas, čhutine muj: 'Savo gav sas gajda baro?' 19 Askal čhudine o praho pe piro šoro thaj počnisardine te roven thaj tugujin. Čhonas muj: 'Jao! Jao, e bare gavešče! Savora saven sas brodo po more barvajle katar lesko barvalipe! A uništine si samo ande jek čas!' 20 Veselitu pe leste, nebo! Veselin tumen pe leste tumen e Devlešče manušalen, apostolurja thaj prorokurja, kaj o Del kaznisarda les pale okova so čerda tumende!" 21 Askal jek močno anđelo vazdas o bar, baro sago o mlinsko bar, čhuda les ando more thaj phendas: "Gajda avela zurale čhudino o baro gav Vavilon thaj zauvek nestanila! 22 Nikada majbut više ande tute či avela svirača, či ašundola o glaso e harfako, e flautako ni e trubako. Nikada majbut ande tute či avela zanatlje pale bilo savo zanato! Nikada majbut ande tute či ašundola o zvuko e mlinosko. 23 Nikada majbut ande tute či zasvetila e svetiljka! Nikada majbut ande tute či ašundola o glaso e džamutresko thaj e borjako. Kaj, čire trgovcurja gospodarinas e phuvjasa thaj čire čirimateŋca sas hohade sa e thema. 24 Ande akava gav si arakhlo o rat e

prorokonengo thaj e Devlešče manušengo thaj savorengo save si dine čhurjasa pe phuv.”

19 Pale godova ašundem vareso sago baro glaso e bute dženengo po nebo. Čhonas muj: “Aliluja! O spasenje, e slava thaj e sila pripadil amare Devlešče, 2 kaj si lešče presude čačutne thaj pravedne. Vo osudisardas e Bare bludnica, savi rumusardas e phuv pire bludosa, thaj pe late osvetisardas o rat pire slugengo saven voj mudarda.” 3 Thaj još phendine: “Aliluja! O thuv katar lako uništenje vazdel pe pale uvek!” (aiōn g165) 4 Askal e biš thaj štar starešine, thaj e štar džude bičurja peline pe koča thaj poklonisajle e Devlešče, savo bešelasa po prestolje, thaj mothonas: “Amin, Aliluja!” 5 A katar o prestolje avilo o glaso savo phendas: “Hvalin amare Devles, savora tumen save sen lešče sluge, save daran lestar, e cikne thaj e bare!” 6 Askal ašundem vareso sago glaso e bute dženengo thaj sago e buka katar e bare morske talasurja thaj sago zvuko e zurale gromonengo sar mothol: “Aliluja! O Gospod, amaro Del vladil, savo sa šaj! 7 Radui men thaj veselimen, thaj e slava das lešče. Kaj avile svaturja e Bakhrešče, thaj e Nevesta lešči si spremno. 8 Dine si lače čiste thaj blistavo parne drže katar o lano te lel pe peste.” A o lano prestavil e pravedne dela e Devlešče manušengo. 9 Askal o anđelo phendas mande: “Ramosar: ‘Blago okolende save si akharde pe Bakhrešče svaturja!’” Thaj još phendas: “Akala si čače e Devlešče alava.” 10 Pelem pe koča dži ke lešče pungre te poklonima lešče, a vo phendas mande: “Na čer godova! Vi sem samo sluga sago vi tu thaj čire phral save svedočin pale piro pačipe ando Isus. E Devlešče pokloni tut. Kaj okola save svedočin palo Isus si len proroko duho.” 11 Askal dikhlem putardo o nebo thaj okote parne graste! Okova kaj jašilas po gras akhardolas “Verno thaj Čačutno”. Vo ande pravda sudil thaj ratuil. 12 Lešče jakha si sago o jagalo plameno, a pe lesko šoro si but krune. Les si ramome alav savo khonik či džanel osim vo. 13 Lačhardo si ando ogrtači natopime e rateja, a vo akhardol: Alav e Devlesko. 14 Pala leste džanas e nebeske vojske pe parne grasta, lačharde ando blistavo parno thaj čisto lano. 15 Andar lesko muj inkljel o oštro mačo saveja dela dab e themen. Vladila pe lende sastrune rovljasa thaj uštavela e drak ande presa e zurale molasa savi si bari holji e Devlešči savo sa šaj. 16 Po ogrtači thaj pe butina si lešče ramome alav: CARO PE CARURJA THAJ GOSPODARI PE GOSPODARJA 17 Askal dikhlem ječe anđele savo ačhel po kham thaj andar sa o glaso čhol muj sa e čirikljende save furjan vuče dži ko nebo: “Aven! Čiden tumen pe bari Devlešči gozba, 18 te han o mas katar e

carurja, katar e zapovednikurja, katar e močnikurja, katar e jahača thaj katar lende grasta, thaj mas katar sa manuša – katar e slobodne, katar e roburja, katar e bare thaj cikne manuša!” 19 Askal dikhlem e Zver thaj e phuvjače caronen thaj lende vojniconen sar čidine pe te ratujin protiv o Jahači po gras thaj protiv lešči vojska. 20 Thaj e Zver sas astardi, a lasa vi o Hohamno proroko, savo ande lako alav čerelas čudurja savenca zavodilas okolen kaj primisardine o žigo katar e Zver thaj klanjinaspes lače kipošče. Liduj sas čhudine ando ognjeno jezero kaj phabol o sumpor. (Limnē Pyr g3041 g4442) 21 A okole avren mudarda o mačo savo inkljisto andar o muj e Jahačesko savo sas po gras, thaj sa e čiriklja čaljile lende masestar.

20 Askal dikhlem e anđele sar fuljel andar o nebo. Ande vas sas les čija katar o Bezdan thaj o baro lanco. (Abyssos g12) 2 Vo astardas e Aždaja, e Purane Sapes, savi si o beng thaj o Satana, thaj phangla les ande lancurja pe milja brš, 3 thaj čhuda les ando Bezdan, pa zaključisardas thaj zapečitisardas o vudar, te na majbut zavodil e theme dok či pherdol milja brš. Pale godova avela muklino pe harni vrjama. (Abyssos g12) 4 Thaj dikhlem e prestolja. Pe lende bešenasa okola savende si dini e vlast te sudin. Lijem sama vi e duše okolende savengo šoro sas odrubime kaj svedočinas palo Isus thaj e Devlešči poruka. Von či poklonisajle e Zverkače ni lače kipošče thaj či primisardine lako žigo pe piro čikat ili pe piro vas. Von boldine pe ando trajo thaj caruinas e Hristosa milja brš. 5 A akava si o prvo vaskrsenje. (Ostale mule či džudile, dok či pherdilo milja brš.) 6 Bahtalo si thaj sveto okova savo si učesniko ando prvo vaskrsenje. Pe lende e dujto smrto naj nisošči vlast, nego von avena e Devlešče thaj Hristošče rašaja thaj von vladina leja milja brš. 7 A kana pherdona godola milja brš, o Sotona avela muklino andar piri tamnica, 8 pa inkljela te zavodil e themen katar e štar riga e themešče, e Gogo thaj e Magogo, thaj čidela len palo rato. Avela len gači but sago o pesko po more. 9 E Sotonešči vojska nakhli pe sasti phuv. Okolisarda o tabor kaj sas e Devlešče manuša thaj o voljeno gav. Ali e bari jag fuljisti andar o nebo thaj uništisardas e Sotonešče vojska. 10 Askal o beng, savo hohada len, sas čhudino ande jagako thaj sumporno jezero, kaj si e Zver thaj o Hohamno proroko. Von avena mučime o đes thaj e rjat pale uvek. (aiōn g165, Limnē Pyr g3041 g4442) 11 Askal dikhlem o baro parno prestolje thaj Okoles savo bešel pe leste. O nebo thaj e phuv nestanisardine angle leste bi tragosko. 12 Askal dikhlem e mulen, bare thaj ciknen, sar ačhen anglo prestolje, a e lila putajle. Thaj putajlo jek aver lil – o Lil e trajosko. E mulende


sas sudime prema okova so sas ramome ande lila – prema lende dela. **13** O more predajisardas pire mulen save si ande leste, a o Smrto thaj o Them e mulengo predaisardine pire mulen save si ande lende thaj svakonešće sas sudime preme lende dela. (Hadēs g86) **14** Askal o Smrto thaj o Them e mulengo sas čhudine ande jagako jezero – godova si dujto smrto. (Hadēs g86, Limnē Pyr g3041 g4442) **15** Thaj kasko alav nas ramome ando Lil e trajosko, sas čhudino ande jagako jezero. (Limnē Pyr g3041 g4442)

21 Thaj dikhlem o nevo nebo thaj nevi phuv, kaj o prvo nebo thaj e prvo phuv nakhline, a ni more više naj. **2** Dikhlem vi o Sveto gav, o nevo Jerusalim, sar mučel pe katar o nebo e Devlestar, sas ukrasime sago e bori savi lačharda pe pale piro rom. **3** Askal ašundem o baro glaso katar o prestolje sar mothol: “Ake, e Devlesko šator si e manušenca thaj o Del trajila maškar lende. Von avena lesko them thaj o Del korkoro avela maškar lende thaj avela lengo Del. **4** Vo khosela lende svako jasvin katar e jakha thaj majbut či avela meripe, ni tuga, ni roipe, ni duk, kaj nakhlas okova so sas varekana.” **5** Askal phendas Okova savo bešel po prestolje: “Ake, sa čerav nevo!” Thaj phendas: “Ramosar, kaj akala alava si čačipe thaj šaj pačalpe ande lende.” **6** Thaj još phendas mande: “Gata si! Me sem o Alfa thaj o Omega, Početko thaj Krajo. E trušale manušešće ivja dava te pel katar o izvor e džude pajesko. **7** Okova savo pobedil sa akava nasledila, thaj me avava lesko Del, a vo avela mande mungro čhavo. **8** A okolende kaj si kukavice, bipačivale, rumome, ubice, bludnikurja, vračarja, idolopoklonikurja, thaj sa okola kaj hohaven lengo than si ande jagako jezero kaj phabol o sumpor. Godova si o dujto smrto.” (Limnē Pyr g3041 g4442) **9** Askal avilo jek katar e ehta anđelurja saven si ehta čare pherde ehta poslednje nevolje, thaj phendas mande: “Av, sikavava tuče e borja, e Bakhrešće romnja.” **10** Thaj indarda man ando Duho pe jek bari thaj vuči gora thaj sikadas mande o sveto gav o Jerusalim sar fuljel katar o nebo e Devlestar. **11** Sijolas katar e Devlešći slava, sas blistavo sago majkuč drago bar, blistavo sago kristalno bar jaspis. **12** Sas les bare thaj vuče zidine thaj dešuduj kapije, a pe kapije dešuduj anđelurja thaj ramome alava katar e dešuduje Izraelošće plemenurja. **13** Po istoko sas trin kapije, po sever sas trin kapije, po jugo sas trin kapije, thaj po zapad sas trin kapije. **14** E gavešće zidurja sas sagradime pe dešuduj temeljurja, thaj pe lende sas ramome e alava katar e dešuduj Bakhrešće apostolurja. **15** E anđele savo čerelas manca svato sas sunakuni trska, te izmeril o gav, lešće kapije thaj zidine. **16** O gav sas sagradime pe štar čoškurja – sas lungo kozom sas vi bulo. O anđelo

izmerisadas o gav e trskava, thaj sas lungo duj milje thaj duj šela kilometerja, bulo duj milje thaj duj šela kilometerja, thaj vučo duj milje thaj duj šela kilometerja. **17** O anđelo askal izmerisarda vi e zidine. Sas thule šovardeš thaj šov meterja. O anđelo merilas e merava sago kaj e manuša merin. **18** E zidurja sas sazidome katar o bar jaspis, a o gav katar o čisto sunakaj, slično sago čisto stakla. **19** E temeljurja katar e gavešće zidurja sas ukrasime svakovrsne drage barenca: prvo jaspis, dujto safir, trito kalcedon, štarto smaragd, **20** pančto sardoniks, šovto sard, eftato hrizolit, ohtoto biril, injato topaz, dešto hrizopras, dešujekto hijacint, dešudujto ametist. **21** A e dešuduj kapije sas dešuduj biserja – svako kapija sas čerdi katar jek biseri. O glavno gavesko sokako sas katar o čisto sunakaj prozirno sago stakla. **22** Ando gav či dikhlem nisosko Hramo, kaj lesko Hramo si o Gospod o Del savo sa šaj thaj o Bakhro. **23** Godole gavešće naj potrebno ni kham ni čhonut te osvetlin les, kaj e slava e Devlešći si lesko svetlo, a o Bakhro lešći svetiljka! **24** E thema phirena ande lesko svetlo thaj e phuvjače carurja anena ande leste piri slava. **25** E kapija či phandavelape e đeseja, a rjat okote či avela. **26** Ande leste avela andini e slava thaj e čast e themendi, **27** thaj khanči nečisto či dela ande leste, niti vareko ko čerel vareso odvratno ili so si hohaipe, nego samo okola savengo alav si ramome ando Lil e trajosko savo pripadil e Bakhrešće.

22 Askal o anđelo sikadas mande e reka e pajesa savi del trajo. E reka sas čisto sago o kristali thaj avel katar e Devlesko thaj e Bakhresko prestolje, **2** maškar e gavešće glavne sokača. Pe liduj riga e rekače barjolas o kaš e trajosko, savo bijanel dešuduj plodurja. Vo anel piro plodo svako čhon, a lešće patrija si palo sastipe e themende. **3** Okote či avela nisosko prokletstvo. Ando gav avela e Devlesko thaj e Bakhresko prestolje thaj lešće sluge služina lešće. **4** Dičhena lesko muj thaj lesko alav avela pe lende čikata. **5** Majbut či avela rača thaj či avela lende potrebno e svetiljka ni o svetlost e khamesko, kaj korkoro Gospod Del svetlila lende. Thaj von vladina pale uvek. (aiōn g165) **6** Askal o anđelo phendas mande: “Akala alava si čače thaj šaj pačalpe lende. O Gospod Del, savo del e prorokonende piro Duho, bičhaldas pire anđele te sikavel pire slugende so trubul uskoro te avel.” **7** (A o Isus phenel:) “Ake, avav sigo! Blago okolešće savo inčarel e prorocke alava akale knjigače.” **8** Me, o Jovano, ašundem thaj dikhlem sa akava. A kana ašundem thaj dikhlem, pelem pe koča angle pungere e anđelošće savo sa akava sikada mande, te pokloni man lešće. **9** A vo phendas mande: “Na čer godova! Vi me sem

samo sluga sago vi tu thaj čire phral e prorokurja thaj savora save inđaren e alava akale lilešće. E Devlešće poklonitu!" 10 Askal phendas mande: "Na zapečatisar e proročke alava akale lilešće te či ačhen garade, kaj e vrjama kana akava proroštvo pherdola si paše. 11 Neka o nepravедniko vi majdur čerel nepravda, neka o duhovno melalo vi majdur ačhel duhovno melalo, a ko si pravedno neka vi majdur čerel so si pravedno, thaj ko si sveto neka vi majdur posvetil pe." 12 (A o Isus phenel:) "Ake, avav sigo thaj anav manca e nagrada, te svakonešće počinav prema lešće dela. 13 Me sem Alfa thaj Omega, Prvo thaj Poslednjo, Početko thaj Krajo. 14 Blago okolende save thoven pire drze te avel len pravo te den ando gav kroz o vudar thaj te han katar o kaš e trajosko. 15 A avri ačhena okola save si sago džučhela, e vračarja, e bludnikurja, e ubice, okola save pokloninpe e idolende thaj savora save volin o hohaipe thaj hohaven. 16 Me, o Isus, bičhaldem mungre anđele te svedočil tumende akava pale khandirja. Me sem o Koreno thaj o Potomko e Davidesko, sjajno čerein e Danica." 17 O Duho thaj e bori phenen: "Av!" Thaj ko akava ašunel, neka phenel: "Av!" Ko si trušalo, neka avel, thaj ko kamel, neka lel paj e trajosko ivja. 18 Upozoriv svakone ko ašunel e proročke alava akale lilešće: Ako vareko akalešće vareso nadodail, o Del nadodaila lešće e nevolje pale save si ramome ande akava lil, 19 thaj ako vareko lel vareso katar e alava save si ramome ande akala proročke lila, lestar o Del lela lesko deo katar o kaš e trajosko thaj andar o sveto gav, pale savo si ramome ande akava lil. 20 Okova savo svedočil pale sa akava phenel: "Ej, Me avav sigo!" Amin! Av, Gospode Isuse! 21 Neka e milost e Gospode Isusešći avel savorenca!



Dikhlem vi o Sveto gav, o nevo Jerusolim, sar mučel pe katar o nebo e Devlestar, sas ukrasime sago e bori savi lačharda pe pale piro rom. Askal ašundem o baro glaso katar o prestolje sar mothol: "Ake, e Devlesko šator si e manušenca thaj o Del trajila maškar lende. Von avena lesko them thaj o Del korkoro avela maškar lende thaj avela lengo Del."

Otkrivenje 21:2-3

Reader's Guide

Chergash Romani at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Chergash Romani at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Romani-Vlax---Chergash-Luke/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Luka 8:31
Rimljanende 10:7
Otkrivenje 9:1
Otkrivenje 9:2
Otkrivenje 9:11
Otkrivenje 11:7
Otkrivenje 17:8
Otkrivenje 20:1
Otkrivenje 20:3

aidios

Rimljanende 1:20
Judasko 1:6

aiōn

Matej 12:32
Matej 13:22
Matej 13:39
Matej 13:40
Matej 13:49
Matej 21:19
Matej 24:3
Matej 28:20
Marko 3:29
Marko 4:19
Marko 10:30
Marko 11:14
Luka 1:33
Luka 1:55
Luka 1:70
Luka 16:8
Luka 18:30
Luka 20:34
Luka 20:35
Jovan 4:14
Jovan 6:51
Jovan 6:58
Jovan 8:35
Jovan 8:51
Jovan 8:52
Jovan 9:32
Jovan 10:28
Jovan 11:26
Jovan 12:34
Jovan 13:8
Jovan 14:16

Dela 3:21
Dela 15:18
Rimljanende 1:25
Rimljanende 9:5
Rimljanende 11:36
Rimljanende 12:2
Rimljanende 16:27
1 Korinčanende 1:20
1 Korinčanende 2:6
1 Korinčanende 2:7
1 Korinčanende 2:8
1 Korinčanende 3:18
1 Korinčanende 8:13
1 Korinčanende 10:11
2 Korinčanende 4:4
2 Korinčanende 9:9
2 Korinčanende 11:31
Galačanende 1:4
Galačanende 1:5
Efežanende 1:21
Efežanende 2:2
Efežanende 2:7
Efežanende 3:9
Efežanende 3:11
Efežanende 3:21
Efežanende 6:12
Filipljanende 4:20
Kološanende 1:26
1 Timoteješće 1:17
1 Timoteješće 6:17
2 Timoteješće 4:10
2 Timoteješće 4:18
Titošće 2:12
Jevrejende 1:2
Jevrejende 1:8
Jevrejende 5:6
Jevrejende 6:5
Jevrejende 6:20
Jevrejende 7:17
Jevrejende 7:21
Jevrejende 7:24
Jevrejende 7:28
Jevrejende 9:26
Jevrejende 11:3
Jevrejende 13:8
Jevrejende 13:21
1 Petresko 1:23

1 Petresko 1:25
1 Petresko 4:11
1 Petresko 5:11
2 Petresko 3:18
1 Jovanesko 2:17
2 Jovanesko 1:2
Judasko 1:13
Judasko 1:25
Otkrivenje 1:6
Otkrivenje 1:18
Otkrivenje 4:9
Otkrivenje 4:10
Otkrivenje 5:13
Otkrivenje 7:12
Otkrivenje 10:6
Otkrivenje 11:15
Otkrivenje 14:11
Otkrivenje 15:7
Otkrivenje 19:3
Otkrivenje 20:10
Otkrivenje 22:5

aiōnios

Matej 18:8
Matej 19:16
Matej 19:29
Matej 25:41
Matej 25:46
Marko 3:29
Marko 10:17
Marko 10:30
Luka 10:25
Luka 16:9
Luka 18:18
Luka 18:30
Jovan 3:15
Jovan 3:16
Jovan 3:36
Jovan 4:14
Jovan 4:36
Jovan 5:24
Jovan 5:39
Jovan 6:27
Jovan 6:40
Jovan 6:47
Jovan 6:54
Jovan 6:68

Jovan 10:28
Jovan 12:25
Jovan 12:50
Jovan 17:2
Jovan 17:3
Dela 13:46
Dela 13:48
Rimljanende 2:7
Rimljanende 5:21
Rimljanende 6:22
Rimljanende 6:23
Rimljanende 16:25
Rimljanende 16:26
2 Korinčanende 4:17
2 Korinčanende 4:18
2 Korinčanende 5:1
Galačanende 6:8
2 Solunjanende 1:9
2 Solunjanende 2:16
1 Timoteješće 1:16
1 Timoteješće 6:12
1 Timoteješće 6:16
2 Timoteješće 1:9
2 Timoteješće 2:10
Titošće 1:2
Titošće 3:7
Filemonešće 1:15
Jevrejende 5:9
Jevrejende 6:2
Jevrejende 9:12
Jevrejende 9:14
Jevrejende 9:15
Jevrejende 13:20
1 Petresko 5:10
2 Petresko 1:11
1 Jovanesko 1:2
1 Jovanesko 2:25
1 Jovanesko 3:15
1 Jovanesko 5:11
1 Jovanesko 5:13
1 Jovanesko 5:20
Judasko 1:7
Judasko 1:21
Otkrivenje 14:6

eleēsē

Rimljanende 11:32

Geenna

Matej 5:22
Matej 5:29
Matej 5:30
Matej 10:28
Matej 18:9
Matej 23:15
Matej 23:33
Marko 9:43

Marko 9:45
Marko 9:47
Luka 12:5
Jakovesko 3:6

Hadēs

Matej 11:23
Matej 16:18
Luka 10:15
Luka 16:23
Dela 2:27
Dela 2:31
1 Korinčanende 15:55
Otkrivenje 1:18
Otkrivenje 6:8
Otkrivenje 20:13
Otkrivenje 20:14

Limnē Pyr

Otkrivenje 19:20
Otkrivenje 20:10
Otkrivenje 20:14
Otkrivenje 20:15
Otkrivenje 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Petresko 2:4

Questioned


None yet noted



E pačimava o Avraam kana sas akhardo te džal ando than savo majkasnije primila ando nasledstvo, čuta kan e Devleste thaj teljardas, vi ako či džanelas kaj džal.
- Jevrejende 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Kaj ni me, o Čavo e Manušesko, či avilem te služin mande nego te me služiv averende, thaj te dav mungro trajo sar počin pale e but manuša. - Marko 10:45



Akava lil ramov tumende me, o Pavle, o sluga e Isuse Hristosko, savo sem odvoime te avav apostoli thaj savo sem bičhaldo te propovediv e Devlešči Bahtali nevimata, - Rimljanende 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

Where?			When?							
			Innocence		Fallen				Glory	
			Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth
Who?	God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16			God's Perfectly Restored Fellowship with All Mankind in the Holy City	All Restored Acts 3:21	
		Son			Pre-Incarnate, John 8:58		Incarnate, John 1:14			Paradise, Luke 23:43
		Holy Spirit			Everywhere, Psalm 139:7		Indwelling Believers, John 14:17			
	Mankind	Living Mankind	Serving the Savior or Satan on Earth, Ephesians 2:1-5							
		Deceased Believing Mankind	Blessed in Paradise, Luke 16:22							
		Deceased Unbelieving Mankind	Punished in Hades until the final judgment, Luke 16:23 and Rev 20:13							
	Angels	Holy Angels	No Creation	No Fall No Death Gen 1:31	Serving Mankind at God's Command, Hebrews 1:14					No Hades No Dead
		Imprisoned Angels	No people					Rev 20:3		
		Fugitive Angels	Gen 1:1		No Fall	Imprisoned in Tartarus, 2 Peter 2:4 and Jude 6			Lake of Fire Prepared for the Devil and his Angels	Fallen Angels Forgiven? Col 1:20 Yes?
		First Beast Demon		No Unholy Angels		Rebelling Against Christ		Thalaasa, Rev 20:13		
		False Prophet Demon				Accusing Mankind		Lake of Fire Revelation 19:20		
		Satan		Gen 1:31	1 Peter 5:8 and Revelation 12:10		Abyss Revelation 20:2	Mat 25:41 Rev 20:10		

Destiny

Chergash Romani at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the whole*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Disciple All Nations

Zato džan thaj ćeren sa e themen te aven mungre ućenikurja! Bolen len ando alav e Dadesko thaj e Ćhavesko thaj e Sveto Duhosko, - Matej 28:19